

Polonica



M

14-2 f. 5

THE UNIVERSITY OF CHICAGO

LE MINISTRE
D'ESTAT,
AVEC
LE VERITABLE
VSAGE DE LA
POLITIQUE MODERNE.
SECONDE PARTIE.
Par SILHON.



Me Marie in Paris

in Caninoletto



A PARIS,
Par P. ROCOLET, Impr. & Libr. ordin.
du Roy, au Palais, aux Armes du
Roy, & de la Ville.

M. DC. XLIII.

Avec Privilege de sa Majesté.

Domus L. M. Magdalene Urbis

*Libris Bibliothecae Vaticanae et Regiae Ill. et R. D.
Augustini Francisci Archiepiscopi Turrecensium*

THE STATE OF NEW YORK
IN SENATE
JANUARY 11, 1906.
REPORT
OF THE
COMMISSIONERS OF THE LAND OFFICE.



AV LECTEUR.



LECTEUR, Je te donne la Seconde Partie du Ministre d'Estat, que je t'ay promise il y a long-temps. Surquoy je confesse qu'il n'estoit pas juste que je te fisse languir en l'attente de si peu de chose, & que la bonté avec laquelle tu as receu la Premiere, meritoit bien que je fisse un effort, pour reconnoistre par la prontitude du travail, ce que je ne pouvois payer par l'excellence de l'œuvre. Mais ce qui m'a fait user de remise, & suspendre l'exécution de ma promesse; a esté la condition du temps, & l'estat present des affaires de l'Europe. M'estant proposé d'en traiter, & d'en faire le fondement & la base de mes Raisonnemens; Je

me trouuois aussi empeſché pour l'execution de ce deſſein, que celui qui n'auroit que du ſable mouuant pour baſtir deſſus : & les Reuolutions frequentes & ineſperées que la guerre a perpetuellement produites; m'ont ſouuent fait perdre les viſées que je prenois, & deſrobé le pied que je commençois à donner à mon ouurage. Mais enfin pour deſgager ma parole, j'ay franchy ces mauuais pas, & j'ay coulé entre ces eſcueils, pour arriuer au lieu où je voulois aller, & où j'eſtois attendu par les ſouhaits trop fauorables & trop obligeans de quantité de perſonnes. C'eſt bien plus j'ay fait ſeruir à mon deſſein le malheur du temps & la condition des affaires, & je ſuis entré en vne Carriere que la guerre ſeule me pouuoit ouvrir avec bien-ſeance, & que la paix fermera à ſon auenement, en deſarmant les Eſprits d'aigreur, & en emouſſant auſſi bien la pointe des Plumes, que celle des Armes. L'euffe de bon cœur deſiré que l'Ambition de nos Ennemis euſt eſté moins effrenée, & que tant d'attentats & d'inuaſions qu'ils faiſoient ſur les Eſtats & la Liberté de nos Alliez; n'euffent point laſſé la patience du Roy, ny contraint ce genereux Prince de ſe mettre ſur les rangs, & de courir de ſes

armes ceux qu'il n'auoit pû defendre par ses intercessions & ses offices.

Toutefois puis que le sort en est jetté, & que la Justice a tiré l'espée pour venger les injures, que la raison ny la douceur n'ont seu faire reparer, j'ay creu que ma forme de vie ne me permettant pas de seruir le Roy dans ses Armées, le le deuois seruir d'une autre façon, & qu'il y auoit encore moyen d'incommoder ses Ennemis, sans employer la violence. J'ay creu que la Maison d'Autriche qui est le grand Aduersaire qu'il a en teste, ayant tousiours fait estat d'esleuer la grandeur ou elle aspiroit sur deux Machines LA FORCE & L'ARTIFICE, & cette derniere quoy que plus immaterielle ne laissant pas de remuer quelquefois des fardeaux, & de renuerser des masses qui eussent esté inesbranlables à l'autre; Je ne ferois pas peu si je la pouuois rendre inutile ou moins puissante, & si je pouuois guerir les Esprits des autres Princes & de leurs sujets, de tant d'erreurs dont cette Maison les a preoccupez à son auantage, & rompre les charmes dont elle les tient pris au grand prejudice de la Republique Chrestienne. J'ay creu que pour cét effet la fortune du Roy pourroit peut-estre

Voyez
les Me-
moires
de du
Belley.

inspirer à mes Escripts, la mesme vertu & le mesme bon-heur, qu'eust autrefois un Discours avec lequel Monsieur de Langey changea la creance & les inclinations d'une partie de l'Allemagne; où Charles le Quint avoit donné de si malignes impressions contre son Maistre, qu'à grand' peine y trouua-t'il personne au commencement, qui luy voulût donner audience. Nous ne sommes pas tout à fait en cette peine, & la corruption des sentimens n'est pas si generale; qu'elle estoit alors en ce pays-là. Il y a pourtant bien encore & là & ailleurs des enchantemens à deffaire, & des tenebres à dissiper, qui sont favorables à la Maison d'Autriche. Et c'est à quoy je travaille selon le peu d'intelligence que Dieu m'a donné, & le peu de connoissance que j'ay aquis des choses du monde.

La maniere avec laquelle j'attaque cette Maison, que je reuere d'ailleurs hors l'intérêt du Roy & de ma patrie; ne scauroit estre plus douce sans estre molle: & j'ajouste tant de courtoisie à la guerre que je luy fais; que je ne doute point que plusieurs ne m'acusent de trop de moderation, veu principalement l'impudence & le venin de tant de Libelles que ses Partisans ont

fait voler de tous costez contre le Roy & ses Ministres. Mais l'imitation n'est pas une excuse valable aux mauuaises procedures, & toute sorte de reuanche n'est pas seante aux honnestes gens. Les tesmoignages que je rends aux bonnes qualitez des Princes de cette Maison, & ce qu'il y a de louable en la forme de leur Gouvernement que je ne dissimule point; sont assez voir qu'il n'y a que la verité & l'interest du public, qui m'ont forcé à reueler des defauts qu'il importe au public de connoistre, & dont il seroit à souhaiter que ces Princes eussent esté exempts pour la paix du monde & pour leur propre repos. Il seroit dis-je à souhaiter qu'ils n'eussent point attendu que d'autres eussent mis des bornes à leur ambition, & que pour paruenir aux fins qu'ils s'estoient proposées; Ils n'eussent point employé toute sorte de moyens. Que si nonobstant cela ils sont mal satisfaits de moy, & s'ils entrent en mauuaise humeur contre mon Liure; Je ne le trouueray point estrange, & je sçay fort bien qu'on ne sçauroit manier des blessures sans faire de la douleur, ny publier certaines veritez sans s'aquerir de la hayne.

Comme donc c'est avec quelque sorte de regret

que je me suis porté, à tirer le rideau dont la Maison d'Autriche couure ses defauts, & à designer le plastre dont elle desguise ses taches: L'auoie aussi que c'est avec une joye indicible, que j'ay tasché de représenter la conduite toute contraire du Roy: que c'est avec une satisfaction incroyable, que je rends l'hommage & paye le tribut en sa personne, qui sont deus de droit naturel à l'excellente Vertu, & que ce ne m'est pas une petite complaisance de sentir, que ce petit essay que j'ay fait pour son seruice; vient plus de mon election & du Zele que j'ay pour sa gloire; que d'aucun deuoir precis que la Sujetion apporte. En effet qui ne seroit rany de voir les merueilles, dont brille la vie de ce Prince de quelque costé qu'on la regarde, & qui pourroit se proposer un spectacle plus agreable que celui de son Regne; où la vertu & la fortune semblent disputer à l'enuy, à qui produira de plus belles actions; & à qui fournira de plus grandes recompenses: à qui meritera dauantage, & à qui sçaura reconnoistre plus auantageusement le Merite: à qui s'appliquera à de plus hautes Entreprises; & à qui leur donnera des Euenemens plus heureux?

Ce n'est pas tout, ce Regne qui est en soy si admirable

mirable, & du sein duquel sort tant de lumie-
re qui luy est propre ; reçoit encore un plus grand
lustre, & de nouveaux sujets d'admiration, de
l'opposition du Regne de nos Voysins, & du pa-
rallèle de leurs affaires avec les nostres. C'est sur-
quoy je ne me veux point estendre, ny m'amu-
ser à prouver ce qui n'est point contesté, & qu'on
connoistra mieux dans quelque temps, & apres
que les nuages que la guerre met necessairement
devant nostre felicité, ayant esté chassés ; Elle
se monstrera toute entiere, & avec cette abon-
dance de biens dont la Paix la doit couronner.

Cependant comme apres Dieu le Roy est la
principale source, & le premier principe des mer-
veilles dont nous parlons ; c'est aussi à luy à qui
j'en attribué le premier honneur & la principa-
le gloire. Quoy qu'il s'en reflechisse beaucoup
sur ceux qui ont esté les Instrumens d'un si beau
Regne, & qui ont secondé de leur conseil & de
leur action cet excellent Prince : qui ont aydé à
manier le gouvernail de l'Estat, & à conduire
ce Vaisseau au port glorieux où nous le voyons ;
Je n'ay point voulu descendre à ce particulier,
ny préoccuper l'esprit de personne. Je n'ay point
voulu faire la distribution de cette gloire, ny

oster au Lecteur le droit d'en faire part à qui il voudra, & qu'il en jugera digne. Je luy laisse donc ce droit tout entier, & la liberté de faire ce jugement comme il luy semblera bon. Ce n'est pas que je croye auoir peché contre la justice, quand j'ay usé de ce droit, & que la mesme bonne foy & la mesme sincerité n'ayent aussi bien regné en ce que j'ay escrit par le passé, qu'en ce que j'escris maintenant, & que j'escriray à l'avenir: & c'est le peu de bien qu'il y a dans mes Ouvrages de cette nature, ou au moins celuy dont j'ose me glorifier.

De sorte que ceux-là me font grand tort, qui en ont acusé quelques uns d'intemperance de loüanges, & de complaisance immodérée. Cela est fort contraire à mon humeur, & je veux bien qu'ils sçachent qu'il me seroit aussi peu possible de louer à faux, que de blasmer sans sujet, & de chercher du fard pour ce qui est laid, que de jetter de l'ancre sur un beau visage. Si j'ay escrit, j'ay pensé de mesme: les paroles de dehors ont esté tirées sur celles de l'Amé: la peinture n'a rien presté au sujet qu'elle représente. C'est un procedé que je ne quitteray jamais, & la fortune n'a pas assez d'esperance à me donner,

ny assez de bien à me faire ; pour m'obliger à trahir mes sentimens , & à commettre la plus grande de toutes les laschetes qui est le menfonge. La Posterité parlera bien plus avantageusement que je n'ay fait, des actions que j'ay louées: Les Estrangers encherissent sur tout ce que j'en ay dit, & ceux là mesmes qui s'en allarment & à qui elles font mal à la veüe; en font le mesme iugement que moy: leur conscience s'accorde avec mes paroles: Il n'y a contrarieté qu'au langage.

Si j'ay trompé en la question du fait, & posé des fondemens imaginaires, pour esleuer dessus des Eloges & des Panegyriques; Je confesse que je suis preuaricateur, & que je merite punition. Si j'ay peché contre les Regles du bon sens, & si mes Raisonnemens se trouuent foibles; on m'obligera bien fort de les reformer & de m'instruire. C'est une courtoisie qui n'est pas à rejeter, & un Aueugle seroit bien malheureux, qui refuseroit d'estre guidé par un homme qui auroit bonne veüe. Cette Seconde Partie & la Troisième qui la suiura bien-tost; ouuriront encore un plus beau champ, & fourniront une plus ample matiere, à ceux qui me voudront faire cet-

refaueur. On y trouuera plus de mysteres politiques, & plus profondement touchez qu'en la Premiere, & on y verra des traits plus vifs & plus naturels de cette incomparable Conduite, qui ne receura son juste prix que du temps futur, & de la vieillesse du monde.

Tu excuseras Lecteur, cette petite Apologie, que j'ay creu ne deuoir refuser à la principale & meilleure condition de mes ouurages, qui est la bonne foy. Je viens au particulier de celuy-cy, dont les deux premiers Liures ont pour Tiltre & pour sujet, LE CONSEIL DE GUERRE DV PRINCE. Ce n'est pas que j'aye pretendu d'y expliquer les preceptes de l'Art militaire, ny d'y monstrier l'ordre d'un siege & d'une bataille. Cela n'est ny de ma profession ny de ma force. Mon dessein a seulement esté, d'y donner quelques notions & quelques lumieres, dont ceux qui aspirent à l'honneur d'estre du Conseil du Prince doiuent estre munis, pour y pouuoir opiner sur la plus jalouse de toutes les actions humaines, & la plus importante de toutes les affaires Politiques, qui est la Guerre. Il est certain que puis qu'on n'est pas appellé à l'exercice de la Iustice qui se distribue aux

particuliers, & sur tout de la Criminelle, sans estude precedente, & sans suffisance esprouvée; On ne doit pas à plus forte raison monter temerairement & sans preparation; à ce severe & redoutable Tribunal de la justice que le Prince se fait à luy-mesme, & qu'il doit exercer contre les autres Princes; de ce Tribunal dis-je où l'on ne scauroit resoudre vne guerre, sans donner un Arrest de mort contre vne infinité de personnes innocentes, qui sont obligées de perir pour les querelles justes ou injustes de leurs Maistres.

Je passe de là au Troisième Liure, & y descens dans cet ordre. Supposant que les Armes du Prince ne scauroient auoir de plus juste employ, que de purger l'Estat de guerres Ciuiles, & d'en destourner celles que les Estrangers y pourroient porter: & apres auoir designé que le Roy a tary la grande source des troubles de son Royaume, en supprimant la Faction Huguenote; Je monstre qu'il a desconcerté le grand dessein de la Monarchie de la Maison d'Austriche, sous lequel estoit necessairement enue-
loppée la ruine de la France. Apres ces deux merueilleux Euenemens; Je pense qu'on ne scauroit

rien dire de si avantageux de ce Prince, qui ne soit au dessous de cette gloire, & que la Rhétorique n'a point de figure, ny l'Art des Sophistes de hardiesse, qui puisse esgaler la grandeur de ces deux succez.

Or d'autant que le dessein de cette pretendüe Monarchie, que tant de personnes & depuis si long-temps attribuent à la Maison d'Autriche; passe dans l'esprit de quelques uns pour une inuention & pour une fable; Je me suis resolu de tirer cette verité des tenebres où elle estoit cachée, & d'esclairer la creance des Princes & des Nations, des lumieres que l'Histoire nous en fournit, & de ce qui en resulte de concluant des desseins & des entreprises des Princes de cette Maison. En quoy j'ay essayé de leur rendre le plus d'honneur qu'il m'a esté possible, les faisant agir le plus raisonnablement que j'ay pû, en l'assortissement & proportion des moyens avec les fins qu'ils ont eües. Car au reste tout le monde juge bien que je n'ay point esté du Conseil de Ferdinand, ny de celui de Charles le Quint & de ses autres descendans.

J'ay encore Lecteur à te dire deux ou trois choses auant que de finir, qu'il m'importe que

tu sçaches. La premiere est qu'en parlant du
Soulèvement des Catalans , & particuliere-
ment de celuy des Portugais qui en est vne suite ;
Il semble que je m'y pique de presage , & que
j'y fasse le Prophete des choses passées. A quoy
je respons que j'ay bien preuenu qu'on me pour-
roit objecter cela , & que je n'eusse point esté si
hardy de m'exposer à cette attaque , si plusieurs
personnes de grande condition & de grand me-
rite ; n'eussent veu les mesmes choses en un Dis-
cours que je fis dès le commencement & comme
à l'apparition de cette occurrence , & auant
que les Portugais se fussent destachez de la do-
mination d'Espagne . La seconde chose est , que
les Estrangers se pourroient peut-estre formali-
ser, de ce que je touche quelquefois quelque de-
faut de ceux de leur Nation , & que j'en des-
couure quelque tache. Mais je m'assure qu'ils
se satisferont aisement , s'ils considerent que ce
n'est ny par esprit de mépris ny par mouuement
de hayne , & que la maniere avec laquelle je
les traite ; n'est pas differente de celle avec la-
quelle je traite ma Patrie ; dont je ne cache point
les defauts , ny ne supprime les taches , quand
la verité & la necessité du discours m'obligent

à les exposer & à les produire. La troisième chose est, que dans les Narrations que je fais, il s'est coulé une fausse datte, qui est celle du Traité de Smalchalde, & peut-estre d'autres Anacronismes qui ne sont d'aucune importance pour mon dessein, & qu'il m'a suffy que les Faits sur lesquels j'ay fondé & basty mes Raisonnemens fussent veritables, sans me soucier du temps auquel ils estoient arrivez. Apres ces Avis Lecteur, tu feras à ce Livre le traitement qu'il te plaira. Quel qu'il soit je ne m'en mets point en peine; étant certain que personne ne me scauroit frustrer de la premiere Recompense, & de la principale fin que je me suis proposée en escriuant; qui est la satisfaction d'avoir tasché de servir mon Prince & ma Patrie.





SECONDE

PARTIE

DV MINISTRE D'ESTAT.

DV CONSEIL DE GVERRE

DV PRINCE.

Liure Premier.



DISCOVRS PREMIER.

D'où vient que les Bestes d'une mesme espece ne se font pas la guerre entre-elles mesmes comme font les Hommes. Que les passions déréglées sont la cause de ce desordre. Que les Duëls sont contre le droit des Gens, & particulièrement contre l'autorité du Prince.

Ly a d'abord dequoy s'estonner qu'on voye des Guerres parmy les Hommes, & qu'il se soit inuenté des Regles, & dressé vn Art pour les conduire. Il y a dequoy s'estonner, qu'entre tous les Arts

A

2 SECONDE PARTIE

qui s'exercent dans la société, il n'y en ayt point qui jette tant d'esclat, ny qui recueille vne si grande portion que celuy-cy, de la gloire qui s'y distribuë. Il y a dequoy s'estonner que dans l'Ancienne Loy, la guerre s'y trouue si solennellement autorisée, & comme en quelque façon consacrée par les Commandemens de Dieu mesme, & que parmy ses plus pompeux & augustes Tiltres; il ayt choisi celuy de Dieu des Armées. L'inclination qu'ont naturellement la plus-part des choses, non seulement à conseruer leur Estre, mais encore à le multiplier; est éuidemment contraire à cette apparente folie, qui pousse les Hommes à la destruction les vns des autres, & nous ne voyons pas que les autres animaux de mesme espece, facent entre-eux des combats particuliers assignez: ou qu'ils s'assemblent en troupes pour decider quelque different, par le meurtre, & par le carnage de la plus part de leurs semblables.

Cét abandonnement & cette prostitution pour le dire ainsi, que font les hommes de la vie presente, & les sujets pour lesquels ils la sacrifient si volontiers, qui ne sont

quelquefois qu'un peu de fumée & d'opinion ; ne sont-ce pas des effets d'un instinct caché qu'ils ont, qu'elle n'est pas leur plus grand bien, ny leur dernière félicité ; ce qu'elle seroit sans doute, s'il n'y en auoit pas une autre ? Et les guerres que Dieu permet, ou qu'il commande, où elle est donnée en proye à tant d'accidens qui la destruisent ; ne sont-elles pas un clair argument, & une conuiction manifeste du peu de conte qu'il en fait, & que ce n'est ny le plus beau présent qu'il face aux hommes, ny le sujet où s'accomplisse la fin pour laquelle il leur donne l'Estre ?

Mais pour ne nous esgarer pas dès l'entrée de nostre chemin, & pour faire cesser l'estonnement, dont nous auons proposé les causes ; Je dis qu'il ne faut point trouuer estrange, que les hommes entrent si souuent en querelle avec leurs semblables ; puis que si rarement ils sont d'accord avec eux-mêmes : puis qu'ils ne sont presque jamais au dedans libres de trouble & de brouillerie, & que leur ame propre est le champ des combats qui se donnent, & loge tousiours en elle-même les ennemis qui se font la guerre. Ce desordre qui

arriue en la condition des Hommes, & n'arriue pas en celle des Bestes, au dedans desquelles on ne voit point esleuer de discorde, ny naistre de contrarieté de partis; a plusieurs sources d'où il découle. La premiere est, comme tout le monde sçait, la constitution de leur nature, & les diuers ordres des parties qui la composent. Les inclinations de l'une sont d'ordinaire si opposées aux inclinations de l'autre, & leurs appetits agitez de mouuemens si contraires; que ceux qui font monter le feu, ne sont pas dauantage opposez à ceux qui font descendre la terre. De sorte qu'il n'y a ny Paix, ny Bonace dans l'interieur de l'Homme, qu'autant de temps que la Partie Superieure est obeïe des Passions, & que l'Appetit où elles se forment souffre son ioug, & ne resiste pas à ses ordres.

Que s'il arriue, & c'est la seconde source du desordre, que dans ces Guerres Intestines, & apres les efforts qui deschirent l'Ame, la victoire demeure à la partie Inferieure; le calme & le repos ne suivent pas pour cela cette funeste victoire. Au contraire elle y suscite de plus grands mouuemens, & des tempestes

DV MINISTRE D'ESTAT. 5

plus dangereuses. Et comme il y a des peuples d'un naturel si inquiet, & d'une humeur si turbulante; qu'ils ne peuvent jamais demeurer en paix, & il faut necessairement qu'ils remuent au dedans, quand ils n'ont rien à faire au dehors, & qu'ils allument des Guerres Civiles, lors qu'ils ont finy les Estrangeres. De mesme quand les Passions ne trouuent plus de resistance du costé de la Raison, & qu'elles n'ont de sa part ny de bride qui les retienne, ny de barriere qui les arreste; Elles n'appaisent pas pour cela leur inquietude: Elles tournent leurs forces contre elles-mesmes: Elles se troublent & s'empeschent les vnes les autres en la poursuite de leurs objets. L'Amour alentit l'actiuité de l'Ambition: l'Auarice retarde les progres de l'Amour, & la pauvre Ame qui est le sujet que ces furies tourmentent, & la Mer que ces vents agitent; souffre plus qu'il ne se peut dire de leur violence. J'ajouste que la Raison n'est presque jamais si pleinement obscurcie, ny si generalement desarmée par les Passions; qu'il ne luy reste tousiours quelque rayon qui fait voir à l'Ame, au moins à certaines rencontres, la defformi-

A iij.

6 SECONDE PARTIE

ré de l'estat où elle se trouue , & quelque aiguillon qui la pique de honte & de remors , de s'y estre si laschement abandonnée .

Je pourrois apporter icy, s'il n'estoit vn peu hors de propos, quoy qu'il ne fust pas sans vtilité, vne autre cause du malheur où se jette l'homme, qui se liure à la mercy des passions, & leur laisse prendre l'ascendant sur la Reason, qu'elle deuroit auoir sur elles. C'est que ne pouuant se defaire de l'appetit d'estre heureux, que la Nature a planté au fons de son Ame, ny s'empescher d'agir pour le contenter, quand mesme il n'y penseroit pas. Et d'ailleurs, ne pouuant ny le remplir ny le calmer, qu'en la possession de la fin pour laquelle il reçoit l'Estre, qui est le Principe qui le luy donne : ou en l'exercice des moyens qui l'y conduisent, qui sont les Vertus; Il arriue qu'après qu'il a obtenu les autres Biens qu'il a poursuuius, & joiüy des autres objets qu'il a recherchez, il trouue que c'est à recommencer, & qu'il n'est pas moins vuide, qu'il estoit auparavant : qu'au lieu d'aller tout droit; il a tourné le dos à la Felicité où il aspire, & que de tout cela il ne luy reste, quand mesme il n'y

auroit rien plus à craindre ; qu'une Société pesante qui l'accable : qu'une profonde lassitude d'esprit qui le rend insupportable à luy mesme , & que ce chagrin inévitable qui ronge ceux qui tombent de leurs esperances.

Comme donc les passions effrenées, sont la cause des troubles intestins que les hommes souffrent, & de la mauvaïse intelligence qu'ils sentent au dedans d'eux-mesmes ; Elles le sont aussi des querelles qui se forment parmy les Particuliers, & des guerres qui s'esmeuvent entre les Princes. Les entreprises que l'Ambition, l'Avarice, & semblables mouvemens desordonnez, font faire aux uns au prejudice des autres, & les obstacles que ceux-cy opposent à leur violence, & à leur rapidité ; mettent toute la Société civile en combustion, & coupent tous les liens du Corps Politique. Ce seroit perdre mes paroles, & abuser de la patience du Lecteur, que de me mettre en peine de confirmer une verité, que l'experience fait sentir par tout : que la raison fait toucher au doigt, & dont l'Histoire rend de perpetuels tesmoignages.

Quant aux Bestes, ce n'est pas merueille, si elles ne sont point sujettes à ces grands fleaux, & à ces furieux orages dont Dieu a permis que l'humaine condition fust battuë. Leur ame n'est pas diuisée par ses puissances en des Regions opposées, & ne fait pas en Elle la conjonction de deux Mondes differens, du Spirituel & du Corporel; comme fait l'Ame de l'homme. Elle & toutes ses inclinations & facultez, sont tirées du sein & de la puissance de la matiere, comme parlent les Philosophes: Elle n'a point d'appetit qui ne soit borné, & que peu de chose ne remplisse: Et comme la Nature le guide par vne lumiere qui ne peut tromper, vers les objets qui luy sont propres, & luy prescrit le degré de la jouissance qui luy est conuenable, qu'il ne peut outrepasser; Elle luy prepare aussi ces objets en vne telle abondance, & d'une acquisition si facile; que de tous les Indiuïdus d'une mesme espece, il n'y en a point qui n'en trouue ce qui luy en faut, & qui ne le trouue sans peine.

Pour diuertir ces maux dont nous auons dit que l'humaine condition estoit affligée: ou
pour

DV MINISTRE D'ESTAT. 9

pour en corriger la malignité, & en émuousser la pointe; la diuine Prouidence ne l'a pas destituée de moyens & de remedes conuenables. Si cela eust esté, elle eust laissé vne tache trop honteuse & trop visible, sur cette belle économie avec laquelle elle gouuerne le monde, & cette admirable Bien-seance qu'elle a gardée en toutes les autres parties qui le composent; se fust dementie en celle qui en est la plus noble. Elle eust agy avec la mesme imprudence que feroit vn Artisan, qui desployeroit toute la force & toutes les delicatesses de son Art, sur vne matiere vile, & prendroit grand soin de bien mettre en œuvre vn morceau de verre; & qui ne se soucieroit pas de faire des fautes enormes sur vn sujet de grand prix, & de mal enchasser vn gros diamant, qui donneroit du lustre à son Art, & feroit honneur à la Nature.

Mais cela n'est pas arriué. Car pour ce qui est du principal Bien de l'homme, qui est le calme du dedans & la tranquillité de l'Ame, & de la victoire de la Raison sur les passions, d'où naissent cette tranquillité & ce calme; le moyen de les obtenir est en sa main, & en ce-

B

la il ne depend ny du caprice de la Fortune, ny des passions des autres hommes. Il est vray que depuis l'infidelité d'Adam, & le malheureux destin de la nature corrompue; il y a tousiours de grands combats à faire, & quelquefois d'estranges difficultez à surmonter, pour paruenir à cette victoire. Mais aussi il y a de grands secours à attendre, & de notables subuentions à receuoir de la Philosophie, & beaucoup plus de la Religion; & la Grace de Dieu ne manque jamais à ceux qui ne manquent pas à eux-mesmes, & les bons succez de cette guerre suiuent tousiours les bons desseins, & les resistances possibles.

Pour ce qui est du degast que les Passions font au dehors, & des mouuemens impetueux dont elles esbranlent la societé; si c'est contre les particuliers qu'elles se desbordent; & si d'un costé elles y produisent des iniures & des outrages, & si de l'autre la Reuanche que prendroient par leurs mains les personnes offensées, & les Reparations qu'elles se feroient elles-mesmes; deuoient estre de nouueaux & plus grands excez qui succederoient aux premiers; Les Preseruatifs & les Remedes contre

DV MINISTRE D'ESTAT. II

ces Maux se trouuent dans la mesme Societé, où on les voit pulluler & croistre. C'est pourquoy il n'y a point de Gouuernement dans le monde, de quelque Esprit qu'il soit animé, & sous quelque forme qu'il se maintienne; qui n'ayt retiré d'entre les mains des particuliers l'usage de la Vengeance, pour le transporter à des personnes desinteressées, comme sont les Magistrats. Et de peur encore que la Corruption ne penetrast jusqu'aux fonctions de leurs Charges, & que la Iustice qu'ils doiuent distribuer, ne fust altérée par quelque teinture de passion, qui s'y pourroit imperceptiblement glisser; On a voulu que la Dispensation s'en fist par le ministere des Loix qui sont incorruptibles, & qui n'estant capables de sentiment ny de connoissance; sont par consequent incapables de passions, & inaccessibles à l'Amour & à la Hayne, à la Faveur & aux Richesses. Bref affin qu'il ny eust point de Puissance dans l'Estat, qui ne pliat sous celle des Loix, ny de si petit particulier, qui ne peut auoir raison du plus grand qui l'offenceroit; on a laissé au Souuerain la disposition des forces publiques, avec lesquelles

B ij

il n'eust point de Sujet si refractaire & farouche; qu'il ne peut ranger sous le droit commun, & contenir dans les bornes de l'Equité & de la Iustice.

On peut voir par là que l'usage des Duëls, par où les Particuliers taschent de se faire Iustice à eux-mesmes, & de tirer raison par leurs propres mains des Torts qu'ils reçoivent des autres Particuliers; est vne manifeste violation du droit des Gens, & vne particulière Inuasion de celuy des Princes. Aussi ce mal qui a commencé par le pernicieux Exemple que François premier & Charles le Quint en ont proposé, & par la funeste permission que Henry Second en a accordée; s'est accru merueilleusement durant nos Guerres Ciuiles, & dans cette generale deprouation qu'elles contiennent, de l'obeissance & de la fidelité, que les Sujets doiuent au Prince. Du depuis il a monté à son comble, & s'est multiplié à l'infiny, par l'Indulgence de Henry le Grand, & durant la Paix de son Regne. Et comme les Terres fertiles & grasses, si l'on n'y jette de bonnes Semences pour ocuper leur fecondité; produisent

des Chardons & des Ronces, & d'autres herbes mal-faisantes. Il est arriué de mesme parmy nous, que les hommes de cœur manquans de matiere pour engendrer pour le dire ainsi, des Actes legitimes de Vaillance; se sont adonnez à des productions illicites, & n'en pouuant attraper le corps, en ont poursuiuy le fantosme dans ces combats particuliers, où la France a perdu plus de sang noble en vn peu d'années de paix; qu'Elle n'auoit fait en plusieurs années de guerre.

Mais on a beau prescher nostre Noblesse sur ce Texte, & beau déclamer contre cét Abus & ce débordement de courage. On a beau chercher des Remedes dans la Philosophie & dans la Religion, contre vne si brutale Maladie. On a beau représenter, que le sang que Henry 2. laissa verser au combat de Iarnac & de la Chasteneraye; ayant demandé vengeance au Ciel l'a obtenuë, & que ce Prince, que sa qualité exemtoit du hazard des Duëls; a laissé la vie dans vn Ieu qui estoit l'Image. Que les plus belliqueuses Nations du monde, excepté la nostre; n'ont jamais admis chez eux cette bastarde vaillance.


ce, ou pour le moins ne l'ont pas naturalisée. Que les Lacedemoniens qui ont fait vne profession plus expresse de la veritable, que les autres Grecs, & dont le Gouvernement semble n'auoir eü pour Ame, que cette vertu; ne l'ont pas connuë. Que les Romains qui ont esté les Conquerans de tant de pays & de tant de peuples; l'ont resignée à la plus vile espece d'hommes qu'ils eussent, & ne luy ont assigné pour objet, que des vies Criminelles. Que les Espagnols qui ont conçu ce grand dessein de la Monarchie, qui les agite depuis plus d'un Siecle, & qui pour cela ayant déclaré & fait la Guerre à tant d'autres Nations; ont par consequent besoin de la Vaillance, plus que de nulle autre Vertu; se moquent de la nostre Moderne, & si quelquefois il en eschape à Eux ou à d'autres de nos Voyfins quelque legere imitation; ce n'est qu'une estincelle qui saute chez Eux, du grand feu qui nous deuore.

Bref que c'est vne Injustice horrible, qu'un homme qui aura blanchy sous les Armes, & sera sorty Victorieux d'une infinité de Combats de Batailles & de Sieges; soit

DV MINISTRE D'ESTAT. 15

obligé de mettre en Compromis sa Reputa-
tion & sa gloire, contre vn jeune fou, qui
n'aura veu d'autre Champ de Bataille, que
la Sale d'un Maistre d'Escrime, & dont le
courage ne se soustient, que sur l'agilité de
son Corps & la vitesse de ses mains, & sur
vn long exercice qu'il aura fait d'attaquer
& de se deffendre. On a dis-je beau repre-
senter tout cela à nostre Noblesse; on ne la
conuertira jamais, & jamais on ne la guer-
ra; si Elle-mesme ne se guerit de cette folie:
Si Elle ne cesse de constituer son honneur
en cette fausse & furieuse Vaillance où Elle
l'a mis, & si Elle n'abat de ses propres mains,
l'Idole qu'elle s'est erigée pour l'adorer. Que
cecy soit dit par ocaſion.





DISCOVRS SECOND.

Pourquoy Dieu a laissé aux Princes le droit de se faire Iustice Eux-mesmes, quand ils sont offensez par les autres Princes. Que la Guerre legitime est dans l'ordre des Vertus, & vne branche de la Justice. D'où vient qu'elle est appelée Vn Fleau de l'Ire de Dieu.



E que nous venons de dire au discours precedent, est vn des Motifs qui ont obligé les Particuliers à se faire des Superieurs, & le Devoir que Ceux-cy ont de leur distribuer la Iustice; vne partie du prix de la Liberté, qu'ils ont quittée pour l'amour d'Eux. Mais cela ne suffiroit pas pour la perfection de la fin qu'ils se sont proposée en les establisant, & ce n'est pas assez pour la seureté & le bon-heur d'un pays exposé aux rauages de la Mer & des Riuieres,

res; de bastir des Chaussées contre les débordemens de celles-cy, si l'on ne prepare des Dignes & des Ecluses contre les Inondations de l'autre. Les inuasions que font les Souuerains sur les Estats des autres Souuerains, & les ruines qu'ils y apportent quand ils y entrent à main armée; sont bien des maux d'un autre poids & d'une autre suite, que ceux que les Particuliers souffrent des autres Particuliers: Et il faut bien d'autres trauaux & d'autres efforts, pour arrester le cours de ces Sources publiques de desolation, quand elles s'ouurent; que pour estouffer les menus desordres, & apaiser les petites broüilleries, qui arriuent entre les personnes priuées.

On voit clairement par là, que puis que les Princes n'ont point de Superieur en terre, qui leur fasse raison des torts qu'ils souffrent des autres Princes; Ils se la peuuent faire eux-mesmes, & que le droit de Nature qui permet à chacun l'exercice de la Vengeance, quand elle est juste; n'est pas suspendu en eux par le droit des Gens, qui l'oste aux Particuliers, pour les raisons que nous auons dites. D'où

C

il s'ensuit encore, que Dieu ayant retrenché ce droit à ceux-cy à cause de l'Ignorance qui d'ordinaire les acompagne, ou des passions dont ils sont la proye: à cause que marchant dans l'obscurité; ils auroient peine de trouver le chemin de la Iustice, ou qu'en pesant les torts reçeus & les satisfactions deües, le mouvement perpetuel où ils vivent, les empescheroit de tenir la Balance droite; Il a laissé ce droit aux Souuerains avec cette precise obligation, que chez Eux & dans leur Conseil, la Raison jouïroit de toute la pureté de sa lumiere: Que les Passions n'auroient point d'entrée dans leur Cabinet; & que ce Saint lieu seroit comme la haute Region de l'Air, qui est tousiours sans agitation & sans trouble. Mais le malheur est que leur Cabinet au lieu de ressembler à cette haute Region; n'est que trop souuent l'Image de la Moyene, & qu'au lieu du calme & de la serenité qui y doiuent regner; on n'y entend quelquefois que bruire des Passions, & on n'y voit que l'esclat que font l'Ambition & l'Auarice, & les autres grands déuoyemens de l'esprit humain.

Bien que cela soit ainsi, & que les maux ne soient jamais petits, qui naissent du desreglement des Causes publiques; C'est neantmoins le plus doux Destin, & le plus favorable traitement, que puisse recevoir la condition presente des hommes. Apres la perte de l'Innocence primitiue & de la Justice Originelle; la Prouidence a suffisamment pourueu à cet inconuenient, & suffisamment réparé la Societé contre les desseins de l'Iniustice, & les rauages de la Violence; en inspirant aux hommes l'ordre Politique, & le mouuement de se faire des Souuerains, qui fussent obligez de les deffendre contre la force des Estrangers, & contre les entreprises iniustes de leurs Concitoyens, & de leurs Compatriotes. En imposant à ceux-cy vne obligation d'autant plus estroite, & des loix d'autant plus seueres de faire leur deuoir; qu'elle s'est reseruée à elle seule la faculté d'en faire la Justice, & d'en prendre la Vengeance, s'ils y contreuiennent. Enfin Dieu n'a pas seulement acheué de remplir la mesure du bien qu'il faisoit aux hommes; Mais il l'a encore comblée, en leur enuoyant la Loy de la Cha-

rité, & faisant descendre du Ciel ce feu sacré, qui desleche jusqu'à la source, & consume jusqu'à la racine, tout ce qui pourroit s'esleuer d'aigre & de violent contre le prochain, dans les Ames où il tombe.

Que si apres tant de Preferuatifs & tant de Remedes, & vne si large effusion de graces & de secours, dont il a muny les hommes; ils tombent si souuent malades, & meurent si souuent au bien: s'ils sont vaincus par les Vices, & menez en triomphe par les Passions. Si l'Injustice & la Force dominant, au lieu de la Raison & de l'Equité, & enuolopent quelquefois ensemble & Innocens & Coupables; Il l'a permis ainsi, pour n'oster pas aux hommes l'vsage de la Liberté dont il leur a fait present: pour ne leur desrober pas la matiere du merite, en leur imprimant la necessité de faire du bien: Affin que les Meschans soient punis par leurs semblables, & les Gens de bien exercez par leurs contraires; & affin que tous apprennent qu'il n'est rien de plus vil & méprisable que cette Vie: qu'il n'y a que vanité & affliction d'Esprit, & qu'on ne prenne point de l'amour pour vn pays, qui pour vn peu de

fleurs qu'il porte ; produit tant de ronces & d'épines, & n'ayant qu'un sentier estroit qui mène à la vie ; a tant de grands chemins & de larges routes qui conduisent à la mort, & finissent en précipices. Que t'ecy soit dit à l'honneur de la diuine Prouidence. Reuenons à nostre sujet.

Il est aisé de conclurre de ce que nous venons d'establis ; que comme Dieu est l'Auteur de la Iustice, que les Souuerains distribuent à leurs Peuples ; Il l'est aussi de celle qu'ils se font eux-mêmes contre les autres Souuerains : que l'une & l'autre a le sceau de son Approbation, & que l'usage des Armes quand il est legitime ; n'est pas moins vne vertu que celui des Loix, quand elles sont bien dispensées. Au contraire ce premier genre de Iustice demeurant dans les termes de sa nature, & ne sortant point de l'enceinte du droit des Gens ; est plus noble & plus auguste que l'autre : Est vn trait plus vif de la puissance que Dieu communique aux Princes, & vne marque plus illustre de l'honneur qu'ils ont d'estre ses Images en terre ; comme je l'ay monsté ailleurs. Ce n'est donc pas merueille



*En la Pres-
sacé du par-
fait Capi-
taine de
Miseur de
Rohan*

si dans l'Ancienne Loy, il a quelquefois commandé de faire la guerre, & s'il y est appelé le Dieu des Armées; C'est à dire de cette Iustice dont nous venons de parler, & dont nous tirerons le plan & dresserons la figure, aux Discours qui suivent.

On demandera peut-estre, si la doctrine que je viens de poser est veritable, & s'il est vray que la Guerre soit vne branche & vn ruisseau de la Iustice, & par conséquent dans l'ordre & dans la classe des Vertus; d'où vient qu'elle est appelée dans la Bible, vn des Fleaux de la cholere de Dieu, & pourquoy dans la Nouvelle Loy; Il ne prend point le Tiltre de Dieu des Armées, dont il semble se parer, & releuer sa Majesté dans l'Ancienne. Quant à la premiere difficulté, elle n'est pas mal-aisée à resoudre, & l'on peut apporter plusieurs Raisons pour l'esclaircir. La premiere, que la Iustice que les Souuerains se font eux-mesmes, est appelée VN FLEAV, à comparaison de celle qu'ils rendent à leurs Sujets; d'autant que l'Administration de celle-cy estant interdite aux Particuliers, & commise à des personnes Tierces, & de condition desinteres-

ſſe; eſt par conſequent moins ſujette à corruption que l'autre, où les Parties ſont Juges en leur propre Cauſe, & où il eſt dangereux que l'Amour propre entrant dans le Conſeil de Guerre, avec les paſſions dont il a couſtume d'eſtre ſuiuy; n'y faſſe couler l'Iniuſtice. La ſeconde eſt, d'autant qu'encore qu'il n'y ait que le Droit & l'Equité, qui preſident au projet & à la naiſſance de la guerre; il ſuruient quelquefois en la ſuite & au progrez, des Accidens impreueus, qui la font changer de nature, & degenerer ou en vn ſimple aſſouuiſſement de Vengeance, ou en vn pur mouuement d'Ambition; & il eſt certain que l'Appetit ſ'irrite par la facilité qu'on a de le contenter, & que l'abondance des viandes qu'on a deuant; fait franchir les limites de la Temperance.

La troiſième Raiſon eſt, pource qu'au lieu que la Juſtice que les Souuerains diſtribuent à leurs Sujets; ſe rend ſans effuſion de ſang & ſans violence, au moins aux affaires Ciuiles; Celle qu'ils exercent contre les autres Souuerains; ne ſe conduit jamais qu'avec la force & avec les armes: ne respire que meurtres &

carnage , & ne fust-il question que d'un pouce de terre, ou d'un filet d'eau ; il faut qu'une infinité de Sujets perissent de part & d'autre, pour les querelles justes ou injustes de leurs Maistres. Ce qui pourtant ne doit point estre trouué estrange ; d'autant que les Souuerains estans les Testes des Corps, dont les Sujets sont les Membres, & comme tels ne pouuant agir que de concert & conjointement avec eux ; Il est aussi necessaire qu'il se fasse entre eux , vne indiuisible communion de toutes choses, & qu'on ne puisse attaquer la Teste, sans fraper les Membres qui en dependent : & que la Teste ne puisse se deffendre , sans exposer aux coups les Parties , qui font un Corps avec elle .

De sorte que la maniere avec laquelle cette Iustice s'exerce , qui est toute pleine de sang de desolation & de ruine ; se peut justement nommer V N FLEAU, comme le feu & le poison qu'on employe dans la Medecine, se pourroient appeller de ce nom ; au prix des autres moyens dont elle se sert, pour guerir les maladies ordinaires . Car au reste il ne faut point dissimuler, que la Iustice qui se rend

se rend aux Particuliers, ne soit sujette, quoy que non pas si souuent ny si dangereusement, aux mesmes inconueniens que l'autre, & exposée aussi bien qu'elle, aux attaques & aux embusches des vices qui luy sont contraires. Il faut confesser que la Raison & l'Equité n'y font pas tousiours pancher la Balance: qu'il y a de mauuais Iuges, aussi bien que de meschans Princes, & qu'en l'vne aussi bien qu'en l'autre; les Grands oppriment les Petits, & les pauures sont la proye & les victimes de ceux qui sont riches. Et à dire vray, puis que c'est le sort & le partage commun des Vertus Morales, de loger entre deux extremitez blasma- bles, & de confiner à deux vices opposez; ce n'est pas merueille, que l'homme ait de la peine de se contenir au milieu de ces deux con- fins, & de n'entrer pas au pays des vices; où de tous costez il trouue les auenuës faciles, & où les erreurs & les inclinations au dedans, & les objets & les Exemples au dehors; le pres- sent continuellement de passer.

La quatrième Raison est, d'autant qu'effe- tiuement Dieu a quelquefois commandé à vn Peuple, de faire la guerre à d'autres Peu-

ples, pour les exterminer de dessus la face de la terre, & pour la purger avec le fer & avec le feu des crimes, dont ils flestrissoient sa Divinité: dont ils deshonorioient la Nature, & dont ils defiguroient le Corps Politique. De cela nous auons plusieurs Exemples dans l'ancien Testament, & parmy le Peuple Iuif. D'autant encore qu'outre les commandemens expres qu'il a donnez de faire la guerre; il a quelquefois souleué & fait armer des Souuerains & des Peuples, par des moyens occultes & inconnus qu'il n'est pas icy le lieu de rechercher, pour chastier d'autres Peuples & d'autres Souuerains qui l'auoient offensé: Et que vouloit dire autre chose le choix qu'il donna à Dauid des trois Fleaux de sa Cholere, la Peste la Famine & la Guerre; pour expier la trop grande complaisance qu'il auoit eüe, & l'orgueil dont il s'estoit enflé, à la veüe de ce nombre innombrable de peuple dont il se trouuoit le Maistre? D'autant en troisiéme lieu qu'il fait naistre quand il luy plait des Accidens & des Conjonctures, qui poussent à la guerre les Princes, qui voudroient demeurer en paix, & rompent les chaines de la con-

corde qui les lie; bien qu'ils fassent tout ce qu'ils peuuent pour la maintenir, comme je le pourrois prouuer par plusieurs Exemples, si je n'auois peur d'estre trop long, & si je n'auois desia apporté quelques vns en la premiere Partie. D'autant enfin qu'apres que la guerre est allumée entre deux Princes, & que tous deux harassez du trauail d'vn chemin si penible & rude, ne soupirent qu'apres la paix & le repos; il les empesche d'y paruenir par des cas inesperez qui pullulent continuellement l'vn de l'autre, & que lors qu'on pense gagner le port; il suscite quelque vent contraire qui remet au large, & rejette plus fortement que jamais dans la tourmente. Ces considerations & plusieurs autres que j'ignore, sont cause que toute Guerre quelque juste qu'elle soit, peut estre appellée VN FLEAU DE L'IRE DE DIEU, & vn effet de sa Prouidence irritée.

On demandera en suite de cela; puis que la guerre peut entrer dans la classe des vertus, & est des appartenances de la Iustice; d'où vient que Dieu ne prend point en la Nouuelle Loy, ce Tiltre esclatant & redoutable de

DIEU DES ARME'ES, comme il a fait en l'Ancienne. A cela certes la responce est fort aisée; & qui est celui qui ne sçache, s'il a seulement receu quelque teinture, & appris les premiers Elemens du Christianisme; que la Loy Nouvelle n'est qu'une Loy de paix, & de dilection envers le prochain. Que les Disciples de Iesus Christ ne se connoissent qu'à cette marque, & ne se distinguent des autres hommes, que par ce sacré caractère. Que le Pere ne pouvoit donner un plus grand Exemple, de l'amour qu'il portoit aux hommes; qu'en donnant pour leur rachat son Fils unique. Que le Fils auoit rendu la plus haute preuue de charité qui se puisse rendre; s'estant immolé volontairement, & ayant mis sa vie en sacrifice pour l'amour d'eux. Que le saint Esprit ne s'y estoit fait voir, que sous la forme d'une Colombe, ou sous la figure de langues de feu, & que l'Eglise son Espouse faisoit entrer l'Huile & le Baume, & non pas les matieres violentes, dans l'usage des Sacremens & des autres choses saintes. Cela veut dire que l'Esprit de la Nouvelle Loy, n'est qu'Esprit de douceur d'indulgence & de paix, & qu'elle

ne commande ny ne conseille d'autre guerre; que celle qu'il faut faire aux passions & aux vices. Que bien loin de souffrir qu'on vſurpe ou qu'on retienne le bien d'autrui; elle ne permet pas qu'on le conuoitè, & qu'elle n'ordonne pas ſeulement de faire Juſtice à ſon prochain; mais qu'elle conſeille meſme d'en ſupporter pluſtot l'injuſtice & des injures; que d'en pourſuiure la réparation deuant les Puiffances legitimes, & de raiſſer à la Religion les preuues de cette belle Maxime qui eſt toute ſienne; Que l'action y eſt quelque choſe de moins noble, que la ſouffrance.

Si donc la Juſtice que la Loy Nouuelle recommande ſi fort, & qui à vray dire eſt l'eſprit vital & la chaleur naturelle du Corps ciuile; eſtoit obſeruée comme elle deuroit, & beaucoup plus ſi la Charité qui couure les taches, que la Juſtice expoſeroit quelquefois au jour, & ferme les breſches que quelquefois l'autre laiſſeroit ouuertes, eſtoit ſuiuie des Chreſtiens; Ceux-cy pour le moins n'auroient beſoin entre-eux, que des droits de la Paix, & des conſeils de l'Equité naturelle, & il n'eût pas fallu preſcrire aux particuliers, des formes

pour plaider, ny aux Princes des Loix pour faire la guerre. On n'eust pas eü à faire de Iuges ny de Capitaines. Tout ce qui eust esté enfermé dans l'enceinte de la Religion, n'eust respiré qu'un air doux & pacifique. La revanche des outrages, n'eust esté exercée que par la retribution des Bien-faits, & on n'eust pas esté en peine d'y implorer, comme c'estoit son intention, le bras du Dieu des Armées, du Dieu puissant & terrible; on eust seulement inuoqué le Nom du Dieu de la Paix, & du Pere des Misericordes.

Mais le mal est que la Iustice disent les Poëtes; n'a pas demeuré long-temps parmy les hommes, & qu'ayant emporté la balance dans le Ciel, où elle s'est retirée; elle n'a laissé en Terre que l'espée, dont l'Injustice & la Violence se sont saisies. Le mal est que la Charité qui est vne vertu d'union, & la grande vertu du Christianisme; n'a gueres regné que parmy les premiers fideles: que son feu est toujours allé en diminuant, & nous voyons que les Chrestiens d'aujourd'huy sont plus diuisez entre-eux, que des Mahometans, & qu'au lieu d'agir contre cét immortel Ennemy de leur

Religion , & ce public detenteur de leurs Estats ; il semble qu'ils n'ayent esprit ny courage ny puissance , que pour se faire du mal , & pour se destruire. Peut-estre que la victoire luy cousteroit trop quand il les attaquera , s'il les trouuoit vnis , & si leurs forces estoient entieres , ils la luy veulent rendre facile par leur discorde , & par la diminution de leurs forces. Ils veulent que le sang qu'ils versent , & le bien qu'ils consomment ; luy soit vn gage de leur dessein , & vne preuue que s'ils n'ont pas encore assez de resolution pour se donner ; ils ont pour le moins beaucoup d'enuie de se laisser prendre. Le Lecteur excusera cette petite digression , & cette plainte hors d'œuvre , que le zele du bien public m'a forcé de faire.





DISCOVRS TROISIEME.

*Que les Princes doiuent imiter Dieu en l'usage,
du droit qu'il leur a laissé de se faire Iustice
eux-mesmes. Que cela est fort difficile, mes-
me pour les Princes qui ayment & en-
tendent leurs affaires. Ce qui se con-
firme par deux Exemples, l'un
de Henry second, l'autre
de Philippe second.*



O V S auons monsté au Dis-
cours precedent, que le droit
que Dieu a laissé aux Princes, de
se faire Iustice eux-mesmes; est
la plus riche effusion qu'il fasse
sur eux de sa puissance, & le plus beau rayon
qu'il leur communique de sa lumiere. D'où
nous pouuons conclurre; qu'assés que cette
representation soit en quelque façon parfai-
te, & que la copie ne s'esloigne point de l'ori-
ginal sur lequel elle est tirée; Il est aussi neces-
saire

faire qu'ils imitent la conduite, & marchent sur les vestiges de la Prouidence, en l'usage de ce triste droit, & en la dispensation de cette sanglante Iustice. En premier lieu comme Dieu ne descend jamais à ce lugubre exercice, ou preuenu d'erreur, ou troublé de passion; ils doiuent faire s'il se peut le mesme. Ils y doiuent voir clair auant que de s'y embarquer, & estre asseurez qu'ils ne font rien, qu'il ne leur soit loisible de faire. Pour cela ils doiuent faire en sorte autant qu'il se peut, qu'il n'y ait que la Raison qui trouue place dans leur Conseil, & que ce grand Tribunal où se prennent des resolutions si importantes, & où ne se donnent que des Arrests de vie & de mort; ne se tienne que dans cette haute Region de l'Ame, où il ne monte point de fumée de la basse, comme nous l'auons designé cy dessus.

Toutefois comme cecy est fort aisé à dire; il est autant mal-aisé à mettre en prattique, & il n'est gueres moins possible de deffendre l'entrée de la Mer aux vents qui s'y rendent; que de fermer la porte du Conseil des Princes à leurs passions, ou à celles de leurs Ministres.

E

Je ne veux point parler icy, puis que je l'ay desia fait en la premiere partie, des mouuemens opposez & des inclinations contraires, des gens d'Espée & des gens de Robe, qui y sont admis. Les premiers panchent d'ordinaire vers la guerre, comme vers leur élément, & comme vers le champ où se fait la principale moisson de leur grandeur & de leur gloire. Les autres tendent presque tousiours à la paix comme à leur centre, & comme à la saison qui leur donne leurs plus beaux jours, & où leurs bonnes qualitez se mettent particulièrement en parade, & sont proprement en leur lustre. Tout le monde sçait le Schisme perpetuel pour le dire ainsi, qui diuisoit les sentimens du Connestable de Montmorancy, & du Chancelier de l'Hospital, sur le sujet des troubles qui trauaillerent la minorité des enfans de Henry second. Tout le monde sçait la fameuse Responce, que fit le dernier à l'autre, qui luy reprochoit, que ce n'estoit à luy ny à ceux de son mestier de se mesler des affaires de la guerre. *Que ce n'estoit pas à luy veritablement ny à ses semblables, qu'il appartenoit de faire la guerre; mais qu'il luy appartenoit & à ses semblables, de juger du temps au-*

quel il la falloit faire. Personne n'ignore encore l'obstinée & inuincible auersion qu'auoit de la Paix, le vieux Marechal de Biron, & ce qu'il dit vn jour à son Fils, qui n'estant pas si grand Politique que luy, ny si preuoyant de l'auenir; agissoit comme s'il eust voulu promptement esteindre & finir la guerre, que le Pere taschoit tousiours d'allonger & de nourrir; *Qu'il se resolut si la Paix venoit, d'aller planter des choux à Biron, & de renoncer à la Cour & à la Fortune.*

En cela certes il n'y a rien qui ne soit fort ordinaire, & il n'est que trop naturel que chacun ayme son mestier, & ce qui contribuë d'auantage à son auancement & à sa fortune. Mais cecy est bien estrange, que des Princes intelligens abandonnent quelquefois leurs interests, pour espouser ceux d'autrui, & soient indulgens à la jalousie ou à l'ambition de leurs Ministres, au prejudice de leurs affaires. En voicy deux Exemples memorables, l'vn tiré de nostre Histoire, & l'autre de celle d'Espagne. Henry second fust sans doute vn Prince bien instruit en l'Art de Regner, & lors qu'il vint au Gouuernement de l'Estat, fort capable de le conduire. Sa prudence & sa va-

leur esclaterent esgalement aux premieres années de son Regne, & sa fortune preualut à celle de Charles le Quint, & l'on peut en quelque façon dire, que l'Orient de sa gloire; fust le Couchant de celle de l'autre. Apres auoir esté par tout victorieux de ses armes, & auoir par tout triomphé de ses artifices, comme nous monstrerons en vn autre endroit; il vit le cours d'une guerre heureuse, suspendu par vne Treue qui couronnoit ce bon-heur d'une grande vtilité, & d'une Reputacion incroyable.

Mais comme les choses du monde ne peuvent demeurer long temps en vn mesme estat, & que les faueurs de la Fortune ne sont pas fixes. Ou pour mieux dire, comme les hommes ont coustume de se lasser de leur propre felicité, & d'aymer à changer de bien; Il arriva que Henry ne demeura pas ferme en ce poste, que le Ciel sembloit luy auoir choisi pour le rendre heureux. Apres la promotion de Paul I. v. au Pontificat; l'Ambition de ses Neueux eschauffa demesurément la haine qu'il portoit naturellement aux Espagnols, & ils luy mirent en la teste de pratiquer vne Li-

gue avec Henry ; pour les chasser du Royaume de Naples , & le faire tomber à vn fils de France, avec des conditions qui leur estoient *L'an 1556* fort auantageuses , comme il se peut voir aux Articles de cette Ligue. La chose estoit extrêmement difficile , & ce n'estoit pas vne petite affaire, de vouloir engager Henry à vne entreprise, qui offensoit la conscience par la violation manifeste de la Foy publique , & qui estoit euidentement nuisible à l'Estat, en le faisant sortir du port où il estoit arriué avec tant d'honneur & de profit , pour l'exposer derechef à l'infidelité de la Mer , & au danger des tourmentes . D'ailleurs Henry auoit la veüe trop bonne, pour ne discerner pas les apparences, dont on tascheroit de l'esbloüir , & il auoit dans son Conseil des personnes qui estoient à l'espreuue des subtilitez des Esprits d'Italie, & de la force de ceux de Lorraine.

Cela n'empescha point, que les Caraffes & Messieurs de Guyse ne dressassent leurs batteries pour rompre la Treue, & que le Roy ne fust attaqué de toutes parts, & par toute sorte de machines, pour l'y faire condescendre. La proposition en fut d'abord mal receüe , pour

les raisons que nous auons dites. Le Connestable de Montmorancy principal Ministre & principal Fauory; s'y opposa courageusement & avec constance. Le Marechal de Brissac grand homme d'Estat & grand Capitaine; en escriuit des Remonstrances de Piedmont, qui eussent esté capables de persuader, tout ce qui estoit capable de se rendre à la Raison & de ceder à la Verité; & il n'y auoit point d'apparence, que la Raison & la Verité ne preualussent dans l'esprit de Henry, sur leurs contraires.

Elles n'y preualurent pas neantmoins, & ce que l'un des Caraffes qui estoit venu à la Cour, ne pût obtenir avec l'autorité de son Oncle dont il estoit armé: ce que l'Adresse & l'Eloquence du Cardinal de Lorraine: ce que le Credit & la Reputacion du Duc de Guyse, qui estoit le second Fauory, & le Riual du Connestable, ne sceurent gagner; La Duchesse de Valentinois l'emporta, & cette femme que Messieurs de Guyse auoient jettée dans leurs interests l'ayant attirée dans leur Alliance, & qui estoit le Demon pour le dire ainsi, dont le Roy estoit souuerainement pos-

sedé ; le contraignit de se rendre apres s'estre long temps deffendu , & de consentir à ce qu'elle vouloit, ou plustot à ce que desiroient Messieurs de Guyse & les Caraffes ; quoy qu'il choquat l'honnesteté, & fust contraire au bien de l'Estat. Aussi le temps fit voir l'imprudence de ce dessein , & rompit le charme que la raison n'auoit pû deffaire. Nostre entreprise sur le Royaume de Naples s'eschoüa d'abord qu'elle fut embarquée, & nous y receusmes des affronts, au lieu d'y faire des conquestes. La France qui s'estoit dégarnie de ses plus belles & meilleures forces, & du plus clair de ses Finances pour les bailler à Monsieur de Guyse; se trouua foible pour resister à l'orage , qui vint fondre sur la Picardie du costé de Flandres, & qui n'ayant pas esté preueu , pour auoir esté sourdement formé ; fit en la surprenant vne impression plus dangereuse. Le Connestable fust vaincu & pris prisonnier deuant Saint Quentin , & quelque temps apres le Mareschal de Termes deffait pres de Grauellines.

Bien que la France fust estourdie de ces deux grands coups; Elle n'en fust pas pour ce-

la abatuë , & ces malheurs entassez l'un sur l'autre, au lieu d'estouffer sa vertu; la reueillerent, & la firent songer aux moyens d'en reuenir, & de se tirer avec honneur du mauuais pas, où son imprudence l'auoit jettée. Pour cet effet le Roy rappella d'Italie Monsieur de Guyse, où il n'auoit rien perdu de sa Reputation, bien qu'il n'y eust point fait de progrez, & qui ne fut pas plustot arriué en France, qu'il n'enleuat Calais aux Anglois, & Thionuille aux Flamens, qui tous obeissoient à vn mesme Maistre. Ces grands commencemens estoient les presages d'une suite de succez encore plus grands, & il y auoit lieu de croire, que la jonction de l'armée du Duc Iean de Saxe à la nostre qui estoit tres-belle; rameneroit chez nous la victoire, dont nos ennemis sembloient estre en possession, & nous rendroit avec vsure la gloire perduë, sous vn Chef si vaillant & si sage, que le Duc de Guyse. Mais voicy derechef vn dessein aussi imprudent de faire la paix, qui saisit le Roy, qu'auoit esté celui de retourner à la guerre; Et bien que selon toutes les Regles de la prudence ciuile, & selon toutes les Maxîmes de Reputation

&c

& d'Vtilité; il la fallut continuer, quoy qu'elle eust esté mal commencée; On l'arresta au fort de la prosperité qui l'accompagnoit, & on repoussa la fortune, qui se pressoit de nous estre fauorable. Celuy qui s'estoit si genereusement opposé à l'ouuerture d'une guerre injuste; fust l'auteur & l'instrument d'une paix pernicieuse, & donna vn exemple illustre de l'humeur ordinaire de la plus-part des meilleurs seruiteurs; qui est de seconder les interests du Maistre, quand ils s'accordent avec les leurs, & qu'ils vont de compagnie: Mais qui les quittent volontiers dès qu'ils ne peuvent compatir ensemble, & assurent leur fortune particuliere, quand il ne se peut faire autrement, au despens de la publique.

Il y auoit long temps que la gloire du Duc de Guyse, faisoit mal au cœur au Connestable, & qu'il sentoit que son Genie auoit de l'ascendant sur le sien, & que l'eleuation de l'autre, estoit son abaissement & sa decadence. Il vouloit par le moyen de la paix, quelque defauantageuse qu'elle pût estre; luy soustraire le moyen que la guerre luy fournissoit de s'auancer, & de faire progres dans

l'esprit de Roy , & dans l'estime de toute la France. Il regagnoit aussi par mesme moyen la liberté , sans laquelle il ne pouuoit se faire valoir que par la patience ; qui est vne vertu qui n'est pas de grand merite ny de grand esclat dans la vie ciuile , & reprenoit la place qu'il tenoit auparauant en la direction des affaires. Et ainsi Henry pour estre trop complaisant à l'auarice d'une Maistresse, & à la jalousie d'un Fauory ; fit vne paix & vne guerre mal à propos, & donna à l'Amour & à l'Amitié , les Interests de la Royauté & le deuoir de sa Charge, qui estoient des choses inalienables. Son Pere l'entendoit bien mieux, & il tesmoigna vne passion bien plus forte pour son Estat ; lors que pressé de receuoir sa liberté, à des conditions ruineuses & exorbitantes ; il protesta qu'il aymeroit mieux mourir en prison , que de reprendre vne Couronne notablement mutilée , & de laisser à ses Successeurs vn Royaume plus petit, qu'il ne l'auoit receu de ses Ancestres.

Le second Exemple est de Philippe second, que tout le monde sçait auoir esté si esperdument espris de l'amour de la Souueraineté,

& du bien de ses affaires; qu'il ne pardonna pas mesme à son propre sang, ny à la vie de son fils vnique, sur l'auis qu'on luy donna qu'il meditoit de la broüillerie, & qu'il deuoit passer en Flandres pour s'y establir. Et neantmoins ce Prince si amoureux de sa grandeur, & si jaloux de ses Interests; n'a pas laissé de relascher quelquefois de cette si forte inclination en faueur de ses Ministres, & d'estre indulgent à leur passion à son prejudice. Apres que les Flamens eurent commencé à se souleuer contre luy, & à ouurir cette fameuse Scene, sur laquelle s'est du depuis respandu tant de sang domestique & estranger; Marguerite Princeesse de Parme leur Gouuernante, les auoit reduits partie avec la douceur & l'adresse, partie avec la Iustice & les armes, à vn assez bon repos. Mais d'autant que cette tranquillité n'estoit pas bien affermie, & que tous les vents qui la pouuoient troubler, n'estoient pas entierement apaisez; On mit en deliberation au Conseil de Philippe, ce qu'il falloit faire en cette occurrence. Ce Conseil estoit mi-party, & comme deschiré en deux Factions opposées. Le Chef de l'vne estoit Roderico

Gomez Prince d'Eboly, qui auoit pour Sectateurs le Duc de Feria, esgallement bon Ministre de paix & de guerre, & Antonio Perez, non moins celebre par la longue & ardente persecution qu'il a soufferte; que par la charge de premier Secretaire d'Etat d'Espagne, qu'il a long temps exercée. Gomez n'estoit gueres propre que pour le Cabinet, & les affaires estoient plus son element, que la guerre. Mais sa meilleure qualité estoit l'inclination que Philippe auoit pour luy, & l'art avec lequel il sçauoit admirablement s'ajuster à toutes les humeurs, & à tous les sentimens de son Maistre.

Le Chef de l'autre Faction estoit le Duc d'Alue, dont le nom porte en soy assez de reputation & de lumiere, sans qu'il soit besoin d'autre chose pour le faire connoistre. Ses Adherans estoient le Cardinal de Spinosa, qui auoit autrefois si absolument gouverné Philippe; qu'on l'appelloit le Monarque de l'Espagne, & Granuelle Euesque d'Arras, qui nourrit tousiours des Esprits guerriers sous la robe d'un Prelat, & qui en vouloit particulièrement aux Flamens, dont il auoit esté

mal-traité, & qui n'ayant pû souffrir son Administration; auoient contraint Philippe de le rappeler. Le Duc d'Alue ne reüssissoit pas mal dans le Cabinet; & n'estoit pas mal propre pour l'Intrigue; Mais son principal talent, & comme le grand Theatre de sa vertu, estoit la guerre. Personnage au reste plus considerable à son Maistre, à cause des seruices qu'il auoit rendus à l'Espagne, & qu'il luy pouuoit encore rendre; qu'agreable pour les conditions de sa personne, & qui estant d'un Temperament superbe & farouche; n'estoit pas mesme aymé de ceux à qui il faisoit du bien.

Sur la Relation donc qui fust enuoyée par la Princesse de Parme, de l'estat des affaires de Flandres; Chacun de ces Chefs de Part donne ses auis; & opine en apparence & avec des raisons colorées, conformément au bien de Philippe; mais en effet & dans le fons de ses intentions, conformément à sa passion; & à ses fins particulieres. Le Prince d'Ebo-ly craignant que si Philippe alloit au Pays Bas, pour y renger avec la force les Flamens souleuez, & les remettre avec les armes sous le joug qu'ils auoient secoüé; Le Duc

d'Alue ne fust en trop grande consideration auprès du Roy ; à cause de la necessité qu'il auroit de son seruice , & n'attirat à soy la plupart des braues gens & la meilleure partie de la Cour ; à cause du rang où il monteroit , & du principal employ qu'il auroit dans l'armée ; Rejette absolument la voye des armes , & conseille celle de la douceur , & de laisser esteindre de soy-mesme & sans violence , le peu de chaleur qui restoit à l'inquietude des Rebelles. D'autre costé le Duc d'Alue , qui voyoit que la paix le mettoit presque hors d'œuure , ou le laissoit sur les degrez pendant que Gomez demeuroit au faiste ; soustient qu'il n'y auoit que le fer & la présence du Roy , qui pûssent guerir la maladie des Flamens , & qu'il falloit oster aux Rebelles la puissance de remuer ; pour s'asseurer qu'il n'y auroit plus de Rebellion , & coper l'arbre à la racine ; pour empescher les branches de pousser & de produire .

Philippe enfermé entre ces deux auis contraires , & ne voyant que trop clair dans l'intention de ces deux Ministres , dont il aymoit chèrement l'un , & estimoit extremement

l'autre; oublie ses Maximes, & se départ de sa propre inclination qui estoit le bien de ses affaires; pour contenter la passion de ses Ministres par vn temperament qui luy fust funeste. Il se resout donc pour la satisfaction de Gomez, de ne quitter point l'Espagne, sous couleur que sa presence y estoit necessaire, pour contenir les Morisques, & empescher son fils Charles de broüiller durant son absence. Et pour applaudir à l'humeur indocile & imperieuse du Duc d'Alue; Il le destine Gouverneur des Pays Bas, & luy donne le commandement d'une armée capable de les subjuguertous, quand mesme ils seroient tous reuoltez, & de mettre à la raison tout ce qui luy pourroit estre contraire. Gomez trouuoit largement son conte au premier de ces deux partis, & demeurant le plus puissant du Conseil; il demeueroit en quelque façon Superieur au Duc d'Alue; qui en deuoit receuoir les ordres, & aux actions duquel il pourroit donner la face qu'il luy plairoit, n'estant pas éclairées des yeux du Prince. Le Duc d'Alue aussi auoit dequoy estre content du dessein que le Roy auoit fait, de l'enuoyer comman-

der vne puissante armée, & exercer vne grande charge, en vn pays où il ne verroit personne au dessus de luy, & où il seroit l'Arbitre du destin d'une infinité de peuple, & de dixsept belles prouinces.

Mais l'interest de Philippe & les Loix de la bonne Politique requeroient; qu'il n'eust point d'esgart à l'inclination de Gomez, ny à celle du Duc d'Alue, & qu'il allat luy mesme en personne, & avec vne bonne armée aux Pays Bas; pour y confirmer la tranquillité encore mal assurée, & pour y dispenser la rigueur & la clemence, selon la disposition des esprits, & l'exigence des Conjonctures. Ou bien certes s'il n'estoit pas expedient pour des considerations importantes, de sortir de l'Escorial, & de rompre les chaines qui l'attachoient à l'Espagne; Il ne deuoit jamais rappeler de Flandres la Gouuernante, qui eust pû facilement acheuer, ce qu'elle y auoit heureusement commencé, & qui n'auoit besoin pour cela que d'un peu plus de forces qu'elle n'auoit, pour rendre son Administration vn peu plus redoutable qu'elle n'estoit aux Flamens, qui auoient d'ailleurs de l'amour &
de la

de la reuerence pour sa personne.

On voit par ces Exemples, combien il est mal-aisé que les Ministres des Princes entrent dans leur Conseil, libres de passion particuliere; puis que les Princes les plus abiles & les plus interessez; se frapent quelquefois de cette contagion, & gastent leurs affaires par complaisance. Cela n'empesche pas que ceux dont nous venons de parler; n'ayent esté grands personnages, quoy que quelquefois ils aient fait des fautes: ny que leurs Vies ne soient d'excellens Miroirs pour ceux qui gouvernent, quoy que ces Miroirs ne soient pas sans tache. Il est des Regnes illustres, comme des Temples augustes & des Palais magnifiques. Bien qu'on ait fait profusion de richesses, & choisi les meilleurs Architectes du monde, pour les bastir; on y trouue tousiours quelque defaut apres qu'ils sont faits, & les choses de l'Art ont cela de commun avec les Naturelles, de n'estre jamais de tout point parfaites. Comme en l'œconomie des mœurs de l'homme; la Raison ne tient pas tousiours tellement l'ascendant sur les passions; que les passions ne le prennent quelque,

G

fois sur la Raison, & que ce qui est du domaine de l'Esprit; ne cede à ce qui est des appartenances de la Beste. De mesme quoy que les Princes s'attachent le plus fortement qu'ils pourront, à représenter les personages de Princes; ils ne sçauroient s'empescher de temps en temps, de joüer celuy de particuliers, & que les inclinations de la Nature ne gagnent le dessus, sur les devoirs de la Charge. L'immobilité au bien; n'est pas du sort & du partage de cette miserable vie, & la constance qui n'est coupée que de quelque petit changement; est dans mon sens vne des grandes merueilles qu'on y voye. Il n'y a point d'Ame si mediocre, qui ne soit capable de quelque fougue & de quelque boutade de vertu heroïque; Mais il n'y en a point de si heroïque, qui puisse maintenir sans relasche la roideur du vol qu'elle aura pris, & tenir toutes choses au dessous de soy, sans jamais se metre au dessous d'elles. Celles qui approchent de plus prez de cét estat, & qui se haussent & baissent quoy qu'il arriue, moins rarement que les autres; sont sans doute les plus nobles & les plus belles de toutes les Ames, &

DV MINISTRE D'ESTAT. 51

cette égalité de conduite telle qu'on la peut aquerir en cette vie; est quelque chose de plus admirable & de plus grand prix en elle mesme, quoy que non pas de si grand esclat ny de si grande vtilité; que la Science de faire la guerre, de conduire des Negotiations, & de gouverner des Empires.

La seconde Règle que les Princes doiuent suiure, en l'vsage de cette dure Iustice dont nous faisons le portrait; c'est que comme Dieu ne punit pas les Pecheurs d'abord qu'ils l'ont offensé, ny ne jette pas sa foudre sur les premiers crimes des hommes; Les Souuerains aussi ne doiuent pas se haster de venir aux remedes extremes, & de prendre les armes, apres qu'ils ont receu quelque injure. Ils doiuent se représenter que de tous les emplois & de toutes les entreprises humaines; Il n'y en a point où la précipitation soit si dangereuse, qu'à commencer vne guerre: ny où il faille fonder plus de passages, & reconnoistre plus de chemins, auant qu'on y entre. Ils se doiuent souuenir, qu'outre cette triste necessité qui est inseparable de la plus innocente guerre du monde, de deuorer vne infinité

de bien & de vies; Il n'y en a point où les Reuolutions soient si subites, & les Conclusions si incertaines. Vne Roüe qu'on esbranle avec roideur, ne met pas plus viste en bas ce qui estoit en haut. La Mer n'est pas plus infidele, & n'altere pas plus promptement sa bonace, & l'esperance des Laboureurs, n'est pas si souuent trompée par la sterilité des Moissons; que les prosperitez des armes changent, & les entrées de la guerre sont démenties par les issuës. Bref qu'il arriue assez souuent, qu'apres beaucoup de feux allumez, & de tempestes excitées: apres vne quantité immense de sang versé, & de Richesses englouties; On trouue qu'il faut rentrer de nouveau dans la Carriere, ou reuenir au lieu d'où l'on estoit party, apres auoir long temps tournoyé; ce qui est tout chemin de desolation & de ruine.





DISCOVRS QVATRIEME.

Qu'il faut observer quelque Iustice aussi bien en la forme qu'en la matiere de la guerre. Qu'il faut garder la Foy aux Heretiques & aux Infideles. Que les Chrestiens ont d'assez justes sujets de faire la guerre au Turc sans se servir du pretexte de la Religion.



POVR éviter cette précipitation si dangereuse, dont nous venons de parler, & pour ne s'embarquer pas en cecy mal à propos, & mettre hors de saison la voile au vent; Il ne suffit pas qu'on connoisse que la guerre qu'on veut entreprendre est juste; si l'on ne juge aussi qu'elle est necessaire, & que c'est le bien de l'Estat qu'on l'entreprenne. Il faut qu'en cette occasion plus qu'en nulle autre s'il est possible, l'Honneste & l'Vtile mar-

chent ensemble, & que ce soient les deux Poles, sur lesquels tout le cours de la guerre tourne. Mais le mal est, que cette seconde condition n'est pas tousiours au pouuoir des Princes, comme la premiere, & qu'il n'y a point de Regle certaine, ny d'Espreuue estable pour s'en asseurer, comme de l'autre. Nous ne laisserons pas pourtant d'essayer, d'apporter quelque jour à vne matiere si obscure, & de donner quelques adresses pour empescher qu'on ne s'esgare en vn pays si peu connu; apres que nous aurons dit quelque chose de la Iustice.

Pour ce qui est de celle-cy; Je dis en premier lieu, qu'il est necessaire qu'elle regne s'il se peut, sur toute l'estenduë de la guerre, & s'espande aussi bien sur les accidens que sur la substance, & sur la forme que sur la matiere des actions militaires. Par exemple pour dire vn mot de la maniere & de la forme, avec laquelle on les doit conduire. (Car il y a des matieres que je veux traiter à fons, & d'autres que je ne veux que legerement toucher;) Il est certain qu'il est indigne d'un homme de cœur, de se salir du sang d'un Ennemy qui est

hors de combat, & que c'est vne chose honteuse, que les pieds foulent ce que les mains ont abatu, & qu'on oste la vie à qui la demande. Il faut contenir sa chaleur & sa bile dans les bornes de la victoire, & ne les porter pas au delà; Si ce n'est peut-estre qu'on en ait besoin pour l'asseurer, ce qui arriue rarement; ou par quelque droit de Reuanche, qui exige qu'on ne donne point quartier, à ceux de qui on ne le reçoit pas, & permet qu'on fasse cesser les rauages par les degats, & les embrasemens par les incendies. Encore y a t'il des actions sur lesquelles la Reuanche ne peut s'estendre, & il n'est pas loisible d'imiter les violemens & les sacrileges, ny peut-estre de donner aux Ennemis des morts inhumaines, à leur exemple. En vn mot il y a des Loix qu'on appelle de la bonne guerre, que le Marechal de Brissac a autrefois rendu si fameuses en Piedmont, qu'il faut observer affin qu'elle soit vne action de Iustice, selon l'intention du Dieu des armées; & non pas vne pure violence, & vne corruption manifeste du droit des gens; suiuant les suggestions du Dieu de ce monde & du Prince des tene-

bres; pour vser des termes de la Bible.

Il est donc vray qu'un Prince ne doit jamais auoir les armes à la main, que la Iustice ne les luy mete, ny les manier que sous quelque forme d'honnesteté, & sous quelque air de bien-seance. Il est encôre vray qu'il ne doit pas faire vne mesme chose de l'Vtile & de l'Honneste; puis qu'ils ne le font pas: ny confondre deux qualitez si distinctes; comme ont fait quelques vns des Anciens, & comme font quelques Modernes. L'ocasion de s'acroistre, & la facilité de conquerir, ne doiuent point l'esbranler; s'il ne peut s'acroistre en conscience, & conquerir legitiment. Vne telle moderation sera plus courageuse & magnanime; que ne seroit aucun acte de vaillance, & il n'y a point de victoire à obtenir sur les Ennemis, qui soit si belle & de si grand prix; que celle qu'en cecy il obtiendra sur luy-mesme.

Mais pour sortir des termes de la generalité qui est trop vague & indefinie, & descendre à des considerations particulieres, qui sont plus instructiues & plus touchantes, que les generales; Je dis en second lieu, qu'il se
doit

doit bien donner de garde de juger par l'euement, de la Iustice ou Injustice de quelque entreprise, & d'attendre de l'appeller bonne ou mauuaise, selon qu'elle aura reüssi, & qu'elle aura eü le vent propice; ou le temps contraire. Il regardera avec auersion la pensée de cét honnest'homme d'Espagnol, qui suivant le party des Communes de son pays souleuées contre leur Roy Charles, escriuit à vn sien amy de party contraire; Que le gain ou la perte de la bataille qui se deuoit donner le lendemain, declareroient qui auroit le droit ou le tort de son costé, & que la marque & le prix de la Iustice du bon party, seroit la victoire. Il aura horreur du conseil que donnoit l'Amiral de Chastillon au Prince de Condé, de ne faire point difficulté de violer le Traité, par lequel il s'estoit obligé de sortir du Royaume, si Messieurs de Guyse se retiroient de la Cour, & de charger l'armée du Roy, qui endormie de cette esperance, & se reposant sur sa parole; ne se tiendroit pas sur ses gardes. Que la victoire s'il l'obtenoit rendroit sa cause honneste & ses armes justes, & si elle demeueroit au Roy; toute autre Iustice seroit

H

pour luy ridicule, & toute autre raison vaine. Cela s'il est vray, comme peut-estre il ne l'est point, & si Dauila qui le rapporte ne trompe pas; c'estoit entendre comme il faut la Maxime de Machiauel, de n'estre point meschant à demy, & sçauoir combler la malice: c'estoit quelque chose de plus, que de coudre la peau du Renart à celle du Lyon: ce n'estoit pas faire la guerre à l'ordinaire; c'estoit la faire avec des armes empoisonnées. C'est donc vn point fixe, & vne Maxime constante de Moralle & de Politique; que comme on ne juge pas tousiours de la prudence d'une entreprise, par le bon-heur de l'euuenement; on ne doit jamais juger de l'honnesteté d'une action, par le bon succez qu'elle aura eü: ny de la Iustice d'une guerre, par la victoire dont elle sera couronnée.

Je dis en troisiéme lieu, que comme il n'y a point de guerre d'une necessité si forte, & qui ait le dehors si specieux; que lors que la Pieté s'y trouue jointe à la Iustice, & qu'on deffend les Autels en maintenant ses interests; Il faut bien éuiter aussi d'interessier Dieu en ses desseins, si veritablement il n'y est interes-

fé, & d'imiter Ferdinand de Castille, qui faisoit quelquefois bien pis que de prendre son Nom en vain; puis qu'il ne manquoit jamais de l'employer, pour donner couleur au mal qui luy estoit vtile: & ses descendans auroient fouuent esté bien empeschez de pallier leur Ambition & leur Auarice; s'il n'y auoit point eü de Religion, ou s'il n'y auoit point eü d'Infidelité ou d'Herésie dans le monde. On ne doit pas encore croire, comme quelques vns se le sont persuadez, ou ont tasché de le persuader aux Princes; que la bonté d'une fin, fust-ce la gloire de Dieu ou le salut des Ames; puisse rectifier les moyens qui sont mauuais en eux-mesmes: ny que le venin & la malignité d'une cause; se corrige & se tempere, parce qu'il y a de bien-faisant & de salutaire dans l'effet; comme nous le monstrerons en vn autre endroit.

Je passe outre & dis en quatriéme lieu, que bien qu'il faille extremement deferer à l'autorité de ceux, que Dieu a commis au plus haut ministere de la Religion, & à la plus absolüe direction des Consciences; Il ne leur faut pas pourtant deferer tout en toutes cho-

H ij

ses, comme ils ne le pretendent pas aussi: ny croire qu'ils puissent dispenser de faire du mal, & deliurer d'une obligation, du premier ou du second droit de Nature. Si Ladislas Roy de Hongrie eust eü la force de resister au Legat, qui le porta à rompre sans sujet, ou sans autre sujet que de bien-seance; la paix qu'il auoit faite avec Amurat Empereur des Turcs, & s'il ne se fust laissé esbloüir à cette pretendüe puissance, que l'autre disoit auoir de delier ce Nœu que le droit des gens auoit formé; Il n'eust pas laissé la vie à Varnes avec la perte de la bataille, & Amurat auoit raison, lors qu'au milieu du combat & au fort de la meslée, la victoire sembloit incliner du costé de Ladislas; d'appeller Iesus Christ à la punition d'un crime qui le regardoit, & à la vengeance d'un Traité violé; où l'on auoit interposé son Nom pour le confirmer. Si Henry second eust plustot suiuy l'avis du Connestable de Montmorancy, & du Mareschal de Brissac, qui l'exhortoient à obseruer la Treue qu'il auoit faite avec l'Empereur; que les suggestions de Messieurs de Guyse & de la Duchesse de Valentinois, qui l'en diuertirent,

sous pretexte que le Pape l'en dispensoit ; Il n'eust pas expié cette Infraction par le malheureux succez de ses armes dedans & dehors le Royaume , & par cette longue & pesante chaisne de maux , dont depuis la France fust enuelopée.

La Religion n'est pas descenduë du Ciel, pour esteindre les vertus qu'elle a trouuées en Terre, ny pour démolir le plus admirable ouurage que la Raison y ait produit, qui est la Societé ; en destruisant son premier fondement & sa principale Base , qui est la bonne Foy. Que si elle deffend quelquefois le commerce & la communication, avec les Heretiques & avec les Infideles ; c'est lors que cette communication peut estre contagieuse à l'Esprit , & qu'il y a danger que les erreurs & les vices ne se transportent , & ne passent conjointement avec les choses permises. Et cela n'est pas tant vn droit nouveau & positif, que la Religion introduise ; que cét ancien commandement du droit de Nature, *de fuir les occasions du mal*, qu'elle renouvelle : ou plustot que ce commandement vague & illimité qu'elle determine , & qu'elle applique à

62 SECONDE PARTIE

vn vſage particulier, & à vne matiere certaine. Mais ſans cela, puis qu'après que le Genre humain s'eſt deſchiré en Creances & en Couſtumes ; Il luy eſt encore demeuré des Loix generales, & vn Droit commun. Puis que l'Infidelité ny l'Hereſie, n'empeschent pas les Souuerains, d'eſtre Seigneurs legitimes de leurs Eſtats, ny les Particuliers d'eſtre veritables proprietaires de leurs biens ; Et par conſequent que l'vſage de la Juſtice Commutative & celui de la Diſtributive, ne ſoit eſgalement ouuert, & le commerce pour les choſes temporelles dont ils ont beſoin entre-eux, permis à tous les Princes & à tous les Peuples, aux Chreſtiens & aux Infideles, aux Catholiques & aux Heretiques ; Les Catholiques entre tous les autres, comme faiſans profeſſion d'une Doctrine plus celeſte, & d'une vie plus innocente ; ſont obligez d'en obſerver plus inuiolablement les Loix, & d'en maintenir plus religieusement les Priuileges : de ne donner point d'exemple d'infidelité & de tromperie, que les Meſchans pourroient refleſchir ſur la Religion ; & de faire touſiours luire cette belle marque de la ſainteté de leur Creance,

qui est la sincerité de leur conduite.

En vn mot pour ne m'enfoncer pas fort auant en vne matiere, dont je traite amplement en vn autre endroit; le me contenteray en suite de ce que je viens de dire, de metre icy cét Argument, pour demonstrier la necessité qu'il y a de garder la Foy aux Heretiques & aux Infideles. Qu'à tous ceux avec qui on peut traiter & faire commerce en conscience; on est obligé en conscience de tenir les choses promises, quand le Traité s'est fait sans fraude & sans violence, & sans cette juste crainte, qui tombe dans l'Ame des gens de cœur, & qui ne leur laisse qu'une liberté mutilée. Cette conclusion coule si naturellement & si necessairement de ses principes; qu'il ne faut point d'autres preuues pour l'establir, ny d'autres lumieres pour l'esclairer.

Et neantmoins cela n'empesche pas, que comme il n'y a point de jour si serein, qui ne soit terny de quelque nuage; Cette verité si claire naturellement, & si conforme à la raison & à l'honnesteté; n'ait esté exposée à l'Art des Sophistes. Mais qui ne sçait que cette de-

prauation de sentimens , a procedé d'un zele
chaut & aueugle , qui faist quelquefois les
plus grands Docteurs : ou d'une complaisan-
ce lasche & prostituée , qu'on a voulu rendre
aux Princes , qui vouloient bien estre parju-
res, d'autant que cela les acommodoit ; Mais
qui ne le vouloient pas paroistre , à cause que
cela les eust trop descriez. Aussi certes cette
Doctrine , qui n'est jamais venuë au monde
que fortuitement , & n'a paru au jour que
dans la violence de quelques occasions qui l'y
ont poussée ; a tousiours disparu avec les causes
qui l'ont produite , & saint Louys dont la pie-
té ne peut estre reuouquée en doute que par les
Impies ; n'en estoit point frapé lors qu'il a trai-
té avec les Sarrafins : & ceux qui s'en seruent
seroient bien marris qu'on leur rendit la pa-
reille , & que ceux qui n'ont pas , quoy qu'à
faux , de moindres pensées qu'eux , de la verité
de la Religion qu'ils professent ; creussent
qu'il leur estoit permis de faire le mesme en
leur endroit sous ce pretexte. Nous exami-
nerons au long en un autre lieu la force & le
poids de cette consequence.

Que si l'on oppose à cette verité , que ce
qu'on

qu'on promet aux hommes ; n'apporte pas vne obligation plus estroite, ny ne forme vn nœu plus indissoluble, que ce qu'on promet à Dieu ; dont il est certain que le Pape peut dispenser en certaines occasions, & pour des causes importantes. On respondra qu'il est certain que le Pape le peut, & qu'il peut deliurer de l'obseruation du vœu d'une bonne chose, pour vne autre qui sera meilleure, ou qui sera esgalement bonne. Mais qu'en cecy il ne fait rien qu'ayant charge de la part de Dieu, & qu'en vertu de cette Commission generale & particuliere qu'il a, de rechercher tousiours ce qui est de sa plus grande gloire, & du plus grand bien des Ames. Il ne fait rien que mesnager ses Interests : qu'ayder à faire valoir le talent des fideles, & qu'estre ce bon œconome, & ce prudent dispensateur du bien & des graces de son Maistre, dont parle la Bible. Que de changer vne chose de moindre valeur, avec vne de plus grand prix ; c'est tousiours gagner au change, & que d'en receuoir vne qui n'est pas inferieure en valeur & en bonté à celle qu'on quitte ; ce n'est rien perdre pour Dieu, & c'est s'acommoder au besoin des

Ames, & vser d'une indulgence raisonnable . C'est suiure les intentions du Maistre , & la douceur de sa conduite : c'est agir dans l'humeur de ce genereux Creancier, qui n'exige pas à la rigueur de ses Creatures , ce qu'elles luy doiuent ; Mais qui leur fait tousiours la composition qu'elles luy demandent , & ne leur demande que ce qu'elles luy peuuent donner commodement , & sans violence. Mais pour ce qui est des droits & des Interests des Heretiques & des Infideles ; ils n'en ont pas constitué le Pape maistre ou arbitre, comme tout le monde sçait . C'est pourquoy il ne peut aussi ny rien ordonner, ny dispenser de rien à leur prejudice, de ce qui aura esté traité de bonne foy , & selon le droit commun, en ces matieres de commerce ciuil & de police temporelle.

Il passe de cette matiere à vne autre , avec laquelle elle s'enchaîne naturellement, & dis en cinquième lieu, que la Religion toute seule, soit pour la planter aux lieux où elle n'est pas : soit pour la deffendre dans les Estats où elle est persecutée ; ne peut estre le fondement d'une juste guerre. Que si les Escrits de quel-

ques saints personnages, ne sont semez que d'exhortations aux Chrestiens de prendre les armes contre les Turcs, & si les Predicateurs taschent tous les jours de les enflammer de ce saint zele. Si les Papes ont autrefois publié des Croisades pour ce sujet, & si les plus grands Princes de la Chrestienté s'y sont enrollez, & ont mis pour cela sur pied de formidables armées; il ne faut point s'imaginer, que ç'ait esté directement pour exterminer la Secte de Mahomet, & pour abolir l'Alcoran, qu'on ait pris les armes. Il ne faut point croire, que ç'ait esté pour contraindre les Mescreans de changer de Religion, ny pour imprimer le Christianisme dans leur esprit avec le fer; qu'on ait fait la guerre. Cela est fort esloigné du genie de nostre Religion, & fort contraire aux mœurs de la primitiue Eglise, qui n'opposoit jamais que la patience à la force, ny ne laissoit respandre d'autre sang, que celui de ses enfans, quand elle estoit outragée; comme nous le dirons en vn autre endroit, où nous reseruons les preuues du second membre de la proposition que nous auons auancée.

C'est donc dans les limites de l'Interest temporel, que la guerre contre le Turc est premierement restreinte. C'est directement contre la puissance des Ottomans, & non pas contre les erreurs de Mahomet; que les Chrestiens tirent l'espée. Et pour cecy ils n'ont pas faute de droit, ny ne manquent pas de tiltres valla-
bles. Les vsurpations que ce Tyran a faites, des plus beaux membres de leur Empire, & les despoüilles de tant d'Estats qu'il leur a volez, dont il se pare; sont des sujets qui ne laissent pas douter, qu'ils ne puissent legitime-
ment armer pour recouurer leurs pertes, & pour retirer d'entre ses mains les pieces qu'il a recueillies de leur debris. Outre cela le des-
sein constant qu'il a fait, & le vœu perpetuel dont sa Religion le lie, de trauailler à destruire le Christianisme: & l'esprit de cette barbare Religion, qui ne dresse qu'à la rapine & aux meurtres, & qui a pros crit & confisqué les biens & les vies de tous ceux qui n'en sont pas; ne permettent que trop aux Chrestiens, non seulement de se deffendre quand il les attaque, & de resister à l'orage lors qu'il esclate de ce costé-là; Mais encore d'attaquer & de

preuenir , si quelque autre consideration ne s'y oppose.

Que si le cours de la guerre & le sort des armes portent quelquefois , qu'il se concludè ou Paix ou Treue entre le Turc & quelque Prince Chrestien ; Celuy-cy en doit obseruer legalement les conditions , tant que l'autre les obseruera de son costé , & ne venir pas à rupture ; s'il ne commence , ou s'il ne se prepare à rompre. Ou bien certes si le Turc qui ne laisse jamais ses armes sans employ , ny ses gens de guerre sans exercice : qui ne fait que courir & tournoyer tousiours , pour attraper quelque proye ; se ruë sur l'Estat de quelque autre Prince Chrestien ; Le premier le peut secourir en conscience , & agir contre l'autre legitiment , & sans estre violateur de sa foy , ny deserteur de sa parole. Car outre le deuoir que la Charité impose , & cette generale obligation que le droit des gens aporte , de ne laisser pas opprimer les foibles par les plus forts ; on entre alors dans les termes de la deffense , qui est tousiours permise bien qu'elle soit indirecte , & ne laisse pas d'estre juste , quoy qu'elle soit anticipée. Et à dire vray que fait

alors autre chose vn Prince Chrestien , en repoussant la violence qu'on fait à autrui; que d'aller au deuant de celle, qui se prepare contre luy-mesme: que se haster d'esteindre le feu qui brusle la maison de son voyfin, auant qu'il s'attache à la sienne, & ayder à faire des remparts & des digues contre la Mer, qui inonderoit son pays apres auoir submergé celuy de ses Alliez.

Hors de là, & pendant que le dessein de sa ruine repose en l'Ame du Turc, & que l'execution du vœu dont nous auons parlé cy-dessus, est suspenduë; il doit garder inuiolablement les conditions du Traité qu'il aura fait aueque luy, & n'estre pas le premier infracteur du Sceau du Commerce public, & du principal lien de la vie ciuile, qui est la bonne Foy. Il est aisé à inferer de ce que je viens de dire; que les Chrestiens en general, n'ont que trop de sujets formiez, & trop de voyes parées, pour entrer quand ils voudront en vne juste guerre contre le Turc, & il y a dequoy s'estonner, comme j'ay remarqué au premier Discours, de ce qu'au lieu de tourner leurs armes, contre

DV MINISTRE D'ESTAT. 71

vn Ennemy qui n'est pas moins puissant
qu'irreconciliable; Ils les conuertissent con-
tre eux-mesmes: Ils les plongent dans leurs
propres entrailles, & les enyurent, s'il m'est
permis d'vser de cette hardiesse Poëtique,
du sang de leurs freres.





DISCOVRS CINQVIEME.

Que la deffense de la Reputacion offensée est le sujet d'une juste guerre. En quoy consiste cette Reputacion. Que le Roy n'a pû éviter avec honneur de rompre avec les Espagnols, qui avoient fait surprendre la ville & l'Electeur de Treues, qui estoient sous sa protection.



L ne faut pas pourtant s'imaginer que la deffense de l'Estat, soit directe ou indirecte, en la façon que nous l'auons circonscrite; soit le seul tiltre qui rende les armes du Prince justes. Il y a encore d'autres tiltres & d'autres considerations, qui les luy metent legitimement en main. Il y a encore d'autres playes à fermer, & d'autres breches à refaire, que la ruïne de ses sujets. Il y a à venger les outrages qu'on fait à l'honneur, & à purger les taches qu'on imprime à la Reputacion de la Couronne qu'il porte. Il y a à empêcher

empescher que celle-cy qui est vne des Colomnes qui en soustiennent la grandeur ; ne prenne coup & ne tombe. Mais d'autant qu'on se pourroit équivoquer sur ce mot de *Reputation*, & prendre pour ce sujet vn change de dangereuse conséquence ; Il ne sera pas hors de propos de l'esclaircir & demesler ; ce qui se fera par vne distinction fort facile, & que j'ay desia aucunement designée.

Il est donc certain qu'il y a deux sortes de Reputation qui sont propres des Estats, & qui entrent dans l'ordre des biens qui leur appartiennent. L'une consiste au bruit que fait la puissance au dehors, & en l'esclat qu'elle y jette. Celle-cy se forme du merite & de la fortune du Prince : du nombre & de la vertu de ses sujets : des devoirs de la sujction & des droits de la Souveraineté : de l'estendue du pays & de son assiete : de la fertilité du terroir : de la commodité du commerce, de la fécondité des Mines : des forteresses des armes & des munitions de guerre &c. L'opinion donc qui emane & rejallit de ces choses & d'autres semblables, dans l'esprit des hommes ; est la Reputation dont je parle & de la-

K

quelle il n'y a point de doute, que le Prince ne doive estre extremement jaloux, comme d'une chose qui fait quelquefois de grands coups quand la Puissance est infirme, & que quelqu'un a comparée fort à propos au credit des Marchands, qui les maintient en honneur & en lustre; bien qu'effectivement ils soient pauvres, & leur donne souvent moyen de remplir le vuide caché de leurs affaires, & de reparer le foible de leur fortune, qui ne paroît point.

Cela ne fait pas neantmoins, que quand on blesse un Prince en cet endroit, & qu'on descrie sa Puissance: quand on diminue ses prosperitez, & qu'on enfle ses disgraces: quand on tasche d'abaisser ce brillant de grandeur & de force, dont il frappe les yeux des Estrangers, & de couvrir de tenebres la face extérieure de ses affaires; ce soit un sujet de juste guerre. La raison de cela est, d'autant qu'il ne faut jamais venir aux remedes forts que contre les maux extremes, ny employer la violence contre les accidens, qu'on peut vaincre avec l'industrie. Il faut qu'il y ait quelque proportion entre les armes avec lesquelles on résiste, & celles

dont on nous attaque. On nous combat avec les forces de l'esprit ; Il n'est pas raisonnable d'apporter celles du corps à nostre deffense. On seme par tout de faux bruits qui nous sont defavantageux ; ayons soin de faire luire par tout la verité qui leur est contraire. Si nous sommes vigilans & ingenieux ; nous n'aurons rien à craindre de ces artifices, & les desseins de nos Ennemis, auront vn fort pareil à celuy des Mines ; qui ne font point de mal si on les éuente.

Mais il y a vne autre espece de Reputation, & vne autre sorte d'Honneur, dont le Prince ne doit point souffrir la flestrisseure, & dont il doit poursuiure la reparation avec les armes, s'il ne la peut auoir autrement, quand on l'outrage. C'est pour le dire en vn mot la dignité de la Couronne, & l'honneur de la Souueraineté. Ce sont certains priuileges & certaines prerogatiues, que le droit des gens y a attachées ; auxquelles il ne doit point laisser toucher sans s'en ressentir, ny permettre qu'on les viole & qu'on les effleure, sans s'y opposer avec la force. L'injure par exemple faite à vn Ambassadeur, dont la personne est sainte &

consacrée par le droit commun, & du consentement de tous les peuples & de tous les âges; est le sujet d'une guerre legitime, & François premier ne sçauroit estre blasmé, d'auoir rompu avec l'Empereur Charles, à cause de l'assassinat de Ringon & de Fregose ses Ambassadeurs, que le Marquis de Gast auoit fait cometre, & dont il ne pût jamais tirer raison, en quelque deuoir qu'il se fust mis pour la demander.

L'Infraction d'un Traité, qui est une marque du mépris qu'on fait du Prince, ou du peu de consideration en laquelle on a son Estat; est un autre tiltre de juste guerre. Que si les personnes des Ambassadeurs sont inuiolables, & doiuent estre vniuersellement respectées, à cause que ce sont les liens viuans du commerce, & les instrumens animez de la correspondance des Princes; par la mesme raison les Traitez qui sont les sceaux inanimez, & les attaches mortes, pour le dire ainsi, de ce commerce & de cette correspondance; doiuent estre sacrez, & les infracteurs chastiez de la peine que le droit des gens permet de prendre. Outre que comme il n'est pas possible,

que l'un des Princes ne tire auantage de la violation du Traité qu'il a promis d'observer; Il est impossible aussi par vne consequence necessaire, que l'autre n'en recoiue du dommage, & qu'il n'aquiere vn droit & vne faculté, de tirer raison de cette injure les armes à la main; si l'on refuse de la luy faire ciuilement & à l'amiable. On peut voir par là, que la guerre que le Roy a faite au Duc Charles; n'est pas vne injuste violence, ny la conqueste de la Lorraine vne inuasion illicite; puis qu'elles ont esté attirées par la violation de plusieurs Traitez faits avec la France: Et qui pourroit trouuer mauuais, s'il n'a perdu tout sentiment de bien, & le goust de tout ce qui est juste; que ce qui a esté laissé pour gage & pour seureté de quelque chose promise, demeure lors que cette chose manque, & que le depost soit retenu, quand on contreuient à la condition, sous laquelle il doit estre restitué? Mais je reserue à traiter amplement cette matiere, en la troisiéme partie, & à en oster là le voile que j'y laisse icy; au moins si la condition du temps le souffre, & que la prudence le conseille.

Voicyvn autre Point essentiel, où la Re-
putation est offensée, & pour lequel on peut
legitamment prendre les armes, & faire la
guerre. C'est pour redimer de vexation vn
Prince qu'on opprime pour la haine qu'on
nous porte, & à cause que ses intersts ont
quelque conjunction, & quelque attache-
ment avec les nostres. Ainsi le Roy a eü juste
sujet de couvrir de sa protection & de ses ar-
mes le Duc de Mantoue, contre le dessein que
les Espagnols auoient fait de le despoüiller,
pour cela seulement qu'il estoit né son sujet,
& qu'ils ne pouuoient permettre, qu'un Fran-
çois fust Souuerain en Italie. Combien pro-
fondement l'honneur de la France estoit blef-
sé de ce coup, & quelle honteuse reflexion
il se faisoit de cet attentat, sur la dignité de la
Couronne; Il n'y a personne qui ne le juge,
sans qu'il soit besoin de l'expliquer. Il n'y a
personne s'il n'est tout à fait aveuglé de pas-
sion pour l'Espagne, qui puisse approuver que
par tout où ils ont projectté d'establiir leur do-
mination, & d'estendre leur Monarchie; ils
y vueillent fermer la porte, & deffendre l'en-
trée aux François, quelque justice qui la leur

œuvre, & quelque droit qui les y appelle : & que ceux qui prennent à toutes mains & vsurent de tous costez ; ne puissent souffrir que les vrayz & legitimes Maistres jouissent de leur bien, ou recueillent ce qui leur appartient ; s'ils sont amis de la France. Je remets à vn autre endroit à représenter les autres raisons que le Roy a eües, & les autres motifs qui l'ont excité, à espouser la protection, & entreprendre la deffense du Duc de Mantoue.

L'Honneur oblige encore vn Souuerain, outre les autres deuoirs qui l'y peuuent conuiener, de faire valoir la protection qu'il aura donnée à vn Prince foible, & de faire respecter l'azile qu'il aura offert à vn malheureux. Je veux expliquer cette proposition par vn exemple. Apres que le feu Roy de Suede fust entré en Allemagne, avec cét extreme bonheur qui acompagnoit sa vertu, & qu'il eust appris à la Maison d'Austriche, qu'elle n'estoit pas inuincible ; Apres qu'estourdie des coups, qu'elle receut des mains de ce Conquerant ; elle ne songeoit plus qu'à s'empescher de tomber, & à rallier comme dans vn naufrage

quelques tables , pour y sauuer ce qui luy estoit demeuré de bien , & ce qui luy restoit d'esperance ; Le Roy qui seul pouuoit mettre vn frein à l'Ambition de ce braue Prince , & conjurer la tempeste qui menaçoit les Catholiques amis de cette Maison desolée ; leur offrit sa Royale protection , & l'ombre de son autorité ; hors de laquelle il n'y auoit point pour eux de salut ny de ressource. L'Electeur de Treues, qui ne creut pas estre obligé de perir avec ceux qui apparemment ne pouuoient pas se sauuer , ny de se laisser tomber , pour tomber seulement de compagnie ; accepta la protection de sa Majesté. Apres cela qui doute que le Roy ne fust obligé d'honneur & de Reputation , de deffendre les Estats & la personne de cét Electeur , de toute impression ennemie , & de tourner mesme ses armes contre les Suedois ; en cas qu'ils ne considerassent pas comme ils deuoient sa protection , & qu'ils vinssent à violer sa sauuegarde. Et de fait il a esté si religieux de ce costé-là , & a si peu considéré l'utile au prix de l'honneste , & le bien de ses affaires , à comparaison de l'honneur de sa parole ; qu'il est vne fois entré en quelque froideur

froideur avec eux, à cause qu'ils differoient de luy donner sur cela toute la satisfaction qu'il desiroit, & de luy remettre entre les mains vne place, qu'il s'estoit obligé de faire rendre à l'Electeur, apres qu'ils l'auroient conquise. *Philisbourg.*

Que s'il a eü raison d'vser de cette procedure à l'endroit de ses Alliez, & de leur tenir cette petite rigueur pour ce sujet; Il est visible qu'il a esté en des termes bien plus forts de justice & de deuoir, pour rompre avec ceux qui ont donné des auis & presté leurs armes, non seulement pour entreprendre sur les Estats de l'Electeur de Treues; Mais encore pour attenter sur sa liberté, & qui ont fait vn captif d'un Prelat & d'un Souuerain, avec qui ils n'auoient rien à demesler: qui ne les auoit point offensez, & à qui ils n'auoient point déclaré la guerre. Que peuuent-ils alleguer pour adoucir cette violence? & quel plastre trouueront-ils, pour déguiser & rendre plausible vn Cas si atroce? Si c'est pour l'amour de nous, & à cause de la protection que nous luy auions accordée, qu'ils ont opprimé vn innocent; Il faut confesser que la hayne qu'ils nous por-

L

rent, est non seulement bien implacable, mais encore bien injuste ; puis qu'elle jette son feu & exhalle son venin, sur les bonnes actions mesmes que nous faisons, qui ne leur sont pas contraires : puis qu'elle ne peut permettre que nous assistions ceux qu'ils ne sçauroient secourir, & leur seruions d'abry contre la tourmente, dont ils sont batus & mal-traitez les premiers : puis qu'elle nous veut interdire jusqu'aux deuoirs de Charité qui emanent du droit de Nature, & nous oster toute sorte de commerce auec les autres Princes, jusqu'à celui des bien-faits.

Cela estant, comme il n'en faut pas douter ; je laisse à juger au Lecteur libre & non passionné, si ce sont eux ou nous qui ont en cecy commencé la brouïllerie : qui ont esté les infracteurs de la paix de Veruins, & les premiers auteurs de la guerre. N'ont-ils pas fait la mesme chose, que s'ils auoient contreuenue aux clauses expresses de ce Traité, quand ils ont violé celles pour lesquelles on ne traite jamais, & qui s'entendent assez sans qu'on les y mette ? Que l'vne Couronne n'attentera point contre la dignité de l'autre, ny ne l'of-

fenfèra en la perfonne de ceux qu'elle prote-
ge, & qu'elle couure de fon autorité & de
les armes. Puis donc qu'ils n'ont pas refpecté
les nostres, & que ce que la paix de Veruins
metoit à couuert, ne leur a pas esté inuola-
ble; peut-on nier qu'ils n'ayent esté les Agres-
feurs en cette querelle? qu'ils n'ayent allumé
le flambeau de la diffention dont les deux
Couronnes brullent, & commencé la guerre
par furprifes & par vols, que nous auons con-
tinuée ouuertement, & apres l'auoir decla-
rée. Certes s'ils fe fouuiennent de la modera-
tion de nostre conduite, & de la grace que
nous fifmes, qui n'estoit pas moindre que de
la vie, aux troupes Imperiales qui auoient
ocupé Heildelberg; Ils verront que nous
auons tousiours euité avec grand soin, de
rompre avec ceux-la mefme, qui ne nous ay-
moient point, & que n'ayans jamais craint les
forces de nos Ennemis; Nous auons tousiours
aprehendé les ruines que la guerre traifne, &
le deluge des maux qu'elle verfe.

Que s'ils veulent dire qu'ils ne nous ont pas
attaqué immédiatement, & ne font pas ve-
nus à nous de droit fil, & qu'ils n'ont vifé qu'à

l'Electeur de Treues, qu'ils auoient droit de chastier, pour s'estre départy de la protection qu'il estoit obligé de receuoir de la Maison de Luxembourg, dont ils sont les Heritiers, & auoir eü recours à vne protection estrangere, ce qui est vne espece de Felonnie. Que c'est le crime qu'ils ont poursuiuy, & leur honneur offensé qu'ils ont voulu reparer, aux despens de celuy qui en estoit coupable. Voila certes le fondement qui porte & qui soustient toute la justice de leur cause : voila le pretexte specieux dont ils la pallient : voila la belle couleur dont ils la fardent. Il n'est rien pourtant de si aisé, que de ruiner ce fondement : que de destruire ce pretexte : que de deffaire & d'effacer cette couleur. Car quand bien il seroit vray, comme on dit qu'il ne l'est pas, & qu'il n'y auroit point d'exemple, comme on assure qu'il y en a, contraire à ce qu'ils pretendent ; que l'Electorat de Treues est sous la protection de la Maison de Luxembourg qu'ils ont recueillie ; oseroient-ils nier, que lors que cette protection se trouue foible pour le deffendre, & cét azile mal-assuré pour le garentir ; il ne luy soit pas permis de

recourir à vne autre protection plus puissante, & de chercher vn azile plus considerable? Vne premiere protection en exclut-elle vne seconde? N'y a-t'il dans le monde qu'un seul azile ouuert contre la persecution? & ne se peut-il point faire de societé, ny former d'intelligence entre deux biens de mesme nature? La ville de Geneue a-t'elle outragé le Canton de Berne, & blessé la dignité de cette Republique, de qui elle a receu sa premiere protection contre les Ducs de Sauoye; lors qu'elle a recherché la nostre, & qu'elle s'est mise à l'abry & sous le couuert de cette Couronne? Le Roy a-t'il persecuté & poursuivy à outrance le Duc de Mantouë, pour auoir obtenu la protection des Venitiens, au mesme temps qu'il jouïssoit de la sienne? & Ceux-cy luy ont-ils fait la guerre, & ont-ils entrepris sur ses Estats & sur sa personne, pour auoir imploré si souuent celle du Pape? Sur tout il n'est rien de plus compatible ny de plus sociable, qu'une protection extraordinaire qui ne dure point, & qui passe & cesse avec le peril qui l'a attirée; avec vne protection permanente & ordinaire: & vn Prince est bien mal-

heureux ou fort imprudent, qui est réduit à vn seul moyen de se conseruer qui peut manquer, & qui pour sortir d'vn embaras & d'vne violence d'affaires; ne sçait qu'vne issue qui n'est pas tousiours libre, & n'a qu'vne porte, dont il n'est pas tousiours le maistre.

Mais puis que le salut des Peuples, est la souveraine Loy de ceux qui gouuernent, & que les autres Loix des Estats n'ont d'esprit ny de vie, que ce qui leur en vient de ce principe; qui pourroit se figurer, qu'vn Prince eust fait vn Traité, par lequel il se fust obligé de perir, toutes les fois qu'vn autre Prince n'auroit pas la puissance de le sauuer, & fust entré en vne dependance, par laquelle il eust renoncé à tous les moyens de pouruoir à la conseruation de ses sujets, qui ne seroient pas au gré de l'autre? Tels & semblables Traitez, seroient plustot des prodiges & des Monstres à exterminer dans la Politique; que des actes valla-
bles & legitimes, qui eussent procedé de l'autorité des Princes, qui n'est pas instituée pour destruire & pour demolir les Estats, mais pour en destourner la cheute, & en reestablir les ruines. J'ajouste à cela que le mot de Protection

designe assez, quelle en doit estre l'operation & l'usage, & que n'ayant pour fin & pour but, que la seureté des Estats & le bien des personnes protégées; elle cesse d'estre ce qu'elle estoit, si elle tombe en impuissance, & si elle n'a plus ny force ny vertu, pour conseruer & pour deffendre: Qu'elle change d'espece, & passe en vne autre nature contraire à la sienne; si elle deuient vn principe de ruine, à ceux à qui elle doit seruir de ressource contre le malheur, & si elle degenerate en poison, de preseruatif qu'elle deuroit estre.

Concluons donc, que puis que la Maison d'Austriche n'estoit pas en estat de garentir personne du mauuais temps, dont elle mesme estoit batuë, & que mesme ceux qui estoient embarquez dans le mesme vaisseau avec elle, couroient fortune de se perdre, s'ils ne s'en separoient; L'Electeur de Treues ne l'a point offensée, de s'estre adressé à la France qui seule luy pouuoit seruir de port, & le metre à couuert des vents esmeus & de la Mer irritée. Je dis bien dauantage, qu'il n'a pas seulement fait vne action de deuoir à l'endroit de ses sujets; d'auoir destourné par nostre entremise,

l'inaffable desolation qui leur pendoit sur la teste : ou vn acte de pieté enuers l'Eglise ; d'auoir sauué par nostre moyen les lieux saints & les personnes sacrées ; mais qu'il n'a pas encore peu merité de la Maison d'Austriche , si elle estoit capable de quelque sentiment de reconnoissance , & de se laisser toucher de quelque bien-fait ; d'auoir empesché par preuoyance & par adresse , que son grand & formidable Aduersaire ; ne deuint plus puissant par la conqueste de ses Estats, & ne fit vne dangereuse conjunction du Rhin avec la Moselle , pour pouuoir en mesme temps estendre ses bras en Flandre & en Allemagne . Et partant que le monde juge sur ces Faits veritables & pertinens , si cét Electeur a merité le traitement qu'il a reçu pour l'amour de nous , & si le Roy l'a deu souffrir sans ressentiment , & sans declarer la guerre à ceux qui l'ont si hautement offensé en la personne d'vn de ses Allez , & au veu & sceu de toute l'Europe.

Cét exemple & plusieurs autres que je rapporteray en leur lieu ; feront voir clairement , que le Roy n'est entré en toutes les guerres , dont la miserable Chrestienté est trauaillée depuis

depuis tant d'années; que pour proteger les foibles contre les plus forts, & que la Maison d'Austriche est celle qui par son indontable Ambition, a rompu par tout les liens de la concorde publique, & allumé les feux dont peut-estre elle sentira le ravage autant que nulle autre, auant que l'embrasement cesse. Dieu seul peut sçauoir quel sera l'euénement de tant d'armes conjurées, & où se terminera l'agitation de tant de Nations esmeües. Mais le Roy doit auoir cette satisfaction, & ce repos de conscience, qu'il n'a pas esté l'auteur de ces deplorables mouuemens: qu'il a fait ce qu'il a pû pour les diuertir: qu'il n'a rien espargné pour les arrester, & qu'ayant tant trauaillé & tant pris de peine, pour fonder & affermir la tranquillité de son Royaume; Il n'auoit point de plus viue & ardente passion; que de procurer l'entiere felicité de ses peuples, & de voir fleurir la paix qu'il leur auoit donnée, par l'abondance dont il la vouloit couronner; s'il eust esté le Maistre du cœur des Estrangers, & l'Arbitre du destin des choses.



M



DISCOVRS SIXIEME.

Qu'il ne suffit pas qu'une guerre soit juste, si elle n'est encore utile à celuy qui s'y embarque.

Quelques Regles que les Princes doivent observer, quand ils seconrent leurs Alliez.



P R E S avoir discoursu des causes qui rendent vne guerre juste, & defriché cette espineuse matiere, qui a encore besoin de quelque culture, que nous luy donnerons en son lieu; Il nous faut parler de l'Vtilité, qui est l'autre condition qui doit acompagner cette guerre, & sans laquelle vn Prince ne s'y doit point engager, quand mesme elle seroit non seulement pleine; mais comblée, pour le dire ainsi, de Iustice. Il ne s'ensuit pas pourtant que cette Vtilité doive estre presente & sensible, & ce n'est pas l'ordre des choses, qu'on moissonne en semant,

ny que les premiers remedes guerissent quand on est malade, ny qu'une peinture s'acheue lors qu'elle s'esbauche. Dieu seul en donnant le premier trait, peut donner la dernière main à ses ouvrages, & finir en commençant. Encore ne l'a-t'il pas tousiours fait, & il a mis six jours à créer le Monde, & à produire & estaller les pieces de cette merueilleuse machine.

Mais pour les œuvres des hommes; il faut du temps & de la patience pour en voir la fin. Il y a plusieurs degrez à monter auant que d'arriuer au faiste, & d'ordinaire il en est comme de celles de la Nature; où la generation des plus excellentes choses, n'est que la suite d'une corruption qui la precede. Il suffit donc que ce soit une vtilité future, afin qu'elle oblige à agir, & qu'elle soit connue telle, non pas avec infallibilité & certitude, ce qui n'appartient qu'à Dieu; Mais autant qu'on le peut juger par la disposition des Causes secondes, & par les Regles de la prudence civile; qui est tout ce qu'on peut exiger de la conduite des hommes, & du sort de cette vie. Nous ne traiterons icy que de l'vtilité qui

M ij

doit reuenir, de la guerre que l'on fait en faueur de ses Amis & Alliez, & du secours qu'on leur preste. Pour les autres; Ou il n'y a point de difficulté, ou ce que nous dirons de celle-cy, esclaireira ce qu'il y pourroit auoir de trouble.

Pour cela je donneray quelques Regles, qui feront voir aux Princes les routes qu'ils auront à tenir, & les esçueils qu'il leur faudra éviter; quand ils s'embarqueront en de semblables assistances. La premiere Regle est, que l'vtilité qu'ils doiuent poursuiure, & proposer à leurs armes, lors qu'ils les prennent en faueur de leurs amis; ne doit pas estre mercenaire, ny de la nature de celle que les Marchands recherchent, lors qu'ils trafiquent. La derniere fin où ceux-cy aspirent, & le principal objet qui excite leur industrie; est l'augmentation des richesses. Ils hazardent peu pour gagner beaucoup: Ils font comme les Laboureurs, qui ne sement pas seulement pour recouurer leur semence, mais pour la multiplier, & ce n'est pas pour fermer à la pauureté la porte de leur maison, qu'ils travaillent; mais pour y introduire l'abondan-

ce. La Reputation mesme d'intelligens & d'abiles en leur profession; ne les touche point, ou les touche peu. Ils ne se soucient que d'estre heureux, & le seul gain fait toute la gloire de leur exercice, & tout le prix de leur course. Il y a eü de tout temps des Princes qui ont agy de cette sorte, & qui ont esté possédez de cette basse passion, que la grandeur de l'objet & l'enormité du mal; ont fait appeller illustre. Mais ceux qui se piquent de l'amour de la veritable sagesse, & du desir de la belle Reputation; doiuent aller d'un autre vent, & suiure vne route toute differente.

Que cecy soit donc vn principe constant & indubitable; qu'un Prince ne doit jamais se porter à la deffense d'un autre Prince, ny armer en sa faueur, par esprit d'auarice; & par vne auidité de s'acroistre à ses despens: de s'enrichir de sa despoüille, & de garder les gages que l'autre luy aura mis en main, pour asseurance de sa foy, ou pour luy seruir de retraite. Autrement si cela estoit; il ne se trouueroit personne, qui n'aymat mieux esprouuer tout seul le sort des armes, & courir la fortune de la guerre, dont les euenemens sont douteux &

incertains; que s'exposer à la perte infallible de tous ses Estats, ou d'une notable partie.

Outre que il n'y a point de doute, que comme les coups qu'on reçoit durant la chaleur d'un combat, & par un Ennemy à qui l'on fait le pis que l'on peut; sont moins sensibles & douloureux, que ceux qu'on reçoit de sang froid, & par un amy à qui l'on se fie. De même les pertes qui nous arriuent de la part de ceux qui nous en deuroient garentir; sont de plus mauuais goust & de plus dure digestion; que celles que nous causent ceux qui nous ont déclaré la guerre, & ont entrepris de nous ruiner, & le feu Roy eust raison, apres que l'Archiduc eust assiegé Calais, & que la Reine d'Angleterre luy eust enuoyé offrir son armée de Mer à des conditions exorbitantes; de refuser ce secours, & de luy faire dire, *Qu'il aymoit mieux que ses Ennemis le despoüillassent, que ses Amis.*

C'est pourtant par ce chemin, que les Romains ont en partie marché à la conquête du monde, & qu'entre deux peuples qui se faisoient la guerre; Ils ont retenu le pays de celui, luy qui les appelloit à son secours, & subjugué

le pays de l'autre. C'est par là que les misérables Grecs ont acheué de se perdre, & que leurs diuisions & leurs broüilleries, les ont liurez à l'ambition de ce peuple, qui ne trouua point de meilleur moyen de terminer leurs differens, & d'esteindre leurs partialitez; que de leur oster la puissance de se quereller, & de les priuer de leurs Estats, qui estoient le sujet de toutes leurs haynes. C'est avec ce pernicieux artifice & cette trompeuse charité; que la Maison Ottomane a enuahy quelques membres de l'Empire des Chrestiens, & fait tomber dans ses filets la plus belle portion de la Hongrie. Le passage de la protection à l'vsurpation est si doux pour les Conquerans, & leurs limites si proches; que les plus religieux ne manquent gueres de les franchir, & de confondre ces deux actions, en les distinguant seulement de nom, & laissant cette ombre de difference, à ce qui n'est en effet qu'une mesme chose.

Nous auons vne Puissance dans la Chrestienté, qui estant frapée de la mesme maladie, que les anciens Romains, & les Ottomans d'aujourd'huy, c'est à dire du dessein de

la Monarchie ; a marché autant qu'elle a pû sur leurs vestiges , & jouié parmy les Chrestiens de semblables pieces . Sa coustume a esté de prendre part dans toutes leurs affaires , & d'acourir au moindre bruit de discorde qu'elle a oüy leuer parmy eux , & à la moindre flamme de diuision qu'elle y a veu luire . Elle n'a jamais sceu que c'estoit que garder Neutralité , tant qu'il y a eü de la guerre parmy ses voyfins : & n'a pas tant considéré la Justice du Party où elle s'est jettée , que le moyen qu'il y auoit d'en profiter , & d'y trouuer ou quelque gage à garder , ou quelque conquête à faire . Les protections qu'elle a données , ont esté autant de jougs qu'elle a imposez , & où elle n'a point apporté de la sujétion ; elle a estably vne dependance qui n'estoit gueres moins pesante , & qui luy estant moins onereuse ; ne luy asseuroit pas moins ceux qui dependoient d'elle , & les tenoit par des liens aussi forts & indissolubles .

Il ne faut point sortir de l'Europe ny du Siecle present , pour confirmer cette verité par des exemples anciens ou esloignez . L'Allemagne & l'Italie ont esté les Theatres , où elle a assez

a assez paru de nostre temps, & elle est entrée avec pompe & esclat, en deux des plus remarquables actions, qu'on y ait représentées. Il ne se peut gueres voir d'exemple de cette nature, plus illustre par la nouveauté des incidens, & par la rareté des circonstances qui s'y rencontrent; que celui qui est arrivé en la Succession du Duc de Cleves, recueillie par le Duc de Neubourg qui fust protégé par les Espagnols, & par le Marquis de Brandebourg, que les Hollandois appuyerent. Mais d'autant que je donne vn Traité exact & ample de cette affaire, en la troisième Partie; j'y renuoye le Lecteur pour parler d'un autre exemple que l'Italie nous a fourny, apres que la Succession de Mantoue & du Montferrat, fust ouverte au Duc de Nevers, contre lequel les Espagnols dresserent toutes leurs machines, & firent tous leurs efforts pour l'en exclure.

Pour paruenir donc à leur fin, & pour toucher à leur but; ils se seruirent d'un double artifice, & mirent ces deux pieces en batterie. La premiere de susciter le Prince de Guastalde, pour s'immiscer pour vser de ce terme de

N

pratique, dans cette Succession, & pour opposer à vn droit clair & indubitable; comme estoit celuy du Duc de Neuers; vne prétention apocryphe & imaginaire, comme estoit la sienné. Si ce qu'on publia en ce temps-là en Italie est veritable; Il n'est pas jusqu'à vn Bastard du Duc precedent nommé Yacinthe, qu'ils n'ayent tasché d'enleuer, pour le faire interuenir dans la querelle, en le purgeant du vice de sa naissance, sous des pretextes qui auoient quelque couleur, mais qui choquoient directement vne Constitution du Concile de Trente reçeüe dans l'Italie. Mais laissons à part le fait d'Yacinthe qui est peut-estre faux; pour nous tenir à celuy de Guastalde, qui ne reçoit point de difficulté, & qui a esté esclairé des yeux de toute l'Europe, & a excité du scandale jusques dans Constantinople mesme.

Le second artifice est, qu'ils ont abusé du nom & de l'autorité de l'Empereur, pour contraindre le Duc de Mantoüe, de metre en *c'estoit le* depost ses fortereffes, entre les mains d'un *Conte Jean* Commissaire qui estoit leur sujet; jusqu'à ce *de Nassau.* que l'Empereur eust prononcé sur le différent

esmeu; & faire droit aux parties interessées. C'est à dire que pendant ce temps-là; ils eussent formé tant d'incidens, & suscité tant de chicane, pour estendre & perpetuer la matiere contentieuse; que la longueur de la poursuite, & le desespoir du succez, en vne Cour où les parties estoient les Juges; eussent forcé le Duc de Mantouie, de consentir à ce qu'ils vouloient, & de laisser vn tiltre apparent de Justice, à ce qui n'estoit qu'une pure oppression, & qu'une violence effective.

La fin donc de l'assistance qu'ils auoient offerte à Guastalde, ou que celuy-cy si l'on veut, auoit implorée; ne tendoit pas à l'esleuer à la Souueraineté de Mantouie & du Montferrat; Mais à se rendre maîtres de la Citadelle de Casal, & à se deliurer de la jalousie que cette forteresse donne, & de l'ombre qu'elle fait à l'Estat de Milan, pour lequel ils ont tant d'amour & tant de tendresse. Et afin que leur injustice regnast en toutes les parties, & fust espandue comme son Aine, dans tout le corps de cette affaire: Afin qu'il n'y eust ny principal ny accessoire, où elle ne laissast quelque impression de son venin, & quel-

que teinture de sa violence; Il est à considérer, qu'auant que Gualtade eust intenté son action, & formé les plaintes à la Cour Impériale : Pendant que le Prince de Mantoue, y rendoit de la part de son Pere les deuoirs nécessaires, & y faisoit les soumissions requises : Pendant qu'on luy donnoit à Vienne de belles paroles & de bonnes esperances . Lors mesme que la plus-part du monde croyoit, que l'Empereur qui ne péchoit pas volontiers, que par ignorance, & qu'on n'eust pas aisement induit à faire du mal, que sous le masque du bien, ne seroit pas contraire au droit du Duc de Mantoue; Le Gouverneur de Milan desoloit le Montferrat avec vne armée, & peu s'en fallut qu'il n'enleuast Casal par l'intelligence d'un Traistre; qu'il auoit pratiqué de longue main, pour luy vendre cette place.

*Spadin
Major
dans la
place.*

Ils n'en demeurèrent pas là, & puis qu'ils auoient mis la voile au vent; il falloit poursuivre la nauigation, & essayer d'acheuer avec honneur, la course qu'ils auoient commencée avec si peu de succez. Apres donc, qu'ils eurent veu qu'ils auoient failly leur coup: que la guerre pourroit tirer en vne lon-

gueur dommageable, & que peut-estre ils pourroient ne trouuer au bout, que la honte & le desplaisir, que laissent les entreprises injustes, quand elles ne sont pas heureuses; Ils firent jouïr d'autres mines, & presser le Duc de Mantouë, d'accepter vn dédommagement pour Casal, dans la Franche Conté ou dans le Cremonois, en n'y comprenant pas pourtant la Citadelle de Cremone. C'est à dire que de Prince indépendant & absolu qu'il estoit en son pays; ils en vouloient faire ailleurs leur sujet ou leur dépendant, & troquer vn Reuenue limité, & du bien qui se pouuoit prendre à toute heure; contre celuy de la Souueraineté qui n'a point de prix, & contre vne forteresse presque imprenable.

De mesme les grands efforts qu'ils ont du depuis faits, & l'extreme ardeur qu'ils ont témoignée, à faire valoir la pretention que la Princesse Stigliane auoit sur Sabionete; n'estoient pas pour luy laisser la libre disposition de cette place: Mais pour la garder sous son nom, & la faire seruir de bride & comme de Citadelle, à trois ou quatre Estats voyfins, au milieu desquels elle est enclauée. N'auoient-

ils pas encore couuert d'une plaifante maniere le Prince de Monaco, contre les pretentions & les desseins des Genoïs sur cette Principauté? & à quoy s'estoit finalement terminée cette protection; qu'à un joug pesant & rude qui l'acabloit; & qu'il a esté contraint de secoïer, pour se jeter entre les bras d'une puissance plus juste, & d'une domination plus humaine? Tels & semblables exemples, que je pourrois apporter en grand nombre; decouvrent assez le genie de la Nation, & cette effrenée avarice, qui les transporte à enuahir ouvertement le bien d'autrui, ou à s'en acommoder avec finesse: à y entrer par une bresche, ou par une fausse porte.





DISCOVRS SEPTIESME.

*La seconde Regle qu'un Prince doit observer
quand il veut secourir ses Amis.*



A seconde Regle sera, que nonobstant ce que nous venons de dire, vn Prince qui s'embarque en vne guerre pour l'amour d'un sien voisin ; peut legitimement pretendre de se faire remplacer d'une partie des frais qu'il fera, si celuy qu'il secourt en a le moyen, & recevoir de luy des places, pour la seureté de ce qu'il auance : ou pour la retraite de ses troupes : ou pour vn gage de la Foy & de la constance de l'autre. Car certes il n'est que trop juste, que puis que celuy-cy ne pardonne point au sang mesme & à la vie de ses sujets, pour garentir son amy de seruitude ; l'autre ne soit point auare du bien & de la substance des siens, pour dédommager en quelque façon son Libérateur, & qu'il ne fasse point difficulté, de payer quelque chose du prix des remedes, qui luy sauueront la vie.

J'entens à condition que cela se puisse faire commodement, & que l'Estat qu'on a secouru n'ait pas esté si fort lassé par le travail de la guerre, & tellement espuisé d'esprits & de forces; qu'il ne luy en reste presque point pour viure & pour se soustenir, & que la moindre évacuation qui luy surviendroit, seroit capable de luy faire rendre l'ame, & de le porter à l'extremité du mal; contre lequel on a pris les armes. Autrement l'assistance qu'on auroit donnée, n'auroit pas tant esté vne charité ciuile, qu'une supercherie de Voleur & de Pyrate, & l'on n'auroit fait que chasser la maladie, en faisant mourir le malade. Quand la chose est en cet estat; il faut qu'un Prince se contente de la gloire qui rejallira sur son nom & sur sa conduite; d'avoir sauvé d'oppression un sien voisin: & de l'utilité qui reviendra à son Estat, d'avoir rompu les mesures, & empêché l'acroissement d'un Ambitieux; qui apres avoir deuoré les Petits, se rueroit infaliblement sur les plus Grands, & qui ne regarde ses premieres conquestes; que comme des planches & des moyens, pour passer à de nouvelles.

Je dis

Je dis le mesme & pour les mesmes raisons, des Estats qui n'ont qu'une forteresse, en laquelle consiste tout leur salut & toute leur esperance. On la peut bien recevoir jusqu'à la fin de la guerre, comme un frein & un arrest de la foy de celuy à qui l'on donne du secours: mais non pas la retenir apres la paix, pour la despense qu'on aura faite pour la conserver; & la garder pour cela ce seroit le mesme, que d'exiger la vie d'un homme, pour luy auoir fourny des alimens, & generalement parlant, que de vouloir la fin, pour le prix & pour le salaire des moyens, qu'on aura contribuez pour la produire. Hors de là le Prince doit tendre autant qu'il se peut avec bien-seance, au remplacement du bien de ses sujets, dont il n'est pas le proprietaire, mais le dispensateur & l'oeconome, & qu'il est obligé de mesnager avec plus de circonspection & de retenue, que le sien propre.

C'est donc un trait de prudence singuliere, & une Maxime de Politique raffinée; de se faire tantir de quelque place importante, pour la seureté de l'argent qu'on preste & qu'on auance, pour les affaires des autres. C'est ainsi

O

que les Venitiens l'ont autrefois souuent pratiqué, & que quantité de bons gages leur sont demeurez; pour n'auoir pû estre retirez par ceux qui les leur auoient mis entre les mains, & qui finalement estoient contrainsts d'en transiger, & de leur en ceder la propriété & le domaine. C'est ainsi qu'en vſa Elizabet d'Angleterre, lors qu'apres la defection des Hollandois de la domination d'Eſpagne; elle ſe reſolut de les ſecourir d'argent & d'hommes, & qu'elle en receut en depoſt Fleſſinghe la Brille & Ramachin, juſqu'à ce qu'elle ſeroit rembourſée de ſes auances; ce qui n'arriua que durant le Regne du Roy Iaques ſon Successeur. C'eſt enfin ne ſçauoir pas ſon meſtier, & pécher lourdement contre l'art de Regner; que de ne demander point des places, pour la retraite de ſes troupes en cas de diſgrace, & de n'auoir point vn Port à ſoy, où l'on puiſſe relascher, quand on a le vent contraire. Sur tout la neceſſité d'en auoir eſt entiere & inéuitable, pour retenir par ce lien, comme nous l'auons deſia dit, & arreſter pour le dire ainſi avec cét Anchre, la volonté de ceux qu'on ſecourt, de peur qu'ils ne chan-

gent, & qu'après nous auoir embarquez; ils ne nous laissent à la mercy des vents & des ondes, & n'acceptent sans nostre consentement des conditions auantageuses qu'on leur pourra offrir pour la crainte de nos armes, & pour les destacher de nostre Alliance.

Les François ont souuent hurté contre cét escueil, pour n'y auoir pas pris garde, & tombé dans ces embusches, pour ne les auoir pas preueües. On ne scauroit dire combien de fois leur facilité & leur excessiue franchise; ont attiré l'infidelité & la defection de ceux, qui n'auoient eü recours à leur protection, ny imploré leur assistance; que pour s'acorder plus auantageusement avec leurs Ennemis, & pour faire à nos despens & à l'ombre de nos armes, vne paix plus honorable. Ce malheur est arriué deux fois à Henry second, & Octaue Duc de Parme, dont il auoit entrepris la deffense, contre l'Empereur & le Pape, qui le vouloient metre en chemise; s'acommoda avec eux sans son sceu & participation: Et en la Ligue qu'il fit avec l'Electeur Maurice, & les autres Confederez d'Allemagne contre Charles le Quint; ayant eü le vent, & veu paroï-

stre des signes, de l'acommodement que cét Electeur meditoit à nostre defaavantage; Il fut contraint de n'acheuer pas la faute qu'il auoit commencée en se contentant d'auoir des Ostages au lieu de places, & de se saisir, du consentement neantmoins de l'Euesque & du peuple, comme nous l'expliquerons au Traité de la Monarchie; de se saisir dis-je de la ville de Mets, pour opposer aux Allemans qui luy venoient tomber sur les bras, & pour arrester le torrent qui s'alloit desborder sur son Royaume.

L'Electeur de Saxe d'aujourd'huy, tresdigne Branche du sang de Maurice, & vray Rejetton d'un tel Tige; n'a pas degeneré de la bonne foy de son parent. Il n'a pas seulement bien imité par la paix de Prague, la supercherie qui nous fust faite à celle de Passau; Mais la copie a encore surpassé l'original, & sans y auoir trouué des conditions si auantageuses que celles de l'autre; Il n'a pas seulement abandonné les deux Couronnes, qui ont versé tant de sang & consumé tant de bien, pour la liberté de l'Allemagne; mais il y a encore conjuré contre elles, & consenty de faire la

guerre à ceux, qui trauaillent si ardemment, à deliurer des captifs qui semblent aymer leur chaisne : ou à contraindre d'estre heureux, ceux qui n'ont pas le courage de le deuenir.

Quoy que c'en soit, il est certain que cette belle Paix de Prague; où ceux qui l'ont acceptée ont creu se pouuoir sauuer, sans courir fortune de se perdre, comme en la continuation de la guerre qu'ils faisoient à la Maison d'Austriche; n'eust pas esté faite, si les deux Couronnes ne se fussent point meslées des affaires de ce pays-là, & que l'Empereur ne leur eust point acordé ce repit de leur ruïne; s'il se fust estimé assez puissant ou assez heureux, pour resister en mesme temps à leurs forces & aux nostres. Que si ceux qui s'y sont rangez s'en trouuent bien, & s'ils y sont à l'abry de la tourmente qu'ils craignoient; ils nous en ont l'obligation qu'ils ont fort mal reconnuë.

Que si cette paix est captieuse & mal-assée, comme elle l'est, & s'ils ont besoin, comme il n'en faut pas douter, d'une paix generale, qui soit le sceau de la seureté & de la durée des particulieres; C'est encore des deux Cou-

ronnes, de qui principalement ils doiuent recevoir ce bien, & c'est d'elles que doit sortir la parfaite guerison du Corps Germanique; au lieu de ces intervalles lucides que les Traitez particuliers apportent, & de ces cures trompeuses, qui soulagent pour quelque temps le malade, mais qui n'ostent pas la cause, ny les principes de la maladie. C'est pour cela qu'elles agissent avec tant de contention & tant de chaleur: qu'elles font de si grands armemens, & supportent tant de despenſe; & l'on doit s'asseurer, qu'elles ne mettront jamais les armes bas, que l'œuvre ne soit entiere: qu'elles n'ont point fait de si grandes avances pour les perdre, & que quelque penible que soit la carriere où elles se sont jettées; elles ne s'arresteront jamais, qu'elles ne l'ayent tout à fait passée. Ou toutes les apparences sont fausses, ou ce terme n'est pas loin, & la Chrestienté verra bien-tost esclorre le bien qu'elle desire; quoy qu'elle ait encore quelque convulsion à souffrir: & paroistre bien tost la lumiere qu'elle attend, quoy qu'il y ait encore quelque ombre à dissiper, & quelque niage à resoudre. Que cecy soit dit par oca-

sion. Reuenons au sujet que nous auons quité.

La facilité dont nous auons parlé cy dessus, n'a pas esté pernicieuse aux seuls François; elle l'a encore esté aux Allemans. Il leur a quelquefois mal pris d'estre entrez en ce Royaume, sur la seule foy de ceux qui les y appelloient, & si cette prodigieuse armée de Reitres, qui le vint inonder sous la conduite du Duc de Boüillon & du Baron de Dona; eust peu se faire metre en main quelque bonne place; elle n'eust pas esté si mal-traitée qu'elle fust en sa retraite, ny n'eust jonché nos plaines de tant de corps morts qu'elle y laissa. Elle eust tousiours esté receuë à capituler pour la seurreté de son retour, & pour vne partie de l'argent qu'on luy auoit promis, en rendant ce qu'elle eust tenu, à son legitime maistre.

La Reyne d'Angleterre dont nous auons desia parlé; fust bien plus fine & sa conduite plus circonspecte, lors qu'elle ne voulut point ouurir sa bourse, ny faire entrer ses armes en France en faueur du Prince de Condé; qu'il ne luy eust mis en depost le Haure de Grace, & liuré cette fameuse porte, pour entrer

quand elle voudroit dans ce Royaume. Il est vray que je ne sçauois excuser le pretexte, sous lequel elle fit semblant de la recevoir: ny approuver la Declaration qu'elle publia; que ce n'estoit pas pour rompre avec le Roy, avec lequel elle desiroit entretenir vne bonne correspondance, qu'elle s'en estoit emparée: mais pour la tirer d'entre les mains de ses sujets Rebelles qui en abuseroient à son prejudice, & pour la luy conseruer durant sa minorité, & jusqu'à ce qu'il pourroit agir par luy-mesme dans ses affaires, & tenir le Gouuernail de son Estat, qui estoit manié par des personnes qui n'estoient pas à ce qu'elle disoit assez prudentes, ou assez bien intentionnées.

Ce plastre estoit trop grossier & ce masque trop connoissable, pour couvrir & déguiser vne si visible vsurpation, & le Conseil du Roy eust raison, de la declarer descheüe des conditions du Traité de Cambray, pour le fait de Calais; puis qu'elle l'auoit violé en assistant les Rebelles de sa Majesté, & qu'elle auoit esté pour le dire ainsi, la Regeleuse des places, que les autres luy auoient volées. Le Duc de Sauoye Grand-pere de celui d'aujourd'huy, auoit

auoit voulu presque exercer la mesme charité à l'endroit de Henry III. & rendre à peu pres le mesme bon office à la Couronne; lors qu'il se saisit du Marquisat de Salusse, pour la peur qu'il auoit à ce qu'il disoit, que l'Esdiguieres ne le preuint, & jusqu'à ce que les troubles dont nous estions trauaillez se calmeroient, & que nos tempestes ciuiles fussent appaisées. Aussi le feu Roy luy paya cette charité, comme vne dete de la Couronne; depuis qu'il y fust paruenue, & luy fit voir que les grands Princes, sçauent rendre les petits gens de bien en dépit d'eux, & les deliurer mieux que gens du monde, de l'obligation qu'ils ont de restituer, ce qu'ils ont pris mal à propos.

La methode donc dont nous auons parlé, & pour les raisons que nous auons alleguées, d'exiger des places; a esté de tout temps familiere aux Princes qui ont sceu regner, & particulièrement aux Espagnols. Que si le Duc de Parme n'en demanda point au premier voyage qu'il fit en France, & s'il vint deliurer Paris des armes du feu Roy, sans chercher d'autre seureté pour sa retraite, que dans celles qu'il commandoit; c'estoit pour vne chose


qui estoit plus importante : c'estoit pour esbloüir le monde par cette montre de franchise : c'estoit pour laisser vne impression, que son Maistre ne l'enuoyoit pas, pour pescher comme l'on dit dans nos troubles, & pour profiter de nos discordes; comme plusieurs en murmuroient dedans & dehors le Royaume: Mais seulement pour en chasser l'Herésie; ou au moins pour empescher qu'elle ne montat au Throne, où il n'y auoit que la vraye Religion qui deût s'assoir; comme il en fit vn serment solennel en la grande Eglise de Meaux, au nom de Philippe.

Mais il ne respira pas long temps cet air de generosité, & il ne pût jamais se laisser persuader de venir secourir Rouën; qu'on ne luy eust baillé la Fere; & qu'il n'eust entre ses mains cette place, qui luy assureoit son entrée dans le Royaume, & sa sortie au dehors. Quant au reste, la suite du temps & le cours des affaires firent bien voir, que Philippeluy auoit fait faire vn faux serment, & qu'il l'auoit trompé le premier, pour luy faire tromper les autres. Le Duc de Sessa le declara assez à Rome; lors que ne pouuant empescher l'ab-

solution du feu Roy, ny sa reunion au centre de l'Eglise, qui est le saint Siege; Il protesta que ce fust sans prejudice des pretentions que son Maistre auoit sur la France, & des frais qu'il auoit faits pour y conseruer la Religion, & en chasser l'Herésie.

Ce fust donc pour eux vn cas extraordinaire, & vne exception de leur Regle generale, dont ils n'y sent que fort rarement; que la procedure du Duc de Parme en son premier voyage de France. Car il est vray qu'ils ont vne si horrible faim de metre le pied dans les places d'autrui, & qu'ils sont si fort transportez de cette passion; qu'ils n'en ont pas mesme excepté le saint Siege, lors qu'ils ont quelque fois fait mine de le vouloir secourir. Durant la chaleur de l'Interdit de Venise, & apres que le Marquis de Veillane Ambassadeur à Rome pour le Roy Catholique, eust obligé le Pape de se jeter entre les bras de son Maistre, & d'accepter sa protection; entre les choses qu'il demanda de sa part, pour le secours qu'il promettoit qui n'estoit pourtant qu'en papier, & pour ce tesmoignage de bonne volonté qui n'estoit qu'en ostentation; Celle sur laquelle

il appuya davantage fust qu'on luy baillat Ferrare pour la retraite de son armée de terre, & Ancone pour celle de son armée de mer. C'est bien plus, le Conte de Fuentes qui ne respiroit que feu & guerre, & qui estoit le principal promoteur de la broüillerie; eust l'audace de demander Charbonnieres au Duc de Sauoye, qui n'y estoit point interessé; pour tenir à ce qu'il disoit la clef du passage, par où l'Esdiguières pouuoit descendre au secours de la Republique.





DISCOVRS HVITIESME.

Que la conduite que le Roy a obseruée en secourant ses Alliez; est pleine de moderation & de generosité. Que celle de quelques autres Princes de ce Siecle n'est pas de mesme.



LE sujet que nous venons de traiter, auroit pû estre merueilleusement esclairé & embelly, par la Relation de la conduite qu'ont obserué quatre differens Princes de ce Siecle, au secours de leurs Alliez. La maniere en est fort diuerse, bien qu'elle ait esté desployée sur vne mesme matiere, & dans le cours d'une mesme affaire; qui sont les Troubles de l'Allemagne. Quoy qu'il n'y ait point de Puissance dans la Chrestienté, qui ne s'y soit interessée, & n'ait joiué quelque personnage de cette celebre Piece; Il est certain que les Roys de France d'Espagne de Suede & le Duc de Bauiere; y ont paru avec plus d'esclat que les autres, & que leur Politique ne s'y est

P iij

pas moins hautement signalée, que leurs armes. Mais d'autant que nous rechercherons dans la Troisième Partie, les plus secrets mouemens avec lesquels ces Princes y ont agy, & ce que leur Cabinet a influé de plus particulier & de plus remarquable, dans cette longue & atroce guerre; Je supplieray le Lecteur de suspendre sa curiosité jusqu'à l'Edition de cette Partie; qui suiura immédiatement celle-cy. Là nous verrons que l'Espagne n'est jamais allée que d'un même pied, & n'a navigé que d'un même vent; c'est à dire de celui de l'Ambition & de l'Vtilité particulière. Que la demarche de la France, a tantost esté plus lente & irresoluë, & tantost plus viste & déterminée vers le bien general de la Republique Chrestienne; mais que neantmoins ce bien general, a tousiours esté le principal but & la dernière fin, qu'elle a proposée à ses Offices & à ses Armes.

Quant au Roy de Suede, il ne pouuoit certes ajuster avec plus d'intelligence & de symmetrie, le dessein qu'il auoit fait de secourir l'Allemagne, & de la tirer des fers de la Maison d'Austriche, sous lesquels elle gemissoit;

avec cét Esprit de Conquerant avec lequel il estoit né: ny faire seruir le premier au second, sous vne plus specieuse & plus plausible bienfiance. Nous le considererons donc dans ce haut & difficile exercice, depuis sa descente au Port de l'Isle d'Vsedom, jusqu'à la plaine de Lutzen où il laissa la vie, sans laisser la Victoire aux Ennemis qui la luy osterent. Nous représenterons la hauteur avec laquelle il traita avec le Duc de Pomeranie, pour s'establiir dans son pays: l'artifice courageux dont il vfa, pour se faire metre Spandau entre les mains par le Marquis de Brandebourg: Et apres que Tilly fust entré à main armée dans les Estats du Duc de Saxe, & que ce fameux Capitaine ne promettoit rien moins à cét Electeur sans party, que de luy expliquer le sens mystique de ce mot, qui estoit familier à l'Empereur Charles; *Qui n'est pas pour moy, est contre moy*; Nous remarquerons la prudence avec laquelle le Roy de Suede se sceut seruir de l'ocasion, & profiter du besoin inéuitable que l'autre auoit de sa Vertu & de sa Fortune, contre vn si heureux & grand Capitaine, que celuy qui l'attaquoit.

Enfin apres que par le gain de la bataille de Lipsic, & par la deffaite des vieilles troupes de la Ligue; il eust brisé tous les obstacles, & se fust osté toutes les barrieres, qui l'empeschoient de penetrer dans l'Allemagne, & que les villes Imperiales luy ouvroient à l'enuy les portes, & les Princes de l'Empire se rengeoient en foule de son costé; Nous verrons comme quoy il donnoit la Loy à ceux, à qui il aqueroit la Liberté, & leur impoisoit vne espee de joug, qui avec le temps leur eust pû deuenir pesant, & qui commençoit desia à n'estre point porté sans jalousie. Cette sorte de Politique certes n'est pas de l'vsage de tous les Princes, & elle entre aussi peu souuent dans le train des affaires du monde; qu'il s'y esleue rarement des Conquerans, & de ces hommes extraordinaires, qui en viennent changer la face; comme faisoit le Roy de Suede.

Pour ce qui est du Duc de Bauiere; on ne luy scauroit refuser cette louange, que n'ayant pas ignoré l'Art de faire la guerre; il n'a cédé à aucun Prince de son Siecle en la science du Cabinet, & que l'Allemagne n'a porté il y a long temps, des mains plus adroites &

tes & plus sçauantes, à faire agir ces Ressorts cachez & ces Machines inuisibles, qui remuent & font tourner, ce qu'il y a de plus pesant & de plus immobile dans les affaires. Et d'autant que son Art & sa maniere d'agir, se peut plus communement reduire en pratique & tirer en imitation, que celle du Roy de Suede; Nous nous arresterons plus longuement & plus particulièrement sur sa conduite, que sur celle de l'autre, & en rechercherons tous les traits & tous les lineamens, pour l'instruction des autres Princes & de leurs Ministres. Nous contemplerons avec soin les diuers personages qu'il a soustenus, & les differens visages sous lesquels il s'est transformé; pour arriuer à son but, & pour deffendre le poste où il s'est mis par son industrie. Comme il s'est esleué à l'Electorat, & comme il s'y est maintenu; nonobstant les ombrages de l'Espagne: la repugnance de l'Angleterre: la contradiction des Electeurs Protestans; & la resistance mesme des Constitutions de l'Empire.

Bref comme en donnant tantost de la jalousie à la Maison d'Austriche, par l'attachement

Q

qu'il faisoit semblant de vouloir prendre avec la France : & tantost s'y joignant plus estroitement, & serrant tousiours plus fort à son auantage le nœu de leur conjunction; Il l'a presque tousiours dominée : Il la tient encore aujourd'huy sans qu'elle le tienne, & a tellement meslé ses interests avec les siens; qu'il les pourra separer quand il voudra, & il le voudra tousiours, quand il n'y fera plus bon pour luy, ou qu'il fera meilleur ailleurs pour ses affaires. Apres auoir esté deliuré par la mort du Roy de Suède, du plus grand danger qu'il eust encore couru, & de la plus furieuse tempeste qui l'ait jamais menacé ; Il croit qu'il n'y a gueres plus pour luy à craindre de mauuais temps. Et à dire vray tant que les Anglois se contenteront de faire de genereuses Deliberations, & d'enuoyer des Ambassades magnifiques en faueur de la Maison Palatine; Il aura bien de la peine à relascher de son bon gré, ce qu'il sera tousiours reçu à quitter, dans vne derniere violence de la fortune. Encore faudra-t'il que cette necessité soit bien forte; s'il ne trouue le moyen de s'en garantir, & quand toutes les portes pour en for-

cir luy seront fermées; il y aura bien à faire, s'il ne s'en eschape par quelque bresche.

Quant à la France, afin d'en dire derechef vn mot, & de laisser eschaper quelque trait de la procedure; Nous la représenterons toute entiere, & toute telle qu'elle l'a tenuë, dans les diuerfes occurrences des troubles dont nous parlons. Elle y paroistra en leur naissance & dans leur progres, comme Mediatrice de la querelle, & fera conclurre vne Paix à Vime, qui eust restably les affaires d'Allemagne, & redonné à l'Empire sa premiere face; si ceux à qui elle auoit seruy d'azile & de table de naufrage, ne l'eussent violé, & n'eussent opprimé en les surprenant, ceux qui se croyant estre en seureté par le benefice du Traité conclu, & à l'ombre de la foy publique; se trouuerent mal preparez à se defendre. Du depuis son action a languy, & ses soins ont esté debiles du costé de l'Allemagne: & les embaras du Cabinet, où le frequent changement des Ministres apportoit tousiours de la nouveauté aux Resolutions qui s'y prenoient, & le feu que les Religioneux factieux allumoient de temps en temps dans ses entrailles;

Qij

l'ont empeschée d'y vaquer jusqu'après la guerre de Mantouë. Alors certes elle commença à tourner avec chaleur ses pensées & ses soins de ce costé-là, & l'experience qu'elle auoit faite en Italie, & la Constitution presente des choses où elle se trouuoit; luy ayant fait comprendre, qu'il n'y auoit pour elle ny pour tous ses Alliez, que le vent du Septentrion à apprehender; Elle se resolut d'aller attaquer le mal dans sa source, & d'aller porter comme on dit, la coignée à la racine du desordre.

Nous la verrons donc commencer à agir vigoureusement pour ce sujet, & à faire esclater ses premiers faits dans la Diete de Ratibonne. Nous verrons comme elle se sceut preualoir auantageusement, de l'ocasion de l'entrée du Roy de Suede dans l'Allemagne; où les Princes de ce pays-là qui souffroient ou qui craignoient l'oppression; l'auoient appelé. Comme depuis le Traité que Monsieur de Charnassé fit à Beerualde avec le Roy de Suede, jusqu'au renouvellement de l'Alliance avec les Suedois, que Monsieur d'Auaux fit l'année passée à Hambourg; Elle a tousiours admirablement & avec vne grande justesse;

(11)

mesnagé deux Interests. Le premier & celuy qui luy a le plus tenu à l'Esprit, & qu'elle a espousé avec vn zele & vne ardeur qui ne s'est jamais relaschée; a esté celuy de l'Eglise & des choses saintes.

Surquoy j'ose hardiment dire, que j'espere de faire voir là & ailleurs; qu'encore que les vrayes Raïsons d'Estat, ne choquent pas les Maximes de la Religion, & que la mesme Authorité qui a mis de la distinction entre la Puissance Seculiere & l'Ecclesiastique; ait voulu qu'elles fussent liées d'amitié, & se donnassent les mains l'une à l'autre. Qu'encore qu'un sage Prince ne doiue jamais souffrir; qu'on rompe leur harmonie, ny qu'on confonde les confins qui les separent; Si est-ce que dans l'embaras où la Chrestienté est tombée, & dans le meslange des Partis de Religions differentes qui la deschirent; le Roy n'a pas seulement eü le soin, de metre à couuert les Interests de la Catholique, & d'asseurer les lieux saints & les personnes sacrées, contre les entreprises de ceux qui les pouuoient violer; Mais qu'on pourroit en quelque façon trouuer sa conduite moins prudente, de

Q iij

ce que pour l'amour de l'Eglise, il a quelquefois quitte des auantages, qu'il pouuoit prendre en conscience, & s'est roidy pour le bien de la Religion, en des choses où il pouuoit se relascher legitiment, pour celuy de ses affaires; n'estoit qu'il a tousiours fortement creu, que ce petit prejudice qu'il se faisoit, seroit largement reparé par celuy qui ne permet point, qu'un verre d'eau donné en son nom demeure sans recompense, & que Dieu n'accompagneroit pas seulement de ses benedictions, la Iustice de ses armes; mais qu'il en couronneroit encore sa pieté, & la passion qu'il a pour les choses qui le regardent. Aussi certes à considerer la grandeur & le nombre de celles qu'il a entreprises, & le long cours des affaires qui l'ont ocupé; On peut dire qu'on n'a gueres jamais veu de prosperité moins interrompue que la sienne, ny de Regne qui ait reçu du Ciel, des regards plus propices & plus fauorables.

J'ose encore auancer vne seconde verité, qui ornera le Regne du Roy d'une gloire particuliere, & me prometre de montrer clairement, que non seulement nous n'auons pas

fait avec nos voyfins des Societez infideles, ny esté les deferteurs des Interests de ceux que nous estions obligez de proteger. Mais que nous serions tombez dans l'excez de ce coûté-là, & qu'on pourroit en quelque façon acuser le Roy, d'auoir esté trop indulgent aux besoins des Estrangers, & trop peu sensible aux necessitez de ses Sujets; n'estoit que du bien de ceux-là, il se doit faire sur ceux-cy vne reflexion inéuitable, & qu'en destournant la perte de ses voyfins; il conserue les dehors de son Estat, & empesche qu'on ne l'inuestisse, & qu'on n'en fasse les aproches. N'estoit que les maux & les souffrances des siens qui doiuent bien-toft finir; sont la semence d'une prosperité qui durera longues années, & que pour rebastir le Temple de la Paix, qui ne fust pas tousiours tremblant & tousiours menacé de ruine comme il estoit; il a esté necessaire que la guerre que nous voyons ait precedé, ce saint & admirable Edifice. Que dans ce tragique & commun malheur, qui fait gemir la Chrestienté; il a cette consolation, qu'il n'y a que les auteurs des guerres injustes, qui soient les coupables, &

qu'on punit bien les Boutefeux; mais qu'on ne blâme pas les autres, qui souffrent des pertes dans les incendies.

Or Dieu & le monde sçauent, qui sont les Agresseurs en la querelle qui exerce aujourd'huy les Chrestiens: que le Roy n'y est entré que comme Soustenant, & que si ses offices & ses prières eussent esté vn bouclier assez fort, contre la violence qu'on faisoit à ses Alliez; Il n'eust jamais tiré l'espée pour les défendre. C'est bien plus, je montreray qu'encore que toute la Chrestienté soit tesmoin, & que ses Alliez goustent le fruit des peines qu'il a prises, & des despeses qu'il a faites pour leur salut, depuis qu'il a esté contraint de le procurer avec les armes; on le pourroit blasmer d'une trop grande retenue, & d'un ressentiment trop lent, pour les injures qu'il receuoit en leur personne, auant qu'il ait pû se refoudre de les repousser par cette voye; On le pourroit dis-je blasmer de cela; s'il eust pû trop craindre & trop éuiter, d'attirer sur ses sujets les consequences de la guerre, & de descendre dans vn abyssme, d'où l'on ne remonte pas quand on le desire: de prendre en main ce

Fleau

Fleau de l'Ire de Dieu, dont les coups tombent sans distinction sur toute sorte de testes, & abatent esgallement les innocens avec les coupables.

Le Lecteur excusera s'il luy plaist cette legere digression, qui peut-estre ne luy sera pas desagreceable, & ce petit Intermede qui luy donnera quelque goust, & luy sera comme vn essay, de ce qui luy est preparé en abondance & avec largesse, dans la suite de ce travail. Cependant afin qu'il puisse juger de l'equité & de la franchise de la procedure du Roy, enuers ses Alliez qu'il defend & qu'il protege; Je diray icy vn mot de la generosité qu'il a prattiquée, à l'endroit de l'vn de ses voyfins, qu'il auoit obligé autant qu'il auoit pû d'estre son Amy, & qui n'a laissé aucun acte d'hostilité à exercer contre luy, ny aucune preuue de haine à luy rendre. Quoy qu'il fust entré en tant de conjurations formées contre la France, & qu'elle n'ait point eü d'Ennemy caché ou descouuert, avec lequel il ne se soit déclaré, ou n'ait eü d'intelligence. Bien qu'il fust coupable comme tout le monde sçait, de tant de Traitez violez, & de tant

d'Attentats commis contre-elle ; Cela n'a pas empêché, que lors qu'il a fait mine de venir à resipiscence , & de vouloir abjurer le party contraire ; le Roy ne luy ait tendu les bras, & ne l'ait restably dans ses Estats à quelques forteresses pres , qu'il n'a voulu commettre à la foy d'un Prince si changeant , & à ce flux & reflux de volonte, dont son Ame est perpetuellement agitée.

Que si apres tout cela ce Prince s'est endurcy dans l'habitude qu'il auoit fait de faillir, & si la reconnoissance du bien receu, ny l'esperance de celuy qui luy estoit promis apres la guerre ; ne l'ont pû retenir dans son deuoir, ny arrester son esprit mobile ; Il y a tousiours sujet de louer infiniment la moderation du Roy, & son humeur magnanime ; d'auoir rendu volontairement , ce qu'il pouuoit legitimement garder : & il n'y a pas lieu de l'accuser de facilité & d'imprudence , pour auoir esté trompé ; puis qu'il auoit jugé de la conduite de l'autre par la loy de son interest ; qui est la plus certaine regle de bien juger que la prudence fournisse , & qu'il n'y auoit point d'apparence , qu'un homme qui estoit

bien, & en chemin d'estre mieux; se voulut perdre par caprice, & qu'il aymat mieux errer encore vne fois au gré d'autrui & de la fortune, & floter dans l'incertitude de ce qu'il deuoit deuenir; que demeurer en vn poste assez commode, & jouïr d'une condition assez seure.

Toutefois que sert-il de dissimuler, ou de ne dire la verité qu'à demy? L'euénement contraire aux presomptions que nous venons d'apporter quoy que fort raisonnables, n'a point trompé la preuoyance du Roy, & la defection du Duc Charles n'a pas esté vne surprise pour luy. Mais entre ces deux extremitez où il se trouuoit enfermé, de courir ce hazard, ou de se laisser reprocher d'auoir repoussé celuy qui se jettoit entre ses bras, & qui imploroit sa Clemence; Il a jugé qu'il luy estoit plus honnesté de s'exposer au premier qu'au second, & qu'il deuoit faire voir au monde par vne preuue si infaillible, qu'il n'y a rien qu'il ne voulût faire pour applanir le chemin de la Paix, & pour oster toutes les pierres d'achopement qui le trauersent.





DISCOVRS NEVFVIEME.

S'il est expedient de hazarder ce qui reste de forces à l'Estat, pour recouurer la Reputation perdue par quelque notable disgrâce. Que c'est mal-fait aux entreprises difficiles, de vouloir tout faire seul, ou de vouloir laisser tout faire aux autres.



LES choses ainsi establies, comme elles ont esté aux Discours precedens; Il reste à leuer vn scrupule, & à esclaireir vne difficulté, qui entrent dans la matiere que nous traitons; Asçauoir si pour reparer la Reputation ruinée par quelque insigne disgrâce, & releuer l'Honneur abatu par quelque perte notable; le Prince doit faire ferme contre la fortune qui l'opprime, & se roidir contre l'effort de la rauine qui l'inonde: & s'il doit plutot hazarder ce qui luy reste de son naufrage; que de le conseruer flectry de mal-heur, &

couuert de honte. Ce qui aiguise dauantage ce scrupule, & donne plus de couleur à cette difficulté, est de ce qu'il semble que la Reputation des affaires de l'Estat, ne doit pas estre moins chere au Prince ; que l'Honneur l'est à chaque particulier qui est honnest'homme. Et partant puis que tous demeurent d'accord, & que les sages aussi bien que le peuple conspirent en ce sentiment ; que l'Honneur est vn bien qu'il faut conseruer quand on l'a aquis, & racheter quand on l'a perdu, aux despens de la vie mesme, & qu'il vaut mieux perir d'vne mort honneste ; que viure d'vne vie infame. Pourquoy ne fera-t'on point le mesme jugement de la Reputation de l'Estat, & ne croira-t'on pas que le Prince soit obligé de la maintenir & de la recouurer, sans exception d'aucun moyen, & sans reserue de biens ny de vies ?

Surquoy on remarquera ; que la Reputation dont nous parlons maintenant, est differente des deux autres dont nous auons parlé aux Discours precedens, & qu'elle est d'vn autre prix & d'vne autre importance, que la premiere dont nous y auons fait mention ; qui

consiste aux bruits sinistres que les Ennemis fement, & à la mauuaise odeur qu'ils répandent, contre la gloire du Prince & au desauantage de ses affaires, que nous auons dit n'estre pas le sujet d'une iuste guerre; bien que de pareilles offenses faites à des particuliers, & de semblables taches imprimées à leur Honneur; ne soient que trop souuent le fondement & l'origine, de leurs ressentimens & de leurs querelles. Ce qui fait voir & je diray cecy en passant, que ce sentiment de Reputation & d'Honneur, dont les plus excellens hommes de tous les pays & de tous les âges, ont toujours esté touchez, & qu'ils ont non seulement autorisé par leurs preceptes, mais encore confirmé par leurs exemples; ne peut sortir que d'une nature spirituelle: Et ce priuilege qu'a nostre Ame, de s'esleuer au dessus de la matiere, & de mépriser non seulement les objets sensibles qui en emanent, mais la vie mesme qui en dépend, pour viure de celle qui ne naist que dans la pensée des autres, & ne se conserue que dans leur memoire; montre assez qu'elle est d'un ordre plus releué, & qu'elle a une naissance plus belle, que l'Ame des Bestes.

Pour reuenir à l'objection que nous nous sommes faite ; Je dis qu'il y a vne grande disproportion & vne notable difference , entre l'Honneur d'un particulier , & la Reputacion des affaires d'un Estat. Que dans l'Estat la Reputacion est vn bien subalterne à la veritable force, & vn moyen qui a pour fin l'essentielle puissance. Que celle-cy est la santé du corps, dont l'autre n'est que la bonne couleur, & cette agreable lumiere qui a coustume de sortir au dehors de la bonne constitution du dedans, & de donner dans la veüe de ceux qui regardent. Qu'elle est pour le Prince, comme nous auons dit ailleurs , ce qu'est le credit pour les Marchands, eü esgart aux Richesses effectiues. Et partant comme on n'abandonne jamais ; ce qui est de superieur en quelque ordre, pour ce qui n'est que subalterne , ny la fin pour les moyens qui sont pour elle. Comme ce seroit mal-fait de corrompre la santé pour se faire le visage bon, & de hazarder tout son bien pour maintenir son credit ; De mesme vn Prince pécheroit trop lourdement contre les Loix de la prudence ciuile , & seroit tres-juste dispensateur, & tres-mauuais œcono-

me de la puissance de l'Estat ; de la commettre toute à la fortune , & de l'exposer toute au fort douteux & infidele des armes ; pour appuyer la Reputation penchante des affaires, ou pour la remettre sus quand elle est par terre.

Tout ce qu'il peut faire en general , & ce qu'il doit faire s'il est abile, pour l'interet de la Reputation dont nous parlons; C'est d'imprimer parmy les hommes vne grande opinion de sa vertu & de sa fortune: de donner autant qu'il pourra de relief & de jour, aux bons succez qui luy arriueront , & d'imiter Romulus, que Tite Liue loüe d'auoir eü vne adresse merueilleuse & vne grace incomparable , à faire valoir tout ce qu'il faisoit , & à estaller jusqu'aux moindres parties de sa grandeur & de sa puissance. On ne scauroit assez croire, les auantages qui reuiennent à l'Estat de ces apparences mesnagées avec art , & de cette lumiere répandue au dehors bien à propos. Combien ces choses qui ne sont que superficielles & d'opinion ; apportent de respect & de confiance aux Amis, & aux Ennemis de crainte & de retenuë, & combien il importe
aux

aux Estats malades, pour n'estre pas empesché de recouurer la santé & de se refaire; qu'on croye qu'ils se portent bien, & qu'ils ont mesme de la force pour se defendre, si l'on se metoit en deuoir de les attaquer.

Mais quand ces deux parties de la grandeur d'un Estat la Puissance & la Reputation, viennent en concurrence, & qu'il faut souffrir quelque notable diminution de l'une ou de l'autre; Il vaut mieux que ce soit de la dernière, qui peut tousiours refleurir & reprendre son esclat, tant que la première subsistera; mais qui ne peut longuement suruiure à la ruine de l'autre, ny demeurer long-temps debout apres sa cheute. Et certes ce n'est pas vne chose nouuelle ou extraordinaire, de voir des vicissitudes dans la Reputation des Princes & des Estats. Il n'y a rien de si frequent dans le monde, & il n'y en a gueres jamais eü, dont la lumiere n'ait souffert quelque éclipse, & qui n'ait esté acueilly de quelque mauuais succez, qui a coupé le cours de sa gloire. Mais on peut se releuer quand on tombe de ce costé-là. Vne tache imprimée à la Reputation des affaires, n'est pas vne tache ineffaçable.

Le premier bon-heur considerable qui suruient la purge, & vn arbre que l'hyuer a despoüillé de ses fueilles & mis à nû; ne laisse pas de se renouueller en beauté, & d'auoir de la grace comme auparauant, pourueu qu'il en repousse d'autres.

C'est bien plus il semble quelquefois qu'il ne se fasse de la corruption en cette partie; qu'affin qu'il en sorte vne plus belle generation, & il est certain que la gloire des Romains a esté plus viue & plus nette, de ce que la victoire leur est demeurée sur les Carthaginois, apres auoir perdu trois batailles, & veu Hannibal victorieux aux portes de Rome; que s'ils l'eussent arresté sur les bords du Rhone, ou à l'entrée des Alpes. La deffaite de Quintilius Varus par les Allemans, n'a pas esté si honteuse au Regne d'Auguste; que la reuanche qu'en prit Germanicus fust honorable à celuy de Tybere. La vertu de la Republique de Venise a esté admirée dauantage, & a jetté de plus beaux rayons, pour estre reuenüe du grand coup qu'elle receut à la Giragdade; que si elle ne l'eust point receu, & pour estre remontée à son ancienne grandeur; que

si elle n'en fust pas descheüe. Et sans flater le Regne du Roy & l'administration presente, nous pouuons dire; que s'il est arriué quelque fois, (ce qui toutefois n'est arriué que fort rarement,) que quelque petit nüage de disgrâce ait coulé, par dessus cette longue prosperité qui a acompagné ses armes, & si ceux qui les ont gouvernées, ne les ont pas tousiours gouvernées heureusement; il semble que la fortune ne l'ait permis, que pour se conferuer par ces legeres atteintes, le droit qu'elle a sur toutes les actions humaines: que pour faire mieux remarquer la puissance de l'Estat, qui n'a pas esté esbranlé par des secousses, qui en eussent renuersé d'autres: Et beaucoup plus pour faire paroistre plus hautement & avec plus de pompe, la prudence la hardiesse & l'actiuité, de la conduite du Roy & de ses Ministres, qui a tousiours rendu inutiles aux Ennemis, les auantages que le commun destin de la guerre leur auoit donnez: qui a tousiours coupé pour le dire ainsi, les aisles à leur victoire, & l'a tousiours empeschée de franchir les limites du mesme Champ, où ils l'auoient obtenuë. Bref qui

l'a tellement enfermée au milieu d'un si grand nombre de celles qui l'ont précédée & qui l'ont suivie de nostre part ; qu'on peut dire qu'en quelque façon elle y a disparu & s'y est esvanouïe, comme si elle ne fust point arrivée.

Auant que de venir à l'autre membre de la comparaiſon, que nous auons proposée au commencement de ce Discours, qui est le sentiment que les particuliers ont pour ce qui touche leur Honneur ; j'ajouſteray deux autres Maximes fort importantes, à celle que j'ay desia establie pour ce qui regarde la Reputation de l'Eſtat. La premiere qu'il y a certains Points de Reputation ambigus ou contestez, & certaines delicateſſes d'honneur qui ne ſont pas bien esclaircies, ou qui ſont reuouées en doute ; ſur lesquelles vn Prince ny ſes Miniſtres, ne ſe doiuent pas roidir opiniaſtrement, ny ſe debatre à outrance, quand il n'eſt pas queſtion de cela, & qu'il s'agit de traiter & de conclurre quelque grande affaire, comme vne Paix, vne Alliance de ſang, ou vne Ligue &c. Car alors il faut taſcher de couler deſſus avec ſoupleſſe, & de manier ces eſpines

fans se piquer. C'est ainsi qu'en vſa Elizabet d'Angleterre, ſur la conteſtation qui naquit à Bologne entre les Ambaſſadeurs d'Eſpagne & les ſiens, pour la preſeance. L'expedient qu'on trouua fuſt de traiter par eſcrit, & par propositions & reſponſes reciproques enuoyées de part & d'autre. C'eſt le temperament qui fut obſerué en la Conference de Veruins, entre nos Ambaſſadeurs & ceux d'Eſpagne. Les Noſtres y furent placez de telle ſorte; que nous auions raiſon de preſumer, que la Droite que la Juſtice & vne poſſeſſion immemoriale nous ont donnée; nous eſtoit demeurée: & il en reſta à ceux d'Eſpagne je ne ſçay quelle apparence & quelle ombre, pour cacher & pour couvrir le deſauantage qu'ils ſembloient auoir receu, dans l'injuſte pretention qui les tourmente pour ce ſujet, & qui leur eſt entrée dans l'eſprit avec le deſſein de la Monarchie.

Hors de là & quand on n'a point à paſſer outre, ny à trauailler à quelque Traité neceſſaire au bien du public; il ſe faut bien donner de garde de biaiser, & de rien relâcher de ſes droits en des matieres importantes. Il

ne faut point laisser metre en compromis directement ny obliquement la dignité de l'Estat, ny souffrir vne pretention d'égalité, où la superiorité nous est acquise. C'est ainsi que le pratiquerent Pibrac & Ferrier au Concile de Trente; qui aymerent mieux se retirer, qu'assister à vne Ceremonie où le premier rang sur les Ambassadeurs d'Espagne; ne leur estoit pas assez netement acordé, ny leur dignité assez ouuertement reconnuë. C'est ainsi qu'aux Noces du fils du Roy de Dannemarc il y a quelques années, Monsieur d'Auaux Ambassadeur du Roy vers cette Couronne; rejetta constamment & sans reserue, tous les moyens qu'on luy proposa, qui laissoient en quelque doute la préeminence qu'il vouloit auoir sans difficulté & sans modification, sur l'Ambassadeur d'Espagne.

Il ne faut pas pourtant oublier de remarquer icy; qu'il y a quelquefois de petites delicateffes & des formalitez de neant, auxquelles les Ministres des Princes Amis s'acrochent, & pour lesquelles ils se broüillent. Ce qui est cause que pendant qu'ils s'amusent à les esclaircir & demesler; il se pert beaucoup

de temps qui ne seroit pas inutile aux affaires de leurs Maistres , & que les secretes aigreurs qui ont pris racine dans le cœur de ces Ministres, les tiennent tousiours diuisez, & empeschent qu'il ne se forme jamais entre-eux, vne bonne & sincere correspondance. Les Esprits fiers & glorieux, sont presque tousiours sujets à tomber dans ces inconueniens ; Et principalement quand ils commencent à agir, & dans l'entrée de leurs employs, qu'ils veulent tousiours signaler par quelque chose qui fasse du bruit, & leur donne de la Reputation par quelque nouveauté, qui oblige le monde à tourner les yeux de ce costé-là, & à parler de leur Ministere. Mais ceux qui sont abiles & sages, se destourneront autant qu'il leur sera possible, de ces pierres d'achopement, & éviteront ces Escueils, contre lesquels leur fortune pourroit se briser & faire naufrage. Et generalement parlant, ils n'engageront jamais, s'ils le peuuent empeschier avec honneur, leurs Maistres en aucune broüillerie, & supposeront qu'ils ont tousiours assez, des affaires qui sont sur pied ; sans qu'il faille leur en faire de nouvelles, & assez des querelles

qui naissent de la rencontre & du mélange des choses qu'ils manient ; sans qu'il leur en vienne encore de la mauuaise humeur , & de l'imprudente & indiscrete conduite de leurs Ministres.

La seconde Maxime est , qu'il ne faut pas tant donner à l'amour d'une grande Reputation , ny se laisser si fort transporter au desir d'une grande vtilité ; que dans une difficile & longue entreprise , on vueille tout faire pour auoir tout , & n'auoir point de compagnon ; pour n'estre point obligé de partager avec personne la gloire de l'euénement , ou de diuiser la masse de la conqueste , qu'on veut auoir toute entiere. Au contraire on se doit toujours figurer , qu'aux affaires de grande importance ; on ne scauroit apporter trop de seureté pour les faire reussir : ny employer trop d'ouuriers pour haster une besoigne , que mille accidents inopinez peuuent trauerser , & que la fortune a mille inuentions pour la destruire & l'enuoyer en fumée. Je ne finirois jamais , si je voulois rapporter toutes les experiences que le monde a faites , & tous les exemples que l'Histoire raconte , de cette importante

portante verité. Il ne faut point sortir du temps qui court, ny des affaires de l'Europe; pour en trouuer des marques viues & sensibles. Nous en auons deuant les yeux en ce qui s'est passé cette année en Allemagne, qui ne sçauroient estre plus fraisches: Et pour monter vn peu plus haut, si apres la mort du Roy de Suede, & la perte de ce Prince incomparable, de la Discipline duquel ne sont pas sortis de moins celebres Capitaines, ny en moindre nombre, que de celle du grand Alexandre; Les Suedois eussent voulu agir avec vn peu plus de concert qu'ils ne firent, avec la France; leur bon-heur qui commença à decliner dans l'Alsace par la leuée du siege de Constance, & du Blocus de Brisac; ne fust pas allé expirer deuant Nortlinghen, & il ne seroit pas remonté au point d'eleuation où nous le voyons maintenant, sans la parfaite correspondance où ils sont entrez depuis avec ce Royaume.

Le passe de ce sentiment desordonné; dont les hommes de grand cœur se laissent quelquefois fraper, à vn sentiment contraire, dont les sages sont malades quelquefois par trop

T

*Lambey est
blasné de
n'auoir pas
attendu
Hatzfeld.*

de prudence. Aussi bien ne ſçauroit-on mieux faire, pour bien tirer la figure d'une vertu, & pour la representer au naturel; que de la conſiderer au milieu des deux extremités où elle loge, & de la peindre par l'oppoſition des contraires où elle confine. Il ſe trouue donc des Princes, qui pour tarder trop à ſe declarer pour vn party, avec lequel ils ſont en communauté d'interets & de fortune, & pour ſe contenter de luy donner vne chaleur ſecrete, & vne aſſiſtance languiffante & oblique; le voyent enfin eſchoüer. D'où il arriue qu'ils ſont obligés de s'oppoſer ſeuls aux progrès du party contraire, & au courant d'une proſpérité qu'il eſt mal-aiſé de retenir, & d'empêcher qu'elle n'entraîne tout ce qui penſe ſe mettre au deuant, & retarder ſon impetuoſité & ſa violence. Cela certes n'arriue que trop ſouuent; au lieu que ſi dès le commencement, & lors que les forces des deux partis eſtoient balancées; Ils euſſent voulu joindre les leurs, à celui qu'ils fauoriſoient en cachete & par deſſous main; Il n'y a point de difficulté qu'ils n'eſſent emporté l'autre, & fait pencher la balance du coſté qu'ils deſiroient qu'elle penchat.

Je veux expliquer ma pensée par vn exemple memorable. Il se fit il y a desia assez longtemps vne Conjuracion par les Barons du Royaume de Naples, contre Ferdinand le vieux & le Duc de Calabre son fils, qui agissoient conjointement avec le pere au gouuernement de l'Estat. Le Duc de Lorraine à cause des pretentions qu'il auoit sur ce Royaume, & le Pape à qui l'Ambition de ces deux Prin- *Innocent 8.* ces estoit suspecte, & la Grandeur odieuse; se mirent de la partie. La Republique de Venise qui estoit blessée de la mesme passion que le Pape, & que les Aragonois regardoient, comme le plus grand obstacle & la plus forte barriere, des desseins qu'ils auoient en Italie; ne voulut pas neantmoins s'embarquer avec les Barons du Royaume, ny entrer dans la Ligue des Princes Confederez. Elle choisit vn temperament qui ne luy reussit pas, & vne voye mitoyenne qui luy fust enfin funeste. Elle licentia Robert de Saint Seuerin Capitaine de grand nom & de grand merite, qu'elle auoit à sa solde, & avec luy vne partie de ses troupes qu'elle luy permit d'emmener, & quelque argent qu'elle luy donna sous main pour les

payer, & pour empêcher cette masse de gens de guerre de se dissoudre, auant qu'elle eust pris seruire. Je diray icy en passant qu'on voit par là, que cette maniere qui est maintenant si fort en vſage, de faire la guerre sans la déclarer, & d'exercer des actes d'hostilité sous le visage de personnes neutres; n'est pas vne inuention des derniers temps, ny vn artifice propre de la Maison d'Austriche; bien qu'elle s'en ſerue plus que nulle autre: mais qu'elle vient de plus loin, & descend d'une ſource plus haute & plus reculée.

En cét equipage donc & avec ce masque; Saint Seuerin ſe vint offrir au Pape par ordre de la Republique, & fuſt deſtiné Chef des Armes de l'Egliſe, & principal Directeur, & pour le dire ainſi, premier Mobile de cette guerre. Mais ce qui a couſtume d'arriuer à la plus-part des Lignes, particulièrement quand elles ſont composées de membres foibles; arriua à celle-cy. Les armes de Lorraine marcherent tard & hors de ſaiſon; pendant quoy celles des Barons & du Pape furent mal-traitées, & la viſteſſe avec laquelle le Duc de Calabre alla chercher les Ennemis, qui n'eſtoient

pas encore à demy prêts ny bien assemblez, & les heureux succez qu'il obtint sur Saint Suerin, qui perdit en cette guerre vne partie de la Reputacion qu'il auoit aquisée en plusieurs autres; eurent bien-tost defilé cette chaisne & rompu la Ligue. Le Pape ne fust que trop aise d'entendre à vn acommodement, qui estoit desiré avec ardeur des Aragonois, & les Barons, excepté le Prince de Salerne qui demeura inflexible mesme dans la mauuaise fortune, & ayma mieux quitter le Royaume, que viure sous vne domination qu'il haïssoit; trauaillerent à se remettre aux bonnes graces du Roy & du Prince.

Les Venitiens voyans que les efforts de cette Ligue contre les Aragonois n'auoient seruy qu'à les rendre plus puissans, & que les machines qui auoient esté dressées pour les renuerfer, n'auoient fait que les affermir; connurent la faute qu'ils auoient commise, de n'auoir pas esté de la partie, & apres auoir inutilement sollicité le Pape & le Duc de Lorraine de la vouloir renoüer; se resolurent de s'opposer seuls à l'accroissement de la puissance de Ferdinand & de son Fils, & de metre vn

frein à l'Ambition de ces Princes, qui se débordoit sans mesure.

Cette Consideration que je viens de représenter, me porte à vne autre qui n'en est pas esloignée, & qui s'y peut joindre sans violence. C'est qu'il y a encore des Princes, qui aymans par trop le repos, ou craignans par trop la despenſe; veulent tousiours demeurer neutres entre deux partis qui se font la guerre, & estre spectateurs immobiles de leur action; bien qu'ils ayent vn notable interet, que l'un ne succombe pas, & que l'autre ne deuienne point le maistre. Les raisons dont ces Princes que je suppose estre puissans, appuyent leurs sentimens, & flatent leur procedure, sont celles-cy; Que si le party qui travaille pour leurs interets, vient à estre maltraité de la fortune, & acueilly de quelque grande disgrâce; ils seront tousiours à temps pour le releuer, & qu'avec les pieces de son débris qui seront tousiours considerables, & leurs propres forces qui seront fraisches & entieres; Ils ne feront pas seulement le contre-poids de la puissance de l'autre, qui sera las du chemin qu'il aura fait, & fatigué mesme de la

viâtoire qu'il aura gagnée; mais qu'ils le rangeront encore à la raison, & le contiendront dans les bornes, où ils desîrent qu'il demeure. Que cependant ils espargneront leurs hommes, & feront fons de finances: ouuriront à leurs sujets le commerce qui sera fermé à ceux des autres, & les enrichiront de leur substance & de leur despoüille. Que si celuy à qui ils desîrent du bien, vient à l'obtenir, & à auoir le Ciel fauorable & la fortune propice; Ils joiüront des effets de son bon-heur, sans qu'ils ayent rien contribué à le faire venir, & auront leur part de la recolte, sans auoir rien mis de la semence.

Cela certes a quelque lueur de bon sens, & est vne maniere specieuse, qui a pipé quelques Politiques qui la prattiquent ou qui la conseillent. Mais pour moy je ne la sçauois approuuer, & quelque montre d'vtilité que d'abord elle presente, & quelque esclat de prudence qu'elle jette; il est certain que d'ordinaire elle cache les dispositions & les principes d'vne grande ruine à l'auenir, & couue des maux qui ne paroissent & ne se descouurent; que lors qu'ils n'ont gueres plus de

remede. Car outre que c'est quelque espece d'injustice, & que cela semble choquer la Loy generale du monde; de vouloir auoir le bien sans l'acheter de quelque chose, & participer au fruit de la peine & de la despenſe d'autrui, sans y rien metre du sien. Ceux qui se reposent sur ce fondement, & se repaissent de cette pens e, qu'ils arresteront quand ils voudront la rapidit  d'un party victorieux; n'ont pas bien consider  quelle est la condition des vaincus, & quelles sont les suites d'une victoire. Ils ne se souviennent pas, que ceux-l  ne sont qu'un leuain de frayeur & de consternation, qui infecte les autres avec lesquels ils se meslent: Et qu'une victoire generale, si l'on ne la laisse pas languir & qu'on la s ache poursuivre; ressemble   un Torrent qui se precipite apres auoir forc  ce qui le retenoit, &   la Mer qui se desborde apres auoir rompu ses digues. Je laisse   deuiner   ces deux Puissances Chrestiennes, qui sont demeur es immobiles jusques icy, & n'ont fait qu'assister comme   un spectacle seulement prepar  pour estre veu,   ce qui se fait depuis tant d'ann es en Allemagne & en Italic; si ceux
  qui

à qui la Maison d'Austriche a eü à faire en ce pays-là, eussent succombé ; si elles eussent esté en estat de les restablir, & de se charger du faix des affaires perduës & desespérées. Certes il faut auoüer que la constitution de l'esprit humain , est d'ordinaire si foible & d'une trempe si molle ; qu'il a de la peine à se refoudre d'entrer dans les entreprises difficiles, quoy qu'elles soient necessaires : ou que lors qu'il y entre de bonne heure ; il n'a pas la constance d'y perseuerer , & qu'il manque d'ha-leine pour aller jusques au bout, & pour acheuer la course .



V





DISCOVRS DIXIEME.

*De la difference qu'il y a entre l'Honneur des
Particuliers & la Reputation des Estats, & si
le Prince est maistre de l'honneur aussi bien
que de la vie & du bien de ses sujets,
quand la neceſſité publique
le requiert.*



ENONS maintenant à l'Honneur des Particuliers, & à cette sorte de bien, qui est esleué dans l'opinion des hommes, au dessus de tout ce que la fortune peut donner de grand, & que la matiere & les objets des sens peuuent contenir d'agreable. l'entens par l'HONNEUR, cét esclat qui rejallit & cette odeur qui s'exhale de l'exercice de la probité, & des autres devoirs de chaque condition particuliere, & qui laisse dans l'esprit des hommes vne bonne impression, & vne haute estime de celuy qui les pratique. C'est

en vn mot la vie ciuile de laquelle les bestes sont exclues, & dont les creatures raisonnables ont vne forte inclination, & vn instinct violent de viure, & d'ennoblir leur Estre naturel & ordinaire. Cette vie comme nous l'auons desia remarqué, a esté de tout temps la passion des grands personnages, & ils ne l'ont pas seulement preferée aux plaisirs & aux richesses; mais à la vie naturelle mesme. La raison de cette difference est, d'autant que l'Honneur estant des appartenances de la vertu & de son train ordinaire; participe à la dignité de son principe, & en attire vne impression & vne teinture pour le dire ainsi, qui est du mesme ordre que luy, & d'un prix supérieur à tout ce qu'il y a de releué dans l'empire de la fortune, & à tout ce qu'il y a d'attrayant dans l'enceinte de la matiere.

J'ay dit que l'Honneur estoit des appartenances & du train de la vertu; pource que véritablement il n'y a point de Nation d'intelligence si grossiere & obtuse, & de mœurs si barbares & incultes; qui n'estime les actions de la probité, & ne loüe ces deuoirs inuiolables, que nul Legislatteur n'a inuentez, & que nul

droit particulier n'a establis ; mais qu'une commune nature & une loy vniuerselle, nous ordonnent de rendre , à Dieu au prochain & à nous-mesmes. Que si nous voyons quelque-fois, que dans la corruption des mœurs de la Société, & dans l'injuste distribution qui s'y fait des recompenses & des peines ; on charge de honte les gens de bien , & on comble les meschans de gloire : on met des Couronnes sur des testes criminelles, & on lance des foudres sur des vies innocentes ; cela n'arriue pas par une confession publique & par une profession ouuerte qu'on fasse, de vouloir flestrir la vertu, & rendre de l'honneur au vice : de juger celui-cy digne d'estime & de veneration, & l'autre d'opprobre & d'ignominie. Mais c'est qu'en effet on les desguise & falsifie des couleurs l'un de l'autre , & qu'on transpose leurs Enseignes : qu'en faisant la guerre à la vertu ; on fait semblant de poursuivre à outrance le vice, & de faire honneur à la vertu , quand on traueille à eriger des Statuës & des Trophées, à son Aduersaire . Mais que la plus débordée licence & la plus impudente calomnie, qui ayent jamais parû dans le monde,

ayent jamais entrepris d'attaquer la vertu en son nom & sous sa figure , & de luy procurer ou de la peine ou de la honte ; c'est dequoy il ne s'est encore veu d'exemple.

C'est pourquoy puis que la vertu a tant de dignité & tant d'éléuation , & qu'elle est en cette vie la dernière fin de l'homme , & la Couronne de toutes les facultez & de toutes les operations de l'Ame ; Ce n'est pas merueille, si les hommes ne sont pas seulement épris de sa beauté, & de la forme qui la constituë : mais se laissent encore tellement toucher à ce qui en sort au dehors , & que l'on appelle HONNEUR, qu'ils le mettent au dessus de tout ce qui n'est pas de son ordre & de sa classe, & en vn mot s'ils aiment mieux souffrir la mort naturelle, que de laisser tacher la vie civile.

Il n'est pas de mesme de la Reputation des Estats, dont nous auons si souuent parlé, & elle ne vient pas d'une source si pure, & n'a pas vne naissance si noble ; que l'Honneur des Particuliers. La vertu n'en est pas la seule cause, comme de l'autre. La grandeur des succez d'où elle procede ; n'est pas moins vn

ouillage de la fortune, qu'un effet du merite des hommes: les Princes ne sont gueres moins formidables pour estre heureux, que pour estre vaillans, & il s'est trouué des Payens, qui ont affecté des commerces particuliers, & des communications secretes avec quelque Diuinité, pour se rendre les victoires plus faciles par cette creance. D'autre costé il est certain que l'Honneur des Particuliers se sauue plusieurs fois du naufrage, que fait la Reputation des affaires. Hannibal ne perdit rien du nom de grand Capitaine, lors qu'il fust vaincu par Scipion; bien que la gloire de Carthage fust esteinte par cette disgrace. Le Prince de Condé sortit plein d'honneur de la bataille de Saint Quentin que nous perdismes, & où il se fit vne si grande bresche à la dignité de cette Couronne, & l'Admiral de Chastillon se vantoit quelques jours auant l'execution de la Saint Barthelemy, qu'il auoit cet auantage sur Alexandre & Iules Cesar; que la perte de quatre batailles, qui auoient sans doute ruiné ou fort affoibly la Reputation de son party; n'auoient rien diminué de la sienne.

La proportion donc qui se peut trouuer, & l'ajustement qui se peut faire, entre la Reputation des Estats & l'Honneur des Particuliers, consiste en cecy; que comme la premiere n'est que l'opinion qui deriue, & le bruit qui se répand de leur grandeur & de leur puissance, dans l'esprit des Estrangers; Le second aussi n'est que l'impression que les vns reçoivent, & la belle image qu'ils se forment de la vertu & du merite des autres. Et derechef comme la Reputation des Estats, est moins considerable que la puissance dont elle est sortie; Que l'Honneur des Particuliers est aussi inferieur en dignité, à la vertu qui en est le principe. Cela me porte à vne consideration qui est vn peu escartée de mon sujet, mais qui ne luy est pas estrangere; C'est qu'il n'y a gueres de corruption qui ait si fortement saisi le genre humain, ny de desordre qui le defigure plus vniuersellement que celuy-cy; qu'y ayant si peu de personnes dans le monde, qui soient veritablement gens de vertu, & qui s'aquient fidelement des devoirs de leur condition; il n'y en a point du tout qui ne vueillent passer pour gens d'honneur, & qui ne s'of-

fenfent si l'on les acufe d'estre ce qu'ils fça-
uent qu'ils font, & si l'on ne rend de faux tes-
moignages en leur faueur.

Puis que nous sommes engagez si auant en
cette matiere, & entrez dans vn si beau champ
que celuy de l'Honneur ; il n'y aura point
d'inconuenient d'y faire encore quelque
course, & d'agiter vne difficulté sur ce fujet,
fameuse dans la Politique ; Asçauoir si les
Princes sont aussi bien maistres de l'Honneur
de leurs fujets, comme ils le sont de leurs biens
& de leurs vies, & s'ils ont droit de les faire
paroistre coupables de quelque crime, bien
qu'ils en soient innocens : & de charger d'vne
tache honteuse leur Reputation où peu de
gens ont interest ; pour en descharger la leur
si importante à tant de personnes. En l'affaire
d'Antonio Perez qui fit tant de peine à Phi-
lippe second, & tant de bruit par toute l'E-
urope ; Diego Chauez Confesseur de Philippe
jugea qu'il estoit expedient, de sacrifier l'hon-
neur & la personne mesme de Perez aux tour-
mens & à la honte, pour sauuer l'honneur du
Roy, & pour destourner les fascheuses conse-
quences qui resulteroient contre l'Estat ; si
l'on

l'on le croyoit l'auteur de l'assassinat commis par son ordre & par le ministere de Perez, en la personne d'Escouedo Secretaire de D. Iean d'Austriche.

Cette opinion pourtant ne me semble ny assez bien fondée, ny assez bien colorée, & il y a de l'apparence qu'encore que l'autorité du Prince sur ses sujets s'estende fort loin & soit fort diffuse; elle n'est pas pour cela infinie, & qu'elle reçoit des exceptions qui en limitent l'estenduë. Et comme il est certain que le Prince n'a pas droit d'obliger ses sujets, de violer les Loix de la probité, & de deuenir parjures, sacrileges, adulteres, &c. Il est probable qu'il n'a pas la faculté d'exiger d'eux; qu'ils laissent souiller leur nom & tacher leur memoire, du des-honneur qui rejallit de ces crimes, & beaucoup moins de les exposer pour sauuer sa Reputacion, aux tourmens & aux suplices dont on punit les veritables criminels, comme Perez y fut exposé par l'auis du Confesseur de Philippe. Je ne sçay mesme, si comme il ne luy est point loysible, de leur interdire pour quoy que ce soit, les deuoirs de la probité, & l'exercice des vertus necessaires; il luy est

permis, de priuer ces vertus de leur premiere & naturelle recompense, qui est l'estime, & de leur dérober cette lumiere qui les esclaire, & cette beauté qui les pare au dehors, & leur donne de nouveaux attraits, pour les faire rechercher avec plus d'ardeur, & imiter avec plus de soin, de ceux qui les considerent.

*J'explique
cela au
vray sens
qu'il doit
auoir à un
Traité de
l'Obeissance
des su-
jets à l'en-
droit des
Souverains
que je mets
en la Troi-
sime Par-
tie.*

Le fondement sur lequel j'appuye mon opinion est celuy-cy; d'autant que les Souuerains n'ayans point communement d'autre puissance sur leurs sujets, que celle qu'ils leur ont transportée, ny de droit qu'ils n'ayent receu d'eux; Il y a de l'apparence qu'ils n'ont point entendu leur laisser la disposition de leur honneur, comme ils leur ont soumis leurs biens & leurs vies: ny se dessaisir pour l'amour d'eux, de cette belle possession & de ce riche heritage qu'ils recueillent de leur vertu; comme ils se sont despoüillez de la liberté qu'ils ont receu de la Nature. Cela se confirme par cette consideration qui me semble concluante, qui est que le bien & la vie des peuples estant commis à la garde des Souuerains, & enfermez dans le benefice de la pro-

tection qu'ils leur doiuent rendre : & que ceux-cy estans obligez de veiller pour leur seureté, & de les preseruer des vsurpations des Auares, & de la force des Violens ; Il n'estoit que trop raisonnable, que pour s'aquiter de ce deuoir & remplir cette obligation ; Ils fussent armez de la force des particuliers, & secourus de leurs richesses, & qu'ils pussent employer vne partie de celles-cy pour conseruer le reste, & exposer vn peu de vies pour en asseurer vne infinité.

Mais il n'est pas de mesme du veritable Honneur de l'homme, & de cette juste estime qui suit naturellement l'exercice de la probité, & des autres deuoirs necessaires de chaque condition. Comme il n'a pas besoin de l'autorité du Souuerain pour se conseruer, mais des causes qui le produisent, & ne vient pas moins sous la violence d'un Tyran, que sous l'Empire d'un Prince juste, & sans l'interuention des Loix, que s'il y auoit des Loix qui l'ordonnassent ; Ce n'est pas dis-je merueille, si pour cette consideration, comme il n'entre point dans la fin de l'Institution des Souuerains ; Il n'est pas aussi compris sous l'esten-

duë de leur puissance, & s'ils n'ont pas droit de le sacrifier à la nécessité publique, comme les biens & les vies de leurs sujets, dont ils ont pris la protection & la tutelle.

On pourroit demander en suite de cela ; si pour le moins les particuliers ont droit d'abandonner leur Honneur, pour l'intérêt du public, & de le laisser souiller de quelque vilaine tache, pour sauver celuy du Prince, & la Reputation des affaires. L'auoüe que cette difficulté me paroît si grande ; que je n'oserois entreprendre de la décider, & que je voy tant de raisons de part & d'autre & d'une force si esgale ; qu'elles me balancent l'esprit, & m'empeschent de prendre party. Je diray seulement icy, que j'ay autrefois admiré dans l'Instruction que le Marquis de Bedemar, qu'on a depuis appelé le Cardinal de la Cueva, laissoit à Louys Braue qui estoit destiné son Successeur à l'Ambassade de Venise ; qu'entre autres choses, il luy conseille cellecy, que pour se rendre plus agreable aux Venitiens, & s'insinuer plus facilement dans leurs esprits irritez contre luy & contre le Duc d'Osborne, à cause de la Conspiration de

Renaut, dont ils les croyoient Autheurs; Il ne fit point difficulté de feindre d'entrer dans leur creance, & d'approuuer leur ressentiment : ny de les charger de l'enuie de ce dessein & de la hayne de cét attentat, pour en descharger le Roy son Maistre. Et tout cela apres auoir fait de grandes protestations de son innocence & de celle du Duc d'Ossone, & apres vn subtil & artificieux discours, par lequel il tasche de montrer, que cette Conspiration n'estoit qu'en songe, & que ce n'auoit esté qu'un Spectre, que le Senat de Venise auoit forgé pour effrayer le peuple, & pour luy faire souffrir plus doucement les subsides & les impos dont il le vouloit charger, & dont il auoit besoin pour continuer la guerre qu'il faisoit à l'Archiduc Ferdinand & au Duc d'Ossone.

On pourroit dire en faueur de ce conseil, qui semble si genereux, & qui a vne apparence si plausible; que si le Marquis de Bedemar estoit innocent, comme il l'a voulu persuader, & comme pieusement on le peut croire; Il scauoit qu'il luy seroit fort aisé de se purger de cette tache, & que le temps qui est le

pere de la Verité, & qui tire des tenebres les choses que l'ignorance ou la malice y ont cachées; gueriroit le monde de l'erreur & de la mauuaise impression, qu'il auoit receüe contre luy. Que si cela n'arriuoit point, & s'il demeuroit coupable dans l'opinion publique, comme les Venitiens le presumoient; ce ne seroit que de ces crimes illustres, que les Ambitieux prennent pour vertus, & que cette Raison d'Estat, qui permet de faire le pis qu'on peut à ses Ennemis declarez ou couuerts; autorise & recompense.

Il est vray que les Espagnols à qui cette Raison d'Estat n'est pas inconnüe; regardoient en ce temps-là les Venitiens comme leurs Ennemis, à cause de la guerre qu'ils auoient avec l'Archiduc de Grets leur parent, & à cause de l'argent qu'ils fournissoient secretement au Duc de Sauoye, dont ils auoient juré la ruine, & qu'ils persecutoient à outrance. Mais pourtant quoy que permette cette Raison d'Estat, dont nous venons de parler; c'estoit vne chose bien sale si elle estoit veritable, de susciter des Traistres, & de les enuoyer au seruice d'un Prince avec lequel on

n'est pas broüillé: chez qui on tient des Ambassadeurs, & avec lequel on conserue toutes les apparences & toutes les marques exterieures d'amitié; pour metre le feu dans ses ports, dans ses villes & dans ses Arsenals; comme Renaut Emissaire du Duc d'Ossone auoit esté aculé ou conuaincu, d'auoir voulu faire contre la Republique de Venise. Que si celle-cy estoit en guerre avec l'Archiduc de Grets Beau-frere du Roy d'Espagne, & si le destin des choses du monde, qui a coustume de ne les laisser pas long-temps en vn mesme estat, & de les promener par vne perpetuelle vicissitude de tourmentes & de bonaces; l'auoit portée à rompre avec luy; Cette Rupture estoit vne guerre ouuerte, telle que Dieu la permet entre les Princes Souuerains, & où toutes les formes que le droit des gens ordonne, auoient esté obseruées. Quant à l'argent qu'elle fournissoit au Duc de Sauoye; il ne luy estoit pas deffendu d'assister de sa bourse vn Amy foible, en la ruine duquel elle estoit notablement interessée; contre vn Ennemy puissant qui le vouloit metre en chemise, & vouloit par la conqueste de ses Estats, fermer

la porte aux secours qui pourroient venir de France en Italie, pour empescher le dessein qu'il auoit fait, d'acheuer d'enuahir ce beau pays, & de le reduire en prouince.

Pour faire encore vne petite station sur cette matiere, & pour y apporter quelque conjecture, puis qu'on n'y voit pas assez clair pour en parler avec certitude; le diray seulement que si la Conjuraton dont il est question n'a pas esté veritable, comme les Espagnols le soustiennent; qu'elle a eü assez de vray-semblance, pour porter la Republique à faire le chastiment qu'elle a fait de ceux qu'elle en a creu coupables. Car de s'imaginer, comme le Marquis de Bedemar l'a publié, que cela n'ait esté qu'une fausse alarme qu'elle ait voulu donner à ses sujets, & qu'un fantosme qu'elle mesme ait formé pour leur faire peur, pour la raison qu'il suppose; outre que c'est vne question de fait de difficile preuue & d'esclaircissement mal-aisé; s'il n'y auoit que cela, la creance n'en seroit pas peut-estre impossible. Mais que pour mieux dorer l'artifice, & donner plus de couleur à la fourbe; elle eust fait mourir & de mort extraordinaire, des personnes

personnes qu'elle sçauoit estre innocentes; *il y en eust de noyez* c'est ce que je ne sçauois me persuader, & il est plus probable que deux particuliers, comme le Duc d'Ossone & le Marquis de Bedemar, dont le premier s'est tousiours joiué de la Religion & de la conscience, comme tout le monde sçait, & le second hayssoit les Venitiens de qui il croyoit auoir esté mal-traité; ayent composé cette fable; que non pas que tout vn grand Corps, comme est le Senat de Venise, parmy lequel il y a plusieurs personnes de sagesse & de vertu remarquables; ait consenty à vne si noire procedure, que celle dont nous venons de parler.

Enfin puis qu'on hazarde si souuent la vertu & la conscience, pour des interets humains & des esperances basses: puis qu'on fait comme faisoient ces simples habitans du nouveau monde, qui prostituoient l'or & l'argent pour du verre, & pour des bagatelles de l'ancien; Il ne faut point s'estonner, si quelquefois pour de semblables sujets on expose l'honneur, qui n'est qu'un accessoire de la vertu & de la bonne conscience; principalement quand cette prostitution est couuerte d'un

Y

manteau si specieux, que celuy du service du Prince, & du bien de ses affaires. C'a esté de tout temps le sort de la Cour, d'empoisonner les hommes, sinon de la profession, pour le moins de la prattique de ces Maximes des-honnestes qui vont à la ruine de l'honneur & de la vertu, pour aquerir du bien & de la puissance. Peu de personnes de celles qui y vivent long-temps s'engarentissent, & la Raison a besoin d'une grace particuliere & d'un secours non commun, pour tenir bon contre la force des objets dont les sens sont perpetuellement assiegez, & contre la multitude des exemples dont elle est de toutes parts combatuë. La lueur que le luxe y jette; fait aymer les richesses qui en sont l'aliment & le culte qu'on rend à la Puissance; la fait rechercher avec tant d'ardeur, & conseruer avec tant de peine: Et comme on ne tombe pas d'abord au fons du mal, mais on est quelque temps à y descendre, aussi ceux qui poursuivent ces choses ou qui en jouissent; s'acoustument peu à peu à en faire leur souverain bien, & à tenir toutes les autres qui ne seruent pas à celles-là, pour vaines & ridicules.

Cela ne fait pas pourtant, ny que toutes les Cours soient si corrompuës: ny que tous ceux qui sont obligez d'y viure, s'y corrompent. Il y en a que Dieu y appelle & qu'il y maintient, pour y donner de bons exemples, & pour faire des richesses & de la puissance, des instrumens de vertu, & de la matiere pour les bonnes œuvres. Il y en a qui connoissent & qui sentent, que hors de là & sans cette consideration, ces choses n'estant que vanité & affliction d'esprit, aussi bien que toutes les autres de leur genre; elles n'ont que ce miserable auantage sur celles-cy; qu'elles sont vne plus grande vanité & vne plus grande affliction d'esprit qu'elles. Quoy que c'en soit, la fidelité des Courtisans, qui sont si desperuëment épris, & si desesperement possédez du desir de faire fortune; qu'il n'y a point de lascheté qu'ils ne fassent, ny de bassesse à laquelle ils ne descendent, pour l'amour de ceux de qui ils l'attendent; leur doit estre fort suspecte, & ils ont grand sujet de se deffier, que ces gens n'adorans que la puissance qu'ils ont de bien-faire, ne changent d'affection si elle change de maistre, & ne manquent de reconnoissance,

dés qu'ils manqueront d'esperance. Et c'est cette deffiance qui est à mon auis l'origine d'une Maxime, qui n'est que trop familiere aux Grands; de tenir tousiours les petits qui leur sont vtils par les liens de cette passion: & pour ne perdre pas ceux qu'ils ont besoin de conseruer; de ne leur faire jamais à la fois tout le bien qu'ils leur veulent faire. Au lieu que ceux-cy s'ils sont gens d'honneur, auront tousiours la reconnoissance qu'ils doiuent auoir pour leurs Bien-fauteurs: & n'auront gueres d'esperance s'ils sont abiles, du costé de ceux qui leur peuuent faire du bien, & regarderont les choses de la Cour, comme les choses du monde les plus pleines d'incertitude, & qui ressemblent à ces jeux de hazard, où pour un Billet de bonne rencontre; il y en a cinquante qui ne portent rien.





DISCOVRS ONZIEME.

*Que quand la guerre se rend trop ruineuse aux
sujets d'un Prince, il doit tascher de la termi-
ner s'il luy est possible. Que le Roy a esté por-
té à faire & à continuer la guerre jus-
ques icy par vne necessité inéuitable.*

*Que les Ennemis & non pas luy
se sont tousiours esloignez
de la Paix.*



PRES auoir pris vn si grand tour,
& fait des courses si longües; il est
temps que nous retournions au
lieu d'où nous estions partis, &
que nous acheuions d'esclaircir le
point de l'vtilité que nous auons dit deuoir
accompagner ou suiure la guerre, par vne troi-
sième Regle, que nous ajousterons aux deux
precedentes. Je dis donc en troisième lieu,
que lors que la guerre s'enflamme si fort & se
fait si furieuse; qu'il y a danger qu'elle ne con-

fume trop notablement le bien de l'Estat, & la substance du peuple ; Le Prince la doit esteindre s'il luy est possible , & imiter les sages Pilotes, qui ont coustume de relascher s'ils le peuvent faire, & de gagner quelque abry, quand la tempeste est trop forte. Louys XI. pratiquoit souuerainement cette Regle ; comme Philippe de Comines l'a remarqué : Les Venitiens l'ont aussi de tout temps obseruée ; comme j'en pourrois apporter plusieurs exemples, & les Espagnols mesmes quelque fierté d'humeur qu'ils ayent , & quelque jaloux qu'ils soient de leur Reputacion ; ne s'en sont pas tousiours esloignez, comme ils ont fait depuis quelque temps. Aux persecutions qu'ils firent au Duc de Sauoye depuis la mort du feu Roy, & lors qu'ils se croyoient estre les Arbitres Souuerains du destin de l'Italie ; d'inexorables qu'ils estoient pendant que le Ciel leur rioit, & que la Fortune leur estoit propice ; il ne se voyoit rien de plus traitable ny de plus docile qu'eux, lors qu'elle leur estoit contraire, & ils se relaschoient beaucoup plus pour obtenir la paix ; qu'ils ne s'estoient roidis pour faire la guerre. Et apres que nous eusmes for-

cé le Pas de Suze, pour deliurer Cazal de leurs armes, & que l'Estat de Milan pouuoit estre la proye des nostres, si nous eussions eü autant de volonté d'en entreprendre la conqueste, que nous auions de facilité & de justice pour la faire; jamais gens au monde ne furent plus soumis qu'eux à tout ce que voulut le Roy, ny plus disposez à accepter toutes les conditions, qu'il luy pleut de leur prescrire.

Le fondement de cette Regle est; que la felicité des sujets estant la principale Loy, & la derniere mesure des actions & de la conduite du Prince; il ne luy est jamais permis de s'en esloigner, que pour y reuenir plus auantageusement, & pour imiter le Soleil, qui n'attire les vapeurs & la graisse de la terre; que pour les luy rendre plus fecondes, & remplies d'un esprit plus vif, & d'une vertu plus actiue. C'est pourquoy ceux qui par opiniastrété, ou par quelque autre passion particuliere, nourrissent vne guerre qui est funeste à leurs sujets; s'esgarent bien fort de la fin de leur charge, & la memoire de François Premier & de Charles le Quint, est mal-traitée dans l'Histoire, de ce que l'un & l'autre, &

particulièrement le dernier , par vne pure animosité, & par vne ardente hayne qu'ils se portoient ; s'opiniastrerent à trauailler à leur ruine, qu'ils ne pouuoient procurer que par celle de leurs Estats , & aymerent mieux laisser noyer de sang toute la Chrestienté, & l'exposer à l'Ennemy commun qui profitoit de leur discorde ; que de metre les armes bas, & d'entendre à vn Traité de paix raisonnable. Sur tout Charles fust si fort transporté de cette passion, & si fort agité de cette fureur; qu'il laissa perir Rhodes pour vaquer à la desolation de la France, & abandonna l'Austriche à Soliman, pour faire la guerre au Duc de Cleues , qui s'estant allié du Roy de Nauarre , estoit entré dans nos interests qui estoient joints avec ceux de l'autre.

Cette Regle ainsi posée, & cette Maxime establee comme vne chose inuiolable, & qui ne reçoit point d'exception que celle que nous auons designée; Il nous faut vn peu parler de la conduite du Roy sur ce sujet , & de l'estat de ce Royaume à l'ocasion de la guerre, depuis qu'il en est le maistre. Sur quoy je dis qu'encore que cet Estat n'ait jamais fait voir depuis

depuis Charlemagne vne si grande montre de puissance, ny ne se soit trouué en vne si haute éléuation de gloire; que sous le Regne de ce Prince. Qu'encore que tout le cours de ce Regne soit plein de lumiere, & qu'il n'y ait point de partie qui ne soit remarquable par quelque accident illustre.

Quoy que dis-je cela soit fort vray; il faut confesser aussi, que la France n'a pas reçu gratuitement ces grands auantages, & qu'elle les a achetez du plus pur de son sang, & du meilleur de sa substance. Il faut confesser que la guerre qui l'exerce maintenant ne luy coûte pas peu, & que c'est avec beaucoup de peine & de sueur, qu'elle monte à la felicité où elle doit paruenir, & dont elle n'est pas esloignée. Cependant comme les derniers pas d'un long voyage, sont les plus lassans & les plus penibles, & comme les dernieres gouttes des medecines, sont celles qui donnent le plus de dégoust à ceux qui les prennent; Aussi ce reste de mauuais temps que la France essuye, & les derniers abois que la guerre jette; est ce qui luy pèse dauantage, & qui acheue la lassitude & la langueur qui la trauaillent. Mais outre

Z

la briueeté du temps qu'elle a à souffrir, & les belles esperances de l'auenir ; elle doit considerer , comme nous l'auons desia remarqué en vn autre endroit ; que le mal passé estoit necessaire, & que la guerre qui dure depuis tant d'années, n'est pas du choix ny de l'inclination du Prince ou de ses Ministres ; mais qu'elle est vn effet inéuitable de quelque maligne Constellation qui afflige la Chrestienté : ou pour parler selon la portée de nostre Raison, & selon l'experience ; vn feu que les Ennemis de cét Estat ont allumé volontairement , & que le Roy ny ses Ministres, quelque soin qu'ils y aient apporté , & de quelque adresse qu'ils se soient seruis ; n'ont encore pû esteindre. C'est ce que je veux maintenant faire voir , sans figure de Rhetorique & sans amplification oratoire : mais racontant succintement & fidelement, & à mon auis sans qu'on puisse raisonnablement me contredire, ce qui s'est passé depuis la paix de Montpellier, & le retour de la Reyne Mere du Roy dans les affaires ; jusqu'à la Conjoncture presente.

Il parle ailleurs des causes veritables ou affectées de l'Infraction de cette paix , qui fust

suiuie de la guerre que les Anglois vindrent porter dans nos Isles, & de la troisieme prise des armes des Huguenots depuis le Regne du Roy. Les Ministres qui n'auoient ny fait ny violé cette paix, comme les Huguenots le pretendirent, & peut-estre mal à propos, ce que je ne veux point esclaircir icy; furent obligez de ne laisser pas receuoir vn affront à l'Estat, & de s'opposer au mal que d'autres auoient attiré, & dont ils auoient jetté les fondemens & la semence. Apres donc qu'ils eurent surmonté ce grand orage, & que l'Isle de Rhé eust esté le tombeau de ceux, qui en vouloient faire le Siege de la nouuelle domination, qu'ils projettoient d'eriger en ce Royaume; Le Roy jugea que le point fatal estoit venu, auquel il falloit abatre le nid de la Rebellion, & l'Azile des Mescontans, qui estoit la Rochelle. Quelle a esté la grandeur du Siege de cette place, & quelle incroyable merueille le succez en paroistra à la posterité; Il n'est pas besoin de l'expliquer icy, puis qu'il n'y a personne qui ne le sçache & qui ne le juge.

Pendant que cette grande affaire se demes-

loit, & que toute l'Europe estoit ocupée à attendre l'euenement d'une entreprise si haute; les Espagnols pour se preualoir de l'ocasion, en firent vne autre en mesme temps sur les Estats du Duc de Mantoue, & se mirent en deuoir de le despoüiller de sa nouuelle succession; pour cela seulement qu'elle les acommo-
doit, & qu'il ne leur estoit pas agreable à cause qu'il estoit François. Combien la France estoit offensée par cet attentat, & quelle honteuse reflexion se faisoit sur elle, de la ruine d'un Prince qu'on metoit en chemise pour son sujet; il n'est pas mal-aisé de le comprendre, & nous l'auons desia dit ailleurs. Elle ne se hâta pourtant pas de venir aux moyens extremes, pour venger l'injure qui luy estoit faite: Et comme auant l'Equipée de Bouquinkan, & l'Expedition des Anglois en l'Isle de Rhé; Elle auoit enuoyé vne Ambassade extraordinaire en Angleterre, pour destourner la rupture qu'elle meditoit; Auant que de s'embarquer à la guerre d'Italie, & de passer les Monts pour secourir le Montferrat; elle eust recours à la voye des offices, & enuoya Monsieur de Bautru en Espagne, pour y offrir

des conditions d'acommodement si ciuiles & raisonnables; que les Espagnols ne pouuoient rien pretendre de plus auantageux, fors la victoire. Cette voye ayant manqué, & la reduction de la Rochelle, sur la subsistance de laquelle ils auoient fondé le principal bonheur de leurs armes, ayant donné moyen au Roy de passer les Alpes, & d'acourir à la deliurance de Casal qui estoit aux abois; Il se contenta de les en faire retirer par vn Traité, qui mît pour cette fois à couuert le Montferat, & qui empescha l'Estat de Milan de changer de maistre.

Qui eust creu qu'un Traité si fauorable & si obligeant; n'eust mis fin à cette guerre, & que les Espagnols ne l'eussent obserué qu'autant de temps qu'il leur en falloit, pour se preparer à la renouueller, & à rentrer dans la lice, d'où ils estoient sortis avec quelque perte certes de Reputation; mais avec l'entiere conseruation de tout ce qu'ils pouuoient perdre en Italie. Ils en vserent pourtant de la sorte, & pour payer la courtoisie que nous leur auions faite: ou pour parler selon leur sens, pour purger l'affront qu'ils auoient receu de-

uant Cazal; ils firent venir d'Allemagne en Italie vne partie des meilleures troupes de l'Empereur, & y enuoyerent d'Espagne le Marquis de Spinola, avec beaucoup d'argent & de grandes forces, pour renoüer la querelle que nous pensions auoir terminée. Et affin de nous oster le moyen de songer aux affaires du Duc de Mantouë, & de faire vne seconde fois passer les Alpes à nos armées; Ils auoient appresté deux puissantes irruptions contre la France; l'vne en Champagne par le Valsstein, à qui le Duc Charles d'aujourd'huy fournissoit passages & viures par la Lorraine: & l'autre en Languedoc par le Duc de Feria qui n'y vint pas à faute de forces, ou pour auoir appris que le Valsstein auoit rebroussé vers Ratibonne, pour y conjurer l'orage qui esclata sur sa teste en cette Diète.

C'estoit là le procedé des Espagnols; & la menée qu'ils ourdissoient contre la France; pendant que nous ne songions qu'aux moyens de composer à l'amiable les differens du Duc de Mantouë: que nous faisons faire des offices en Italie & en Allemagne, pour le tirer avec douceur du mauuais pas où ils l'auoient jetté sans sujet, & que nous auions enuoyé à

Vienne le Sieur de Sabran, pour y faire des offres si plausibles & si justes; qu'inailliblement l'Empereur leseust acceptées, s'il eust esté maître de ses volontez, & si les Espagnols qui dominoient dans son Conseil; n'eussent eü tellement l'esprit plein & comblé pour le dire ainsi, des pensées de la guerre; qu'il n'y restoit plus de place pour y recevoir vne seule pensée de paix, ny vn mouuement qui ne sentit l'outrage & la violence.

Les armes donc de l'Empire de l'Espagne & de Sauoye conjurées contre nous, & contre nostre Allié; eurent au commencement & en la suite de cette guerre, des succez considerables. Mantouë se perdit par surprise, & Casal qui estoit la seule piece qui s'estoit sauuée du debris de la fortune du Duc, & la dernière ancre du salut de l'Italie; faillit de se perdre par Siege. Il fust neantmoins secouru comme par miracle, & il se fit deuant cette place vne espece d'accommodement, qui pallia plustot le mal qu'il ne le guerit, & que Ferraria qui succeda à Sainte Croix au Gouvernement de Milan; eust dessein d'enuoyer en fumée, si tost qu'il nous auroit renuoyez delà les Monts, & qu'il seroit en estat de rompre avec

avantage. Il l'eust certes fait ainsi, & il s'en estoit assez laissé donner à entendre, comme nous le déduirons amplement en l'Apologie de l'aquisition de Pignerol; si la vigilance de nos Ministres n'eust éuanté ses mines, & si les Armes du Roy de Suede qui commençoient à poindre en Allemagne; n'eussent fait rappeler d'Italie les Imperiales, sans lesquelles celles d'Espagne n'eussent point eü assez de force pour y agir puissamment, ny assez de pretexte pour colorer leur entreprise. Cela fust cause que les Espagnols furent contrains d'aquiescer à la paix qui fust concluë à Cairasque; puis qu'ils n'estoient pas Parties principales en cette guerre; qu'ils n'auoient à leur dire commencée ny poursuiuie, que pour les interests de l'Empereur, & comme Auxiliaires de l'Empire.

Auant la leuée du Siege de Casal, & durant la tenuë de la Diete de Ratifbonne; le Roy auoit fait traiter avec le Roy de Suede, que les Protestans d'Allemagne auoient attiré à leur secours, & sur lequel ils auoient jetté les yeux comme sur leur dernier azile, & le seul port qu'il leur restoit contre l'orage dont leur
pays

pays estoit batu. Pendant que ce grand Adversaire estoit sur les rangs, pour s'esprouver contre vne Maison si formidable, qu'estoit alors celle d'Austriche, & qu'à dire vray la victoire n'estoit gueres moins à craindre du costé des Amis, que de celuy des Ennemis, entre des Parties si ambitieuses; La Raison d'Estat vouloit que le Roy demeurât armé, pour auoir dequoy faire respecter son autorité, & dequoy faire considerer sa protection, qu'il auoit offerte si genereusement & si chrestienement, à tous les Catholiques d'Allemagne: pour auoir moyen de contenir en cas de besoin les victorieux, dans les bornes où ils deuoient demeurer, & d'empescher qu'ils n'abusassent de la victoire, & ne la poussassent plus loin qu'il n'estoit expedient pour le bien de la Religion, ou pour la liberté Germanique. Que s'il eust esté aussi mortel ennemy de la Maison d'Austriche; que la Maison d'Austriche l'est de la France, & s'il eust juré sa ruine, comme l'autre a juré la sienne; on ne peut douter qu'avec le moindre effort qu'il eust voulu faire contre elle, lors que le Roy de Suede l'esbranloit si violemment, il ne l'eust

portée par terre: Et si apres la mort de ce magnanime Prince, & pendant que la fortune ne pouuoit encore se separer des armes qu'il auoit commandées; Il eust voulu joindre les siennes à celles des Suedois pour le secours de Ratisbonne, où toutes les forces de l'Empire estoient engagées; apparemment elle eust succombé sous cette charge.

Il a certes esté religieux jusqu'au scrupule, pour n'effleurer point la paix qui estoit entre nous & elle, & pour l'auoir espargnée en vne occasion où il pouuoit legitiment l'incommoder; Il a esté mal reconnu de cette grace, & les mesmes troupes à qui nous auons donné la vie à Heildelberg, furent celles comme nous auons desia remarqué, qui nous volerent Philisbourg, & nous firent cette grande playe, qui saignera peut-estre jusqu'à la fin de la guerre. Enfin les Espagnols ayant fait surprendre Treues, & enleuer l'Electeur qui croyoit estre en seureté à l'ombre des Fleurs de Lys, & inuiolable sous nostre protection, à ceux avec qui nous n'estions pas en guerre; nous auons esté forcez par toute sorte de raisons, de la declarer à ces Rauisseurs, & de pur-

ger avec les armes cette injure, contre ceux qui ne l'auoient pas voulu reparer à l'amiable. Depuis il semble que la paix ait esté pour eux vn Monstre qui leur ait fait peur, & quelque mine qu'ils ayent fait de la desirer, & quelque personnage qu'ils ayent joué, pour esbloüir le monde de cette apparence; Il est certain qu'ils n'y ont jamais voulu tout de bon entendre, & que s'estant tousiours flatez de l'esperance, qu'il arriueroit quelque changement parmy nous, qui leur applaniroit le chemin de la victoire, ou qu'ils se le rendroient aisé avec les armes; Ils ont tant pointillé & tant chicané; tantost sur la forme des Passeports necessaires pour traiter la paix, & tantost sur la qualité de ceux qui y deuoient estre compris, & sur d'autres Incidens estudiez, pour acrocher cette affaire, comme nous le représenterons au Discours suiuant; que les moins clairuoyans ont veu qu'ils ne pensoient à rien moins qu'à cela, & que tout leur fait n'estoit qu'illusion pour piper les simples.

Enfin le Ciel lassé de leur hypocrisie, & ayant horreur de tant de sang Chrestien que leur ambition faisoit respandre; a renuersé leurs espe-

Aa ij

rances, au plus haut ascendant où elles fussent encore arriuées, & ceux qui auoient eü auersion de la paix, à cause des auantages immenses qu'ils se figuroient en la continuation de la guerre; sont contrains de faire bonne mine & de s'en esloigner encore, pour tascher de regagner ce qu'ils ont perdu, & voir si la Roüe de la Fortune qui les a mis si bas, ne pourroit pas faire vn tour en leur faueur, & les ramener au lieu d'où elle les a fait descendre. Il faut pourtant qu'apres s'estre longuement debatus sur cette attente, & auoir tenté toute sorte de moyens pour se releuer; ils plient sous la violence du destin qui les mal-traite, & se resoluent de quiter quelque chose de ce qu'ils n'ont plus, pour sauuer le reste qu'ils pourroient encore perdre. Ou tous les presages que l'estat present des choses en donnent sont faux; ou ce terme comme nous auons dit en vn autre endroit n'est pas loïn, & dès qu'on aura mis à la raison l'Allemagne, ce qui n'est pas mal-aisé pour peu d'effort qu'on fasse encore de ce costé-là; le dernier acte de la Tragedie sera joué, & la paix fermera ce sanglant Theatre, qui a esté si long-temps ouuert à la guerre.





DISCOVRS DOVZIESME,

*Où il est montré par deux preuues infailibles,
que c'est la Maison d'Autriche qui a tous-
jours resisté au dessein de la paix, où le
Roy & ses Confederez, se sont
portez, tout de bon.*



L faut encore esclaircir le monde d'une des plus importantes veritez, qu'il est necessaire qu'il sçache, & retoucher plus exactement vne matiere, qui n'a esté que legerement esbauchée au Discours precedent. Il nous faut faire voir, que ce n'est pas le Roy qui a violé la Regle que nous y auons établie; mais que ce sont les Ennemis qui luy ont osté le moyen de l'observer: Que ce sont eux qui l'ont tousiours obligé d'auoir les armes à la main, quoy qu'il eust enuie de les quiter, & qu'ayant pitié des maux de ses sujets, & horreur de tant de blessures que la

Aa iij

Chrestienté receuoit, & de tant de sang qu'elle perdoit durant la guerre; Il a fait toutes les auances qu'il a pû faire avec honneur, pour venir à vne paix honnestes & seure.

En effet il a escouté avec les oreilles les plus fauorables, & l'esprit le plus préparé qu'on pouuoit desirer, tous les offices que la Sainteté a fait faire pour ce sujet. Il a deliuré de bonne foy & en la forme conuenable, les Passports necessaires pour les Deputez de nos Ennemis. Il a nommé les siens pour aller trauailler aux lieux destinez, pour cette sainte œuvre. Bref il n'a rien obmis de tout ce qu'on peut attendre d'un Prince, qui desire veritablement la paix, & les demonstrations qu'il en a données, n'ont pas esté de fausses enseignes & des signes trompeurs; mais des marques certaines & des argumens concluans, de la volonté qu'il en a eüe. Je n'auance rien que le Pape & ses Ministres ne certifient: que les Princes neutres & leurs Ministres n'ayent connu: que la plus grande partie de la Chrestienté ne sçache, & dont la conscience mesme de nos Ennemis ne demeure conuaincuë.

Ceux-cy au contraire n'ont fait que de faux semblans & des mines estudiées, de vouloir la paix, & de desirer le repos de la Chrestienté; pendant qu'ils se distilloient l'esprit à chercher des inuentions pour continuer la guerre, & qu'ils trauailloient de toutes leurs forces, à trouuer moyen d'allonger le trouble, & de faire durer l'agitation. Ils enuoyerent à la verité des Deputez à Cologne, où ils pouuoient aller en seureté & avec honneur; mais c'estoit pour deux fins qui toutes deux leur estoient auantageuses, mais qui n'estoient pas celles où le reste de la Republique Chrestienne aspirait avec tant d'ardeur, & dont elle auoit tant de besoin; qui estoit la cessation de la guerre. La premiere pour tromper le monde par cette belle apparence, & pour faire acroire aux simples; que non seulement ils auoient desir de faire la paix: mais qu'ils auoient encore haste de la faire, & qu'ils brusloient d'impatience de donner commencement à vne besongne si necessaire & si desirée. Et tout cela affin de se garentir par ces illusions & par ces souplesses, du blasme qu'on leur donneroit, de tenir si long-temps la Chre-

stienté en trouble, & de verser tant d'huyle & de souffre sur les feux qu'ils y ont allumez, & qui l'ont à demy reduite en cendres.

La seconde fin estoit, pour nous endormir par cette montre, & nous rendre plus languissans & plus tiedes, par cét exterieur de vouloir la paix, à nous metre en estat de soustenir la guerre qu'ils vouloient poursuiure. Pour refroidir encore par mesme moyen ceux qui auoient enuie de se lier avecque nous, & les empescher de se faire d'une partie, où leur interest & leur honneur les obligeoient de se metre. Bref pour destacher de nostre amitié & de nostre alliance, ceux qui y estoient desia entrez, en leur proposant des conditions vray-semblablement plus avantageuses, s'ils traitoient separement; que celles qu'ils pourroient trouver dans vn Traité de paix generale, & en les persecutant de cette vieille Maxime de Politique, qu'en fait de Societez & de Liges; il n'y a que les derniers traitans sur qui l'orage tombe, & qui payent les frais de la guerre, & que les premiers sont ceux qui en recueillent le profit, & qui font la moisson du champ que les autres ont cultiué, & de la semence

mence qu'ils ont jettée. Cependant nos Deputez & ceux de nos Confederez, pour lesquels ils n'enuoyoient pas des Passeports, ou n'en enuoyoient point qui ne fussent mutilez & defectueux, en la forme ou en la matiere; n'auoient garde de se rendre au lieu destiné pour traiter; puis qu'ils leur en auoient defendu l'entrée, & fermé les auenuës par cét artifice. Procedure certainement injurieuse au saint Siege; de l'entremise duquel ils ont long-temps abusé pour couvrir leur fourberie, & comique pour le reste du monde, qu'ils ont joué par des apparences si esloignées de leurs intentions, & si contraires à la verité; ainsi que nous l'allons monstrier par deux preuues infaillibles.

L'une est la Responce qui fust renduë à Vienne au mois de Iuillet de l'année 1637. à l'Ambassadeur du Duc de Florence, sur l'instance qu'il y faisoit pour auoir les Passeports necessaires, tant pour nos Deputez que pour ceux de nos Alliez. Ils ne vouloient pas disoient-ils acorder des Passeports pour la Couronne de Suede, avec laquelle ils estoient en Traité particulier: ny pour les Princes qui leur

Bb

estoyent Rebelles; dont ceux qui auoient les armes à la main, comme estoit le Lantgraue de Hesse, trauailloient de faire leur accomodement à part, & les autres sur qui estoit tombé la foudre, & qui auoient esté mis au Ban de l'Empire; estoient incapables de traiter, & n'auoient point de different qui n'eust esté terminé, par l'espée de l'Empereur & par les Loix de l'Empire. Et en general leur sens estoit, qu'il n'appartenoit pas à des Princes dépendans & subalternes; au nombre desquels ils mettoient tous les Princes de l'Empire; d'enuoyer des Deputez à vne Assemblée, où ne deuoient interuenir que ceux des Princes absolus & independans, comme estoit celle qui se deuoit tenir à Cologne. Qu'au reste le Roy auoit grand tort, quand mesme il n'auroit pas promis le contraire, comme ils asseuroient qu'il auoit fait; de se mesler des affaires d'Allemagne; & qu'il trouueroit fort mauuais, que l'Empereur s'ingerat dans celles de son Royaume, & qu'il fauorifat les Reuoltes de ses sujets, & donnat chaleur à leurs broüilleries. Que s'il desiroit des Passeports pour enuoyer traiter la querelle qu'il auoit

avec le Roy d'Espagne, & le different du Duc de Lorraine ; qu'on estoit prêt de les acorder.

Il est aisé à juger par tout le cours de cette Responce, & par le sens caché qu'elle enferme ; que la hayne qu'ils nous portent est immortelle, & que la vengeance qu'ils meditent contre nous, est le Demon ordinaire qui les tourmente. Que les paix particulieres qu'ils ont recherchées avec tant de vehemence & tant d'artifices ; n'estoient pas pour eux des planches, pour passer plus facilement à vne paix vniuerselle : mais des moyens pour nous faire vne guerre plus ardente & plus opiniastre, & pour nous battre par plus d'endroits, & par vn plus grand nombre de machines. Surquoy pour faire quelque reflexion sur la teneur de cette belle Responce ; Je diray encore, qu'il me semble que pour estre si grands hommes d'Estat que le monde croit, & si abiles en l'art de dissimuler qu'ils en ont aquis la reputation ; Ils éuëntoient trop ouuertement le dessein qu'ils ont de changer l'Empire en Monarchie, & de ne laisser point en Allemagne aucune trace de Souueraineté, ny aucun

vestige de puissance libre. Ou bien certes pour ne dissimuler point la verité, & pour dire la chose comme elle estoit ; ce n'est pas qu'encore qu'ils eussent l'esprit tout plein & tout eschauffé pour le dire ainsi, de ce dessein ; ils n'eussent le pouuoir de le contenir au dedans, s'ils eussent voulu s'empescher de luy donner de l'air, & de luy faire voir la lumiere. Mais c'est qu'effectiuement depuis la malheureuse & funeste paix de Prague ; ils croyoient auoir tellement ajusté leurs pieces, & pris le dessus du vent ; que rien ne les empescheroit d'en venir à bout ; & c'estoit au plus fort de leurs esperances, & dans la plus haute éléuation de leurs pensées, qu'ils firent cette Responce.

Car au reste que vouloit dire autre chose, de comparer les Princes de l'Empire avec les sujets du Roy, & de metre en parallele, & en vn pareil degré de condition les vns & les autres ; que commencer à degrader ceux-là de la Souueraineté, que personne ne leur a jusques icy contestée ; que vouloir faire la transmutation dont nous venons de parler, & reduire plusieurs Estats qui ont des Seigneurs par-

ticuliers, sous vn seul Monarque? Et neant-
 moins personne n'ignore quelle est la dignité
 de l'Empire d'Occident, & la puissance qui le
 constitue, & qu'elles ne résident point en la
 seule personne de l'Empereur; cōmme la di-
 gnité & la puissance des Monarchies ont leur
 Siege, en la personne des Princes qui les posse-
 dent: mais bien en l'assemblée & en la con-
 jonction des Electeurs, & des autres Princes
 d'Allemagne; qui tous ensemble forment le
 Corps dont l'Empereur est le plus considera-
 ble Membre, & superieur en excellence aux
 autres Membres considerez separement, &
 destachez du Corps qu'ils forment. Il n'y a
 aussi personne qui ne sçache, que la Majesté
 de l'Empereur; & cet auguste caractere, qui
 le distinguent des Monarques; ne se tirent pas
 de la puissance qu'il ait sur vne grande esten-
 duë de pays qui luy soit soumis, & sur vn
 grand nombre de sujets sur qui il domine:
 mais qu'elles se prennent de la grandeur où il
 monte, & du rang qu'il ocupe au dessus de
 plusieurs Souuerains qui l'enuironnent: qui
 luy font de l'honneur: qui sont obligez en cer-
 taines ocafions de le seruir de leurs biens &

de leurs personnes: qui en recoiuent l'Inuestiture de leurs Estats; Bref qui luy doiuent eü esgart aux autres Souuerains qui ne sont pas du Corps de l'Empire; vn culte particulier & vne veneration extraordinaire.

Or affin que l'Empereur suiuant l'humeur ordinaire des Grands, ne donne plus d'estendue à son autorité qu'elle n'en a, & ne fasse point d'inuasions sur les droits & la liberté des Princes de l'Empire. Et de peur aussi que ceux-cy enflent de l'esprit de Souueraineté avec lequel ils viennent au monde, & enyurez de la douceur du commandement qu'ils exercent sur leurs sujets; ne deuiennent indociles à l'endroit de l'Empereur, & n'entreprennent d'attirer à eux toute l'autorité de l'Empire; On a fait des Constitutions & estably des Loix qui bornent la Iurisdiction, & temperent la puissance des vns & des autres: qui tiennent entre-eux la balance au point où elle doit demeurer, & apportent le contrepoids necessaire; affin que l'vn deuenant trop fort, n'emporte & n'enleue l'autre. Et c'est ce temperament contre lequel l'Empereur & les Princes de l'Empire; ont fait diuers

desseins en diuers temps : ce sont ces limites qu'ils ont souuent voulu démarquer : c'est ce contrepoids qu'ils ont plusieurs fois essayé d'oster, & de ruiner cette excellente harmonie, en la conseruation de laquelle consistent principalement le bon-heur de l'Allémagne : le salut de la Chrestienté, & le plus assuré moyen de resister aux forces Ottomanes, quand elles s'y débordent du costé de terre. Et c'est ce que la Maison d'Austriche s'efforce plus que jamais depuis quelques années de faire. C'est où elle va à voiles & à rames comme l'on dit. C'est la grande œuvre après laquelle elle trauaille, & laquelle si elle pouuoit acheuer, comme plusieurs fois elle n'en a pas esté loin depuis la bataille de Prague ; Il ne luy seroit pas peut-estre impossible, de conuertir les Royaumes en Prouinces, & de faire esclorre avec le temps la Monarchie, dont elle a conceu le dessein depuis tant d'années.

Et partant les affaires de l'Empire estant en ces termes ; Je laisse à juger à toute personne non passionnée, si le Roy n'a pas eü grand interest & grande raison de s'en mesler, & s'il peut auoir promis à la Maison d'Austriche,

de laisser accomplir à son aise & sans résistance, le pernitieux dessein dont nous venons de parler: s'il a deu avec des yeux indifferens & les bras croisez, voir brusler l'heritage de ses voyfans, dont la flamme pourroit apres si aisement gagner le sien. Il laisse aussi à juger, si assister des Souuerains qu'on opprime & qu'on despoüille; c'est proteger des sujets Rebelles, & s'il n'y a point de difference entre ceux, aux mains desquels Dieu a mis le glaive pour deffendre leurs droits contre les Estrangers, aussi bien que pour punir les mal-faïcteurs de leur pays; & entre ceux qui n'ont point d'autre droit de porter les armes, que celui qu'ils reçoivent des mains du Prince. Le Roy donc ne pouuoit abandonner la cause de la miserable Allemagne, ny souffrir qu'on ravit la liberté de ses Princes, sans estre ennemy de son peuple, & deserteur de la Republique Chrestienne; & il n'estoit pas moins obligé de maintenir par ses offices & par ses armes, le temperament de l'Empire dont nous auons parlé, contre la Maison d'Austriche qui taschoit de le destruire; qu'il l'estoit alors qu'il employa son autorité, & laissa passer les forces de

ces de son Royaume ; pour empescher que le Conte Palatin ne l'alterat, & que les Resolutions prises à l'Assemblée de Wormes ne s'exécutassent. Nous esclaireirons dauantage cette matiere au Traité de la Monarchie de la Maison d'Austriche.

Quant aux Princes d'Allemagne qui ont cessé de cooperer aux saintes intentions du Roy, & se sont départis de son Alliance & de celle de Suede : qui ont pensé mettre à couuert leurs Estats & leur fortune par vn Traité particulier, & trouuer dans la paix de Prague vn azile inuiolable, contre le mal qu'ils apprehendoient; ces Princes dis-je sont bien auueugles ou bien foibles de courage, s'ils ne voyent pas venir la seruitude qu'on leur prepare, ou s'ils n'osent refuser leurs mains pour forger la chaisne où l'on les veut metre. Que s'ils se sont laissez prendre aux charmes que la Maison d'Austriche leur a presentez, & s'ils ont suiuy les mauuais inspirations, que de mauuais amis leur ont données. Si la paix qu'ils ont pensé faire; n'a pas tant esté vne paix; qu'un changement de guerre, & vn passage à de nouueaux troubles, & à des mouuemens plus

dangereux, que ceux dont ils estoient sortis. Si en l'estat où ils sont ; ils marchent entre des precipices , & s'ils doiuent estre la proye des victorieux de quelque costé que la victoire demeure, & porter la peine de leur defection du bon party : ou estre la derniere conqueste de l'autre , & faire la conclusion de la piece qu'ils meditent. En cét accessoire où leur imprudence & la corruption de quelques autres Causes les a conduits ; encore vaudroit-il mieux chercher quelque chemin pour retourner au bon party, où ils pourroient trouver de la seureté & de l'honneur, en y amenant la victoire ; que de perseuerer dans vne Societé, où il faut perir quoy qu'il arriue. Je sçay bien qu'il n'est pas facile de remonter d'un precipice quand on y est tombé, & qu'on ne sort pas comme l'on veut d'un labyrinthe, quand on y entre fort auant. Mais pourtant quelques embarrassez que soient ces Princes avec la Maison d'Austriche, & quelques filets qu'elle leur ait tendus de tous costez, pour les empêcher de luy eschaper : quelque offense qu'ils ayent faite à ceux qui les font venus si generousement secourir, & de quelque ingra-

titude qu'ils ayent payé vn sang des plus précieux versé, & vne des plus illustres vies du monde perduë pour leur salut; pourueu qu'il leur reste au fons de l'ame, quelque sentiment de l'amour de la liberté, dont leur Nation a tousiours esté si violemment esprise, & qu'ils se tiennent prêts à receuoir la bonne fortune, quand elle se presentera à eux; La fauorable Reuolution qui commence à luire sur l'Allemagne, leur donnera moyen de se desgager des liens où ils sont pris: de se reconcilier avec leurs anciens amis, & de redresser leur premiere intelligence, avec ceux sans lesquels ils ne sçauroient se sauuer, & avec lesquels ils ne se sçauroient apparemment perdre. Nous les entretiendrons encore plus amplement de cela en vn autre endroit. Que cecy soit dit en passant.

Pour ce qui est du Traité particulier que les Austrichiens meditoient alors de faire avec les Suedois, & qu'ils poursuiuoient avec tant de vehemence: qui a esté si souuent coupé & si souuent renoüé: qui estoit la fin des dernieres Resolutions de la penultiesme Diete de Ratisbonne, & le fondement sur lequel s'esle-

uoit l'esperance du bon succez des affaires du party ennemy ; le temps a fait voir que ce n'estoit qu'une contremine du costé des Suedois, pour endormir les Imperiaux; comme le dessein des Imperiaux , en cas que le Traité vint à auorter ; n'estoit que d'endormir les Suedois, & de les rendre plus lents & moins eschauffez à faire la guerre. Ou bien certes ce n'estoit de leur part qu'un tour d'adresse permise & un artifice legitime, pour piquer leurs Confederez de quelque pointe d'ombrage & de jalousie, & pour les exciter à vaquer avec plus d'ardeur & de plus fortes subventions qu'ils n'auoient fait jusques alors, aux affaires de la Ligue.

Car au reste cette sage & auisée Nation, n'estoit pas si ennemie de son bien, ny si peu esclairée de la verité de ses interests; qu'elle eût voulu se priuer en faueur du Roy de Pologne, d'une grande & riche prouince qu'il luy estoit facile de conseruer; pour estre plus libre à deffendre ses conquestes d'Allemagne, & à faire de nouueaux progres sur les vsurpateurs & sur les deserteurs de la liberté de ce pays-là; & renoncer par apres à ce qu'elle y

possédoit de stable & d'immobile, pour vne somme d'argent qu'on luy offroit, & pour vn bien si labile que celuy-là, & si aisé à se dissiper & à fondre. Que si la Maison d'Austriche consentoit, qu'elle gardat les prouinces & les places qu'elle n'estoit pas en estat de luy oster; elle connoissoit trop l'humeur de cette ambitieuse Maison, & la Politique de ses Ministres; pour se persuader que ce fust que pour autant de temps qu'il luy en faudroit, pour acheuer ailleurs ses desseins, & pour se procurer ou vne si grande victoire, ou vne paix si auantageuse; qu'il n'y eust point de Puissance Chrestienne, qui pût ou qui voulût s'opposer à la guerre qu'elle feroit à ceux, qu'elle appelle les Agresseurs de l'Empire, & les Perturbateurs du repos de l'Allemagne. Nous discourrons ailleurs du fondement qu'ils pourroient faire, sur les promesses de cette Maison; si elle les pouuoit violer avec auantage.

L'autre preuue dont je me veux seruir est toute fraische, & il ne faut pas exciter la memoire pour s'en souuenir; elle est presente à l'esprit & aux sens de ceux qui sçauent quelque chose de nos affaires. C'est ce qui s'est

passé cette année à Hambourg, touchant l'ajustement des conditions necessaires, pour proceder au Traité de la paix generale, & à terminer cette lamentable guerre, qui ne fera enfin de toute la Chrestienté, qu'un bûcher & qu'une voirie. Cét ajustement se poursuiuoit par l'entremise du Roy de Danemarck, qui pour se rendre plus considerable aux deux partis, & pour donner de la jalousie à celui qui se montreroit rebelle à la paix; auoit armé puissamment, & mis sur pied des forces capables de faire tomber la balance du costé qu'il se rengeroit, en cette ardente querelle. Pendant que l'Ambassadeur du Roy & celui de la Couronne de Suede; se mettoient à la raison, comme ils s'y sont tousiours mis, & faisoient toutes les auances qu'on pouoit attendre de gens qui agissoient tout de bon, & ne jouïoient point de personnage; Il arriua premierement que le Sieur Lutzau Deputé du Roy de Hongrie se retira sans rien dire, lors qu'on estoit sur le point de resoudre quelque chose pour cet ajustement pretendu, à l'imitation du Conte Curts, qui en auoit usé quelque temps auparauant de la

forte : & qu'estant reuenu six semaines apres, & son Pouuoir s'estant trouué imparfait & sa Creance defectueuse, pour en manquer de la part du Roy d'Espagne; la Negotiation fust arrestée. C'estoit tousiours pour pousser le temps à l'espaule; ce que faisoient les Impériaux, & pour voir si cette grande nuée qui se formoit du costé de la France; ne produiroit rien à leur auantage, & n'ameneroit point sur ce Royaume la tempeste qu'ils se promettoient, & dont ils fournissoient vne partie de la matiere.

D'ailleurs pour ne paroistre point auoir auersion de la paix, & ne se charger point de la hayne qu'attireroit sur eux la continuation volontaire de la guerre; Ils souffrirent que le Traité rompu fust remis sur pied, & enuoyerent à Hambourg le Conte d'Auersberg avec vn pouuoir plus ample, en vertu duquel apres auoir beaucoup disputé, & longuement combatu de l'esprit & de la parole; l'ajustement qu'on desiroit fust resolu, & les conditions signées, ausquelles il ne manquoit rien pour estre executées, que la Ratification des Princes interessez en cette affaire. Mais cela leur

manqua de la part du Roy de Hongrie, qui au lieu d'enuoyer la Ratification pure & simple comme il estoit necessaire : comme son Deputé s'estoit obligé de la faire venir, & comme le Roy auoit fait la sienne; ne l'enuoya que mutilée & limitée de tant de modifications & de reserues; qu'il ne fust pas mal-aisé de voir, que tout cela n'estoit que Comedie, & la continuation de la Piece que le Sieur Lutzau auoit commencé à joüer pour amuser le monde, & pour donner temps de meurir, au grand dessein qui se tramoit contre la France. Et affin qu'ils ne m'acusent point de leur supposer ce qui n'est pas, & de me faire à plaisir vn fantosme pour le combattre; Je n'employeray pour la justification de ce que je dis, que l'autorité d'un Libelle contre nous qu'ils ont n'agueres publié en leur langue, & sous l'enseigne d'une Lunette. Là dedans apres quantité de sotises auancées, & d'impostures vomies, contre les bonnes intentions du Roy & la conduite de ses Ministres; l'Autheur de ce rare Libelle le conclut, par vn prognostic ou plustot par vne menace qu'il fait, du grand desordre qui estoit prest d'esclater

d'esclater en ce Royaume, de la concurrence de deux partis qui deschiroient la Cour, & qui à son dire deuoit esbranler les Colomnes de cette Monarchie.

J'ajoute à ce que dessus, pour faire voir la veritable passion que le Roy auoit, d'applanir de son costé toutes les difficultez qui pouuoient embarasser le chemin de la paix, & de ne rien obmettre de ce qui pouuoit acheminer cette sainte œuvre; qu'il auoit donné pouuoir à Monsieur d'Auaux son Ambassadeur, d'accorder dans les Passeports qu'il deliureroit de sa part au Roy de Hongrie, vn Tiltre qu'il auoit jusques alors vainement desiré de nous, & que nous luy auions tousjours constamment refusé, pour des considerations que nous apporterons au Traité de la Monarchie. Et pour monstrier encore l'indubitable auersion que le Roy de Hongrie avec toute sa Maison, auoit de la paix, que tout le reste de la Chrestienté demande & qui luy est si necessaire. Au mesme temps qu'il la luy refusoit par ses euasions & par ses feintes; il achetoit cherement la continuation de celle qu'il a avec le Turc, & consentoit

*Voyez la
lettre esrite
au Roy de
Danemarck
sur ce
sujet, par
Monsieur
d'Auaux.*

Dd

que pres de deux cens villages fussent retrenchez de ses frontieres, pour en allonger celles de l'autre.

*Fin du premier Livre de la
Seconde partie.*



Digitized by Google



DV CONSEIL DE GVERRE DV PRINCE.

Liure Second.

DISCOVRS PREMIER.

Que c'est vn grand mal-heur à vn Prince de n'auoir pas en luy-mesme dequoy se defendre contre vn autre Prince qui l'attaque, & de dependre en cela de la volonté d'autruy. Ce qui se confirme par deux Exemples; le premier de la Ligue qui se fit entre le Pape le Roy d'Espagne & les Venitiens, pour le secours de l'Isle de Chypre.



PRES auoir ouuert quelques auis, & donné quelques adresses, aux Princes qui veulent secourir leurs Alliez; il ne sera pas hors de propos d'apprendre à ceux qui ont besoin d'estre secourus, la maniere avec laquelle ils le peuuent estre plus seurement, &

Dd ij

de leur monstrier les mauuais pas, & descourir les embusches, qu'ils rencontreront en ce chemin; si la fortune les y jette. Pour entamer donc cette matiere, & l'estaller avec ordre; le dis qu'encore qu'un Prince doive estre fort soigneux de se fortifier d'Alliances, & d'interessier le plus grand nombre de Puissances qu'il pourra en sa conseruation; c'est tousiours vn grand mal-heur pour luy, si le bon-heur de ses Estats & la subsistance de sa fortune dependent de la volonte d'autrui, & s'il n'a pas en luy-mesme & en sa propre force, le principe de son salut, & la ressource de ses disgraces. Si cela luy manque & qu'un puissant Ennemy l'attaque; il est souuent acablé, auant que ses Amis se soient mis en deuoir de le defendre, & le mal a fait son coup, auant que les autres se soient resolus de l'aller combattre.

La raison de cela est, d'autant qu'un sage Prince ne doit jamais s'embarquer que le plus tard qu'il pourra à vne guerre, ny s'exposer avec precipitation à vne chose, qui n'a rien de certain que la despenſe qu'il y faut faire, & dont le succez plus que de toutes les autres

choses du monde; depend du caprice de la fortune, & des mouuemens des autres causes estrangeres. C'est pourquoy il taschera tousjours de diuertir l'orage avec l'adresse, auant que d'entreprendre de le dissiper avec la force. Il tentera au preallable les voyes d'acommodement, & voudra que l'essay de son intercession & de ses offices; precede le mouuement de ses armes. Et quand mesme tout cela sera inutile, & que les remedes doux ne faisant qu'aigrir le mal, il se resoudra de se seruir des extremes; il y a bien encore du chemin à faire, & des difficultez à surmonter auant que d'en venir là. Il y a à s'equiper de beaucoup de choses & à se bien ajuster; auant qu'entrer dans la lice, & que commencer la course.

En effet s'il ne veut qu'enuoyer des secours foibles, & de legers rafraischissemens à son amy; que sera-ce qu'une auance mal employée, & une despenſe perduë? que jetter quelques gouttes d'eau sur vn grand feu, qui l'allument au lieu de l'esteindre? qu'irriter la maladie, & non pas guerir le malade? Que s'il se resout d'armer puissamment, & de faire vn grand ef-

fort en sa faueur ; il ne le fera point sans prendre ses seuretez : sans auoir des gages de la foy de l'autre : sans auoir conuenu de quelque desdommagement , & sans plusieurs autres conditions, sur lesquelles il faudra long-temps contester & se debatre. Cependant le Prince qui a l'Ennemy sur les bras , & le feu dans ses Estats ; aura tout loisir de perir , ou de faire quelque perte considerable. Au contraire l'Agresser fera ses apprets de longue main, & au moindre bruit qu'il pourra pour surprendre l'autre : fera l'inuasion la plus pronte & la plus soudaine qu'il luy sera possible pour l'opprimer, auant qu'il se puisse reconnoistre , ou qu'il puisse estre secouru , & fera joüer toute sorte d'inuentions & de machines ; pour detourner ou pour allentir, les subuentions & l'assistance qui luy pourroient venir de la part de ses Alliez.

Je veux apporter pour l'esclaircissement & la confirmation de ce que je viens de dire , deux Exemples illustres , & de deux des plus sages & plus celebres Nations de l'Europe , en l'art de conduire des Negotiations , & de gouverner des Entreprises. Aussi bien faut-il

rascher d'esgayer pour le dire ainsi, par le
 moyen des Narrations, la face des Discours
 qu'un trop long Raisonnement rendroit au-
 stere, & de détendre l'esprit du Lecteur de la
 trop profonde attention où il le plongeroit,
 s'il n'estoit interrompu. Le premier exemple
 se prendra de la Ligue qui se fit entre Pie V.
 Philippe Second & les Venitiens, contre Se-
 lin Second qui auoit attaqué l'Isle de Chypre.
 Il faut rendre ce tesmoignage à la pieté de
 Philippe; qu'il n'attendit pas d'estre sollicité
 de secourir les Venitiens en cette occasion, &
 qu'il leur offrit & enuoya ses forces de mer vn
 an auant la conclusion de la Ligue. Mais ce
 qui se fit ensuite de cela, n'apporta pas le fruit
 qu'on s'en estoit promis. Les remedes ne
 vindrent pas assez à temps, & le secours s'ap-
 presta avec tant de langueur, & marcha si
 lentement; que Nicosie se perdit auant que
 les armées Espagnolle & Venitienne fussent
 ensemble. Cette ville estoit la capitale de
 Chypre, & vne des meilleures forteresses qui
 fust en Leuant. Comme les Espagnols ne s'e-
 stoient mis en mer, que sur l'opinion qu'ils
 auoient de la pouuoir sauuer; Ils commen-

cerent aussi à se rallentir dès qu'ils sceurent qu'elle estoit perduë : Et bien qu'au commencement ils eussent fait mine , de vouloir tout de bon assister les Venitiens; il ne fust pas possible apres cela , de faire resoudre Iean André Doria leur General, de s'auancer pour secourir Famagouste qui tenoit encore , & avec laquelle si on l'eust pû conseruer ; il y auoit esperance de recouurer ce qui estoit perdu , & de reprendre Nicosie.

Quoy que cela fust ainsi; ce ne fust pas pourtant la seule rigueur que tint Doria aux Venitiens , ny la seule amertune qu'ils eurent à boire de sa part, durant le cours de cette Expedition. Pendant que les armées estoient en mer, & qu'apparemment elles deuoient marcher de conserue ; Il tenoit tousiours la sienne destachée de celles des autres , & alloit separément ; pour n'estre pas obligé de s'engager à quelque entreprise , & de seconder l'ardeur de la Republique , qui ne pouuoit se resoudre de se retirer sans rien entreprendre. Il rejettoit les petits desseins qu'on luy proposoit , comme indignes des forces qu'il commandoit , & de la Reputacion de l'armée. Il ne
vouloit

vouloit point s'embarquer aux grands & aux difficiles ; à cause du peu de temps qui restoit pour les acheuer, & qu'on estoit sur le declin de l'Automne, où les tempestes sont frequentes sur la mer du Leuant, & la nauigation y est dangereuse. De sorte que deux tres-belles armées se retirerent sans auoir fait que du bruit, & vn des plus puissans appareils qu'on eust veu sur la mer il y auoit long-temps ; n'eust rien de memorable, que de n'auoir rien produit de memorable.

On disoit que ce n'estoit pas par inclination, mais par jalousie; que Philippe auoit si franchement offert ses forces aux Venitiens, & qu'il s'estoit porté à ce dessein, de peur que s'ils venoient seuls à resister à l'orage, & à soutenir la puissance de Selin; leur Reputation ne se haussat excessiuement, & qu'ils ne se fissent considerer dans la Chrestienté, & particulierement en Italie; plus qu'il n'estoit expedient pour le bien de ses affaires. Mais il cherchoit vn temperament qu'il luy fust impossible de trouuer. Et comme son esprit retenu & son humeur deffiante, l'inclinoient naturellement à donner en toutes choses le moins

Ee

qu'il pouuoit au hazard; il vouloit essayer en celle-cy de gagner sans courir fortune de perdre: Il vouloit tascher de conseruer les Venitiens en tesmoignant seulement de les vouloir conseruer, & d'empescher les progresz du Turc par le seul bruit de ses armes, & par la simple demonstration de ses forces.

Cela ne luy ayant pas reüssi; la Ligue dont nous auons parlé cy dessus se conclüd l'année suiuiante, & bien que ce ne fust point sans beaucoup de contention & de peine; les offices neantmoins violens & passionnez que fit Pie V. pour ce sujet; furent plus forts que toutes les difficultez que les Espagnols formerent, & que tous les inconueniens qu'ils firent naistre. Il nous faut arrester vn peu à raconter la procedure qu'eux & les Venitiens y tindrent, & à représenter les ruses & les stratagemes que les vns & les autres prattiquerent en cette guerre d'Esprit; puis que c'est le sujet pour lequel nous nous sommes engagez à rapporter cét exemple, & que ce que nous auons dit cy dessus; n'a esté que pour luy seruir de passage & d'auenüe. On fust donc huit mois entiers à contester sur les conditions du

Traité sans en pouuoir trouuer le bout. On agiroit beaucoup & resoluoit peu, & l'humeur lente & difficile des Espagnols; fournissoit tousiours matiere pour l'allonger, & quelquefois des pretextes pour le rompre. Cependant Famagouste s'acheuoit de perdre: l'insolence croissoit au Turc avec la victoire, & les irresolutions dont il voyoit les Chrestiens trauaillez; luy estoient vn argument necessaire de leur crainte ou de leur foiblesse.

Et neantmoins il n'estoit pas possible, de faire joindre des esprits qui auoient des interets si differens & des fins si contraires, que les Venitiens & les Espagnols. Ceux-là qui estoient les premiers exposez aux armes du Turc, & sur qui se deuoit descharger le principal fais de la guerre; ne tendoient aussi qu'à l'aller promptement esteindre. Les Espagnols au contraire estant plus esloignez du peril; n'auoient pas tant de haste de le repousser, & ne pouuant estre de long-temps touchez du mal qui pressoit les Venitiens; ne visoient aussi qu'à se deliurer d'vn autre mal qui les trauaille continuellement, qui sont les courses

de la Barbarie. Ils eussent voulu qu'on eust porté la guerre en ce pays-là, pour les reprimier: ou au moins estre asseurez qu'on le feroit à l'auenir, & que les Venitiens & eux trauaileroient conjointement & de toute leur puissance, pour enleuer aux Pyrates leurs Aziles, & aux Turcs les Conserues de leurs flottés. Mais pour cela il ne se trouuoit point d'expedient dont ils fussent satisfaits, ny d'assurance à donner qu'ils voulussent receuoir. L'humeur des Venitiens leur estoit suspecte, & ils se defioient d'yne Politique si interessée que la leur, & si pleine d'artifices & de pieges, comme ils la croyoient. Et comme ceux qui ont de l'inclination à la tromperie, ont tousiours peur d'estre trompez; Ils craignoient qu'après que les autres seroient au port; il n'oubliaissent ceux qui auroient aydé à les y conduire, & qu'après qu'ils seroient à couuert de la tourmente qui leur venoit du costé de Constantinople; ils ne voulussent plus entendre à la guerre d'Alger & de Thunis, ny continuer pour les interets d'autrui les mesmes despenses, qu'ils auoient faites pour les leurs propres.

La fin donc qu'ils pourſuiuoient, & le but où ils vouloient donner ; eſtoit celuy-cy. *De former vne Ligue* offeſiue & deſſeſiue avec le Pape & avec les Venitiens. Que cette Ligue fuſt éternelle. Qu'elle euſt touſiours des forces ſur mer , & que les Conſederez s'en pourroient ſeruir ſelon l'exigence des ocaſions , & le beſoin de leurs affaires.* Là deſſus ils faiſoient des propoſitions auſſi ridicules que magnifiques , & ils formoient ſur ce plan des deſſeins auſſi enflés que leur courage, & auſſi hauts que leurs eſperances. Ils vouloient qu'après qu'on auroit pris Conſtantinople & ruiné le Turc ; qu'on s'obligeaſt de faire la guerre au Roy de Perſe : de deſtruire Biſerte Thunis & Alger : d'exterminer les Scriphes d'Aſſrique ; bref de pourſuiure par tout avec le fer & avec le feu la Secte de Mahomet , & de luy rendre avec vſure ce qu'elle auoit ſi largement preſté au Chriſtianisme. Ils ne faiſoient après cela qu'eſleuer la puissance de leur Maiſtre , par deſſus tout ce qu'il y auoit de grand & de redoutable ſur la terre : qu'amplifier ſon zele enuers la Religion : qu'exalter ſes proſperitez & donner du vent à ſes eſperances.

En vn mot il eſtoit aiſé à voir, que tout leur

E c iij

procedé n'estoit qu'illusion & qu'artifice , & qu'ils ne traualloient qu'à sauuer par là les apparences de bons Chrestiens , & à s'aquerir de la Réputation parmy les Ames credules & les Esprits foibles ; qui sont tousiours en plus grand nombre que les sages. Mais quand il falloit venir au particulier de l'affaire , & au sujet pour lequel ils estoient assemblez , qui estoit le secours de Chypre ; il n'y auoit rien de si froid qu'eux : il n'y auoit rien de moins traitable , & apres s'estre long-temps debatus & auoir longuement tournoyé autour de l'affaire ; ils reuenoient tousiours là ; qu'ils vouloient bien qu'on fit vne Ligue , & que toute la Chrestienté s'vnit en vne commune querelle. Qu'ils vouloient qu'il y eust tousiours des forces sur pied , pour contrepeser & tenir en eschec celles du Turc ; mais ils vouloient apres cela que leur premiere intention preualut , & que d'abord on n'entreprit ny n'attaquat rien ; que du costé de la Barbarie.

Cette Ligue comme ils en auoient dressé le plan ; asseuroit toutes leurs affaires , & jamais dessein ne fust mieux entendu pour eux que celuy-là , ny plus à leur auantage. Sans

rien hazarder; ils se mettoient en estat de gagner beaucoup. Ils moissonnoient sans auoir semé, & contre la disposition ordinaire des choses du monde; le bien leur venoit tout pur, & sans qu'il y eust de mal qui le precedat, ny de mal qui le deût fuire. Les leuées qu'on leur permetoit de faire sur le bien des Ecclesiastiques, & les Croisades que le Pape leur acordoit tant en l'ancien qu'au nouveau Monde; leur donnoient moyen d'équiper & d'entretenir les vaisseaux, qu'ils estoient obligez de fournir par les conuentions de la Ligue. Ils ne faisoient point d'Ennemy nouveau ny de nouvelle guerre: ils continuoient seulement celle qu'ils auoient tousiours ouverte avec le Turc, & la portant dans son pays; ils la tenoient par consequent esloignée du leur, & sans estre contrains de fortifier leurs Costes de tant de garnisons & de vaisseaux, comme ils faisoient; elles deuenoient libres des inuasions des Corsaires, sans lesquels le Turc n'armoit point sur mer, & de ces petites guerres qui ruinent les particuliers, & incommodent si fort le Commerce. Bref ils se donnoient par ce moyen vne gran-

de Réputation par tout , & ayans tousiours de si belles forces prestes, qu'ils pouuoient faire aisement passer d'Italie aux Pays-Bas ; ils tenoient en eschec tous leurs Ennemis , & se rendoient formidables depuis le Leuant jusqu'au Ponent, avec vne mesme puissance.

Le sort des Venitiens estoit bien different du leur , & l'estat present de leurs affaires auoit vne autre couleur & vne autre face. Ils auoient vn Ennemy sur les bras , dont ils auoient tousiours esté fort soigneux de cultiver l'amitié, & avec qui ils ne pouuoient estre mal sans souffrir de grandes pertes , ou sans courir de grandes fortunes. Ils estoient exposez comme il a desia esté dit , aux premieres impressions de ses armes , & aux premiers coups de la tempeste. Ils auoient quelques membres de leurs Estats de Mer destachez des autres , & qu'ils ne pouuoient secourir qu'avec de grands frais & avec de puissantes flottes. Candie seule n'estoit pas moins digne de l'ambition & de la fortune de Selin ; que le Royaume de Chypre ; & cette Isle qui bride l'Archipelague , & qui est la porte par où les Corsaires du Ponent y doiuent necessairement

ment entrer; ne luy deuoit pas donner moins de jalousie que l'autre, ny vn moindre desir de s'en rendre maistre. Enfin le voysinage du Turc du costé de la Dalmatie de l'Esclaunie & du Frioul; les obligeoit d'armer encore de ce costé-là, & d'ouurir toutes les veines de leurs Estats, pour fournir à tant de despense. Nonobstant toutes ces considerations & toutes ces difficultez; la Ligue ne laissa point de se conclurre. Le plus grand interest l'emporta sur le plus petit, & l'embrasement general dont la Chrestienté estoit menacée; ramena les inclinations particulieres qui s'en esloignoient, sous vn commun dessein de s'y aller opposer, & d'en aller arrester le cours, & reprimer la violence.

Puis que nous auons veu aux choses qui ont precedé la negotiation de la Ligue que nous venons de représenter, quel dangereux escueil & quel fatal obstacle, c'est à vn Prince qui est en mal-heur, de dependre d'un autre pour en sortir; Il ne sera pas hors de propos, de remarquer encore le mesme inconuenient & la mesme pierre de scandale, aux choses qui ont suiuy la conclusion de cette Ligue. Apres

donc que la Ligue fust signée, & que chacun des Confederez en la signant se fust referué, comme c'est la coustume, quelque secrette intention & quelque fin particuliere qu'il s'empeſcha de manifester ; le temps qui auoit esté si vainement perdu à deliberer, ne le fust pas de meſme à executer ce qui auoit esté reſolu. Les forces Confederées se mirent en mer avec diligence, & le Turc que la prosperité faisoit déborder, & qui se vantoit de ne ſouhaiter aux Chreſtiens, qu'assez de courage pour l'attendre; apprit que nostre armée le cherchoit. La ſienne cependant ne se tint pas immobile, & ſçachant que la nostre alloit à elle, voulût faire la moitié du chemin, & vne partie des auances pour la voir & pour la combattre. Mais quoy que toutes deux bruſſaſſent d'une meſme ardeur, & qu'elles deſiraſſent eſgalement de se rencontrer ; c'est vne choſe remarquable que l'une & l'autre fust eſgalement eſtonnée, d'abord qu'elles se deſcoururent. Tant il eſt vray que l'eſprit humain ne demeure pas long-temps en meſme aſſiete, & que la veüe d'un objet à tout autre effet, que la penſée, & que l'aprehenſion d'un peril opere di-

uersement, selon qu'il est près de nous ou qu'il en est esloigné.

Les deux Generaux seulement D. Ioan d'Auſtriche pour les Chrestiens, & le Bacha Aly pour les Turcs; ne sentirent pas cette pesanteur & ce refroidissement, qui auoit saisi les armées, & contre l'opinion presque de tous les Chefs qui les acompagnoient; ils se resolurent de donner bataille. D. Iean d'Auſtriche sur tout estoit viuement sollicité par les Ministres d'Eſpagne qui estoient aupres de luy; de ne metre point au hazard le salut de toute la Chrestienté, & la fortune de son Maistre. Ils luy representoient qu'encore que le hazard du combat fust esgal; les suites de la victoire n'estoient pas pareilles, & que des forces ramassées comme estoient celles des Chrestiens; n'en vseroient jamais si bien, que celles qui ne dependoient que d'un seul, & qui n'estoient animées que d'un mesme esprit, ny portées que d'un mesme interest; comme estoient celles du Turc. Mais luy qui auoit l'Ame pleine de l'image de la gloire, que cette grande action luy promettoit, & de l'esperance de la victoire qu'il deuoit gagner; leur fit


Ff ij

cette genereuse Responce; *Qu'il estoit temps de combattre & non pas de deliberer, & qu'il n'auoit pas besoin de Raisonnement ny de conseil pour cela, mais d'execution & de courage.*

L'euenement ne trompa point son esperance. La fortune se declara pour les Chrestiens, & la victoire qu'ils gagnerent; leur ouuroit le chemin à de plus beaux succez, si les Espagnols ne l'eussent trahie. Mais c'estoit assez fait pour eux & selon leur intention, qui estoit que le Turc ne fit pas de nouueaux progresz sur les Chrestiens, ny que les Venitiens se reparassent à ses despens de ses despoüilles, & se raquistassent de leurs pertes. Il est certain que si apres la bataille, D. Iean d'Austriche eust voulu auancer, au lieu de retourner en arriere, & s'il fust entré dans l'Archipelague pendant que tout y estoit plein d'effroy, & que la consternation qu'apporta la nouuelle de ce grand accident, y estoit encore viue; il eust enleué ces Isles sans resistance: Il eust esbranlé la fortune des Ottomans, & Constantinople auroit pû voir arborer le Crucifix, aux lieux où le Croissant est adoré. En effet Selin ayant perdu ses meilleures forces de mer à la Iournée

de Lepante, & les Sieges de Nicosie & de Famagouste; luy ayant consumé les meilleurs hommes qu'il eust pour la terre; Il estoit presque hors de deffense, & son Empire demeurait comme vn grand corps, qui abatu de foiblesse, & ayant à grand peine la force de se soustenir & de porter son propre poids; tombe necessairement dès qu'on le hurte.

Ff iij





DISCOVRS SECOND.

Du mal-heur de la condition des petits Princes.

L ne faut pas s'imaginer icy, que quand j'ay parlé au Discours precedent, des petits Princes, qui ont besoin du secours de leurs Alliez pour se conseruer, & qu'en suite de cela j'ay apporté l'exemple de la Republique de Venise; je l'aye voulu metre absolument & sans relation en ce rang, & que je ne sçache bien qu'entre tous les Princes d'Italie; il n'y en a point de plus grand qu'elle, ny dont la puissance soit établie sur de plus solides fondemens, & sur vne base plus inébranlable. Je n'ay donc eü autre visée en l'exemple dont je me suis seruy; que de faire voir que c'est vn dur accessoire & vne triste necessité à qui que ce soit, de dependre de la volonté d'autrui, pour repousser vne violence de fortune, & pour soustenir l'effort d'vn

Ennemy qui estant superieur en forces; est tousiours porté d'une plus ardente passion de rauager & de destruire, que nul Amy ne scauroit l'estre de conseruer & de deffendre. Qu'au pis aller il y a tousiours tant de temps à perdre & tant d'escueils à passer, auant qu'on paruienne à la conclusion d'un Traité; que c'est merueille si cependant il n'arriue quelque naufrage, & ne se fait quelque grande perte. Outre cela quoy que la Republique de Venise porte en elle-mesme beaucoup de grandeur, & qu'elle ait joint de tout temps à la verité d'une puissance considerable, la Reputation d'une sagesse singuliere; Si est-ce qu'il est vray que l'opposant au Grand Seigneur, & la metant en parallele avec ce superbe Dominateur de l'Asie de l'Affrique, & d'une partie de l'Europe; Elle en demeure offusquée, & qu'en c'ela c'est comparer le cours d'un petit ruisseau, à la rapidité d'un grand fleuve.

Disons encore icy un mot, puis qu'il ne sera pas hors de propos, & que le fil de nostre discours nous y mene; du destin des Princes qui sont petits en eux-mesmes, ou qui n'ont qu'une puissance mediocre. C'est une chose

pitoyable de voir à quelle necessité sont réduits les premiers pour se maintenir, & à combien de véritables maux ils sont exposez, pour conseruer cette vaine image de liberté dont ils sont épris, & cette douce illusion d'autorité souueraine dont ils sont charmez. Ils se consument en despeses pour se garder, & donnent presque tout ce qu'on leur prendroit; afin qu'on ne le leur prenne point. Ils sont obligez d'observer tous les caprices & tous les mouuemens de leurs Ennemis & de leurs Amis, & s'ils subsistent ce n'est pas par leur force, puis qu'ils n'en ont point; mais par leur foiblesse, & pource que leurs Estats sont si peu de chose; qu'ils ne meritent pas qu'un Ambitieux les conuoite, & qu'il viole la Justice pour les conquerir. Ou bien certes ils sont à couuert des entreprises des vns, par la jalousie des autres, & demeurent en liberté; d'autant qu'ils s'empeschent les vns les autres de s'en saisir & de s'en rendre les maistres.

La petite Republique de Raguse, ne se maintient que par le Tribut qu'elle paye au Grand Seigneur, & par les presens qu'elle donne aux Grands de la Porte. Il n'est pas jusqu'aux plus
petits

petits Sangiacs qui luy sont voyfins, dont elle ne retienne l'insolence avec de l'argent: qu'elle ne fasse quelque hommage au Roy d'Espagne, pour n'en estre pas inquietée, & ne souffre vne partie de ce qui plaist aux Venitiens; qui ne seroient pas fâchez de trouuer quelque juste sujet de s'approprier s'ils osoient, vn Estat qui est si fort à leur bien-seance, & qui estant situé vers le milieu du Golfe dont ils se disent Seigneurs; en rendroit la possession plus nete & la jouïssance plus seure. Il n'y a point de doute, que le Duc de Florence, ne laisseroit pas à la Republique de Luques la liberté & le repos dont elle jouïit; si l'Espagne ne l'appuyoit, & ne la couuroit de sa protection, qu'elle ne luy donne pas pourtant, mais qu'elle luy vend; comme elle fait toutes les autres. Elle seroit bien marrie que cét Estat tombat à la mercy d'une Puissance, qu'elle a trouuée trop grande apres l'auoir renduë telle, & pour laquelle elle voudroit rappeler si elle pouuoit, les liberalitez qu'elle luy a faites comme elle parle: ou retenir les bien-faits dont elle a recompensé ses seruices, comme parle l'autre.

Gg

Que fust deuenüe Geneue sans l'Alliance des Suiffes, & sans la protection de la France? Qui ne ſçait combien de fois les Ducs de Sauoye ont medité de l'attaquer à force ouuerte, ſur l'eſperance du ſecours que l'Eſpagne leur promettoit, lors qu'ils eſtoient bien avec elle, & de celuy du ſaint Siege qui ne leur euſt pas manqué, s'ils ſe fuſſent embarquez à vne entrepriſe, dont le viſage a vne apparence ſi ſainte & vne couleur ſi pieuſe? Et combien de fois encore la fortune & la rencontre des choſes ayant deconcerté ce deſſein, & enuoyé en fumée les eſperances de ces Princes; ont ils formé des Conjurations & dreſſé des parties ſecrettes, pour ſurprendre & pour enleuer cette place? Que s'il ſemble maintenant qu'elle respire de cette crainte ſous la minorité du Duc de Sauoye, & ſous la dependance particuliere qu'il a de la France: Et ſi les Suiffes leur ſemblent meſme vn plus ferme rempart qu'ils n'eſtoient, à cauſe de la Conjoncture preſente, qui les rend plus conſiderables à ceux de qui ils auroient à craindre quelque choſe; Si eſt-ce que cette viciffitude perpetuelle qui altere les choſes humaines, & ce

mouuement sans fin avec lequel la Roüe de la fortune les tourne; pourroit amener quelque conjoncture, où les François n'auroient pas le pouuoir ou la volonté de l'assister: & il ne seroit pas impossible, si la Reuolution qui menacel'Allemagne depuis tant d'années s'acheuoit; qu'elle ne s'estendit sur le pays des Suisses, qui en est la lisiere, & que les Cantons Catholiques n'enuahissent les Protestans, comme ils l'ont souuent projecté; & ne fissent par consequent tomber de ce costé-là, le rempart qui couure Geneue.

Combien plus seurement & plus auantageusement seroient quelques vns de ces petits Estats, sous la domination que sous la protection d'un grand Prince? Et ne seroient-ils pas plus heureux d'estre à un Maistre puissant, qui veilleroit pour leur salut, & qui les deliureroit de la crainte qui les trauaille, & de la despense qu'ils soustiennent à se conseruer par eux-mesmes? Leurs Priuileges seroient aussi entiers qu'ils sont, & leur liberté plus grande; puis que pour le moins ils seroient gueris de la passion dont nous venons de parler, & des poursuites importunes qu'il faut faire à

Gg ij

ceux à qui l'on donne des pensions, pour les recouvrer. Les Princes à qui ils se feroient donnez, se piqueroient bien dauantage d'une chose qui leur seroit propre; que d'une qui n'est que dependante de leur Couronne, & la bresche qui se feroit à leur Estat, s'ils les perdoient, seroit bien plus large à cause de l'intérest de la Reputation; que s'ils se perdoient eux-mêmes estant sur leur foy, & chargez seuls de leur deffense. Enfin plus ils seroient à leur bien-seance; plus ils prendroient de soin de leur estre indulgens, & de bien traiter les habitans, de peur qu'ils ne se portassent à quelque changement, & que la facilité qu'ils auroient de secoüer le joug où ils se seroient mis volontairement, & de retourner à eux-mêmes; ne les obligeat à l'entreprendre.

Mais certes l'humaine condition est sujette à tant de foiblesses, & nostre Raison est assiegée de tant d'erreurs; que non seulement les Particuliers, mais les Communautés toutes entieres, se trompent souuent en l'élection du bien qui leur est propre, & se frapent de l'esclat & des apparences; plustot que de la solidité & de la verité des choses. Ou bien

certes l'acoustumance qu'on prend, & l'habitude qu'on fait à quelque genre de vie, & à quelque forme de police; est vn lien si fort & vn charme si puissant, pour ceux qui en sont pris; qu'il leur est fort mal-aisé d'auoir seulement la pensée, de les rompre & de les deffaire. Ou bien encore la liberté absoluë & la puissance souueraine, sont des choses si cheres à ceux qui en jouissent; qu'il n'y a point de prix auquel ils les voulussent quitter, & ils aiment mieux en posseder seulement l'ombre avec de notables incommoditez; que de viure dans la plus legere dependance, & dans la plus commode sujction qui soit au monde. Ou bien enfin comme il n'y a rien en cette vie qui n'ait deux faces, ny de Bien qui n'ait ses inconueniens; ainsi quoy que ceux que ces petits Souuerains souffrent, pour conseruer ce fantosme de Souueraineté qu'ils adorent, leur soient fort sensibles; ceux de la sujction quelque douce qu'elle puisse estre, leur paroissent plus insupportables, & ils auroient peur d'empirer leur condition en la changeant, & de quitter vn bien connu & certain, pour vn bien douteux & inconnu, & prendre des

maux que la nouveauté rendroit plus aigres & plus pesans, pour des maux dont l'acoustumance a emoussé la pointe, & temperé l'amertume. En vn mot ce que j'en ay dit, n'a pas esté pour preuenir les sentimens de personne; ny pour persuader ce qu'on ne voudra pas croire: mais seulement pour monstrier l'vne des faces de la medaille; affin que par cette representation on pût mieux juger de l'autre: ou bien certes on le prendra pour vn jeu d'esprit, & pour vn exercice de Raisonnement, qui est sans dessein & sans consequence.

Pour ce qui est des Princes qui n'ont qu'une puissance mediocre, comme par exemple le Duc de Sauoye; il n'y a point de doute que le voysinage de deux grandes Couronnes entre lesquelles il est enfermé, ne soit son salut, & que la jalousie que l'vne a que l'autre ne se faisisse de ses Estats, & n'oste cet entre-deux & cette barriere, qui fait la separation des leurs; ne les sollicite viuement de l'empescher de toutes leurs forces. Il n'y a point dis-je de doute, que les François n'ayment mieux auoir ce Duc pour leur voysin; qu'un Roy d'Espa-

gne, & que les Espagnols ne sçauroient rien porter plus impatiemment; que de voir estendre la domination des François jusqu'au Duché de Milan, qui est la base qui porte pour le dire ainsi, le reste de leurs Estats d'Italie.

En second lieu, il semble que ce soit vn heur fatal à la Maison de Sauoye, de porter d'excellens Princes pour la paix & pour la guerre, & que le Ciel leur ait acordé ces deux grandes qualitez, pour suplée à ce qu'il leur auoit refusé de puissance, & affin qu'ils pûssent avec l'esprit & avec le courage, faire le contrepois de la grandeur & de la puissance des autres. Ajoutez à cela, que les Alliances de sang qu'ils ont de tout temps contractées, avec l'une ou l'autre des deux Couronnes, & que ces Couronnes ont désirées pour leurs fins particulieres; leur ont grandement seruy pour en tirer du secours, quand ils en ont eü besoin, & pour s'empescher de tomber, ou pour se releuer de leurs cheutes.

C'est pourquoy bien que communement parlant les Ducs de Sauoye n'ayent point de plus grands souhaits à faire, que pour la bonne intelligence des deux Couronnes, ny rien

tant à apprehender, sinon qu'elles s'esbranlent l'une contre l'autre; Si est-ce que quand cela arriue, la Loy ordinaire de leur interest requiert, que ne pouuant demeurer Neutres; ils prennent party du costé de France, & ils ne sçauroient faire autrement, si quelque conjoncture extraordinaire ne les en exemte, sans courir fortune de se perdre, & sans estre inondez par les forces d'un grand Royaume, auant que l'Espagne ait moyen d'en arrester l'inondation, & d'en diuertir le rauage. Il s'est fait de cela tant d'experiences; que personne ne le peut reuoquer en doute. Et sans parler de la Sauoye que nous pouuons enleuer sans beaucoup de resistance, & où il n'y a qu'une forteresse qu'on peut rendre inutile par un Blocus, qui se puisse presque deffendre; Qui ne sçait en combien peu de temps, ce Charles qui s'attacha à la persuasion de sa femme qui estoit Portugaise, à la fortune de Charles le Quint; fust despoüillé de la meilleure partie du Piedmont par François Premier, & comme il auoit laissé sa posterite en chemise, si la vertu de Philibert son fils qui nous deffit deuant Saint Quentin, & le mal-heur de la France; ne

ce; ne luy eussent ouuert par vn Traité de paix, la porte de tant de places, qui luy auoient esté fermées durant tant d'années de guerre. Ceseroit vne chose superflüë, puis qu'ellen'est ignorée de personne, de parler de la conqueste que fit le feu Roy de toute la Sauoye, & des progresz qu'il eust pû faire en Piedmont, si vne puissante Conjuracion qui se formoit dans le cœur de son Royaume, & la reuerence qu'il portoit au Pape; ne l'eussent obligé d'entendre à la paix, où il estoit conuié de la part du saint Siege. Je passe aussi sous silence les Expéditions du Roy en Sauoye & en Piedmont, que toute l'Europe a veües, & l'extremité où il a poussé les derniers Ducs à la face de l'Espagne & de l'Empire, & nonobstant les efforts de leurs armes conjurées.

Les Ducs de Lorraine ne sont pas en vne constitution fort dissemblable, ny en vne dependance moins forte des interests de ce Royaume; que ceux de Sauoye. Que si le Duc Charles d'aujourd'huy eust bien connu cette verité qui luy estoit si importante, & si quelque mauuais Demon, ou plustot quelque mau-

H h

uais Conseiller ne l'eust aueuglé, pour ne voir pas ce qui estoit si visible & si plein de lumiere; Il ne se fust pas perdu comme il a fait: Il n'eust pas si souuent conjuré contre la France, & n'eust point quitté le chemin qu'auoient tenu ses predecesseurs qui les auoit fait heureux; pour se jeter dans ces sentiers destournez qui l'ont esgaré de son bien, & l'ont conduit au precipice où il se trouue. Pour le moins s'il eust pû garder la Neutralité entre les Princes qui se faisoient la guerre, & estre Spectateur de la querelle sans se metre sur les rangs; il eust esté en consideration de tous costez: Il eust pû se preualoir de la fortune des vns & des autres, & son pays apres auoir quelque temps esté vn des Theatres de la guerre; n'eust pas esté vn des plus beaux membres des conquestes du Roy, & vne des principales pieces de son Triomphe.





DISCOVRS TROISIEME.

*Où est apporté le second Exemple dont il a esté
parlé au Premier Discours, pour monstrier les
artifices dont se seruent les Princes qui at-
taquent vn autre Prince, pour empes-
cher ses Amis de le secourir.*



Le second Exemple que dans le
Premier Discours nous auons
promis d'apporter ; se prendra
encore de la Republique de Ve-
nise, & d'un different qu'elle a
eü avec la Maison d'Austriche , sur le sujet
des Vscques. I'en donneray icy la peinture
entiere pour la curiosité du Lecteur , & affin
qu'il puisse remarquer plus distinctement &
en leur place naturelle , les traits sur lesquels il
importe pour mon dessein qu'il s'arreste, &
qu'il fasse vne reflexion particuliere. Il y a
plaisir de voir sur les rangs deux celebres
combatans, qui s'esprouent l'un contre l'au-

H h ij

tre, & ceux qui ont de l'inclination pour les affaires d'Estat, ne sçauroient assister à vn spectacle plus agreable; qu'à la rencontre & au choc pour le dire ainsi, de deux Puissances toutes deux sçauantes en l'Art de regner, & toutes deux à peu près esgalement fortes en artifices & stratagemes politiques; comme sont l'Espagne & la Republique de Venise. Telles & semblables obseruations, sont les fruits dont les gens d'Estat doiuent faire leur principale moisson en la lecture de l'Histoire: sont les veritables lumieres dont ils se doiuent munir pour esclairer leur conduite, & la riche matiere dont se doit composer la science, dont ils font profession.

Le sujet donc de ce Discours sera la broüillerie des Vïscoques, qui a fait tant de peine à la Republique de Venise: qui l'a promenée par vne Negotiation la plus espineuse & la plus intriguée qu'elle ait gueres jamais gouvernée, & qui s'est enfin terminée en vne guerre qui a consumé vne partie de son Tresor, & luy a fait perir des hommes sans nombre. L'origine & le progres de cette affaire ont esté tels. La Mer Adriatique si fameuse dans

l'Antiquité à cause des grandes pyrateries qui s'y exerçoient ; auoit esté renduë par le soin des Venitiens ; la plus seure Mer du monde . C'estoit vn azile pour les vaisseaux qui fust long-temps respecté par les Corsaires , & la seureté de la Nauligation , qui embrassoit les Costes de quelques autres Princes , aussi bien que celles de la République ; n'y fust point troublée notablement jusqu'au temps de Soliman , que les Vscques la violerent . Ils furent pourtant bien-tost reprimez par les armes de la Republique , qui s'obligea par la paix qu'elle fit avec Soliman l'an 1539. de tenir son Golfe net de Pyrates , & de reparer à ses despens les dommages qu'en receuroient les sujets du Grand Seigneur ; qui nauigeroient sur cette mer . Ce calme du costé des hommes dura depuis jusqu'au temps des Empereurs Rodolphe & Mathias , & des Archiducs Ferdinand & Leopold , que les mesmes Vscques l'interrompirent , & le Golfe fust tellement trauaillé de leurs courses & de leurs larcins ; qu'ils les estendirent jusqu'aux Ports de la Republique , en l'vn desquels ils pillerent vne Galere , & apres auoir tué tout ce

H h iij

qui estoit dedans , par vne inhumanité des Barbares du nouueau monde , mangerent le cœur du Capitaine qui la commandoit.

Ces Vscloques sont vne espece de gens ramassez de plusieurs Nations , Croates Hongrois Esclauons & Bannis de la Republique : qui n'ont ny bien ny industrie : qui ne s'entretiennent & ne viuent que de rapines & de carnage , & que l'enormité des crimes dont ils craignent la punition , ou les attraits d'une vie desreglée & qui est hors du frein des Loix & des Magistrats ; ont jettez dans cette violente Societé , & dans ce sanguinaire commerce. Ils habitent en Esclauonie , autrement appelée Venadel & anciennement Liburnie , au dessous de la Montagne Morlache , qui fait vne partie de celle qu'on appelle *Chaisne du monde*. Leur principale demeure , & comme la grande Taniere de ces Voleurs ; sont la ville de Segna & la forteresse de Serisa , qui fust prise sur eux par Iaqués Zane Prouediteur de la Dalmatie . Ils sont sujets de l'Empereur & des Archiducs de Grets , qui se pouuoient vanter d'auoir à leur disposition des hommes seulement neez pour faire du mal , & pour estre le

fleau des autres hommes; comme Dieu a sous la generalité de ses Creatures, & dans l'estenduë de son Empire, des Demons aussi bien que de bons Anges, & des foudres & des tempestes, aussi bien que des Meteores agreables & salutaires.

Ces gens donc se mirent à faire des courses sur la Mer Adriatique, & bien que le pretexte de leurs pyrateries fust de faire la guerre au Turc, & que comme bons sujets ils se parassent de cette belle couleur, qui est si familiere à leurs Maistres; ils ne laissoient pas de piller & de metre à rançon les Chrestiens & sur tout les Venitiens, aussi bien que les Turcs, & la Baniere de saint Marc ne leur estoit pas plus inuiolable, que le Croissant de Constantinople. Leurs courses & leurs inuasions ne s'arrestoient pas à la Mer; ils mettoient souuent pied à terre, & passant par les terres de la Republique, penetroient dans celles du Grand Seigneur; d'où ils enleuoient tout ce qu'ils pouuoient emporter, & reuenoient chargez de despoüilles, dont les plus riches & plus precieuses estoient la part des Officiers de l'Empereur & des Archiducs; outre les droits de

l'Admirauté, qu'ils payoient comme c'est la coustume des Pyrates protegez, mieux que gens du monde.

Il n'en falloit pas tant pour metre les Turcs en mauuaise humeur contre les Venitiens, & pour allumer le sang de ces ames auares, qui non seulement ne se connoissent point à souffrir des pertes de la part des Chrestiens leurs voyfins; mais qui sont en perpetuelle possession d'en tirer des tributs, ou de faire sur eux des prises. Aussi certes ils en tesmoignerent bien-tost du ressentiment à la Republique, & acompagnerent leur ressentiment de plaintes aigres & de menaces de reuanche; si elle ne remedioit à ce desordre, & ne faisoit cesser le mal qui croissoit tous les jours, & se fortifioit par sa conuience. C'estoit justement le but des Princes de la Maison d'Austrie, & sur tout des Espagnols; qui ne visoient qu'à la broüiller avec le Grand Seigneur, & à les commettre ensemble; afin que le besoin qu'elle croyroit auoir de leur secours si le Turc rompoit avec elle; luy fit perdre la volonté de les trauerser au dessein qu'ils auoient fait d'opprimer le Duc de Sauoye. Mais sa dexterité

dexterité qui a tousiours esté aussi grande que le monde sçait , & le credit qu'elle auoit à la Porte, qui n'estoit pas mediocre ; frustrerent les Espagnols du succez de leur projet . La connoissance que les Turcs eurent de cét artifice , allentit l'ardeur qui commençoit à les eschauffer , & retint leur patience & leur moderation, dans des bornes qui ne leur sont pas naturelles.

Il arriua vn accident presque semblable durant la broüillerie de l'Interdit , & vn dessein tiré de la mesme idée, & jetté pour le dire ainsi sur le mesme moule ; eust vne fin à peu pres pareille , & s'eschoüa de la mesme sorte. Pendant que la mauuaise intelligence du Pape & des Venitiens estoit la plus enflammée , & que les choses de tous costez tendoient visiblement à vne rupture ; les Espagnols enuoyerent le Marquis de Sainte Croix avec 40. Galeres en Albanie, qui y prit & sacagea Duras ville des appartenances du Turc, & de quelque reputation dans la prouince. Leur intention n'estoit pas d'incommoder le Grand Seigneur par la prise d'une place , qu'ils ne pouuoient long-temps garder, ny de s'establis

en vn lieu où ils n'auoient point de tenuë, & ne pouuoient prendre racine. Ils pretendoient seulement de réueiller par cette piqueure cet orgueilleux Ennemy, & de l'obliger à se ressentir de cet affront; ce qui ne se pouuoit faire sans qu'une partie du faix de la guerre tombat sur les Venitiens, & que leurs Estats fussent la premiere Scene, où se desployeroit l'effort des armes du Turc: ou au moins sans qu'elles passassent par leur Golfe pour attaquer les Costes de Naples; ce qui estoit toujours pour eux, vn grand sujet de jalousie, & vne ample matiere de despenſe. Mais la mine ayant esté éuentée par le Grand Seigneur; faillit de se renuerſer sur ceux qui l'auoient preparée. Au lieu d'attaquer les Estats de la Republique; il luy enuoya offrir ses forces contre les Espagnols & contre le Pape, & fit auancer Giaffer Bassa avec 55. Galeres jusqu'aux Gomenicies pres de Corſou, pour joindre le General Paschaligo, toutes les fois qu'il plairoit aux Venitiens. Ils n'eurent pas pourtant ny la volonté ny le besoin de se seruir d'un remede, dont l'operation estoit tres-dangereuse: ny d'entrer dans yne Societé, où

il y auoit pour eux fort peu à esperer, & beaucoup à craindre.

Reuenons à nostre sujet. La Republique voyant que l'affaire des Vſcoques auoit besoin d'un prompt remede, & que de cette racine pourroit pulluler quelque grand accident à son prejudice, si l'on ne la coupoit de bonne heure; se met en deuoir d'y remedier. Pour cet effet elle tente premierement, comme c'est tousiours sa coustume, la voye de la Negotiation & des offices, auant que de venir à celle des armes. Mais en tout cecy elle ne receoit que des paroles sans effet, & des changes perpetuels qu'on luy donne: que des eschappatoires estudiez, & des fourbes colorées, & jamais procedure ne fust plus oblique plus vague & plus indeterminée; que celle dont on vſa en son endroit. Quand elle faisoit solliciter l'Empereur, de reprimer les attentats des Vſcoques, & d'en destourner les violences; Il la remettoit aux Archiducs comme Gouverneurs du pays où ils habitoient. Quand elle auoit recours aux Archiducs pour le mesme effet; Ils respondoient que c'estoit à l'Empereur comme au Souuerain d'y pouruoir, & non

II ij

pas à eux qui n'auoient qu'une puissance subalterne. Quand elle les auoit tous ajustez, & mis en estat de n'vser plus de collusion & de deffaites; Ils s'auisoient tantost de dire, que cette affaire se termineroit plus seurement en vne Diete d'Hongrie qu'il falloit conuoyer; puis que les lieux de la demeure des Vscouques estoient de la dependance, & releuoient de ce Royaume. Quelquefois ils protestoient que ce n'estoit pas à eux à qui il falloit s'adresser immediatement, mais au Conte Sosimo & à Frangipani, comme aux Seigneurs particuliers desdits lieux: qu'il falloit marcher dans l'ordre, & passer par les degrez des Iurisdictiones inferieures, auant que de venir à la suprême.

Enfin quand apres tant d'evasions & de destours, par où la Republique fust promenee; elle tesmoignoit que sa patience estoit au bout, & qu'elle vseroit du droit de Souuerain, & se feroit raison elle-mesme contre ceux qui la luy refusoient; On luy enuoyoit des Agens au nom de l'Empereur & du Roy Catholique, qui prometoient qu'on luy donneroit satisfaction, & qu'on feroit cesser ses plain-

tes. Mais tout cela ne se trouuant que du vent & des promesses vaines & creuses, & la Republique si long-temps & si souuent abusée, se preparant tout de bon pour emporter par la force, ce qu'elle n'auoit pû obtenir par la douceur; On deputoit des Commissaires sur les lieux, qui bannissoient ou faisoient mourir quelques vns des plus petits & des moins coupables des Vſcoques : mais qui ne touchoient pas à leurs Chefs & aux autres membres plus considerables; c'est à dire qui retrenchoient quelques legeres & inutiles branches du mal; mais laissoient en son entier le tronc, & les autres parties de l'arbre. Et ainsi le desordre estant plustot cultiué qu'arraché par cette procedure, repoussoit plus gaillardement qu'auparauant, & ressembloit aux eaux d'un torrent qu'on arreste, qui se respendent avec plus d'imperuosité & de ruine, apres que l'obstacle qui les bridait est osté; que lors qu'elles couroient en liberté, & que leur force n'estoit pas irritée par la contrainte.

En vn mot il y a dequoy s'estonner de la quantité des Traitez qui se firent sur cette dispute, & du succez & comme du destin

de ces Traitez, dont vn seul ne fust executé, & qui tous s'en allerent en fumée. Il s'en fit à Ratifbonne, à Lints, à Prague, & notamment à Vienne du 12. May 1612. par lequel il fust arresté que l'Archiduc Ferdinand purgeroit la Mer Adriatique de pyrateries, & empescheroit ceux de Segna d'aller en course. Mais l'heure de l'exécution n'estoit pas encore venue, & les Espagnols auoient besoin que le mal durat plus long-temps, & que la Republique fust diuertie hors d'Italie; afin qu'elle ne s'appliquat pas si fortement qu'elle eust fait, à ce qui se passoit en Piedmont, & donnât moins de chaleur aux affaires du Duc de Sauoye. Tous les Commissaires qu'on enuoyoit pour faire executer le Traité; tomboient malades en chemin, ou estoient rappelés sous quelque pretexte affecté, & il interuenoit tousiours quelque accident, qui frustrait la Republique des esperances dont on la repaissoit depuis si long-temps, & qui luy fit comprendre qu'il n'y auoit que le fer qui peut arracher l'Ulcere, qui s'estoit enraciné & rendu malin par la conniuece.

Cela la fit resoudre à la guerre contre l'Ar-

chiduc Ferdinand, & pour empescher le mal de couler plus long-temps; de l'aller combattre dans sa source. Pour cet effet elle fit assiéger Gradisque, & n'espargna ny argent ny hommes pour rauoir cette place, qu'elle auoit autrefois bastie contre les inuasions des Barbares en Istrie, & qui luy ouuroit le chemin à la conqueste de Goritia. Avec ces deux places, comme avec vne chaisne tenduë; elle eust fermé le passage aux troupes Allemandes, qui pouuoient descendre dans le Frioul par les montagnes du Carso, & par la riuiera de Lisonzo. Cette bien-seance qui n'estoit pas petite pour les Venitiens, & la commodité de mettre vne puissante barriere entre leurs Estats & l'Allemagne, dont ils ont tousiours apprehendé l'inondation; firent dire à ceux qui mesurent tousiours les desseins des autres par leur regle propre, & ne connoissent d'autre Løy d'agir que l'vtilité; Que les courses des Vsqques estoient le pretexte de cette guerre; mais que la conqueste de ces deux places en estoit la cause. Mais ceux qui considereront l'interest violent qu'auoit la Republique de reprimer les attentats des Vsqques, & les pe-

rilleuses consequences qui resultoient à son prejudice, d'une plus longue patience; jugeront facilement qu'elle ne pouuoit faire autrement, & que si en cecy on pouuoit blasmer sa conduite; ce ne seroit que de trop de lenteur & de flegme, & d'auoir laissé par trop d'insensibilité enhardir l'insolence, & croistre l'outrage qu'on luy faisoit.

Ce n'est pas icy le lieu de raconter le progres de cette guerre, ny les differens visages que la fortune luy a donnez tantost en faueur des Archiducs, & tantost des Venitiens. Mon intention est seulement de descrire la procedure qu'eux & les Espagnols y ont tenuë, & de représenter les diuers moyens dont deux Princes puissans en artifices & en prudence politique, comme nous auons dit au commencement; se sont fait la guerre, & les mines & contre-mines avec lesquelles ils se sont attaquez & deffendus. La rupture arriuée entre les Venitiens & les Archiducs, & la guerre s'eschauffant de part & d'autre; le Duc d'Osone dont l'humeur estoit naturellement portée au trouble, & qui finalement comme la chaleur naturelle s'attache à l'humide radical
quand

quand l'aliment estranger luy manque; ne trouuant pas au dehors assez de matiere pour broüiller, s'en fit dans les Estats de son maistre, ce qui fust la cause de sa perte. Le Duc d'Ossone dis-je nonobstant la continuation de la paix avec l'Espagne; arme par mer pour trauerser la Republique: escume le Golfe sous la conduite d'Alonzo Riuera: enleue des vaisseaux, & pour pouuoir estre defauoüé en cas de besoin, & par vn artifice digne de l'esprit Espagnol; fait toute cette equipée sans arborer d'autres Enseignes, que les siennes. Enfin les affaires se troublant à la longue de plus en plus, & l'animosité des partis deuenant plus forte par les diuers accidens que la guerre produit tous les jours; Il desploye les Enseignes Royales, & par vne nouueauté des derniers temps, & inconnuë aux temps precedens; fait la guerre sans la declarer, & sans confesser de la faire.

On a dit que tout cela se faisoit par forme de diuersion, & pour rendre le change aux Venitiens, qui fomentoient sous main, comme il a esté dit ailleurs, le Duc de Sauoye, & luy payoient tous les mois vne certaine

Kk

somme d'argent, pour nourrir la guerre du costé du Piedmont, & afin que les Espagnols ocupez avec ce Prince; ne vinssent à effleurer leurs frontieres dégarnies de vieux soldats, & pourueüs seulement de gens qui ne seruoient qu'à faire nombre, comme sont les milices d'Italie. Ce danger du costé de la terre, qui tenoit plus en ceruelle les Venitiens, que les entreprises que faisoient les Espagnols du costé de la mer, & la jalousie de la conseruation de leur campagne, dont ils sont plus travaillez que gens du monde; fit qu'ils s'auserent de faire proposer en Espagne quelque forme d'acommodement entre les Archiducs & eux, & d'y faire aussi comprendre le Duc de Sauoye, avec lequel ils estoient alors en société d'interests, & en quelque façon en communauté de fortune. C'estoit obliger le Roy Catholique par cette deference, de ne rien entreprendre sur leurs Estats, & de ne traiter pas comme Ennemis, ceux qui le choissoient pour Arbitre de leurs differens, & luy confioient si franchement leurs affaires. Cette procedure eust pû adoucir le courage des Espagnols, s'ils eussent esté aussi magnanimes que

superbes, & emousser l'indignation qu'ils auoient conceüe contre les Venitiens, à cause de la guerre qu'ils faisoient aux Archiducs, & de l'assistance qu'ils donnoient secretement au Duc de Sauoye.

Mais au lieu de s'amollir par ce grand respect qui leur estoit rendu, & de relascher de leur animosité par vne soumission qui leur faisoit tant d'honneur ; Ils tesmoignerent plus d'endurcissement, & se roidirent dauantage à ne vouloir point ouyr parler d'acord. Ils se haussèrent d'autant plus qu'ils croyoient que les Venitiens s'estoient abaissez, & les prenant pour gens qui auoient faite de cœur, ou qui manquoient de puissance ; Ils les traitèrent avec reproches & menaces. Ils faisoient sans doute les difficiles, pour se faire dauantage prier. Ils croyoient trouuer moins de résistance à faire accepter les conditions du Traité, par la repugnance qu'ils monstroient à vouloir s'entremetre de l'acommodement, & ils s'imaginoient que ceux qui estoient dans le borbier ; s'estimeroient tousiours heureux d'en sortir, quoy qu'ils en fussent riez avec rudeffe, & qu'il n'y auoit point de

Kk ij

port trop incommode pour ceux qui se fau-
uoient d'un naufrage. Ils se tromperent pour-
tant : car ny les affaires de la Republique n'é-
stoient encore si déplorées; qu'elle eust besoin
d'auoir recours à des moyens honteux pour
les restablir, & elle n'estoit jamais tombée en
des disgraces si profondes ; qu'elle ne se fust
toufiours proposée de s'en releuer avec digni-
té. Ce que cela opera fust, que les Espagnols
dans l'effet furent plus retenus qu'ils n'eussent
esté à offenser les Venitiens, & qu'ils ne vio-
lerent pas du costé de terre la paix qu'ils au-
uoient avec eux ; ce qui estoit leur principale
intention.

La proposition donc d'acommodement
estant auortée à Madrit, & pour ce coup l'hu-
meur des Espagnols & celle des Venitiens ne
s'estant pas trouuées sociables; les differens
furent renuoyez à Rome. Icy les difficultez
qui trauersoient la paix, ne s'applanirent non
plus qu'en Espagne. Car outre que le Pape
estoit suspect de passion pour les Espagnols,
& qu'en l'affaire dont il s'agissoit, il y en au-
oit qui croyoient qu'il n'auoit pas les
mains assez adroites, pour la manier ; Ceux-

cy n'eussent pas volontiers souffert, que d'autres qu'eux eussent la gloire de la terminer, & l'inclination de leurs Ministres d'Italie, estoit trop portée à la guerre, qui leur produisoit vne vtilité presente & certaine qu'ils n'auoient pas en temps de paix, avec l'esperance de quelque succez esclatant, qui eust rendu leur Administration remarquable. Ainsi on ne songeoit tousiours qu'à gagner du temps, & ce jeu continua jusqu'à ce que les armes Espagnoles s'estant mises en reputation par la prise de Vercel, & la crainte qu'auoient tousiours eü les Venitiens qu'elles ne se continssent pas dans les frontieres du Milanois, & ne se desbordassent dans leur pays, s'estant augmentée par cet accident; Ils se mirent à reprendre les erremens qu'ils auoient quitez du costé d'Espagne, & à rejoüer leur vieille Piece, mais beaucoup plus ajustée, & avec plus de couleur d'en desirer la conclusion; qu'ils n'auoient fait la premiere fois.

Les Espagnols aussi de leur costé ne s'amuserent plus à faire les fins & les Rodomons, comme ils auoient desia fait. Sur tout le Duc de Lerme Ministre d'humeur pacifique, & qui

K k iij

ne cherchoit il y auoit long-temps, que quelque chemin specieux, pour sortir avec honneur de la guerre d'Italie; embrasse la conjoncture. Elle ne pouuoit estre plus auantageuse aux affaires de son maistre; puis que la paix venoit apres la victoire: ny plus favorable aux siennes particulieres; puis que par ce moyen il esloignoît du commandement des armées D. Pedro de Toledé qui estoit de faction contraire, & qui commençoit à offusquer le Cabinet où l'autre estoit proprement en son jour, par l'esclat des choses qu'il auoit fait à la campagne. Il reçoit donc avec grand agrément les propositions des Venitiens: promet de reconnoître l'honneur qu'ils faisoient à son Maistre, par les conditions les plus vtilés & les plus honorables qu'il leur pourroit procurer, & jamais Traité n'eust l'apparence d'une plus certaine conclusion, que celui-là.

Toutefois comme les tourmentes ne sont pas plus frequentes à la mer; que les Reuolutions le sont à la guerre, & que celle de Piedmont auoit cela de particulier; qu'elle suiuit la forme du Gouvernement de France, & estoit dependante de l'inconstance & des

changemens d'une Cour, qui estoit en ce temps-là plus changeante & plus mobile qu'elle fust jamais; Il arriua que le Marechal d'Ancre Partisan passionné des Espagnols, & grand promoteur de leurs interets; ayant esté tué, & que la source qu'il tenoit fermée des principaux secours qui deuoient venir au Duc de Sauoye, ayant esté ouuerte par sa mort; Il passa tant de François en Piedmont, que le Duc se trouua en estat de faire quitter la campagne à l'armée des Ennemis, que le siege de Vercel auoit toute debiffée: qu'il leur enleua par la prise de plusieurs places vne partie des restes de cette armée: qu'il estoit prest de penetrer dans le Milanois, & qu'il eust pû faire peur à la ville mesme de Milan; si l'on n'eust rompu le cours de la victoire du costé de France, & retenu la foudre qui estoit prestee à tomber sur les Espagnols. D'ailleurs la fortune qui auoit mal-traité les Venitiens deuant Gradisque, commençoit à se déclarer en leur faueur, & vn renfort notable de Hollandois qui leur estoit venu sous la conduite du Conte Iean de Nassau; leur promettoit vne heureuse issue, & vne prompte reduction de

cette place, qui leur auoit cousté avec vne infinité d'argent, beaucoup de sang estrangier & domestique.

Dans ce changement de fortune, & dans cette nouvelle face d'affaires ; les Venitiens changerent de procedé à l'endroit des Espagnols, & leuerent le masque sous lequel ils auoient jusques alors caché leur intention; qui n'auoir jamais esté que les Espagnols si puissans & si redoutables en Italie, à cause des Estats qu'ils y possèdent ; deuinsent les Arbitres des querelles qui s'y esmouuoient, & ajoustassent à la puissance qu'ils y auoient, l'autorité de terminer les differens & de regler les affaires, où ils n'auoient point de puissance. Ils firent donc dire au Roy Catholique, que leur Ambassadeur n'auoit eü charge de s'adresser à luy, que pour sçauoir ses sentimens, & auoir ses auis sur le sujet de la guerre de Gradisque & de celle de Piedmont, & qu'ils auoient bien entendu de le consulter en cette matiere comme Amy; mais non pas de luy en remettre la decision, & de l'en constituer Iuge. Et ainsi le remerciant en termes magnifiques, & avec des paroles de grand respect qu'ils ont

ont coustume de substituer en abondance aux choses qu'ils ne veulent pas acorder; Ils frustrerent les Espagnols de leur dessein, & reseruerent à la France vn honneur que les autres auoient passionnement desiré.

De sorte que dans tout le cours de cét Intrigue, & dans toute cette guerre de Cabinet; le champ demeura aux Venitiens, qui ne trouuerent pas pourtant leur conté en France, où les interests de l'Estat, ou le genie des Ministres trop portez d'inclination à obliger l'Espagne, ou de crainte de la desobliger; firent qu'on eust trop d'esgart à la dignité de cette Couronne, ou trop peu à celle de la Republique, & aux interests du Duc de Sauoye. Il ne faut pas taire icy le mescontentement que l'Empereur & les Archiducs eurent des Espagnols à cause de cette paix, & des plaintes qu'ils firent d'vn accommodement, qui n'auoit pas amendé leur condition: qui n'auoit fait que les remettre en l'estat, où ils s'estoient mis par le Traité de Vienne, & les rendre au mesme port d'où ils estoient sortis, apres auoir essuyé

la despense & les hazards d'une nauigation inutile. Ainsi les Espagnols ont coustume de sacrifier à leurs interets, ceux de leurs meilleurs Amis, & de tendre à leurs fins sans exception de moyens ny de personnes.

L'usage de cet artifice dont nous venons de parler; n'estoit pas nouveau dans le monde, ny de l'inuention des Venitiens. Il auoit esté il y auoit long-temps mis en pratique par Charles VIII. pour diuertir Henry VII. Roy d'Angleterre de secourir le Duc de Bretagne, à qui il vouloit faire la guerre. Pour conjurer donc l'orage qui luy pouuoit venir de ce costé-là, & retarder le secours que Henry eust pû amener ou enuoyer en faueur de son voyfin; Charles fit semblant de desirer la paix, & offrit de soumettre à Henry le different qu'il auoit avec le Duc, & de le reconnoistre pour Arbitre & Mediateur de la querelle. Avec vn atrait si delicat & ce subtil charme d'honneur; Il desarma l'esprit de Henry, qui estoit tout porté d'inclination d'assister le Duc de Bretagne: Et luy cependant fit vn armement si

puissant & si prompt, & mit en si peu de temps de si belles forces sur pied; que le Duc fust acablé auparauant qu'on eust presque sceu en Angleterre, que Charles fust entré dans son pays à main armée, & la Piece fust acheuée, auant qu'on y eust appris qu'on en auoit joué le premier Acte.

Ll ij





DISCOURS QUATRIEME.

*Quelques Regles que les Princes & sur tout ceux
qui sont foibles, doivent observer quand ils
ont besoin de se servir du secours
de leurs Amis.*



N OUS auons veu aux Discours precedens le malheureux destin des Princes foibles, quand ils sont attaquez par de plus puissans, & les diuers artifices que ceux-cy ont coustume de faire joüer, pour empescher ou pour allentir les secours qui leur pourroient venir de la part de leurs Amis. Mais puis qu'il est neecessaire qu'il y ait de tels Princes dans le monde, & que dans la distribution des parties de cette petite machine, pour lesquelles les hommes se donnent tant de peine & font tant de bruit; l'esgalité n'a pas esté obseruée; Il faut que les plus mal partagez suiuent la Loy generale, & qu'ils de-

meurent la proye des plus forts qui les attaquent : ou qu'ils cherchent de la protection auprès de ceux qui leur en peuuent donner, & se sauuent à l'ombre de leur autorité, ou par la force de leurs armes. Cependant il y a quelques Regles à obseruer qu'il importe qu'ils connoissent. La premiere est qu'ils fassent le plus grand effort qu'ils pourront d'eux-mesmes, pour s'opposer à l'Ennemy qui leur vient tomber sur les bras, & pour arrester sa premiere impetuosité; qui est d'ordinaire la plus forte, & rendre vains ses premiers coups; qui sont tousiours les plus dangereux.

Pour cét effet & dans cette publique necessité; ils ne feront point difficulté de vendre ou d'engager ce qu'ils auront de meilleur & de plus pretieux: de puiser largement dans la bource de leurs Amis, & dans celle de leurs sujets pour faire de grandes leuées; & il vaut bien mieux pour ceux-cy qu'ils souffrent d'estre vn peu saignez & pour vn peu de temps par le Prince, que s'ils venoient à estre totalement & à jamais ruinez par les Estrangers: & paysgasté comme l'on dit, vaut mieux encore

Li iij

pour luy, que pays perdu, & sujets vn peu foulez, que sujets contrains de changer de maistre. Et bien qu'ils ne puissent pas longtemps soustenir cét armement extraordinaire, ny resister à cette despenſe exceſſiue; Il ſe pourra faire que l'ardeur de l'Affaillant ſe refroidira par la reſiſtance qu'il aura d'abord trouuée plus grande qu'il n'auoit creu, & qu'il ne ſera point faſché qu'on luy faſſe des propoſitions d'acommodement, & qu'on luy ouure quelque porté, pour ſortir avec honneur d'vne entrepriſe, dont les commencemens n'ayans pas eſté heureux; il y auroit à craindre que le progres ne fuſt de meſme, & que la chaîne du mal-heur ne fuſt continuë. Et ainſi ce nuage qui auoit eſté formé contre eux; ſe diſſipera ſans auoir fait que du bruit, & ils retourneront au port, ſans auoir eſté que menacez de la tourmente.

Ou bien certes ſi l'Ennemy ne ſe rebute point pour ce mauuais viſage que la fortune luy aura fait d'abord, & ſ'il ſe reſout de ne laſcher point le pied pour cela, & de ne retourner pas en arriere; Ils n'auront pas peu fait d'auoir gaigné du temps, qui eſt le grand

remede des mal-heureux & des foibles, & donné moyen à leurs Amis de les venir secourir, & de leur mener des troupes fraisches, avec lesquelles ils ne pourront pas seulement se maintenir; mais ils pourront peut-estre encore faire changer la guerre de face: conuertir la deffense en attaque, & deuenir les Assaillans de leurs Aduersaires. Le Duc de Saouye Ayeul de celuy d'aujourd'huy en a vſé de la sorte, aux guerres que les Espagnols luy ont faites depuis la mort du feu Roy. Sans cela il eust esté emporté d'emblée, & englouty pour le dire ainsi par ces puissantes armées, avec lesquelles les Gouverneurs de Milan entroient en Piedmont, & faisoient peur à toute l'Italie, fors à ce Prince. Et neantmoins avec cette sage & hardie procedure; il n'a pas seulement soustenu & eschoüé leurs premiers efforts; mais il leur a encore avec le temps fait des affronts, & nous auons remarqué au Discours precedent qu'apres la perte de Vercel, qui eust pû estre conserué s'il eust esté bien deffendu; s'estant fortifié du secours que Monsieur d'Esdiquieres luy amena, qui estoit florissant & beau; il les mit sur la deffensiue, &

les contraignit de desirer la paix, qui fust conclue à Paris à leur auantage.

La seconde Regle est, qu'il n'est pas seulement question icy, d'essuyer vne grande despense & de faire de grandes leuées; mais qu'il importe encore extremement de les faire de bonne heure, & de ne s'exposer pas aux hazards des surprises, qui estant dangereuses en toute sorte d'affaires; le sont infiniment à la guerre, & font d'ordinaire des bresches par où la mauuaise fortune entre si auant dans les Estats; qu'on a bien de la peine à l'en chasser, & il faut quelquefois qu'ils meurent de ces coups, ou qu'ils en soient long-temps malades. Et c'est ce qu'on a quelquefois trouué à desirer à la sagesse des Venitiens, & à leur excellente conduite. Leurs Historiens mesmes confessent, qu'une des causes de la perte du Royaume de Chypre; fust la longueur qu'ils apportèrent à se preparer contre l'orage qu'ils voyoient venir, & nous les auons veus aux mouuemens qui ont trauaillé l'Italie, pour la Succession du dernier Duc de Mantoüe; armer plus lentement qu'il n'eust esté besoin pour le dessein mesme qu'ils auoient, & suspendre

pendre plusieurs fois les ordres & les commissions qu'ils auoient données pour la guerre, sur des bruits vagues & incertains qui couroient de quelque Traité de paix, & qui n'estoient peut-estre qu'une ruse estudiée & qu'un artifice affecté par les Espagnols; pour leur jetter cette froideur & ce relaschement dans l'ame. Pour le moins il est certain, que si apres que le Roy eust forcé le Pas de Suze, & ouuert cette barriere qui luy fermoit l'entrée de l'Italie; Ils n'eussent reuoké l'ordre qu'ils auoient donné à leur General d'entrer dans le Cremonois; ils auroient pris quelque notable auantage sur les Espagnols, pendant qu'ils manquoient de forces: qu'ils estoient perdus de courage, & que l'inclination des peuples leur estoit contraire.

Qui peut dis-je douter que s'ils eussent occupé Cremone qui leur tendoit les bras, & suspiroit apres vn joug si doux que le leur; Ils n'eussent grandement fortifié le party qu'ils fauorisoient, & obligé peut-estre par cette declaration les Espagnols, à obseruer la paix de Suze, & à faire enuoyer au Duc de Mantoue les Inuestitures acordées par ce Traité;

M m

plustot que de s'enfermer entre deux Puissances si considerables ; comme estoient la France & Venise, & peut-estre encore quelque autre ; que celle-cy eust attirée. Ou bien certes si la guerre se fust rallumée, comme elle fit l'année suiivante, & si les Espagnols piquez des affronts qu'ils auroient receus de toutes parts, eussent voulu à quelque prix que ce fust en effacer la honte avec les armes ; la guerre eust sans doute pris vne autre forme, si les Vénitiens y eussent esté engagez : apparemment Mantouïe ne se fust pas perduë : on eust veu tous les desseins des Ennemis auortez, & au lieu du mal-heureux succez de l'Expedition de Valesse, pour auoir esté faite trop tard & avec precipitation ; la Republique auroit veu meurir à son aise & sans beaucoup de hazart, les fruits d'un dessein si genereux, si elle l'eust fait de bonne heure. Elle n'en eust pas esté pour cela plus haïe de la Maison d'Austriche : elle en eust esté dauantage respectée, & toute l'Italie eust pris plus de cœur pour deffendre la commune liberté ; si elle eust eü deuant elle vn si grand exemple de courage, de la part de ceux qui luy donnent tous les jours de si

grands exemples de sagesse. Mais quoy c'est le sort de la sagesse humaine ; d'estre quelque fois fautive : ou plustot c'est le propre des mauvais euenemens ; d'estre tousiours attribuez à des causes peu raisonnables : ou bien encore c'est la nature de toutes les affaires qu'on met en deliberation ; d'auoir plusieurs visages , & des raisons de tous costez qui inclinent à agir ou à n'agir pas , de cette maniere ou de cette autre. Et enfin c'est le priuilege de la fortune , ou pour parler plus chrestienement, c'est le droit de la Prouidence qui gouerne le monde ; de frustrer ou de faire suiure comme bon luy semble , ces raisons de l'effet où elles tendent, & du succez qu'elles promettent.

La troisieme Regle sera, que si apres que le Prince qu'on attaque aura fait l'effort que nous luy auons conseillé de faire, & que notwithstanding cela il ait besoin du secours de ses Alliez, pour faire cesser le mal, ou pour l'empescher de passer outre ; Il faut qu'il tasche de se seruir de leurs forces par diuersion, & de les faire entrer dans le pays de son Ennemy, s'il n'est trop pressé dans le sien, & si le mal qu'il sent ou qu'il craint, peut attendre ce re-

M m ij

mede. Par ce moyen il deschargera son pays des troupes qui le desoloient, & qui en auoient juré la ruine, & le garentira encore du rauage des Auxiliaires; qu'on ne scauroit éuiter quelque ordre qu'on y apporte, & qu'on peut fort proprement comparer aux medecines, qui ne peuuent guerir le corps sans l'vser, ny en chasser les mauuaises humeurs qui l'alterent, sans y faire du desordre, & sans y laisser mesme quelquefois quelque impression mal-faisante. Pour ce qui est de cette diuersion il n'est pas possible qu'elle ne reussisse, & n'ait l'effet qu'on pretend; puis qu'elle a le caractere & la marque des diuersions efficaces, & qu'elle se fait sur vn pays qui est d'ordinaire de plus grande importance, & en plus forte consideration à l'Ennemy, estant le sien propre; que celuy dont on le veut esloigner: & qu'il n'y a point d'apparence qu'un sage Medecin, laisse souffrir le cœur ou quelque autre partie noble; pour vaquer à la cure d'une legere contusion, ou de quelque petite esgratigneure.

Disons encore auant que de retourner à nostre principal sujet, & pour mieux esclaircir ce point de la Diuersion, qui ne nous en

esloignera pas beaucoup, & qui ne luy est pas estranger; qu'une des plus memorables & des plus judicieuses que le Siecle passé ait veu; a esté celle que fit François Premier sur les Espagnols, quand le Connestable de Bourbon, le Marquis de Pescaire & les autres Chefs de l'armée Imperiale; vindrent assaillir la Prouence. Au lieu de s'aller opposer de droit fil à eux, & de les aller combattre dans son Royaume; Il transporta prontement son armée en Italie, & vint fondre sur l'Estat de Milan, comme sur l'Estat fauory de l'Empereur, & sur l'endroit de tout le reste de ses États, qui luy estoit le plus cher, apres l'Espagne. Aussi certes il ne se trompa point en sa pensée, & l'armée Imperiale ne manqua pas au premier bruit de cette Expedition, d'abandonner la Prouence, & de s'acheminer en Italie, avec une si estrange vitesse & une diligence si incroyable; qu'elle preuint nostre arriuée dans l'Estat de Milan, & eust moyen d'en assurer & d'en munir quelques places, qui furent le salut de tout le reste.

Que si les succez qui suivirent apres, nous furent aussi funestes, que le premier nous

M m' iij

auoit esté fauorable, & si le cours de cette guerre se vit terminé par la prison du Roy, & par la ruine de son armée; Il ne faut point attribuer cette disgrâce à la nature de cette diuersion, qui fust faite fort à propos, ny charger vne cause salutaire, de la production d'un effet malin qui est prouenu d'une autre cause. Il faut dis-je attribuer cette disgrâce au dessein de la fortune, qui auoit entrepris de mortifier François: à la mauuaise conduite de ce Prince: à la faute de ses Ministres, & sur tout à cette autre mal-heureuse & peu sage diuersion, qu'il se proposa de faire sur le Royaume de Naples, où il enuoya le Duc d'Albanie avec vne partie de son armée. Car outre le notable affoiblissement qu'il apportoit à ce qui luy restoit de forces, & le beau jeu qu'il faisoit aux Ennemis, pour le venir attaquer comme ils n'y manquerent pas, dans cette foiblesse; Il ne consideroit pas que le Royaume de Naples estant moins important à l'Empereur, & luy tenant moins à l'esprit que l'Estat de Milan; son armée n'abandonneroit pas la deffense de celuy-cy, pour acourir à celle de l'autre.

La quatrième Regle sera , que si c'est vne necessité inéuitable à vn Prince de faire venir dans son pays du secours estranger , & d'en fortifier son armée ; ce sera vn grand bonheur pour luy, si pour cela il n'a besoin que de forces mediocres , & qui soient inferieures aux siennes : à qui il puisse tousiours donner la Loy: de qui il ne puisse jamais receuoir de jalousie , & en vn mot qui ne le mettent pas luy-mesme en quelque espece de sujettion à la veüe de ses sujets , & n'abaissent cét esclat d'autorité avec laquelle il domine sur son peuple, & l'opinion de sa grandeur , par cette marque de dependance où il ne sçauroit éuiter d'entrer , receuant chez soy des armées fortes. Je ne parle pas des autres inconueniens qui peuuent naistre , de l'introduction des Estrangers dans vn Estat ; & particuliere-ment si l'ambition y vient avec la puissance : ou si la beauté du pays & la richesse des habitants ; y peuuent seruir d'amorce pour le conuoiter, à ceux qui estant nez sous vn Ciel rigoureux , & en des Contrées sauuages; ne font que trop tentez de changer de demeure , & de s'aquerir vne habitation plus heureuse.

C'est par cette voye que Philippe pere d'Alexandre, a autrefois attenté à la liberté de la Grece: que les Romains en ont fait la conquête, comme nous l'auons desia remarqué: que les Gots les Vandales & les autres peuples du Septentrion; ont ocupé les pays de ceux qui les appelloient à leur secours, & que six mille Turcs qui estoient passez d'Asie en Europe, pour seruir les Empereurs de Constantinople, charmez de la douceur & de la fecondité de cét agreable Climat, ayant inuité les autres de leur nation de s'y venir establis; ont esté la premiere cause de la reuolution de ce bel Empire.

C'est pourquoy les sages Princes, & les Republiques bien instruites en l'Art de gouverner; ont de tout temps éuité l'vsage d'un remede si dangereux, & l'employ d'un moyen si plein de jalousie; que l'introduction dans leur Estat d'une armée estrangere considerable. En la guerre que les anciens Romains eurent contre Pyrrhus, & apres que par le gain de quelques batailles, ce braue Prince eust esbranlé les fondemens de la Republique; Ils refuserent l'armée que les Carthaginois enuoyoient

enuoyoient à leurs secours sous la conduite de Mago, & se proposerent en vne telle extremité, de ne deuoir qu'à leur vertu & à leur puissance; le reſtabliſſement de leurs affaires, & le retour de leur fortune.

Après la deroute de la Giragdade, & le funeste ſucces de cette Iournée, qui oſta tout d'un coup aux Venitiens toute leur Terre-ferme; La Republique ne voulut point accepter l'offre que Bajazet ſecond luy enuoya faire de ſes forces, ny ſe ſeruir de ce moyen pour ſe deliurer du mal-heur qui la pourſuiuoit, qui eſtoit extreme, & pour ſortir du precipice où elle eſtoit tombée, qui eſtoit effroyable. Il eſt certain que ce mal-heur ne pouuoit eſtre plus grand, ny ce precipice plus profond. Elle auoit ſur les bras toute la Chreſtienté conjurée, & vne puiffante armée victorieuſe: Elle en auoit perdu vne, à laquelle il luy eſtoit impoſſible d'en ſubſtituer vne autre: Elle auoit veu entrer la terreur & le deſeſpoir dans toutes les villes de ſon Eſtat, avec le bruit de cette diſgrace: Elle-meſme s'eſtoit veu contrainte, par vn mouuement eſtrange de prudence, & par vn trait de politique qui

n'est pas commun ; de conseiller à ses sujets d'en ouvrir les portes aux Victorieux, & de faire sans offenser leur deuoir & sans deuenir felons ; ce qu'aussi bien la consternation où ils estoient tombez, & le courant de la victoire que les Ennemis auoient obtenuë ; les eust forcés de faire. Et toutefois nonobstant cela, elle ayma mieux chercher son salut & sa ressource en sa Sagesse, & en la seule voye qui luy restoit pour se releuer ; qui estoit de trauailler de toutes ses forces à la desunion des Confederez, & à la rupture de la Ligue ; que d'attirer dans son pays ces armées barbares, d'où elle ne les renuoyeroit pas quand elle voudroit, & d'exposer l'Italie au mesme sort, qu'auoient souffert les prouinces voylines de Constantinople, sous les Turcs dont nous auons parlé cy dessus.

En la naissance de l'Herésie dans ce Royaume, & aux premiers feux dont il brusla pour le fait de la Religion ; François Second refusa Philippe son Beau-frere, lequel craignant que la contagion de l'erreur & de la felonie qui regnoit parmy nous ; ne passat en Flandres & n'acheuat de corrompre ses sujets qui

en auoient desia receu quelque odeur; luy auoit enuoyé offrir toutes ses forces pour la combattre. Le Duc d'Alue encore apres auoir obtenu aux Pays-Bas quantité d'heureux succez contre les Rebelles de son Maistre; suplia Charles IX. de souffrir qu'il luy menat pour renger ceux de son Estat, quinze mille hommes de pied, & cinq mille cheuaux tous gens aguerris & acoustumez à vaincre. Mais le Roy par l'auis de son Conseil refusa encore cette offre, & ne voulut en l'acceptant, ou faire paroistre la foiblesse de son Regne: ou donner aux Religionnaires factieux plus de pretexte d'appeller à leurs secours les Estrangers, & à ceux-cy plus de couleur d'y venir: ou sur tout introduire dans le cœur de son Royaume, des gens qu'il n'en eust pas chassés quand il eust voulu: qui luy eussent demandé des places de seureté pour y entrer, & des dédommagemens immenses pour en sortir, & qui eussent pû avec le temps estre la matiere, d'une plus difficile & plus longue guerre; que celle qui l'exerçoit. De sorte que pour vne partie de ses sujets à qui il auoit pour lors à faire, & pour des Rebelles qu'il vouloit metre à la raison,

qui faisoient profession de fidelité; & qu'il pouuoit par consequent desarmer facilement avec l'indulgence, toutes les fois qu'il eust fait trop dangereux de les reprimer avec la force; Il auoit à se deffendre de ses sujets & de ses voylins, & à combattre des Ennemis, qui ayans quelque tiltre de justice, & faisans la guerre sans remors de conscience & sans scrupule; l'eussent faite plus opiniastre & moins susceptible d'acommodement.

De ce que nous venons de dire se formera vne cinquième Regle, qui l'esclaircira d'auantage; qui est que non seulement il faut éuiter s'il y a moyen d'introduire dans l'Estat des secours estrangers en Corps d'armée, & en tel nombre; qu'ils puissent faire la Loy ou donner de la jalousie, à celuy qui les employe: mais qu'il faut encore s'il est possible obseruer deux choses, l'vne de tascher de faire en sorte que ces troupes estrangeres, dependent d'auantage du Prince qui les appelle & qui les paye; que de celuy qui les mene & qui les commande, & que la relation qu'ils auront à celuy-là soit plus forte & absoluë; que celle qu'ils ont à celuy-cy. L'autre chose sera d'em-

pescher qu'elles ne subsistent en vn corps, & de les tenir tousiours séparées, s'il n'y a rien qui oblige de les metre ensemble, & de les rejoindre. C'est ainsi que les Venitiens essayèrent il y a desia quelque temps, de diuiser les troupes que le Sieur de Roquelaure leur auoit menées, & de luy en oster le commandement, & que les Hollandois trauaillerent à faire le mesme au Conte de Mansfelt, apres qu'il eust secouru Berg-Opson. Mais les vns & les autres rencontrèrent des Esprits fermes, qui resisterent à leur artifice, & contre lesquels s'emoussa ce trait hardy de Politique. Il est vray qu'on ne peut essayer de faire ce traitement qu'à des Chefs Auanturiers, qui ne dependent que de leur espée, & du Prince qui les employe, & qui ayant assemblé ces troupes par leur industrie & par leur credit, les maintiennnent aussi dans leur dependance, par leur autorité & par leur adresse.

Pour ce qui est d'empescher la jonction en mesmelieu, des troupes qui pourroient former des corps grands & considerables; c'est vn moyen indubitable d'en destourner le desordre, & de preuenir la licence qui a coustu-

me de naistre en ces Ames mercenaires , de l'esperance de l'impunité; comme l'esperance de l'impunité a coustume de s'engendrer de la multitude des coupables. De cette racine ont souuent pullulé la sedition & les mutineries, dans des armées anciennes & modernes. De là sortit autrefois l'audace des troupes Pretoriennees, qui entreprirent de tuer & d'essire des Empereurs, & qui abuserent si souuent de la pourpre Royale, en l'ostant & en la donnant à qui bon leur sembloit, par ce mouuement aueugle qui agite les courages, lesquels n'estant point reglez par la raison; n'ont ny respect ny crainte qui les retienne. Sejan le plus grand des Fauoris de tous les Siecles, & le premier exemple de grande faueur que le monde ait veu; en ayant le commandement, s'auisa de les loger toutes ensemble, pour se rendre plus redoutable par ce prompt & present secours qu'il auoit en main, des meilleurs soldats de l'Empire. Ceux-cy se mirent à accommoder leur logement, & à le fortifier de telle sorte; qu'ils en firent comme vne Citadelle pour dominer Rome, & comme vne bride pour tenir en sujction la Capitale ville.

du monde . Le grand nombre de Janissaires que le Grand Seigneur a coustume de tenir à Constantinople; est cause des tumultes qu'ils y excitent souuent, & des insolences qu'ils y commettent, qui vont quelquefois jusqu'à violer la seureté du Serrail: à contraindre le Prince de leur liurer ses Fauoris, pour en faire justice, comme ils parlent, & à ne pardonner pas à sa propre personne, jusqu'à attenter à sa vie mesme. Que si vn Prince doit éuiter avec tant de soin, & pour les consequences que nous auons representées, de laisser ensemble quantité de gens de guerre de ses sujets; combien plus doit-il estre curieux, de tenir tousiours separez autant qu'il le pourra faire commodement, ceux qui ne tiennent à luy que par la consideration de la paye qu'ils en reçoient, comme font les estrangers, & ne le respectent qu'autant qu'ils le craignent, & ne le craignent qu'à mesure qu'il a la puissance de les chastier.

La sixième Regle sera, qu'un petit Prince qui est attaqué par un plus grand, & qui a besoin d'un remede plus present & plus efficace que la diuersion, contre la violence qui l'aca-

ble; auant que de se refoudre à receuoir dans ses Estats quelque armée estrangere plus forte que la sienne, & de luy bailler des places pour sa seureté & pour sa retraite, si elle en demande; doit faire vne exacte & iuste comparaison, des maux où il s'expose en le faisant, & de ceux où il tombera necessairement s'il ne le fait pas: doit examiner froidement & sans passion, la nature & les circonstances de l'affaire qui l'exerce: les conditions de ses Ennemis & de ses Amis: la foy & l'ambition des vns & des autres: la bien-scance pour eux de ses Estats, ou de quelqu'une de ses places; Et apres cette comparaison & cét examen, des inconueniens qu'il y a à courir de tous costez; Il s'arrestera aux moins fascheux: Il s'acordera avec ses Ennemis s'ils sont traitables, ou se seruira du secours de ses Amis s'ils sont fideles, & louiera Dieu, comme d'une grace toute sienne, & d'une faueur extraordinaire, quand il aura bien choisi, & qu'il sera arriué au port sans faire naufrage.

La derniere Regle sera; qu'en general vn Prince doit tousiours auoir s'il le peut vne ou deux forteresses, pour la seureté de son pays,
&

& pour seruir d'arrest aux forces qui s'y pourroient déborder, & aux inuasions d'un Ennemy, qui sans cela s'en pourroit prouement rendre le maistre. C'est ainsi par exemple, que le Duc de Saxe a Dresde & Vittemberg, le Marquis de Brandebourg a Custrin & Spandau, le Lantgraue de Hesse a Cassel & Ziegenhaim; ausquelles places consiste sans doute le salut de leurs Estats, & sans lesquelles ils seroient la proye du premier Ocupant, comme sont ceux de quelques autres Princes d'Allemagne, qui n'ont point de fortereffes. Et que fust deuëhu je vous prie le Montferrat, sans la Citadelle de Cazal; & sans cette excellente piece, qui a fait eschoüer autant d'armées ennemies qui ont entrepris de l'attaquer; que sa situation, & la jalousie que sa force donne, en a conuié de l'entreprendre?

Il faut pourtant se donner bien de garde de faire icy vne faute specieuse, & de passer du defaut où quelques Princes demeurent, & peut-estre par impuissance, à l'extremité où d'autres tombent, par un certain dereglement de fantaisie qu'ils ont, de ne se trouuer jamais assez puissans ny assez considerables. Il faut

O o

qu'ayant de petits Estats, & vn Reuenu fort limité; Ils s'empeschent de les charger d'un trop grand nombre de places fortes, & de faire comme les Imtemperans, qui mangeans avec excez, ne peuuent digerer ce qu'ils mangent, & se remplissent d'une si grande quantité de mauuaises humeurs; que la chaleur naturelle ne sçauroit les resoudre, ny descharger le corps de cette abondante source d'incommoditez, & de cette seconde maniere de maladies. Il arriue de cette faim desreglée, & de cette intemperance d'esprit, de vouloir quantité de forteresses; que le bien du Prince ne pouuant fournir à les rendre toutes completes: ou à les pouruoir des choses necessaires pour leur conseruation: ou à y tenir des garnisons suffisantes & bien payées; Il en pert tousiours quelque vne par quelque vn de ces manquemens, & il arriue encore que l'Ennemy qui s'en est emparé, acheuant de la fortifier & de la munir; se fait quelquefois par le moyen de cette place vn si puissant establisement dans cet Estat; & y prend des racines si profondes; qu'on a bien de la peine à l'en chasser, que par quelque Traité de paix, & par

cette lassitude & impuissance que la guerre apporte à la longue, qu'il le contraignent à y entendre.

Il deriue encore de ce principe vn autre inconuenient, qui met tout l'Estat en proye, & coupe de tous costez les attaches & les nerfs qui en lient & conjoignent les parties; c'est que le nombre excessif des garnisons que le Prince est obligé d'entretenir, fait qu'il se trouue d'ordinaire foible quand il est obligé de metre en campagne, & que l'ennemy se rendant maistre sans resistance du plat pays, toutes les places se trouuent bloquées tout à la fois, & se perdent en foule & à l'enuy l'une de l'autre, pour ne voir pas d'armée capable de les secourir, & pour ne s'exposer au traitement qu'on fait à ceux qui s'opiniaistrent à vne deffense inutile, & qui ne pouuans auoir vn dessein raisonnable de se sauuer; n'en peuvent auoir que de perir vn peu plus tard, & de consumer ceux qui les attaquent.

Les Ducs de Sauoye sont tombez dans cét inconuenient d'auoir quantité de forteresses, & la pluspart accompagnées de quelqu'un des defauts que nous auons representez. L'as-

siete véritablement de leur pays, & particulièrement la situation du Piedmont, qui est enclaué au milieu des Estats de Princes si grands & si formidables, qu'un Roy de France & un Roy d'Espagne; peut auoir beaucoup contribué à ce desordre. Mais cela n'empêche pas qu'il ne leur en ait souuent mal pris, & estant impossible qu'ayans tant de foibles dans leur Estat, on n'en rencontre tousiours quelqu'un; Ils ne scauroient éuiter de recevoir tousiours par là, quelque blessure fort dangereuse. Monsieur de Rohan a aussi remarqué dans ses Memoires, qu'une des causes de la ruine du Party Huguenot, & un des principes de la dissolution de ce grand Corps; a esté le trop grand nombre de places fortes qu'il auoit; qui a fait que les voulant conseruer toutes, il les a toutes perduës, & que ne se trouuant pas assez fort pour disputer la campagne aux armes du Roy, comme il faisoit autrefois; Il a fallu que tout ait enfin succombé sous la vertu & sous la puissance de ce Prince. Il n'appartient qu'aux Flamens & aux Hollandois, d'auoir leur pays tout semé de forteresses, & toutes ces forteresses pour-

ueües de puissantes garnisons ; & de pouuoir en mesme temps metre sur pied de grandes armées ,

Mais quant aux premiers, qui ne sçait qu'en-core que leur pays soit vn des meilleurs du monde, & qu'on l'ait appellé les Indes de la Chrestienté à cause de ses richesses ; Il eust esté bien tost espuisé & mis à sec , sans l'influence de l'Espagne, & sans l'abondance des deux Indes, qui a esté employée à nourrir la guerre, & à soustenir les mouuemens dont ces peuples sont trauaillez depuis tant d'années ? Encore n'a-t'elle pû tousiours fournir aux besoins de cette guerre, & à la faim de ce Monstre insatiable : & l'on a veu plusieurs fois deperir les armées de ce pays-là à faute d'argent, & de cette disette s'esclorre des corps considerables de Mutins , comme autant de Republiques, qui subsistoient avec ordre & discipline, sans se rejoindre au gros d'où ils s'estoient destachez , jusqu'à ce qu'on leur eust fait raison de ce qui leur estoit deu, & qu'ils eussent cessé d'estre Creanciers du Prince, pour retourner estre ses sujets.

Pour ce qui est des Hollandois, qui ne sçait

aussi qu'ils n'ont pas tousiours esté en l'estat où l'on les voit aujourd'huy : qu'ils n'ont pas tousiours eü tant de places fortes , ny si bien munies qu'ils ont à present : qu'ils ont esté long-temps sur la deffensive , & avec vne armée si mediocre; qu'ils croyoient gagner tout ce qu'ils ne perdoient pas, & vaincre suffisamment quand ils n'estoient pas vaincus. C'estoit lors qu'ils ne subsistoient que sous le bon plaisir d'autrui , & par les subuentions & les secours qui leur venoient de France d'Angleterre & d'Allemagne : qu'ils n'auoient pas encore appris le chemin des Indes : qu'ils n'auoient pas despoüillé les flotes d'Espagne : qu'ils ne frequentoient les Mers du Leuant que sous la Baniere de France. Qu'en vn mot ils n'estoient pas les maistres du Commerce & de la Nauigation , comme ils le sont à cette heure. Mais depuis que la Mer les a enrichis de tous costez , & a fait venir l'abondance chez eux de toutes les parties du monde ; Ce n'est pas merueille si leurs places ny leurs armées ne manquent jamais de rien, & si estans grands œconomes & prenans bien leurs mesures en toutes choses , ce qui est le propre des

Republiques ; Ils ne demeurent jamais courts en leurs Expéditions militaires. Encore ne peut-on nier qu'ils ne sçauroient metre en campagne plusieurs années de suite sans se laisser, & sans tarir leur Espargne, & qu'ils n'ayent besoin de se reposer & de prendre haleine : ou de receuoir de la subuention de dehors ; comme ils en reçoient souuent de la France.

Ce que je viens de dire sont des Propositions generales , qui sont le plus souuent vrayes ; mais qui ne le sont pas tousiours , non plus que la plupart des autres Regles de la Politique. Ce sera à la prudence de ceux qui gouuernent de les ajuster à la nature des affaires qu'ils auront en main , & à l'estat des conjonctures où ils se trouueront ; & non pas d'ajuster les affaires & les conjonctures, à ces Propositions & à ces Regles.





DISCOVRS CINQVIEME.

Quelle sorte de Confederation & de Correspoudance se peut former entre vn Prince & les sujets d'un autre Prince qui luy sont Rebelles. Que le Roy a pu en conscience assister les Catalans.



PRES auoir discoursu de la maniere avec laquelle se doiuent donner & receuoir les secours entre les Souuerains; Il ne sera pas hors de propos d'examiner icy vne autre matiere qui est liée à celle-là, & de rechercher quelle sorte de Confederation & de Correspoudance se peut former, entre vn Prince & les sujets d'un autre Prince qui luy sont Rebelles. Sur quoy je dis premierement, que les souleuemens des peuples contre les Princes, & les agitations intestines des Estats, estant d'ordinaire des coups de la cholere du Ciel, ou pour mieux dire des effets de sa justice; ont

ce; ont aussi des succez fort differens selon qu'elle est differemment irritée. Quelquefois elles en changent tout à fait la face, & y introduisent de nouvelles formes; s'il est ainsi resolu au Conseil de la Prouidence. Et alors il n'y a ny industrie ny force humaine, qui en puisse destourner l'euenement: vne foible estincelle cause alors des embrasemens, que nul secours ne peut esteindre, & l'on voit la petite pierre de Daniel, renuerfer & metre en pieces des statuës enormes & prodigieuses. La defection des Suisses de la Maison d'Austrie d'Allemagne, & la defection des Flamens de celle d'Espagne, sont des preuues si claires de cette verité; qu'il n'en faut point rechercher d'autres.

Quelquefois ces desordres ne sont que de simples menaces de la part de Dieu, pour conduire par là à resipiscence les Princes & les peuples qui l'ont offensé. Et alors quelque disposition qu'il y ait au changement dans l'inclination des Causes secondes, & quelque roide que soit la pente par où elles y descendent, ou s'y precipitent; on en voit arrester la cheute comme par miracle: l'embaras des affaires

Pp

se demesse aussi inespéremment, que l'intrigue d'une Comédie, & les choses retournent à leur premier Estre, sans qu'on s'apperçoive presque du chemin, par où elles y sont reueuës. De cela la France a fait plusieurs experiences, sans parler des autres pays. Je me contenteray de rapporter icy la plus moderne de toutes, qui est la descente des Anglois en l'Isle de Rhé. Il n'y auoit point d'apparence au monde, selon laquelle ils ne deussent executer leur dessein, & se rendre maistres de cette Isle. Et toutefois si cela fust arriué; on eust bien eü de la peine à parer la tempesté qui nous menaçoit en suite, & à garentir de naufrage quelques Prouinces de ce Royaume. Les emboucheures des Riuieres de Loire & de Garonne, dont l'Armée nauale d'Angleterre se deuoit saisir, & par consequent toute sorte de communication fermée par là, à la Bretagne au Poitou & à la Guyenne. Vne armée considerable qui estoit presté à venir joindre les Anglois, & qui marchant depuis le Languedoc jusques à eux; se fust enflée de quantité de forces Huguenotes qui s'y fussent renduës; comme vn fleuve se grossit en roulant de plusieurs riuieres qui

s'y deschargent. Vn grand Capitaine à la teste pour mesnager tous les auantages qu'on eust gaignez, & tous ceux que la fortune eust offerts, & plusieurs autres circonstances; formoient vne Conjoncture tres-perilleuse.

Ce n'est pas qu'il faille douter que la vertu & la fortune du Roy: la prudence le courage & l'actiuité de ses Ministres, & les forces d'un puissant Royaume; n'eussent pû corriger ce que cette Conjoncture auoit de malin & de funeste. Mais il ne faut pas douter aussi qu'elles n'auroient pû estre mises à vne plus forte espreuue, & qu'il n'auroit pas fallu moins que cela; pour rompre les desseins de la Rebellion, & pour empescher qu'elle ne se fit vn establissement dans l'Estat, qui auroit peut-estre duré aussi long-temps que la Monarchie. Mais Dieu aymoît trop la France, pour permettre qu'elle vint à cette espreuue, & la gloire du Roy se deuoit former d'une plus belle matiere; que de la necessité de se deffendre. Aussi ceux qui faisoient l'inuasion de l'Isle de Rhé, furent frapez de l'esprit de confusion, dès le commencement de l'entreprise: vn fatal auenglement, qui ne les abandonna point depuis

les auoir saisis jusques à ce qu'ils fussent perdus; fit auorter vn des plus hardis & mieux entendus projets, qui eust esté fait il y auoit long-temps, & il luy arriua comme à ces formidables machines qu'on voit quelquefois à la guerre; que peu de chose rend percluses & inutiles d'abord qu'elles se remuent.

Je dis en second lieu, qu'il faut poser pour Fondement & pour Maxime; que les Sujets peuuent bien par eux-mesmes se souleuer contre leur Souuerain, & briser les liens de l'obeissance qu'ils luy doiuent, par la seule force de leurs passions. Mais que ce souleuement se puisse maintenir en chaleur, s'il n'est eschauffé de dehors, & que cette nouuelle liberté viue long-temps, si quelque Puissance estrangere ne la nourrit; C'est ce qui ne s'est gueres veu, & il y en a fort peu d'exemples. Au contraire il y en a vne infinité qui tesmoignent, que l'vn ne peut estre sans l'autre, & qu'une Reuolte est mal assise, qui n'a pour base que les forces d'un peuple rebelle. Je me feruiray encore pour confirmer cette verité, de l'exemple des Suisses & de celuy des Flamens; puis que j'en ay desia fait mention. Il

n'y a point de doute, qu'apres que les Habitans de ce pays sauuage & rude, à qui le village de Suits a donné le nom; eurent pris les armes contre les Princes d'Austriche, & que pour se deliurer de la longue violence, & de la tyrannie insupportable qu'ils exerçoient sur eux par leurs Gouverneurs; Ils se furent deliurez de la domination de si mauuais maistres; cette nouuelle Republique demeura long-temps tremblante & mal-assurée: qu'elle ne commença à s'affermir & à respirer vn air libre, que sous la protection de Charles VII. & qu'elle ne receut son entiere confiance, & son parfait establisement, que de l'Alliance qu'elle fit avec Louys XI. Apres que les Flamens eurent resolu de secoüer le joug d'Espagne, & de n'adorer plus vne Puissance mal-faisante bien qu'elle fust legitime; Ils n'eussent pas duré long-temps contre elle, si des Puissances voy fines ne se fussent interessées en leur conseruation, & s'il ne fust venu diuers secours pour les appuyer, d'Allemagne de France & d'Angleterre.

J'ajouste à ce que dessus, que quand du temps de nos Peres, l'Herésie & l'Ambition

*Le Prince
de Condé.
L'Admi-
ral de Chas-
sillon.*

s'allierent contre la puissance Souueraine, & que de ces deux principes de Rebellion se fust esclos vn Party, qui ne laissoit à nos Roys qu'une partie de leur autorité, & à ce Royaume qu'une partie de ses forces. Bien que ce Party fust animé du sang mesme de nos Roys, & guidé par une des plus hautes Intelligences de son Siecle. Bien qu'il eust tous les attraits que la nouveauté donne à l'erreur, & tout le zele qui acompagne les Partisans des Sectes naissantes. Bien que l'union parmy ses membres ne pût estre plus grande qu'elle estoit, ny le concert de leur volonté plus juste. Il est toutefois certain qu'avec tant d'avantages, & tant de rencontres fauorables; il ne se fust pas maintenu comme il a fait: Il n'eust pas jetté de si profondes racines dans l'Estat, ny estendu si loin ses branches; si des mains estrangères ne l'eussent soustenu, & s'il n'eust esté souuent rafraischy par l'or d'Angleterre, & des forces d'Allemagne. En effet la decadence de ce Party n'a commencé, & sa ruine n'est arriuée, que lors que ces sources qui luy enuoyent de puissantes subuentions, & que ces veines qui luy portoient le

sang & la vie; ne luy ont plus esté ouuertes: que lors que l'Allemagne est tombée en impuissance, & que l'Angleterre s'est. trouuée timide ou foible, & l'Espagne lente ou irresoluë pour le secourir. De là vient que les peuples qui meditent de ces changemens, & qui se portent à ces resolutions hardies & violentes; ne le font jamais si l'inspiration ne leur en vient de dehors, avec des promesses de grands secours: ou s'ils ne le font dans vne certaine constitution de temps & d'affaires; qui leur monstre quelque port où ils se pourront metre à l'abry, & se refugier en cas de tourmente.

En effet pour parler des choses presentes; & du souleuement des Catalans; Il n'y a point de doute qu'ils ne s'y fussent jamais portez, quelque sujet qu'ils en eussent, ce qui ne se doit pas examiner icy; qu'à la faueur de la Conjoncture où ils se trouuoient alors: Et bien que peut-estre il eust esté conceu il y auoit long-temps, & que toute la matiere dont il a esté formé eust esté ensemble; Si est-ce qu'il ne fust point sorty du sein de ses Causes, ny ne se fust monstre au jour; si les armes

s'allierent contre la puissance Souueraine, & que de ces deux principes de Rebellion se fust esclos vn Party, qui ne laissoit à nos Roys qu'une partie de leur autorité, & à ce Royaume qu'une partie de ses forces. Bien que ce

*Le Prince
de Condé.
L'Admi-
ral de Cha-
ssillon.*

Party fust animé du sang mesme de nos Roys, & guidé par vne des plus hautes Intelligences de son Siecle. Bien qu'il eust tous les attraits que la nouveauté donne à l'erreur, & tout le zele qui acompagne les Partisans des Sectes naissantes. Bien que l'union parmy ses membres ne pût estre plus grande qu'elle estoit, ny le concert de leur volonté plus juste. Il est toutefois certain qu'avec tant d'avantages, & tant de rencontres fauorables; il ne se fust pas maintenu comme il a fait: Il n'eust pas jetté de si profondes racines dans l'Estat, ny estendu si loin ses branches; si des mains estrangeres ne l'eussent soustenu, & s'il n'eust esté souuent rafraischy par l'or d'Angleterre, & des forces d'Allemagne. En effet la decadence de ce Party n'a commencé, & sa ruine n'est arriuée; que lors que ces sources qui luy enuoyoient de puissantes subuentions, & que ces veines qui luy portoiént le

sang & la vie; ne luy ont plus esté ouuertes : que lors que l'Allemagne est tombée en impuissance, & que l'Angleterre s'est trouuée timide ou foible, & l'Espagne lente ou irresoluë pour le secourir. De là vient que les peuples qui meditent de ces changemens, & qui se portent à ces resolutions hardies & violentes; ne le font jamais si l'inspiration ne leur en vient de dehors, avec des promesses de grands secours : ou s'ils ne le font dans vne certaine constitution de temps & d'affaires; qui leur monstre quelque port où ils se pourront metre à l'abry, & se refugier en cas de tourmente.

En effet pour parler des choses presentes, & du souleuement des Catalans; Il n'y a point de doute qu'ils ne s'y fussent jamais portez, quelque sujet qu'ils en eussent, ce qui ne se doit pas examiner icy; qu'à la faueur de la Conjoncture où ils se trouuoient alors : Et bien que peut-estre il eust esté conceu il y auoit long-temps, & que toute la matiere dont il a esté formé eust esté ensemble; Si est-ce qu'il ne fust point sorty du sein de ses Causes, ny ne se fust monstre au jour; si les armes

de France n'eussent esté triomphantes par tout comme elles estoient : Si celles d'Espagne n'eussent esté mal-heureuses en Flandres & en Italie , & si la Reputation des Imperiales, n'eust esté comme elle estoit alors, abaissée dans l'Allemagne.

Je dis en troisiéme lieu , qu'en matiere de ces mouuemens de peuples , on ne s'en peut rien promettre de certain , ny sçauoir quelle en sera la durée; jusqu'à ce qu'ils ayent traité avec le Prince dont ils implorent l'assistance, & qu'ils luy ayent donné des gages de leur foy dont il se contentera; & il n'y en a point de plus grand ny de plus seur , que quand ils se donnent eux-mesmes. Iusques alors il aura sujet de douter , que-la mine qu'il fera de les vouloir proteger; ne serue qu'à piquer de jalousie le Prince dont ils sont sujets, & à l'exciter dauantage à remuer toute sorte de ressorts, & metre en œuvre toutes les inuentions possibles; pour les ramener à leur deuoir , & pour faire dissoudre leur vnion , pendant qu'elle n'est pas encore bien ferme. Iusques alors dis-je il aura juste sujet de se desfier qu'ils ne s'accommodent , & que balancez entre l'ap-
prehension

prehension de la peine qui succederoit à la victoire, si elle demeueroit à l'autre Prince, & les offres non seulement d'impunité, mais encore de recompense, dont il taschera de les esbloüir; Ils n'embrassent l'ocasion de se remettre en grace: Et comme c'est le naturel des peuples de changer facilement de passion; qu'ils ne soient bien-aïses de retourner à vn estat plus tranquille, & à vne station plus douce; que ne leur paroistra celle où ils se trouueront dans la Reuolte. Cela estant il n'y auroit pas moins de mal à craindre pour luy de leur acommodement; qu'il y auroit à esperer de bien de leur broüillerie: leur penitence luy seroit aussi funeste; que leur peché luy pourroit estre fauorable, & ils seroient obligez de purger à ses despens la faute qu'ils auroient faite pour ne l'auoir pas acheuée, & de tourner contre luy les forces, qu'ils auroient preparées contre l'autre Prince.

Que s'ils se resoluent de ne faire pas à demy, ce qu'autrement il ne faudroit point commencer. S'ils resistent aux offres & aux menaces de leur premier Prince, & les prennent comme peut-estre elles le sont, pour des pie-

Qq

ges qu'il leur tend , & pour des embusches qu'il leur dresse. S'ils se persuadent , comme la chose pourra estre ainsi, qu'il ne croira pas estre obligé de leur tenir , ce qu'il ne leur aura pas promis de son bon gré; mais qu'ils luy auront arraché de force : ny d'observer la foy qu'il leur aura donnée; puis qu'il dira qu'il ne la violera que pour leur bien , & pour les empêcher d'estre vne autre fois Rebelles. Si en vn mot ils perséuerent à vouloir secoüer le joug , dont ils croient qu'ils seront enfin opprimez , & à implorer l'assistance & la protection d'un autre Prince ; il y a encore quelques considerations à faire, auant qu'il la leur acorde.

Il semble d'abord que ce soit vne chose de mauuaise odeur , & de dangereux exemple parmy les Princes; que l'un s'oblige par Traité de deffendre & de proteger , les sujets d'un autre qui luy sont Rebelles. Que ce soit bleffer vn droit où tous les Souuerains sont interessez dans la consequence , & donner cœur à la Rebellion , d'estre par tout moins retenüe & plus entreprenante qu'elle ne seroit ; si elle croyoit estre destituée d'appuy estranger &

de forces Auxiliaires. On ne peut certes nier generalement parlant, que cela ne soit ainsi, & il n'arriue pas souuent que les Princes se declarent hautement en faueur des sujets des autres Princes, ny qu'ils les secourent ouuertement & à Enseignes desployées. Quand ils le font; c'est d'ordinaire sans bruit & comme à la derrobée: c'est en cachant le bras apres auoir jetté la pierre: c'est ou en fournissant secretement de l'argent; comme Philippe I. en fournissoit aux Chefs de la Ligue, durant la vie de Henry III. ou en licentiant des trouppes & les faisant passer au party Rebelle; comme firent les Venitiens en la guerre des Barons de Naples contre Ferdinand le vieux & le Duc de Calabre son fils; ainsi qu'il a esté remarqué en vn autre endroit.

Il faut vser en cecy d'une distinction qui esclaireira cette doute, & conciliera ce qu'il y semble auoir d'opposition & de contrarieté. C'est que ny la Loy de la conscience ny celle de la prudence ciuile, ne peuuent souffrir que durant la paix & en temps calme, & pour le moins quand ce n'est pas par forme de reuanche, & pour diuertir vn orage qui se prepare;

Qq ij

on suscite du trouble dans les Estats de ses voyfins, ny qu'on y fasse souleuer les sujets contre leur Prince. Mais quand la guerre est allumée entre deux Princes, & qu'ils brulent d'une ardeur reciproque de se faire du pis qu'ils pourront, & de se destruire; La difficulté s'adoucit, & l'on a plus de raison de demander, si l'un de ces Princes peut en conscience fomentier la Reuolte des Sujets de l'autre. Ou bien pour dire la mesme chose en plusieurs façons, & pour reuestir la mesme idée & le mesme sens, d'expressions differentes; si vn Prince peut en conscience joindre ses forces, à celles des sujets Rebelles d'un autre Prince, & agir de compagnie & comme de conserue avec eux, contre vn Ennemy contre lequel il peut en conscience agir tout seul. Ou bien s'il luy est permis de diminuer le nombre de ses Ennemis, en donnant chaleur à des gens qui seront necessairement contre luy, s'ils ne sont pour luy, & deuiendront ses Ennemis, s'il ne les tient en humeur & en puissance de demeurer ses Amis. Ou bien si cela luy est moins permis; que de recueillir des Officiers & des Soldats du party contraire, qui se vien-

nent ranger au sien : que de se servir contre ses Ennemis des cheuaux du canon & des autres instrumens de guerre qu'il aura gaignez sur eux. Et en general s'il a le mesme droit d'vser des choses ennemies que la fortune luy presente elle-mesme, & luy fait tomber entre les mains sans aucune peine; que de celles qu'il obtient avec les armes: qu'il rend siennes avec la force, & qui sont des conquestes legitimes, & des fruits d'une juste guerre.

Or il est certain que ces choses vont d'un mesme pied, & avec une esgale force, & que si les vnes sont permises, comme l'on n'en doute point; il n'y a point de difficulté ny de scrupule pour les autres. Aupis aller il n'y a point de doute, que cette procedure ne soit plus douce ou moins odieuse, que de corrompre la fidelité d'un Gouverneur de place; ce qui se pratique tous les jours par les Princes les plus religieux, qui ne font point de conscience de tascher d'auoir de gré, ce qu'ils croient leur estre permis de prendre de force, & d'acheter avec un peu d'argent, ce qui cousteroit le sang & la vie à une infinité de leurs sujets. En cecy il y a une difference fort notable,

Qq iij

cóme il est aisé à voir. Car au premier cas dont il s'agit; on sollicite les Princes; on leur demande protection: on implore leur assistance contre la violence & la tyrannie. Ils ne font que donner de l'aliment à ce qui a desia vie: que profiter du mal s'il y en a que d'autres ont fait: qu'vser du benefice que la fortune leur offre. Au lieu qu'au second cas, ils recherchent, ils attirent, ils desbauchent, ils font en quelque façon naistre l'infidelité & la trahison. Et neantmoins ils croient que cela leur est permis en conscience, & ils le pratiquent sans scrupule, & en quelque façon avec gloire. Tant il est vray que la Iustice que les Souuerains exercent contre les autres Souuerains, a son estenduë longue & ses bornes reculées, au prix de celle qui se distribuë parmy les particuliers: que le droit de la guerre qui est vn droit de force & de ruse; se poursuit par des chemins qui sont fermez & avec des adresses, qui sont deffenduës, au droit des personnes priuées, & que le salut des Peuples est dans l'Ame des Princes, vne Loy dominante à toutes les autres Loix, & l'obligation qu'ils ont de le procurer, est superieure aux autres

obligations de leur Charge.

On peut voir par là que le Roy en receuant les Catalans, qui se sont jettez entre ses bras; n'a pas commis vn si grand crime, que des personnes ignorantes ou passionnées pour l'Espagne ont publié. Qu'en cela il n'a rien fait qui fust de mauuais exemple: qu'il n'ait pû faire legitiment: que la Loy de la conscience ne luy ait permis, & celle de la prudence ne luy ait conseillé. Et puis qu'au milieu de la paix que les Espagnols auoient avec nous; Ils n'ont point fait difficulté de fauoriser à decouuert & à la veuë de tout le monde, les Rebelles de son Royaume, & qu'ils traiterent auant la rupture, avec Monsieur de Rohan pendant qu'il estoit Chef de Part, & que pour profiter du mescontentement d'vn de nos Princes; Ils enuoyerent avec luy dans ce Royaume, de ces troupes Auanturieres qui ne viuent que *Les Polaq-
ques.* de proye, & dont la vaillance ne consiste pas à prendre les places qui resistent; mais à brul-
ler celles qui ne se peuuent deffendre: ny à gaigner des combats, mais à tuer apres la victoire. Puis que le droit de reuanche appartient aux Princes, & qu'il leur est loysible de

rendre ce qu'on leur preste; Le ne pense pas qu'aux termes où nous estions avec les Espagnols , & dans le feu de la guerre que nous auions avec eux; Le Roy deust faire conscience d'acorder aux Catalans la protection qu'ils luy demandoient , ny d'accepter ceux qui se donnoient à luy volontairement , puis qu'il luy eust esté permis de les prendre de force, & de s'en rendre maistre avec les armes.





DISCOVRS SIXIEME.

*A quoy se doit terminer la Protection, que donne
 un Prince aux Sujets Rebelles d'un autre
 Prince, & ce qu'il faut faire affin que cela
 se fasse & honnestement pour celuy-là,
 & seurement pour ceux-cy. Cela se
 confirme par la procedure que
 le Roy a observée en l'occu-
 rence de la Catalogne.*

NOUS auons apporté de la lumie-
 re au Discours precedent à vne
 doute qui concerne la conscience,
 sur le fait des Secours que les Prin-
 ces donnent aux Sujets Rebelles
 des autres Princes. Il nous faut maintenant
 traiter d'un inconuenient inéuitable en cet-
 te matiere, & de resolution plus difficile;
 Asçauoir à quoy se terminera cette prote-
 ction, & ce que fera en leur faueur le Prin-
 ce qui la donne, en cas que la paix se fasse;

Rr

comme il faut enfin qu'elle se fasse, & que le repos succede quelque jour à l'agitation, & le calme à la tourmente. Car il faut ou que les sujets Rebelles retournent en grace aupres de leur Prince naturel par le moyen du Traité qui se fera, & qu'ils se reconcilient avecque luy, par l'entremise de l'autre Prince: ou qu'ils demeurent affranchis de la domination du premier, & fassent vn Estat à part & vn Corps separé; comme ont fait les Suisses, & comme font les Hollandois: ou qu'ils soient à celuy qui les a tirez de Servitude, & au second Maître qu'ils se sont choisis, pour sortir du joug de l'autre: ou enfin qu'ils soient abandonnez & laissez en proye au ressentiment, & à la cholere de celuy-cy.

Quant au premier point, (on fera le mesme jugement, & encore en plus forts termes du second & du troisiéme;) ce sera vne chose bien difficile à digerer à vn Souuerain, qu'un autre emporte cet auantage sur luy; que d'estre le Mediateur & l'Arbitre entre luy & ses sujets, & il faut que la fortune le mete bien bas & luy fasse vne estrange violence, pour luy faire accepter vne si dure condition, & vn party si

peu honorable. Au Traité de Madrit & en celuy de Cambray, qui n'a esté à proprement parler, que le correctif & la modification de l'autre ; on voit à la verité quelques Particuliers qui auoient suiuy le party d'Espagne, reestablis en leurs honneurs & en leurs biens par ces Traitez. Mais qui ne sçait en quelle constitution se trouuoit alors la France ? Qui ne sçait que le Ciel n'auoit plus pour elle que des regards mal-faisans, & des influences funestes, & que la fortune versant ses faueurs sur l'Espagne ; auoit oublié d'estre muable ? On a veu quelle peine on eust il y a quelques années, d'obtenir grace pour le Marquis de saint George & pour quelques autres Montferrins, qui auoient seruy le Duc de Sauoye, aux guerres qu'il auoit eües depuis la mort du feu Roy, avec les Ducs de Mantoüe. On a veu la dureté que les Genois apportèrent & la resistance qu'ils firent, pour ne pardonner pas aux prisonniers, qu'ils acusoient d'auoir conjuré contre leur Patrie, & conspiré avec le Duc de Sauoye pour luy donner l'entrée dans Genes ; & qu'enfin dans l'accommodement que fit cette Republique avec le Duc ; Il fal-

Rr ij

lutiuent vn moyen & trouuer vn tempe-
rument, pour empescher ces criminels d'Estat
de perir, & affin qu'il ne parût pas que la Re-
publique leur eust donné grace. Et au Traité
de Veruins les Deputez du feu Roy se roidi-
rent, à n'y laisser comprendre aucun François,
qui eust eü de l'attachement avec l'Espagne,
& à ne donner rien à l'intercession des Estran-
gers, de ce qui n'appartenoit qu'à la clemence
du Prince.

C'est bien plus; ce ne fust pas sans vn grand
mal de cœur, & sans vne extreme repugnan-
ce, que les Espagnols souffrirent, que les Am-
bassadeurs de France d'Angleterre & de Venise
signassent non seulement comme Media-
teurs, mais encore comme Garens de la part
de leurs Maistres, le Traité de Vercel, qui ter-
mina la guerre née de l'inexecution de celuy
d'Ast. Et neantmoins il n'estoit pas icy que-
stion d'un different de Sujet à Souuerain, &
de ces querelles d'Estat qui ne se doiuent as-
soupir, que par la soumission ou par la peine
de l'un, & par l'indulgence ou par la iustice
de l'autre. Il s'agissoit seulement d'une poin-
tille d'honneur, & d'une préeminence d'au-

thorité que les Espagnols affectoient, de traiter par toute l'Italie en Maistres: d'y imposer des Loix aux Princes: d'y donner comme bon leur sembloit la forme aux affaires, & d'y estouffer les broüilleries qu'ils y laissoient allumer, par la seule signification de leur volonté, & par la simple demonstration de leurs armes. Il falchoit fort à ces Ambitieux; qu'un Duc de Sauoye eust l'audace de s'opposer à cette publique necessité, & de resister au dessein commun des petits Princes d'Italie. Ils ne pouuoient souffrir qu'il eust des pensées de Prince libre, ny qu'il voulut vser des priuileges de la Souueraineté, & faire l'independant auprès d'eux. Ce fust le sujet des querelles qu'ils luy firent, & qu'ils renouellerent deux ou trois fois. C'est ce qui obligea la France de ne permettre pas qu'il succombât en vne cause si juste. C'est ce qui luy fit entreprendre avec l'Angleterre & avec la Republique de Venise, la garentie de ce qui luy fust acordé par les Espagnols, & ce fust l'amertume & le tourment de ceux-cy; d'estre contrains pour éuiter pis, & pour n'attirer avec la guerre les Estrangers en Italie, suiuanz

la Maxime qu'ils tenoient alors, & qu'ils ne deuoient jamais abandonner; d'estre contrains dis-je apres auoir offert au Duc tous les auantages imaginables, & cherché tous les expediens possibles, pour destourner l'entremise des susdits Ambassadeurs; de consentir qu'ils se rendissent Pleiges de l'observation du Traité.

Que si nous auons veu arriuer quelque chose de semblable, entre le Roy & ses Sujets Rebelles, & si l'Angleterre s'est meslée de leurs affaires, & est interuenue au Traité de la paix qu'il leur donna deuant Montpellier; Il est à considerer que ç'a esté par cette Loy dure & inexorable, qui fait accepter le moindre mal pour éuiter le plus grand, & que dans la lassitude où la France se trouuoit alors, on jugeoit qu'il estoit plus expedient de luy procurer du repos avec vn peu de honte; que de la laisser dans les trauaux de la guerre avec vn peril extreme. Ou bien certes il faut auoier qu'il n'y auoit pas dans le Cabinet, assez de vigueur & de courage, assez de soin de l'honneur du Roy & de la dignité de la Couronne, & que les veines de ceux qui gouuernoient en ce temps-

là; n'estoient pas remplies de ces esprits genereux, & de ce sang magnanime, dont on voit de si grands effets en l'Administration presente. Aussi pour dire ce qui en est, ces paix forcées & ces reconciliations violentes; ne sont pas de longue durée. Il faut qu'elles rompent bien-tost de quelque costé que la faute vienne, & les sujets enflés & fiers de cette protection estrangere; ne peuuent se contenir dans les bornes qui leur sont marquées: ou le Prince ne peut souffrir des sujets qui ayent relation à vne autre Souueraineté que la sienne: sur qui il ne luy reste qu'une ombre d'autorité, & de qui il ne recoiue qu'une apparence d'affection, pendant qu'ils donnent le cœur & la realité à vn autre.

Ce qui a suiuy la paix de Montpellier, nous a fait toucher au doigt cette verité, & montré qu'estant faite par necessité ou par crainte, & arrachée plustot qu'acordée volontairement; l'interuention & la garentie des Anglois, n'auoient seruy qu'à donner plus de jalousie au Roy, contre ceux qui les auoient recherchées: qu'à luy donner plus de curiosité d'observer leurs deportemens, & plus d'in-

clination à les interpreter avec esprit de defiance. Qu'elles n'auoient seruy qu'à rendre ceux-cy plus tendres & plus sensibles, à la moindre esgratigneure qu'ils s'imaginoient qu'on fit à la paix: qu'à les faire plus hardis à en demander la reparation, & à la demander avec menaces: qu'à les faire proceder plus en esgaux qu'en sujets, en toute cette broüillerie. Bref de quelque cause que cela ait procedé, qu'il n'est pas icy le lieu de rechercher, & que j'ay designée ailleurs. Tout a enfin esclaté à une rupture ouuerte, comme nous auons remarqué au Discours precedent, & de toutes ces Causes assemblées s'est formé la plus perilleuse guerre, qui eust menacé l'Estat depuis la naissance de l'Herésie.

Toutefois Dieu changea en bien ces funestes apparences, & empescha que le mal n'acomploit son periode. Il l'arresta au fort de son mouuement & sur le milieu de sa course, & il auoit suscité au Roy des Ministres, non pas pour emousser sa vertu par leur froideur; mais pour luy donner de la pointé par leur courage: non pour biaiser deuant le desordre, & pour en retrencher quelques branches;

ches; mais pour l'attaquer de droit fil, & pour le couper à la racine: non pour amuser pour quelque temps la Rebellion avec des promesses qu'on sçauoit ne vouloir pas tenir, & peut-estre qu'on croyoit ne le deuoir pas; mais pour la metre en estat de ne plus capituler avec son Maistre, & pour luy oster deormais la volonté de remuer, en luy ostant la puissance de le faire. Cela n'a pas manqué d'arriuer. Les Anglois ont esté battus, & les Huguenots humiliez en cette guerre. La Rochelle est tombée par terre, & l'Espagne est deuenüe aueugle ou paresseuse, pour ne fournir pas les secours qu'elle auoit promis à vn Party mourant, & pour comble du bon-heur du Roy, & pour la perfection de sa gloire, faisant la paix avec l'Angleterre; Il luy a fait relascher ce point, que Monsieur de Rohan n'y fust pas compris, & l'a obligée d'abandonner celuy qui auoit refusé vn peu auparauant de traiter sans elle, & n'auoit voulu se preualoir d'vne si belle occasion que la guerre d'Italie, pour traiter seul avec auantage.

Nous auons veu quelque chose de pareil à cette derniere circonstance, en la paix que le

Si

*Au mois de
Juin 1629.*

feu Empereur fit vn peu auparauant à Lubec avec le Roy de Dannemarc. Les Princes dont celuy-cy auoit embrassé la protection ; n'y entrèrent que sous cette clause generale, qui estoit vne marque d'abandonnement, *Que l'Empereur n'en inquieteroit aucun contre la Iustice & l'Equité. Que cependant le Roy de Dannemarc ne s'immisceroit point dans les affaires de l'Empire, & ne s'en mesleroit non plus que l'Empereur se mesloit des affaires de son Royaume.* Il faut pourtant confesser pour parler au vray de cette occurrence, que les auantages que l'Empereur tira de ce Traité; ne furent pas le juste prix des succez qu'il auoit obtenus durant la guerre, & que la recolte des fruits ne respondit pas aux promesses qui la precederent. Qu'aux termes où estoit le Roy de Dannemarc, en se desistant de la protection de ses Alliez ; Il ne quittoit que ce qui n'estoit point en sa puissance, ou ne laschoit que ce qu'il ne pouuoit plus tenir : & que par cette renonciation qui ne produisoit rien de réel à l'Empereur, & n'estoit qu'une marque inutile de superiorité, que la victoire auoit renduë assez visible ; Il en receut de solides biens : Il recouura toutes ses pertes, & conjura la tempe-

ste qui estoit presté à fondre sur le reste de ses Estats. Mais l'ambition des Espagnols, & la violence qu'ils firent à l'Empereur, pour enuoyer ses armées en Italie contre vn Prince Catholique qui ne luy auoit rien fait; le contraignirent comme nous l'auons remarqué ailleurs, de faire la paix avec vn Prince Protestant qui l'auoit offensé: d'allentir sa bonne fortune dans sa plus grande chaleur, & de retenir le courant de la victoire qui eust pû passer les bords de la Mer Baltique, & arrester au dela cette fatale Puissance qui a depuis inondé l'Empire, & esbranlé jusqu'à ses fondemens la Maison d'Austriche.

Quoy que c'en soit reuenons en tousiours là; que c'est vne preuue de grande superioté en puissance, ou de grand ascendant en bonheur; de faire exclurre des Traitez de Paix, ou d'y faire comprendre ceux que l'on veut, & qu'il faut que ce soient de biens violens interets d'Estat, qui obligent les Princes de faire oublier dans les accomodemens leurs Amis, dont ils ont esprouué la fidelité durant la querelle. En cecy ils ne sçauoient garentir leur honneur; que par la necessité extrême de

leurs affaires: ny estre dispensez de l'obseruation de leur foy; que par cette suprême Loy qui doit regler leur conduite, qui est le salut de leurs Sujets. Surquoy ceux qui voudroient les excuser pourroient dire, que cela est vne condition qui entre tacitement en toutes leurs Alliances, & vne reserue qui n'a pas besoin d'y estre comprise, d'autant qu'elle n'en peut estre excluse, & qui touche esgalement l'esprit de tous les Confederez; dont il n'y en a point qui ne s'en serue en cas de besoin, & qui croye estre obligé de perir, s'il ne peut se sauuer qu'en compagnie. Il n'y en a point qui croye se rendre parjure, quand il ne tient pas ce qu'il ne croit point auoir promis: Et bien qu'aux Traitez des Confederations ils promettent tous, de ne s'acorder pas sans le sceu & sans le consentement les vns des autres; Tous l'entendent neantmoins avec cette exception, sinon en cas d'extreme malheur dont autrement ils ne pourroient se garentir, & d'une derniere ruine d'où ils ne sçauoient sortir que par cette bresche.

Que si cela n'estoit ainsi, ce seroit agir contre la fin des Confederations, où plusieurs se

rangent & s'unissent pour resister tous ensemble à vn mal, qui seroit superieur aux forces de chacun en particulier; mais où personne ne s'enfermeroit, s'il ne luy estoit loysible d'en sortir lors qu'il ne pourroit y estre dauantage en seureté, & qu'il se perdrait en y demeurant. Qu'elles sont comme des vaisseaux, où ceux qui les menent s'obligent bien de travailler autant qu'ils pourront pour les deffendre contre l'orage; mais où chacun se reserve la liberté de pourvoir à son salut en les abandonnant, quand ils sont prêts de couler à fons, & que le naufrage est inéuitable. Qu'en vn mot les Estats sont en quelque façon entre les mains des Princes, comme les biens des Mineurs. Ils en sont les Tuteurs, mais non pas en tout sens les Maistres, & dans toute l'humaine Societé il n'y a point de depost si sacré & si inuiolable, que celuy-là l'est pour eux. Les peuples de qui ils les tiennent les leur ont bien confiez; mais ne les leur ont pas donnez absolument & sans condition. Ils leur en ont bien commis la garde; mais ils ne leur ont pas laissé la faculté de les aliener, & de les metre au hazard de perir & changer de maistre.

*Tout ce cy
s'explique-
ra en la 3.
Partie au
Traité de
l'Obeissan-
ce, que les
sujets doi-
uent au
Prince.*

On peut ajouster encore à ce que dessus; qu'il vaut mieux que l'un des Confederez cedant au temps, & baissant les voiles deuant la fortune; s'acorde tout seul pour trauailler apres à rendre meilleure la condition des autres, & à leur seruir de ressource; que s'ils se perdoient tous ensemble par vne fausse generosité, & par vne delicateſſe d'humeur, qui se peut bien souffrir en la conduite des Particuliers; mais qui ne doit jamais interuenir en celle des Princes, ny trouuer place dans leurs affaires. Que hors de là il n'y a point de doute; que ce ne soit pour eux vne fort vilaine tache, que de manquer à l'obseruation des choses promises, & qu'il n'y a point de grandeur à aquerir ny d'establissement à faire, qui puisse reparer les bresches de la foy violée, & purger la honte d'estre parjure.

Ce sont des considerations qui me sont venues dans l'esprit, pour décharger autant qu'il se peut le procedé, dont les Princes sont quelquefois contrains d'vser en matiere de Traitez. Je ne pretens pas pourtant garentir mes pensées d'infalibilité, ny les faire passer pour decisions ou pour dogmes. Je laisse à

chacun la liberté d'en juger selon son sens: de les approuver ou condamner comme il luy semblera bon, & de les prendre pour des raisons qui establisent, & pour des adresses qui menent bien: ou seulement pour des couleurs qui pallient, & pour des chemins qui esgarrent. Quoy qu'il en puisse estre, il faut bien se donner de garde, d'employer souuent & de metre à tous les jours vne conduite si cha-
 toüilleuse, & il ne faut point s'en seruir, que comme on se sert des poisons en la Medecine; c'est à dire ne s'en seruir que rarement, que contre des maux extrêmes, & qu'avec des correctifs excellens & des preparations exquises. J'ajousté enfin qu'aux exemples que j'ay alleguez du Roy d'Angleterre & de celuy de Dannemarc; je n'entens pas blasmer au fons la conduite de ces Princes, ny me constituer Iuge souuerain d'une chose, dont je ne sçay pas toutes les raisons ocultes d'où elle est sortie, qu'il faut presumer auoir esté justes: ny tous les ressorts cachez qui luy ont donné le mouuement, qui la peuuent auoir rendu necessaire. Je n'ay seulement fait qu'en designer l'exterieur, & ce qui en a paru au de-

hors, qui a quelque apparence moins plausible, & que j'ay tasché de temperer & d'adoucir par les considerations que j'ay apportées.

Ne touchant donc point à ce qui est de la verité au fons, d'une telle procedure; ce qui en paroît au dehors semble estre vn argument de mauuaise foy ou de foiblesse, & l'une & l'autre de ces qualitez sont des precipices, dans l'un desquels vn Prince ne tombera jamais s'il est vertueux, & ne descendra gueres dans l'autre, s'il est assez preuoyant, & s'il scait bien prendre ses mesures. D'où je conclus affin que ce dernier n'arriue point, & que le Prince qui protege ne soit pas contraint de donner au monde, cette marque honteuse de son impuissance; ou qu'il doit d'abord rejeter les propositions des peuples qui implorent sa protection, & fermer la porte à leurs prieres: ou s'il les reçoit de le faire si puissamment, & avec des forces si considerables; qu'apparemment rien ne luy puisse oster la victoire, ny empescher par consequent que la paix ne se fasse sur le plan qu'il en dressera, & ne mette à couuert les Peuples du salut desquels

desquels il s'est chargé, & dont il a espousé la deffense.

En vn mot on ne sçauroit presenter vn plus digne exemple à suiure, ny vn plus excellent modele à imiter en pareilles occurrences; que la conduite que le Roy a obseruée en celle de la Catalogne. D'abord qu'elle a paru, & que cette grande ocasion d'auancer nos affaires s'est monstrée; Il a sagement jugé qu'il n'y auoit point d'apparence de la laisser eschaper: qu'il n'y auoit point lieu de repousser la bonne fortune qui nous venoit trouuer, sans que nous l'eussions appellée, ny de refuser vne faueur que le Ciel nous offroit si liberalement. Et comme on voit quelquefois qu'aux maladies difficiles, la Nature fait quelque effort, qui monstre aux Medecins le chemin qu'ils doiuent tenir pour sauuer les malades, & leur descouure l'endroit par où il faut attaquer le mal; Le Roy a aussi fort bien compris, que par cét accident impreueu, & par cette auenture inespérée du souleuement des Catalans; Dieu nous auoit voulu marquer vne des routes que nous deuions suiure, pour arriuer au port pour

T t

lequel nous nous estions mis en Mer, & paruenir à la fin pour laquelle nous auions entrepris la guerre ; qui est vne paix seure & honneste, vn repos ferme & durable entre les Princes Chrestiens.

Il a compris que si nous auions eü raison de l'entreprendre de ce costé-là , lors que toute l'Espagne nous estoit contraire, & que tous les peuples conspiroient avec le Prince, pour ruiner nos desseins, & rendre vain l'effort de nos armes ; les mesmes causes & les mesmes raisons subsistant, & la plus peuplée & plus belliqueuse Prouince de cette Nation, s'estant destachée des autres, & joignant ses forces aux nostres ; Il n'y auoit rien que vray-semblablement nous ne deüssions nous promettre du bon succéz de cette affaire. Il le deuoit certes croire ainsi, & croire encore si cette affaire s'embarquoit heureusement, & si la faueur du Ciel n'en abandonnoit pas le progres ; que la prosperité peut-estre ne se borneroit point aux frontieres de la Catalogne : que la bonne influence pourroit s'espandre plus loin ; Et comme vne aiguille frottée d'Aymant a la vertu d'en at-

tirer d'autres apres elle; que la subsistance des Catalans seroit l'atrait, qui seroit suiure d'autres Prouinces mescontentes.

Il sçauoit que les Portugais n'auoient jamais perdu la volonté de se souleuer, depuis qu'ils auoient esté soumis à la Couronne d'Espagne: qu'ils ne pouuoient porter de joug si impatientement que celuy-là: qu'ils souspiroient tousiours apres leur ancienne forme de Gouvernement, & que la hayne qu'ils auoient pour les Castillans estoit si naturelle & si forte; qu'il n'y auoit longueur de temps, ny moderation de conduite, qui en peut effacer l'impression, & en adoucir la violence. Il jugeoit que les Aragonois qui n'ont pas encore perdu le souuenir du traitement que leur fit Philippe II. qui sont encore outrez du depit de la cassation de leurs Priuileges, & de la perte de leur Liberté: qui n'ignorent pas que de droit ils nous appartiennent; regarderoient quels seroient les premiers succez des armes de leurs voyfins: quelle la forme de leur Establissement, & quels les signes & les presages de leur future durée; pour se joindre peut-estre à eux, s'ils le pouuoient faire avec seureté, & s'ils

T t ij

voyoient dans cette vnion assez de resis-
tance & de force, contre les entreprises de leur
commun Ennemy. Bref il jugeoit que si l'on
pouoit mener cette guerre en longueur, &
faire que le premier effort des troupes que le
Roy d'Espagne assembleroit, pour reduire ou
pour acabler les Catalans, auant qu'ils fussent
en estat de luy resister, manquat son coup; Il
faudroit necessairement qu'il rappellat des
Pays-Bas & d'Italie, vne partie des forces
qu'il y tenoit, pour les opposer à celles qu'il
auroit sur les bras au milieu, & comme dans
le centre de sa Monarchie. Et par consequent
que ses autres Estats demeurans descouverts
& foibles; Ils seroient exposez à des coups
fort dangereux & à de fort grandes blessures,
& que plusieurs autres bons effets & suites
heureuses, pourroient deriuier de cette cause
& de cette source. Et partant concluons que
la procedure du Roy sur l'occurrence de la
Catalogne; ne pouoit estre plus judicieuse;
ny le mouuement de ses armes de ce costé-là,
mieux entendu selon les Loix de la pruden-
ce ciuile.





DISCOVRS SEPTIEME.

Que c'est vn grand secret à la guerre, de sçauoir bien choisir l'Endroit où il faut faire les plus grands efforts. Que les Espagnols ne se trôpent guerres en ce choix, avec quelques autres observations sur leur conduite. Que celle du Roy a esté admirable à gouuerner la guerre qu'il fait en tant d'endroits de la Chrestienté.



Et que je viens de dire au Discours precedent, du procedé du Roy sur les mouuemens de la Catalogne; me porte à vne autre consideration qui n'est pas de petit poids, pour le maniment d'une guerre qui se fait en plusieurs endroits, & qui se diuise en plusieurs branches esloignées l'une de l'autre. C'est qu'en cecy le suprême degré de sagesse militaire, & comme l'Elixir precieus qu'il faut chercher pour rendre cette

T t iij

guerre heureuse; est qu'il faut tascher tousjours de bien connoistre l'endroit, qui en doit estre le siege principal, pour tourner aussi de ce costé-là le principal de ses forces: & estre tousiours prêt de changer de conduite, selon qu'il arriuera du changement en ce point, & que la guerre prendra vne autre constitution & vne autre forme. La Maison d'Austriche a de tout temps merueilleusement entendu & prattiqué ce secret, & si le feu Empereur s'en departit, lors qu'il enuoya faire la guerre au Duc de Mantoue, & qu'il negligea celle d'Allemagne, pour s'appliquer puissamment à celle qu'il portoit en Italie; c'est qu'il y fust forcé comme nous l'auons desia plusieurs fois remarqué, par l'ambition des Espagnols, qui preferans leurs Interets aux siens; l'obligerent de les aller poursuiure où ils estoient pour eux les plus forts, & d'aller trauailler pour leur grandeur en Italie, qui les touchoit alors dauantage, que celle de l'Empereur en Allemagne.

La cause pour laquelle les Espagnols particulierement possèdent en perfection ce secret, & ne se trompent gueres en la connois-

fance & au choix, de ce qu'il y a de plus important dans leurs affaires; est l'ordre de leur Gouuernement, & cette diuersité de Conseils particuliers dont il est composé, selon les diuers pays où leur domination se partage, & où leurs armes s'exercent. Par exemple pour ce qui regarde l'Italie; Il y a vn Conseil establi dans l'Italie mesme, qui se forme de la correspondance & de la relation qui s'observe entre les Ministres qu'ils y entretiennent, & sur tout entre le Gouuerneur de Milan, le Viceroy de Naples, l'Ambassadeur de Rome, & l'Ambassadeur de Venise. Aux affaires donc qui suruiennent en ce pays-là; les premieres deliberations s'en font par ces quatre Testes, qui constituent comme le premier Tribunal, où les difficultez sont agitées, & les resolutions prises, de ce qui est le plus expedient de faire en l'occurrence dont il s'agit. Le Resultat des auis de ce premier Conseil, avec vne Relation fidelle des Faits sur lesquels ils ont esté formez, & des raisons sur lesquelles ils se fondent; est enuoyé en Espagne à vn autre Conseil, composé de personnes intelligentes aux affaires d'Italie, & qui ayant passé par les

grands employs de ce pays-là; en ont aussi de grandes lumieres & des notions exactes. Icy se fait le second Examen de l'affaire, & les auis & les raisons du premier Conseil s'y mettent encore à l'espreuve, & s'y digerent tout de nouveau.

Et derechef comme dans l'œconomie du corps humain; les Esprits qui se forment au foye, se vont purifier au cœur, & s'y descharger de ce qu'ils ont de plus grossier, & de là se rendent au cerueau, où ils reçoivent le dernier degré de subtilité & de lumiere dont ils sont capables, & vne certaine trempe qui les rend les plus prochains organes du mouvement du corps & des operations des sens. De mesme les Resolutions de ce second Conseil sont portées à yn troisiéme, qui est le Conseil d'Estat du Prince, pour y subir vn troisiéme Examen, & pour voir si elles peuuent trouver place dans l'ordre de ses affaires, & si ce qui est conforme au bien de celles d'Italie, à quoy seulement ont visé les deux Conseils precedens; ne seroit pas contraire au bien general de leur Monarchie.

Ils n'agissent pas seulement dans cet ordre, &

dre , & avec ce raffinement de prudence aux affaires qui leur sont propres , & qui les touchent immédiatement ; Ils apportent encore les mesmes soins & la mesme contention d'esprit , à examiner celles de la Maison d'Autriche d'Allemagne, & à resoudre la forme & le mouuement qu'on leur doit donner ; avec cette difference neantmoins, qu'encore qu'ils adressent comme à leur centre les particulieres qu'elle a, au bien general de cette Maison ; Ils font que ce bien general demeure toujours inferieur & subalterne, aux Interets particuliers de la leur , & au grand dessein qu'ils ont eü de l'agrandir sans mesure , & de l'esleuer à la Monarchie Chrestienne. J'ay desia apporté quelque exemple pour la preuue de cette verité, & j'en pourrois apporter d'autres sans nombre pour la confirmer s'il en estoit besoin, & si elle n'estoit si euidente & si connuë ; qu'il sembleroit que je voulusse esclairer le Soleil, & rendre la lumiere visible. De sorte qu'il ne faut point s'estonner, si le Conseil de Vienne n'est que le Ministre des Resolutions, dont celuy de Madrit est l'Auteur, & si l'on ne voit rien sortir de celuy-là,

V u

qui ne porte la marque de l'autre , & qui n'ait reçu l'impression de ses Maximes & de sa conduite.

Et d'autant que la connoissance des Faits & du veritable estat des choses; est la base des Raisonnemens, & que ceux-cy n'ont point de subsistance, si l'autre est mal-assurée, & ressemblent aux couleurs de l'Arc-en-ciel, qui quelques brillantes & agreables qu'elles soient, ne laissent pas d'estre fausses, * pour n'auoir pas des corps où elles soient infuses & attachées; Ils pouruoyent à cét inconuenient par deux moyens. L'vn est par vn pouuoir sans limite qu'ils donnent à leurs Ministres, de ne rien espargner, & de ne considerer aucune sorte de despenſe, pour estre bien informez de ce qui se passe, & pour penetrer ce qui se delibere & se resout, chez leurs Ennemis & chez leurs Amis: & cette despenſe leur est toute alloüée sans examen & sans restriction, & sur le simple memoire qu'ils en presentent. Leur Raïson est d'autant qu'encore que cela soit vne matiere à fourberie, & vn champ où l'auarice peut faire des moissons injustes; Ils ayment mieux courir ce hazard qui est peu con-

siderable , pour le bien qui leur en peut reuenir qui l'est beaucoup, & ils croient qu'une despenſe bien employée de ce coſté-là, & vn bon auiſ donné à propos ; les recompensent avec vſure de cent despenſes perduës, & de cent auiſ inutiles.

L'autre moyen eſt, que jamais gens au monde n'ont eſté plus ſoigneux qu'eux, d'entretenir leurs correſpondances, ny d'en entretenir vn plus grand nombre. Ils n'en affectent pas ſeulement de ſpecieuſes, & avec des perſonnes illuſtres & intelligentes ; Ils en forment encore avec tous ceux qui en veulent lier avec eux , & l'experience leur a appris qu'un homme de baſſe condition & de peu de ſens ; leur deſcouurira quelquefois quelque verité importante, qui aura eſchapé aux ſoins & à la ſubtilité d'un grand perſonniage. De forte que c'eſt vne choſe merueilleuſe & je m'en ſuis quelquefois eſtonné ; de voir le grand nombre de Copiſtes qui trauaillent aux Chancelleries de leurs Miniſtres, & la grande quantité de Letres que leurs Ambaſſadeurs par exemple, eſcriuent par toute ſorte d'ordinaires. Apres cela il n'eſt pas croyable, com-

V u ij

bien ils sont diligens à informer le Prince, & ses autres Ministres soit de guerre soit de paix, de ce qu'il est necessaire qu'ils sçachent : combien tant les mauuaises nouuelles que les bonnes, leur sont enuoyées proutement ; & sur tout les mauuaises, comme celles qu'il importe principalement qu'on sçache de bonne heure & sans déguisement , pour remedier à temps & avec les prouisions necessaires , au mal qu'elles annoncent ou qu'elles presagent. Bref comme les Courriers qui les portent , sont pour le moins aussi largement payez , & aussi ciuilement traitez ; que ceux qui portent les bonnes.

Après donc qu'ils ont compris au vray l'estat present de leurs affaires , & reconnu l'endroit où il leur importe dauantage d'agir ; Ils tournent de ce costé-là comme nous auons dit, le principal de leurs forces, pour agir plus seurement , & pour rompre & inonder par vn excez de puissance , tout ce qui se pourroit metre au deuant d'eux , & leur faire obstacle. Ils se resoluent de souffrir de petites pertes & de legers defauantages en vn endroit , pour obtenir de grands succez en vn autre , & ils

ſçauent bien que les branches ne peuuent demeurer debout , apres que le tronc eſt renuerſé , & qu'apres que les parties nobles ſont bleſſées , les autres meurent d'elles-mêmes. C'eſt par ce principe que nous auons quelquefois veu nos frontieres couuertes de nuées eſpouuantables de leurs gens de guerre , où elles ſe ſont pourtant diſſipées , & que la baſſe Allemagne a veu former contre elle de grands & formidables Corps d'Armées Imperialles, qui ſ'y ſont encore eſchoüez.

Puis que nous ſommes en train de parler de la conduite, que les Princes de la Maiſon d'Autriche ont couſtume d'oſeruer particuliere-ment à la guerre ; Il n'y aura point d'inconuenient de remarquer encore icy, que quand ils meditent quelque grand deſſein , & qu'ils ſe preparent à quelque haute entrepriſe ; Ils le font le plus ſourdement & à moins de bruit qu'il leur eſt poſſible. Ils apportent autant de ſoin afin qu'elle ne ſ'éuente pas, que ſ'ils trauiilloient à vne mine. Ils font ſemblant de ſe reposer & de dormir, lors qu'ils trauiillent d'auantage & qu'ils ſont les plus eſueillez. Ils ne ſont pas faſchez qu'on les accuſe d'impuiffan-

V u iij

ce, & ils sement eux-mêmes des raisons apparentes, & fournissent des couleurs specieuses, pour rendre cette acufation vray-semblable. Il n'est pas mal-aisé de deuiner quelle est la fin de cét artifice, qui est d'endormir & de surprendre, & l'Histoire & l'experience nous apprennent assez; quels incroyables auantages ils en tirent quelquefois, & quels grands & prodigieux coups ils font, à l'ombre de cét artifice, & à la faueur de ce silence. Le malheur de la bataille de Saint Quentin eust son origine, en ces secrets & ocultes preparatifs que fit Philippe II. des grandes forces avec lesquelles il entra en Picardie, & en cette fatale credulité dont nous nous laissames fraper de sa foiblesse, & du peu de moyen qu'il auoit d'armer puissamment; jusqu'à ce que nous l'aprismes à nos despens, & que nous fusmes battus de la foudre, sans auoir veu preceder l'esclair. Nous ne sçaurions auoir perdu la memoire d'une chose si fraische & si sensible, que fust la surprise qui faillit d'opprimer Bannier dans le haut Palatinat, & l'orage qui esclata sur luy si inesperement; que peu s'en fallut, que toute la puissance des Suedois en Al-

lemagne, ne fust esteinte de ce coup avec la liberté Germanique.

L'ajouste enfin que quand le Ciel seconde leur preuoyance, & se rend propice à leurs desseins; il n'y a point de gens au monde communement parlant, qui entendent mieux à bien vser de ses faueurs, & à se seruir de leurs auantages. Au lieu que d'autres se relaschent dans les bons succez, & que la prospérité semble amollir & fondre leur vigueur: Au lieu qu'ils s'arrestent d'eux-mesmes comme pour reprendre haleine, au plus beau de leur chemin, & qu'en laissant aller la bonne fortune deuant eux, sans auoir le courage de la suivre; Ils la perdent quelquefois de veüe. Ceux-cy au contraire ne se reposent jamais moins, qu'apres qu'ils ont trauaillé avec succez, & ne sont jamais plus ardens à combattre, qu'apres le gain d'une bataille, ny plus desirieux de rentrer dans la carriere, qu'apres auoir esté couronnez. Ils sçauent poursuiure vne victoire jusqu'au bout, & ils ne perdent pas vne des suites heureuses qu'elle peut produire, ny vn seul des fruits qui s'en peuuent humainement recueillir. Celle de Nortlin-

ghen sans monter plus haut, en est vne preuve euidente, & si la France ne fust interuenue pour en retenir le courant & en retarder la rapidité; Ils n'eussent eü apres cela rien d'auantage à faire en Allemagne, qu'à prendre possession de ce qui se fust rendu, ou qu'à marcher & à se presenter pour vaincre par tout.

De sorte que si l'on considere la puissance esmerueillable de la Maison d'Austriche; qui se maintient & demeure debout apres auoir receu tant de secousses, apres auoir perdu tant de batailles, apres le souleuement des Prouinces & des Royaumes: Et d'autre costé si l'on regarde l'ordre si constant & si bien entendu de sa Politique, & les vertus qu'elle pratique dans le Cabinet, & qu'elle exerce à la Campagne; Il faudra auoüer que pour auoir esté empeschée de venir à bout de ses desseins, il a esté necessaire que le Ciel ait particulièrement entrepris de les trauerser, & qu'il ait suscitè pour luy opposer, des forces esgales ou superieures aux siennes: vne Politique aussi sage pour le moins & incomparablement plus juste, & des vertus aussi fortes & aussi agissantes;

agissantes; mais plus veritables & plus effectives. C'est pourquoy l'obligation qu'a toute la Republique Chrestienne au Roy, ne se pourra jamais assez comprendre, & quelque reconnoissante qu'elle soit; elle ne le sera jamais assez enuers luy, pour auoir raffermy sa Liberté si violemment esbranlée: pour auoir mis vn arrest à l'ambition d'une Maison si puissante: pour auoir fait des efforts pour ce sujet, qu'on pourroit dire auoir esté trop grands, s'ils n'auoient esté necessaires. Cependant le Lecteur ne trouuera point mauuais, que j'aye fait icy cette legere peinture de la conduite de cette Maison, & particulierement de la branche d'Espagne, qui est comme le Mobile & l'Ame de la conduite de l'autre. Si elle ne peut estre entierement imitée aux autres Estats & des autres Princes, pour les raisons qu'il n'est pas icy le lieu d'allerguer; Elle le pourra estre en partie, & avec quelque proportion: Et ce ne sera pas tousiours auoir peu fait, que de l'auoir fait connoistre, afin qu'on puisse & qu'on sçache s'en deffendre.

Voyons maintenant si en ces derniers

Xx

temps, la France a bien compris ce mystere politique dont nous auons parlé au commencement de ce Discours; & si dans l'exécution de ses desseins, elle a obserué l'ordre que nous auons dit qu'il falloit garder, & sceu changer de conduite selon le changement des conjonctures. Pour s'asseurer de cecy il faut supposer, que l'intention du Roy n'ayant jamais esté que de s'opposer à l'agrandissement injuste & demesuré de la Maison d'Austriche, & d'empescher les vsurpations qu'elle projettoit de faire de tous costez; La Loy des contraires vouloit qu'il acourut principalement aux lieux, où elle vouloit faire ses principaux establissemens, & qu'il allat rompre son trauail, où deuoit estre le fort de la besoigne, & le gros de l'œuure qu'elle meditoit. Or on ne peut douter que presque dans tout le cours de cette longue & funeste guerre qui deuore la Chrestienté, jusqu'à la leuée du siege de Cazal, & au souleuement des Catalans qui est venu en suite; ces lieux n'ayent esté l'Allemagne & l'Italie.

Quant au premier, il est certain que c'est vne resolution constante & vn dessein immor-

tel, dans l'Ame de ces Princes qui recueillent l'Empire comme par Succession; de faire aussi de l'Allemagne leur Patrimoine. Personne n'ignore ce que fit & ce que ne fit pas Charles le Quint, pour paruenir à ce but, & tout le monde sçait encore, & nous le deduirons amplement au Traité de la Monarchie, comme ce vaste & belliqueux pays dont il s'estoit promis la conqueste luy eschapa, & rompit les filets dont il le tenoit enuelopé. Nous auons veu à quoy il a tenu que le feu Empereur n'ait acheué vn ouurage qu'il auoit plus qu'à demy fait. Sans la paix de Lubec dont nous auons parlé aux Discours precedens, & sans la degradation du Valssthein à la Diete de Ratibonne, dont nous parlerons en la Troisième Partie; apparemment rien ne pouuoit l'empescher de luy donner la dernière main, & l'on peut dire de luy, qu'apres auoir esté à l'entrée du port; Il a esté rejetté au large, & réduit au point de faire naufrage. Nous auons veu les esperances que la fortune a fait luire, dans l'Ame du Roy de Hongrie, d'une conqueste si désirée, & combien le succez en estoit auancé, si en la Retraite de Torgau

Xx ij

Banier ne se fust demeslé comme par miracle, de tant d'armées qui l'envelopperent: comme il se fust peut-estre acheué, sans cét esmerueillable & inoiüy passage du Rhin fait par Monsieur de Longueuille, & sans le renfort & le courage que les armes du Roy commandées par ce braue Prince; donnerent à ceux qui combatoient pour la Liberté Germanique, & à ceux qui n'osoient auoir que de bonnes intentions pour cette mesme Liberté. Nous auons remarqué cy dessus l'extrême peril que l'armée Suedoise qui auoit esté jusques alors la base du bon Party d'Allemagne; courut au haut Palatinat, & combien il s'en fallut que cette base ne fust renuersée, & que le Party Imperial ne prit vn ascendant, qu'il auroit esté impossible de luy faire perdre.

Outre cela comme la fuite du mal, est la premiere & plus forte inclination de la nature, & comme les pointes de la douleur & l'image de la mort, remuent plus viuement l'Ame; que les atraits de la Volupté & l'idée d'une vie heureuse. Aussi dans l'ordre des passions que le Prince doit auoir pour l'Estat; L'amour de la conseruation doit tousiours precéder le

desir de la conqueste, & auant que de songer à entreprendre & à faire progrez au dehors; Il doit pouruoir à la seureté du dedans, & retrencher les auenuës par où le desordre y pourroit entrer. Et partant puis qu'il n'y a que l'Allemagne qui nous puisse faire de mal considerable: puis que c'est elle qui a tousiours enuoyé les armées qui ont inondé la France, & qu'il est certain que si les armes Imperialles y demeueroient victorieuses; elles ne demeureroient pas enfermées dans les confins de ce pays-là, & qu'apres s'estre enflées du débris des Confederées, & de quantité d'autres forces qui y courroient comme à l'enuy; elles se deschargeroient sur le nostre: Elles pourroient descendre en Italie, & y faire les mesmes rauages & apporter la mesme desolation; que lors qu'elles y descendirent sous Colalte. Ou enfin elles pourroient y fortifier de telle sorte les Espagnols, & espouuanter les Italiens; que nous aurions bien de la peine d'empescher ceux-là d'acheuer les desseins qu'ils ont, & qu'ils n'ont pas peu auancez, & de diuertir ceux-cy d'accepter les chaisnes de la seruitude où de la dependance qu'on

leur prepare depuis tant d'années.

Puis que dis-je tout cela est possible, je conclus que la chaleur que le Roy a donnée aux armes du feu Roy de Suede, & qu'il a continuée au party qu'il a laissé dans l'Allemagne: que les efforts qu'il a fait pour le releuer, apres qu'il fust presque abatu deuant Nortlinghen: que les subuentions d'argent & d'hommes qu'il a enuoyées à diuerfes fois en ce pays-là: que les Traitez qu'il a fait pour en soustenir les affaires, avec le feu Duc de Veimar & les troupes qu'il a commandées, & avec cette

*Madame
la Land-
grauce de
Hesse.*

genereuse Princeesse, dont le bon sens & la constance seruiront d'exemple aux Princes les plus magnanimes, & seront la honte des lasches; Je conclus dis-je que quoy que cela ait cousté & qu'il couste à cette Couronne; qu'il n'y a rien qui n'ait esté projectté & fait selon les Regles de la bonne Politique, & particulièrement selon cette Loy de prudence, qui veut qu'on coure au deuant du mal qu'on craint pour le diuertir, & qu'on n'attende pas qu'il fasse son impression, pour le repousser quand il l'aura faite. Je passe outre & dis d'auantage, que non seulement le Roy a deu en-

uoyer en Allemagne, des forces qui ayent esté capables avec les Confederées, de contrepeser & tenir en eschec les Imperialles, comme elles ont fait jusques icy. Mais pource qu'en cette posture la moindre faueur de la fortune; les pourroit oster d'eschec, & que dans vn juste contrepoids il ne luy seroit rien de plus aisé, que de faire tomber la balance du costé des autres; On ne sçauroit trop louer ce Prince de la resolution qu'il a prise, d'y en establir de si puissantes; qu'elles metent infailliblement les autres sur la deffensiue: qu'elles leur donnent continuellement la Loy, & preparent seurement le chemin à la liberté Germanique, & à la Paix generale de la Republique Chrestienne.

Quant à l'Italie on ne peut douter, que ce n'ait esté vn dessein fixe & immuable dans l'esprit des Espagnols; de la metre sous le joug, & de despoüiller ses Princes de tous les Estats qu'ils y possèdent: ou de les reduire à vne dependance qui ne soit differente de la sujction, que par la vanité des Tiltres & par l'exterieur des formes. Il ne faut pas rafraischir icy la memoire des attentats de Charles le Quint,

contre la liberté de ce beau pays, des violences qu'il luy a faites, & des embusches qu'il luy a dressées; cela se rapportera au long au Traité de la Monarchie. Il ne faut non plus représenter tout ce que les Espagnols ont entrepris depuis la mort du feu Roy, tantost contre le Duc de Sauoye, tantost contre les Venitiens & du costé de la Valteline, tantost contre le Duc de Mantoüe. C'est à dire toutes les atteintes qu'ils luy ont données, & tous les endroits par où ils ont tasché d'entamer & d'affoiblir, ce qu'il y restoit d'entier & de vigoureux; Nous le verons amplement en la Troisième Partie, en l'Apologie du Traité de Monçon, & en celle de l'Aquisition de Pignerol. Il faut seulement qu'on se souuienne de l'estat pitoyable où estoit tombé ce pays, & des augures qui parurent de sa prochaine ruine; lors qu'après que les Espagnols eurent rangé le Duc de Parme: suborné les Grisons: vsurpé Sabionete & la Mirande: enuahy presque tout le Piedmont & tout le Montferrat, & assiégué Casal; toute l'esperance de son salut se trouua reduite, au courage heroïque d'un Prince, qui voulut perir ou sauuer cette place, &

ce, & au bon-heur des armes du Roy, qui n'est pas sujet à l'ordre des choses, & qui rend quelquefois facile ce qui apparemment est impossible.

Il ne parle pas de nos Expéditions de Flandres, où il semble que le Roy ait conuerty pendant quelques années le principal effort de ses armes. Ce n'est pas à moy à entreprendre de reueler ce mystere, & de leuer le voile d'une chose que la prudence de ceux qui gouvernent veut estre cachée. Il y a aux matieres d'Estat des endroits aussi dangereux pour les particuliers qui en veulent parler; que les bancs & les escueils le sont pour ceux qui nauigent, & pour eux les motifs de la conduite des sages Princes en plusieurs choses; doiuent ressembler aux racines des arbres qui sont couuertes & inuisibles; pendant qu'on voit le tronc & les branches: ou aux vertus des Cieux dont nous ne connoissons pas la nature, bien que nous en sentions les effets, & en admirions la puissance. Aussi il ne faut point douter que le Roy n'ait eü de grandes raisons, de s'appliquer comme il a fait à la guerre des Pays-Bas; bien que ces raisons ne soient pas

Yy

connuës de tout le monde : & que les visées qu'il a eües de ce costé-là , n'ayent esté fort justes , quoy qu'elles passent la portée de nostre veüe.

Outre ce qui en paroist & qui tombe sous les sens d'un chacun ; qui estoit de deliurer nos frontieres de la jalousie qu'elles receuoient, de quelques vnes des places ennemies, & principalement de couvrir & remparer davantage Paris, qui est comme le cœur & la plus noble partie de l'Estat ; Il y a peut-estre encore esté obligé par d'autres Interets, qui ne sont pas tout à fait les siens, & pour s'ajuster aux Interets de quelques vns de ses voisins par cette prudente Maxime de Politique, qui veut que les Grands prennent quelquefois la Loy de ceux qui ne le sont pas tant, & en suivent les mouuemens quand ils ont à faire d'eux, & qu'il y auroit danger qu'une entreprise ne se desconcertat, si quelqu'un des Reforts qui la doiuent faire joüir, venoit à manquer & à se destacher des autres. Peut-estre que dans les suites des grands & profonds desseins qu'auoit le Roy sur ce pays-là ; Il preuoit que s'ils estoient tous aussi heureux,

qu'ils estoient sagement projettez; il y pourroit arriuer quelque reuolution, qui gueriroit pour jamais son Royaume, des alarmes & des irruptions qui luy viennent quelquefois de ce voysinage. Et certes si l'attaque de Calo & le siege de Saint Omer auoient reüssi, comme apparemment ils le deuoient faire: ou si vn coup inesperé qui esclata sur la frontiere de Champagne, n'eust destourné les fauorables progresz que promettoit la prise d'Aire; On eust peut-estre veu l'effet de la preuoyance de ce Prince. Peut-estre encore qu'il vouloit pour vne bonne fois fermer les portes par où les forces d'Allemagne entrant en Flandres, se peuuent venir desborder & faire du rauage en France.

Mais quand les choses ont changé de face, & que le souleuement des Catalans a formé vne autre con joncture; il a aussi changé de conduite, & jugé comme nous l'auons desia remarqué; qu'apres les affaires d'Allemagne il n'y en auoit point, où il deût vaquer avec plus d'ardeur, & faire vne plus grande montre de ses forces; que celles de ce pays-là. Il a preueu que les fruits qui se recueilliroient de

Y y ij

cette Expedition ne feroient pas mediocres, & que les auantages qui en reussiroient à la Cause commune, ne feroient pas de legeres dispositions à la paix, pour laquelle on fait la guerre. Car outre que les Espagnols ne sçau-roient long-temps agir puissamment, en Espagne en Flandres & en Italie, & que la nourriture qu'ils donneroient à leur pays originel, consumerait l'aliment des autres; Si l'on voyoit le Roy de Hongrie embarassé dans l'Allemagne, & celuy d'Espagne attaqué dans le cœur de ses Estats, & empesché à en deffendre la vie; Il ne seroit pas impossible qu'il en reussit encore deux biens fort considerables. L'un que les Princes d'Allemagne qui se sont separez du bon Party; prendroient courage pour s'y rejoindre. L'autre que la Ligue à laquelle jusques icy on a trauaillé inutilement d'induire les Princes Italiens, se pourroit former, & qu'ils ne laisseroient pas eschaper vne si belle occasion, de chasser ceux qui ont volé la liberté de leur pays, & d'oster le meslange & la bigarrure de Nations & de mœurs estrangeres, qui le tachent & le defigurent. Car de s'imaginer qu'à moins que cela la Republi-


que de Venise, qui est le plus considerable de tous ces Princes pour ce qui est des choses temporelles: qui donneroit le bransle aux autres, & apres laquelle ils ne feroient point difficulté d'entrer dans la lice qu'elle auroit ouverte, se portat à cette Ligue; Ceroit n'en connoistre pas l'esprit: ce seroit enignorer les Maximes: ce seroit croire ce que l'on desire, sur le simple mouuement de sa passion. Nous examinerons ce point au Discours suivant, celuy-cy n'estant desia que trop long.

J'ajouste seulement icy pour ceux qui pourroient trouuer quelque chose à desirer de nostre part, sur le sujet des grandes extremités, où les affaires sont quelquefois tombées en Allemagne & en Italie; que le Roy ne pouuoit pas faire toutes choses par tout, & qu'il en auroit peut-estre trop fait, comme nous l'auons desia remarqué; si ce n'eust esté vne necessité absoluë & inéuitable pour le bien mesme de son Royaume, de le faire. Qu'il ne pouuoit pas tout seul diuertir tous les malheurs qui pouuoient arriuer en ces pays-là, par le manquement & par l'insensibilité de ceux qui y estoient plus interessez que luy, & pour

Y y iij

la liberté desquels il prenoit tant de peine & faisoit tant de despenſe. Que dans le cours & la grande variété d'affaires qui l'ont exercé; Il n'a pas meſme touſiours pû faire, que ceux qui ont receu ſes ordres, ayent eſté auſſi heureux à les executer & metre en œuvre; qu'il auoit eſté prudent à en faire le deſſein, & à en dreſſer le plan. Mais que c'eſt vne merueille qui paroitra preſque incroyable aux ſiecles auenir, & qui ſera vn des plus beaux rayons de la gloire de ce Prince, & vn des plus nobles monumens de ſon incomparable Règne; que par ſa ſageſſe par ſon courage & par ſa puiſſance; Il ait releué chez ſoy & chez ſes Alliez ce qui venoit de tomber: qu'il y ait redreſſé tout ce qui commençoit à pancher, & fruſtré touſjours la fortune du progrez de ſes malices, & des ſuites de ſes ſurpriſes.





DISCOVERS HVITIEME.

*En quelle Conjoncture on se pourroit vray-semblablement prometre, que les Venitiens entre-
roient en Ligue contre les Espagnols.*

BIEN que je ne pense pas qu'il soit besoin que cette Ligue dont nous venons de parler se fasse, ny que le terme de la Paix generale soit si reculé, qu'il puisse attendre l'accomplissement d'une negotiation si difficile; l'ay creu neantmoins qu'il ne seroit pas hors de propos que j'en disse mes sentimens, pour faire mieux connoistre le Genie de la Republique de Venise, & ce qu'on peut attendre d'elle en de pareilles rencontres: & pour faire voir en mesme temps à l'Auteur d'un Livre qui parut vn peu apres le dernier siege de Casal sous le nom du Soldat Montferrin, que la saison n'estoit pas encore venuë de former cette Ligue comme il le pretendoit, & que la

chose n'estoit pas meure selon le sens de cette Republique, & les Maximes de sa Politique.

Le fondement sur lequel j'appuye mon opinion, est celuy-cy. Pource qu'outre que c'est le naturel ordinaire des Republiques d'estre extremement deffiantes; & de craindre beaucoup plus que d'esperer, quand les apparences du mal & du bien sont esgales; on peut dire qu'entre toutes les autres celle de Venise est trauaillée de cette humeur, & que l'inclination qu'elle a en tout ce qu'elle entreprend, de donner le moins qu'elle peut au hazard, & le plus qu'elle peut à la prudence; fait qu'elle ne s'esbranle gueres pour la guerre qui est l'Element de la fortune, si vn extrême danger ne l'y force, ou vne euidente vtilité ne l'y conuie. Je pourrois apporter quantité d'Exemples anciens pour confirmer cette verité, si je ne croyois qu'il valoit mieux n'en employer que de modernes comme estant plus efficaces, & de plus grande instruction que les autres. Dans ce haut & merueilleux dessein que le feu Roy auoit formé, pour humilier la Maison d'Austriche, & pour metre le repos de la Chrestienté si souuent troublé par cette Maison,

Maison, en quelque estat de consistance; Il fit solliciter la Republique de vouloir estre de la partie. Et neantmoins quelque autorité qu'il eust aupres d'elle, qui ne pouuoit estre plus grande, & quelques auantages qu'il luy fit proposer pour le prix de l'armement, & pour l'vsure de la despense qu'elle feroit, qui n'estoient pas mediocres. Bien que cela ne se fit que pour rompre les fers de l'Italie, & pour arracher aux Espagnols ce qu'ils y tenoient injustement. Quoy que tout le fruit de la conqueste, dont la plus grande partie se deuoit faire à ses despens & par ses forces; deust estre pour les Italiens, & qu'il ne se reseruat que la gloire d'auoir esté leur Libérateur, & d'auoir fait perdre aux Espagnols le lieu d'assemblée de la pluspart de leurs armées, qui estoit alors l'Estat de Milan; Si est-ce qu'il ne peût jamais tirer d'elle, que des paroles generales de bonne volonté, & des loüanges qu'elle donna sans mesure, comme c'est sa coustume, à ce magnanime Prince, qui n'auoit pas de moindres pensées; que d'estre le Fleau & l'Exterminateur des Tyrans, le Restaurateur & l'Arbitre de la Republique Chrestienne.

Celle de Venise donc ne se laissa point si fort esbloüir aux propositions qu'on luy faisoit, ny aux apparences dont elles estoient reuestuës; qu'elle n'eust encore dauantage deuant les yeux l'instabilité des choses humaines, & les jeux ordinaires de la fortune: le mouuement perpetuel de sa Roüe, & les subites & frequentes reuolutions qu'elle apporte dans le monde. Elle auoit peur qu'auant que l'ouurage dont on luy presentoit le plan, fust acheué ou mesme bien commencé; l'Entrepreneur ne vint à manquer, ou par vne mort naturelle; ce qui ne seroit pas estrange, ou par vne fin violente; ce qui n'estoit pas sans exemple. Elle vouloit voir toute la contexture de la Ligue: l'assiete & l'action des pieces de cette machine, & le succez de ses premiers mouuemens; affin que si elle venoit à se desprendre, ou à estre acueillie de quelque accident funeste, elle n'eust pas à se repentir d'y estre entrée, ny à s'acuser de precipitation, & d'estre tombée pour estre allée trop viste. Que si le Ciel regardoit fauorablement cette Ligue, & si elle auoit le vent propice; Elle sçauoit bien que la porte luy en seroit tousiours ou-

uerte : Elle ſçauoit que ſans elle l'Expedition qu'on meditoit en Italie; ſeroit foible & eſtropiée, & que la perfection de ſon bon-heur, dependoit de la jonction de ſes armes à celles des autres. Et ainſi qu'en y entrant elle n'auroit que fort peu de hazarts à courir, & fort peu d'auances à faire: elle trouueroit la moiſſon preſte: elle n'auroit qu'à pourſuiure les reſtes de la victoire, & viendrait pluſtot au partage qu'à la priſe de la proye. Telle eſtoit la creance du feu Roy ſur la procedure de cette Republique, & c'eſt à peu pres en ce ſens qu'il donna charge à Monsieur de Bullion d'en parler au Duc de Sauoye, vers lequel il l'auoit enuoyé pour conclurre & terminer la Ligue, que Meſſieurs de Nemours & de Vaucelas auoient eſbauchée. Le Lecteur pourra voir cela plus au long, dans l'inſtruction de Monsieur de Bullion, qui eſt à mon gré vne tres-belle piece, & vne des meilleures choſes que j'aye veu en ce genre. Paſſons outre.

Après que Cordoua euſt aſſigé Cazal, & que par vn attentat dont le commencement manquoit meſme de pretexte pour le colorer; Il euſt fait voir aux Italiens, que ſon Maiſtre

ne metoit point de difference entre ce qui l'acommodoit & ce qui luy appartenoit; La Republique arma veritablement, & fit quelque demonstration de s'interesser en cette querelle. Toutefois de quelque importance que fust la conseruation de Casal pour le salut de l'Italie, & quoy que l'ambition d'Espagne n'eust point de plus forte barriere en ce pays-là, que cette place; Elle ne peut jamais estre induite à la secourir, ou en enuoyant son armée dans le Montferrat pour attaquer celle de Cordoïa, ce qui n'estoit pas impossible: ou en faisant diuersion du costé du Cremonois, ce qui luy estoit fort facile. Mais apres qu'elle eust veu l'heureux succez du siege de la Rochelle, & le Pas de Suze forcé, & par consequent vne des portes d'Italie ouuerte à nos armes; Elle se resolut de faire entrer les siennes dans l'Estat de Milan, à la defense duquel elle ne voyoit qu'un peu de troupes estonnées, & le debris d'une armée que l'hyuer & les assiegez auoient mal-traitée deuant Casal, & qui n'auoit plus de force que pour fuir, & pour se sauuer deuant la nostre.

Quoy que cela fust ainsi, & qu'apparem-

ment les fruits de la victoire que le Roy auoit obtenuë; ne pûssent estre plus certains ny plus plantureux, si l'on l'eust suiuië. Quoy qu'il semblat apres cela, qu'il ne nous restat plus de peine, que pour recueillir les faueurs que la fortune nous offriroit d'elle-mesme, & pour receuoir ce qui se rendroit; Si est-ce qu'il y eust encore bien des efforts à faire & des combats à donner, pour faire resoudre la Republique d'enuoyer l'ordre à son General de passer le Rubicon; c'est à dire d'entrer à main armée dans le Cremonois, & de franchir des limites qui luy auoient esté il y auoit pres d'un siecle sacrées & inuiolables. Ce ne fust pas sans vne longue agitation de pensées, & sans vn trauail d'esprit extrême; qu'elle se porta à cette hardie resolution. Iamais l'Eloquence & l'adresse de Monsieur d'Auaux quelques grandes qu'elles fussent; ne furent plus empeschées qu'à la luy faire prendre. Elle y apporta les mesmes formalitez & les mesmes precautions; que lors qu'elle se determina à accepter la guerre, que le Heraut de Louys XII. luy declara de la part de la Ligue de Cambray, ou celle que le Chaoux de Selin second luy inti-

ma, pour la possession de Chypre. Et depuis apres que pour des considerations importantes, que j'ay touchées en la premiere Partie, le Roy eust arresté le cours de la victoire de Suze, & donné la paix aux Espagnols, qui n'estoient plus en estat de faire du mal à nos Allies; Elle a auoüé plusieurs fois à Monsieur d'Auaux, qu'elle ne pouuoit assez s'estonner de la resolution qu'elle auoit prise de rompre si tost avec l'Espagne, & que c'estoit par vne espece de transport, & contre le train de sa conduite ordinaire; qu'elle s'estoit jettée si auant dans la querelle du Duc de Mantoue.

On peut encore remarquer par la guerre, ou plustot par la persecution que le feu Empereur & le Roy d'Espagne firent à ce Duc; qu'il est mal-aisé d'attirer les Venitiens à quelque Ligue offensue, & de les engager à vne guerre, que par l'amorce de quelque grand auantage qui leur paroisse comme infailible: ou par la crainte d'un grand mal qui vienne avec rapidité, & qui soit prest à fondre si l'on ne l'arreste. Ainsi Eux qui ne pûrent jamais estre induits à metre en campagne contre les Espagnols, lors que Casal estoit aux abois &

tout le Montferrat en proye; jusqu'à ce qu'ils virent luire delà les Monts les armes Françoises, & avec elles l'esperance de la conquête de Milan, & du partage de ce bel Estat, qui leur sembloit estre ouuert par la Fortune de la France. Quand ils virent Mantoüe en danger & sur le point de se perdre. Quand ils virent que l'affaire pressoit de ce costé-là, & que le mal estoit en sa violence: & qu'ils virent par conséquent que cette place, laquelle entre les mains du Duc de Mantoüe seruoit de rempart à vne partie de leur Estat de Terre-ferme; deuenoit entre les mains de l'Empereur ou du Roy d'Espagne vne Citadelle pour le dominer; Ils firent auancer leur armée pour la secourir. Mais soit que le remede vint trop tard, & que la maladie n'en fust plus capable: ou que le mal-heur ou l'imprudence de ceux qui furent ordonnez pour le dispenser, en corrompit la vertu & en empeschat l'operation; Il arriua qu'il ne produisit point l'effet que les Venitiens s'estoient proposé, & pour dire la chose comme elle a esté; la longueur dont ils vserent à se resoudre à ce secours: l'ordre du plan que le Duc de Rohan en auoit dressé,

qu'un des Chefs de leur armée changea par jalousie, & la mauuaife intelligence qui s'esleua entre le Duc de Candalle & le Marechal d'Estrée; furent les causes fatales de la perte d'une place, qu'il importoit si fort aux Venitiens de conseruer.

Il conclud de là, que ce peril éminent qui les excite à agir, ne menaçant plus leur teste, & la deffaite des Espagnols deuant Cazal: les grandes pertes qu'ils ont souffertes deuant Thurin, & les autres disgraces qui leur sont depuis arriuées; ayant dissipé la crainte qui les trauailloit, qu'ils n'estendissent leurs inuasions sur le reste de l'Italie. Et d'autre costé voyant que la fortune de la Maison d'Autriche, se soustient encore hautement dans l'Allemagne, & que cette source qui pourroit enuoyer de puissans secours à l'État de Milan, n'est pas tarie; Il ne faut point s'estonner, s'ils refusent de s'embarquer en vne querelle, où il n'y a pas de grand mal à craindre pour eux, ny de bien certain à esperer, s'ils s'y embarquent. Mais s'ils voyoient les forces Confederées superieures & dominantes dans l'Allemagne; comme ils voyent dans l'Espagne

gne les semences d'une longue guerre, & la matiere d'un embrasement durable: Et par consequent qu'elle ne peut plus faire en Italie, que des efforts languissans & foibles; Il y a de l'apparence qu'ils profiteroient de la conjoncture, & seroient bien-aises d'attraper quelque portion de l'Estat de Milan, qui seroit à leur bien-seance: ou qu'au moins ils se mettroient en deuoir de faire rendre gorge aux Espagnols, des usurpations qu'ils ont faites en Piedmont & au Montferrat, le pouuant faire seurement & sans crainte de reuanche.

Et sans mentir ce seroit vne chose bien estrange & fort injuste, qu'estans si interessez comme ils sont en la liberte de l'Italie, & y ayans tant à perdre; Ils voulussent y demeurer tousiours Spectateurs immobiles de ce qui s'y passe. Ils voulussent en repos & les bras croisez, y laisser tousiours trauailler leurs Amis à l'œuvre de leur salut, & ne rien contribuer à l'auancement de la paix, & à la structure du Temple qu'on luy prepare; que des Raisonnemens oysifs, que des souhaits superflus, & des offices sans effet. De cette paix dis-je qui est la fin des armes du Roy, & l'ob-

A a a

jet de ses plus ardens & continuels desirs; pour laquelle il essuye tant de soins & tant de peine: Il expose sa personne à tant de dangers, & tire tant d'argent de la bourse de ses sujets, & tant de sang de leurs veines. De cette paix qui ne doit pas seulement pallier les blessures de la Chrestienté; mais qui les doit entiere-ment guerir & consolider: qui ne doit pas seulement estre vn remede contre ses maux presens; mais encore vn preseruatif contre ceux de l'auenir: qui doit metre les Petits à couuert de la violence & des attentats des plus Grands, & à l'ombre de laquelle tous jöuyront de ce qui leur appartient, sans trouble & sans jalousie.





DISCOVRS NEVFVIEME.

Quelles conditions doit auoir la Paix que tous les gens de bien desirent, affin qu'elle soit honnestes & seure. Queles Paix particulieres que la Maison d'Autriche tasche de faire; seroient la ruine de ceux qui les feroient.



Et que j'ay dit au Discours precedent de la Ligue que la Republique de Venise seroit capable de faire, & de la Paix à laquelle elle deuroit contribuer quelque chose de plus réel & de plus effectif, que des souhaits & des offices; me porte à dire vn mot des conditions que doit auoir cette Paix, & du mal-heur des Princes qui s'en sont esloignez en Allemagne. Affin donc qu'elle soit telle, que tout les gens de bien la desirent, & pour en jetter des fondemens si profons & si solides, qu'on ne puisse craindre que l'Edifice

Aaa ij

tombe ou se démente de long-temps; Il faut nécessairement que ce soit vne Paix generale, & que tous ceux qui se sont associez pour faire la guerre, comme ils ne font qu'un Corps composé de plusieurs membres; n'ayent aussi qu'une mesme Ame qui les meue, ny qu'une mesme fin où ils tendent. Que les Confederez se procurent mutuellement & sans esprit d'émulation, tous les appuys honnestes & tous les avantages raisonnables, qui pourront servir à la commune seureté. Qu'encore que la Ligue offensive se separe, & que les armées se licentient; Il demeure tousiours vne Ligue deffensive, qui soit la gardienne de la Paix, & comme l'ancre sacrée sur laquelle elle se reposera: par laquelle tous les Confederez s'obligeront de courir sus au premier qui entreprendra de la violer, & de rallumer les flambeaux qu'elle aura esteins, & ressusciter les troubles qu'elle aura calmez. Bref que de l'union indissoluble, & de la parfaite correspondance des Princes & des Estats de cette Ligue; se forme vn si puissant contrepoids, & se fasse pour le dire ainsi vne si forte & haute leuée, contre l'ambition de la Maison d'Austriches

qu'elle soit contrainte de se contenir dans les bornes qui luy seront marquées, & de jouïr d'un bien qu'elle perdrait en l'ostant aux autres; qui est le repos.

C'est de cette matiere que la Paix dont la Chrestienté a besoin, doit estre faite afin qu'elle dure. C'est sur cette base qu'il la faut esleuer si l'on veut qu'elle subsiste. Hors de là je ne voy point qu'on luy puisse donner assez de fermeté & de subsistance; & il est certain que si les Confederez se laissent prendre aux amorces & aux auantages qu'on leur presentera par des Traitez particuliers, & que les Membres de la Ligue se destachent du Corps qu'ils composent; Ils se perdront infailliblement; & il leur arriuera comme à ces Insectes qu'on coupe en pieces; qui conseruent pour quelque temps un peu de mouuement & de vie; mais qui meurent & perissent bien-tost apres, pour estre priuez de la vertu qui sortoit de l'vnion de toutes les parties, comme du principe de leur durée. Par où l'on peut voir quelle a esté l'imprudence du Duc de Saxe, & des autres Princes d'Allemagne, qui ont suivy le cours de ce premier Mobile; de s'e-

estre separez de l'Alliance de Suede. Car sans parler de l'honnesteté offensée par cette separation, dont nous auons fait mention ailleurs, & de cette vilaine tache d'ingratitude dont ils se sont chargez enuers la memoire d'un Prince à qui ils estoient si redevables; leurs interets portoient qu'ils demeurassent tousiours vnis, & qu'au lieu de cette mal-heureuse paix de Prague, qu'on leur a vendue si cherement; Ils trauaillassent encore vn peu de temps, pour paruenir à vne generale, qui n'eust point laissé de playe ouuerte, ny de tison fumant dans l'Empire: qui n'eust point caché de pieges ny recelé d'embusches, & qu'ils eussent obtenuë par vne plus courte & moins onereuse guerre; que celle qui s'est esclose de l'autre, & qui continuë encore.

En effet si l'on n'eust jetté de la poudre aux yeux de ces Princes, & si leur Conseil ne les eust trompez: s'il leur fust demeuré vn peu de lumiere ou vn peu de liberté, pour voir ce qu'ils faisoient, ou pour s'empescher de le faire; y a-t'il apparence qu'ils n'eussent point veu le precipice où l'on les menoit, ou qu'ils y fussent descendus volontairement? y a-t'il appa-

rence qu'ils eussent pris si grossièrement le change qu'on leur a donné ? qu'ils fussent sortis d'une Société , pour se metre dans vne chaisne , & que d'égaux & de compagnons qu'ils estoient des Suedois ; ils se fussent rendus esclaves des Imperiaux , & dependans des Espagnols ? N'eussent-ils point connu , qu'au lieu de quelque leger mescontentement , & de quelque petit degoust qu'ils receuoient d'un des Ministres de la Couronne de Suede , à quoy on eust facilement remedié ; Ils s'exposioient à tous les traitemens , que la Tyrannie a coustume de faire à ceux dont elle veut s'asseurer , & qu'elle a peur qui luy eschappent ? Qu'au lieu que dans l'Alliance de cette Couronne , ce qu'ils contribuoient pour l'entretienement de la guerre , estoit volontaire , ou ne pouvoit excéder ce qui estoit porté par les conditions du Traité ; ce qu'ils deuroient contribuer dans celle de l'Empereur , n'auroit point d'autres limites que leur impuissance : que la charge de la despense qu'on les obligeroit de faire redoubleroit sans relasche , & s'appesantiroit sans mesure , & qu'on ne viseroit pas moins en cette trompeuse & infidele

Confederation, à faire exhaler toute leur chaleur & tous leurs esprits, & à les espuiser d'argent & d'hommes; qu'à exterminer les Suedois dans l'Allemagne, & à purger comme ils parlent, l'Empire des Nations estrangeres qui s'y sont jettées; affin qu'on n'ait plus à faire qu'à eux, quand on aura fait avec les autres.

Si des principes de la Politique d'Espagne, qui ne regnent pas moins à Vienne qu'à Madrid, ils ne veulent pas tirer vne conclusion si necessaire; qu'ils l'inferent pour le moins de leur propre experience, & qu'ils considerent, que si les autres ne les vouloient tenir que par les liens de l'Amitié, & par le sentiment des Bien-faits: s'ils n'auoient dessein de les confumer en destruisant les Suedois & les autres Estrangers, & de s'en seruir contre ceux-cy, comme les Affineurs se seruent du plomb pour purifier l'or & l'argent à la coupelle; lequel au mesme temps qu'il enuoye en fumée les autres metaux imparfaits, s'euapore luy-mesme, & se'pert avec ceux qu'il chasse. Ils ne feroient pas comme ils font autant qu'ils peuvent, de leur pays le Theatre de la guerre: Ils n'en feroient pas la curée ordinaire de leurs

leurs troupes, aussi bien que de celuy des Ennemis, & ils en receuroient vn traitement pour le moins aussi doux; que celuy qu'en reçoit le Duc de Bauiere. Qu'ils se souuiennent des discours qu'on a oüy tenir à Rome, aux Ambassadeurs du feu Empereur, sur les plaintes qu'on y faisoit de la concession que leur Maistre auoit faite des biens de l'Eglise au Duc de Saxe, au grand mépris de la Religion, & au grand scandale des bons Catholiques. Que c'estoit le peu d'assistance & de subuention qu'il auoit receu du saint Siege, qui l'y auoit contraint: que c'estoit la violence de ses affaires qui l'y auoit forcé: que c'estoit la plus dure & la plus inexorable de toutes les Loix, qui est celle de la necessité, à laquelle il auoit obey.

Qu'on recherche maintenant l'esclaircissement de ce mystere, & le sens caché de ces paroles. Qu'on en tire l'esprit secret qu'elles contiennent, & l'on jugera à mon auis que cette paix tenant plus de la force, que de l'election, & estant plustot arrachée, que sortie librement de la volonté de l'Empereur; Il n'y aura pas faute de Docteurs qui prouueront,

Bbb

qu'elle ne doit point estre obseruée, pour le moins par les Successeurs qui ne l'ont pas faite. Que ceux-cy ne seront pas obligez de tenir, ce qu'il n'estoit pas loysible à leur Predecesseur de promettre, & qu'il n'y a point de promesses plus illegitimes, & dont il faille plus prontement couper le lien, & reparer le domage quand on le peut; que celles qui blessent la Religion, & par lesquelles les Princes consentent à la dissipation des biens de l'Eglise; qu'ils ont vne particuliere & inéuitable obligation de proteger & de deffendre.

Les Princes donc qui ont quité les Confederations si solennellement jurées, & si souuent renouuellées, de leurs veritables Amis, pour se precipiter dans la paix de Prague; doivent tenir pour certain, qu'ils ont abandonné la poursuite d'une realité & d'un corps, pour n'embrasser qu'un fantosme & qu'une ombre, & qu'il n'y a qu'un de ces trois chemins ouuerts à leur condition future; ou de demeurer la proye finale des Imperiaux, comme nous l'auons dit ailleurs, & de faire la conclusion de la Piece qu'ils jouent en Allema-

gne, si le Party Confederé succombe : ou si la victoire se range du costé des Suedois; de souffrir la peine de la foy publique violée, & les effets de la vengeance que demande le sang du Roy de Suede versé pour le rachat de leur liberté. Ou enfin s'ils veulent voir la verité de cette Amnistie, qui est le sujet des armes Confederées; au lieu de cette autre imaginaire, qui a esté l'appas avec lequel la Maison d'Autriche les a pris. S'ils veulent voir finir l'agitation de l'Allemagne par vn repos ferme & durable. S'ils veulent voir refleurir les Constitutions & l'ancien Ordre de l'Empire. S'ils veulent voir metre vn arrest éternel à l'ambition de ceux qui l'alterent; affin dis-je que cela se fasse bien-tost & facilement, il ne leur reste que de retourner au bon party, & de se rejoindre à ceux, qui trauaillent avec tant d'ardeur, à cét immortel ouirage.

Je passe outre & dis encore, que comme il ne faut point douter, que la Maison d'Autriche ne remuë tous les ressorts de la Politique, pour defiler la Ligue qui est sur pied en Allemagne, & pour reduire les troubles presens à des paix particulieres, & semblables à celle de

Bbb ij

Prague; comme il ne faut pas dis-je douter qu'elle ne le fasse, afin que chacun des Confederez pris en son particulier, & destaché du Corps de la Ligue, se trouue plus foible pour luy resister quand elle l'attaquera, quoy qu'elle promette le contraire; Il est aussi necessaire pour se garentir de cét inconuenient, de prendre le contrepied de cette Maison, & de mettre en prattique la Loy des contraires, qui est de si grand vsage dans les affaires du monde. Il faut que tous les Confederez se resoluent, de ne se desfunir jamais: de rejeter toutes les propositions qu'on leur fera des Traitez particuliers, comme vn poison déguisé qu'on leur presentera sous l'apparence d'un remede, & de s'enfermer pour ne l'abandonner point qu'il ne soit accomply, dans le projet d'une paix generale, & d'une Ligue deffenfue telle que je l'ay depeinte cy dessus.

Mais peut-estre qu'en les menaçant de la licence qu'on dit que la Maison d'Austriche se donne, de violer les Traitez dont l'observation luy est dommageable, & l'inobservation auantageuse; le leur veux donner vne fausse alarme, & faire peur d'un fantosme. Peut-

estre qu'elle est aussi soigneuse d'accomplir de bonne foy ce qu'elle promet, & particulièrement quand le Nom de Dieu y est interuenue; qu'elle a les autres apparences de pieté specieuses, & le dehors de la Religion exemplaire. Peut-estre qu'elle ne respire non plus que nous qu'une bonne paix, & que son intention est quand elle aura gagné ce port; de ne se commettre plus à l'auenir, si l'on ne l'y force, à une Mer si dangereuse que la guerre. Je veux monstrier icy que cela n'est point, & faire voir qu'elle se donne veritablement cette licence, & qu'elle abuse du Nom de Dieu & se joüe de la foy publique quand ses Interets en ont besoin, peut-estre plus que Prince du monde. Pour cet effet je ne pretens point faire l'Orateur, ny employer un Art qui se vante avec ses couleurs & avec ses lumieres, de changer quand il luy plaist l'estat des choses, & de les faire paroistre grandes ou petites, belles ou hideuses, comme bon luy semble. Cela est autant esloigné de mon humeur, qu'il est au dessus de mes forces, & je renonce de bon cœur à un exercice, duquel je m'aquiterois fort mal quand je l'aurois entrepris. Je ne

veux non plus apporter icy toutes les infractions de Traitez que la Maison d'Austriche a faites , ny toutes les infidelitez dont elle a noircy sa conduite. Il faudroit pour cela des volumes tous entiers. Je m'arresteray seulement à quelque chose de plus moderne, comme plus sensible , & à ce qui s'est passé en ces derniers temps en Allemagne & en Italie.

Pour ce qui est de l'Italie ; qui ne sçait que les guerres posterieures que les Espagnols ont faites au Duc de Sauoye Ayeul de celui-cy ; ont tousiours pullulé de l'inexecution de leur part des Traitez qui les precedoient , & que dès que la crainte du mal qui les auoit obligez de s'acommoder, venoit à cesser, & que l'esperance de la fin qu'ils auoient proposée à leurs armes, venoit à renaistre ; Ils perdoient la memoire de la paix qu'ils auoient jurée, & ne faisoient point difficulté de renoüer la querelle, & de rallumer le desordre, aux despens de leur foy & contre toute justice. De sorte que ce qui interuenoit entre deux guerres, n'estoit pas tant vne paix, qu'une suspension d'armes : ny la guerison de la fièvre , que la remission de l'accez. Le feu se couuroit de cendres, mais il

ne mouroit pas dans l'intention des Espagnols, & il arriuoit de toute cette affaire, comme des playes mal-pensées qui se r'ouurent souuent; Elle se renouuelloit de temps en temps, & ce jeu dura jusqu'à ce que de nouveaux accidens, firent prendre aux Espagnols de nouveaux desseins, & que les troubles d'Allemagne firent calmer ceux d'Italie.

Je ne parle pas de la Paix de Suze, qu'ils violerent sans autre couleur, sinon qu'ils auoient besoin de la violer pour l'intérêt de leur Reputation: ny de l'ingratitude avec laquelle ils reconnurent la courtoisie dont le Roy vſa en leur endroit, & cette rare moderation, qui luy fit borner sa prosperité par la deliurance de ses Alliez, & ne luy permit de vaincre qu'autant qu'il trouua de resistance. Nous en auons parlé en vn autre endroit, & nous en parlerons amplement en la troisiéme Partie. Je remets là aussi à parler du Traité de Cairasque, que la necessité des affaires d'Allemagne emporta d'eux, plustot que l'amour du repos de l'Italie, & auquel les Resolutions de la Diete de Ratisbonne, & l'entrée du Roy de Suede en Allemagne, où l'on voyoit desja paroistre les si-

gnes de la tempeste, qui a depuis batu la Maison d'Austriche; les forcerent de consentir & de donner les mains, avec dessein de ne l'observer pas, dès qu'ils nous auroient renuoyé delà les Monts, comme nous le deduirons au long en l'Apologie de l'Aquisition de Pignerol.

Je ne veux non plus rafraischir icy les fourberies qu'ils exercerent à l'endroit des Vénitiens, & les changes qu'ils leur donnerent sur le sujet des Vïscoques. Ce seroit refaire ce qui a esté fait. Je passe encore sous silence les diuerses niches qu'ils ont faites en diuers temps aux Grisons, & les artifices & la force ouuerte avec laquelle ils ont si souuent attenté à leur liberté contre la foy des Traitez faits avec eux, & avec leurs Alliez. Cela se verra en la troisiéme Partie en l'Apologie du Traité de Monçon, où je donne vn Tableau assez exact des affaires de cette Republique. Je viens à celles d'Allemagne, & à ce qui s'est passé sur cette Scene, qui n'est gueres moins fameuse par les Traitez, que par les guerres qu'on y a veu faire. Qui ne sçait que la paix d'Vlm qui fust conclüe par l'entremise de la France,

France, donna moyen à l'Empereur de respirer du faix de la guerre sous lequel il gemissoit, & de demesler l'embaras d'où il ne pouvoit sortir que par cette voye? Et qui ne sçait aussi qu'il ne l'obserua qu'autant de temps qu'il luy en fallut, pour se preparer à la guerre qu'il meditoit en jurant la paix, & que la ruine du Conte Palatin & de ses Amis, n'a procédé que de la confiance qu'ils auoient prise en ce Traité, & de ce fondement ruineux sur lequel ils se reposoient, comme sur vne Ancre sacrée par le droit des gens, par la reuerence du Nom de Dieu qui y estoit interuenue, & par l'autorité d'un si grand Mediateur, que le Roy de France?

Après le gain de la bataille de Prague, & cette fatale suite de prosperitez, qui viennent après les grandes victoires. Après que les armes Imperialles eurent triomphé de tout ce qui fauorisoit le party du Palatin, & que le Conte de Tilly & le Marquis de Spino-la eurent mis à nu ce mal-heureux Prince; l'Empereur transporta son Electorat au Duc de Bauiere, & partagea son pays entre luy & le Roy d'Espagne. Mais d'autant que l'on pre-

Ccc

tendoit, que les formalitez ordonnées par la Bulle d'Or & par les autres Pragmatiques. Sanctions, n'auoient pas esté obseruées en cette translation & en ce partage, & de peur que cette procedure qu'on presumoit auoir esté violente; n'irritat les autres Electeurs par vn commun interet, & n'excitat le Roy d'Angleterre à s'en ressentir, & à poursuiure la reparation de l'outrage fait à son Gendre. L'Empereur protesta à la Diete de Ratisbonne de l'année 1622. *Qu'il n'entendoit auoir transferé l'Electorat à la Maison de Bauiere, que durant la vie du Duc qui en estoit inuesty, & que pour ce qui estoit du Palatinat, il feroit raison au Contre Palatin, & donneroit là dessus satisfaction à ses Amis.* Il donna les mesmes assurances au Roy d'Angleterre par ses Letres de l'année 1623. que le Duc de Bauiere mesme luy enuoya confirmer par les siennes, & luy declarer que ce n'estoit que durant sa vie, qu'il entendoit que sa Maison jouit de la dignité Electorale, & qu'il ne l'auoit acceptée qu'à condition qu'elle retourneroit d'où elle estoit sortie, & feroit vn priuilege de sa personne, & non pas vn heritage de ceux de sa Race. Ce fust l'appas qu'on presenta tousiours au

Roy d'Angleterre, & auquel il se laissa toujours prendre, & son humeur naturellement portée à la douceur du repos & aux delices de la paix; fust aisément diuertie par cette demonstration qu'on fit de le vouloir contenter, des pensées de la guerre qui ne luy estoient pas naturelles. Il acheua le reste de sa vie attendant les effets de cette esperance, qui luy estoit renouuellée de temps en temps, & dont le Conte de Gondemar qui s'estoit saisi de son esprit, & mis en possession de le gouverner souverainement, luy sceust figurer l'exécution si infailible; que non seulement il l'empescha d'armer contre les Vsurpateurs du bien de son Gendre; mais qu'il le disposa mesme à prester ses vaisseaux à son Maistre, pour asseurer contre les Hollandois les flotes d'Espagne qui venoient des Indes.

Cette affaire a toujours esté depuis aux mesmes termes du costé de l'Empereur, & est toujours demeurée flotante dans l'irresolution & l'incertitude, jusqu'à ce qu'apres l'accident de Nortlinghen qui fust fatal aux Suedois; La plupart des Princes & des villes franches de l'Empire, se destacherent de leur

Confederation , & conspirerent à Prague avec la Maison d'Austriche contre la liberté Germanique. Là l'Empereur fier & orgueilleux de ce prodigieux succès , & se croyant maître des affaires & de la fortune ; sans se souvenir des promesses qu'il auoit si solennellement faites au dernier Roy d'Angleterre , & de la foy qu'il luy auoit si souuent donnée en faueur de son Gendre : sans qu'il fust rien interuenu depuis contre luy de la part de ce Prince, ny de la part de ses Enfans, qu'un triste & deplorable progres de calamitez & de disgraces ; declara de sa propre autorité ; (bien qu'il ne le peut faire legitiment , que de l'autorité d'une legitime Diete , & parties oüyes ;) declara dis-je l'Electorat denëment transféré au Duc de Bauiere & à toute sa Race, sans qu'il pût passer à aucune autre Maison que celle-là ne fust esteinte. Declara en outre nulle l'oposition interjettée par le Duc de Neubourg, comme Prince de la Maison Palatine , & luy non receuable en cette pretention ; & ce pour de grandes & importantes considerations connües de sa Majesté Imperiale. Maintint & confirma au partage & en la jouissance du Palatinat, ceux qui l'auoient occupé en son nom & sous son autorité ; sauf à auoir esgart aux Contes Palatins, & aux

prieres des Princes qui se deuoient rendre leurs Intercesseurs;
Et cela sous des conditions si basses & si honteuses; qu'il sçauoit bien qu'elles ne seroient jamais acceptées.

Du depuis considerant qu'un si sanglant affront fait au Roy d'Angleterre d'aujourd'huy, & le contrepoids qu'il apporteroit à la balance où la victoire estoit suspenduë entre deux partis, s'il se declaroit pour celuy qui luy estoit contraire. Considerant encore le dommage que receuroient les Pays-Bas, de la cessation des Conuois que les Anglois leur amenoient, & les autres consequences qui naistroient de la hayne d'un Prince, animé à la vengeance par le long mépris qu'on faisoit de luy, & par l'extrême injure qu'on auoit faite à ses Neueux; Il reprit la peau de Renart qu'il auoit quitée au Traité de Prague, & se rejetta à l'exercice du premier Art avec lequel on s'estoit si souuent joiué du pere, pour en abuser le fils, & pour suspendre la resolution qu'il pourroit prendre, de rechercher avec la force, ce qu'on auoit refusé à son intercession & à ses offices. Il fit donc semblant de gouter les ouuertures d'acommodement qui luy

me qui les diuise. Cela certes n'est pas sans fondement, & sans pretexte plausible. Mais le secret de l'affaire est, que tant que ce Schisme subsistera, & que le feu que les Anglois viennent d'allumer au milieu de leurs entrailles, se maintiendra en sa chaleur & en sa force; le Roy de Hongrie ny ceux de son party n'ayant rien à craindre de leurs armes, ne se hasteront pas de traiter; & s'il est expedient qu'ils traitent tout de bon; que ce sera toujours assez tost, quand les Anglois auront repris leur premiere concorde, & le dessein de vouloir releuer la Maison Palatine, & reestablis ses Princes que l'Empereur & ses Adherans ont mis en chemise. Que cependant ils courront le hazard de la guerre, où peut-estre ils obtiendront des succez si considerables, & leur puissance s'acroistra si demesurement; que quand l'Angleterre entreroit dans la Ligue où toute sorte de raisons la conuient d'entrer, & joindroit ses forces à celles des Confederez; Ils auront mesme dequoy esperer la victoire, & ne seront pas obligez de relascher de gré, ce qu'on ne leur scauroit oster de force.

Ces prejuges que je viens d'apporter, at-

tendant que je les acompagne de plusieurs autres , ce qui se fera en la troisiéme Partie ; suffiront pour faire voir à nos Confederez , quel fondement il pourroient faire sur la durée des Traitez particuliers , ausquels la Maison d'Austriche les presse & les sollicite d'entendre. Sur tout les Suedois qu'elle voudroit débaucher de la Confederation de la France, & contre la foy desquels elle dresse ses plus fortes bateries , & arme ses plus subtils artifices ; sont trop abiles pour ignorer , que c'est vne resolution constante, & vne volonté immuable parmy les Princes de cette Maison ; de ne permettre pas qu'ayant mis si auant comme ils ont fait , le pied dans l'Allemagne ; ils y prennent de longues racines, & qu'il se fasse vne adjonction à l'Empire d'un Membre si puissant , & d'une Nation si belliqueuse. Je croy aussi qu'ils ne doutent point , que pour ce qui regarde la fermeté & la subsistance du Traité particulier qu'ils auroient fait avec eux ; Ils ne trouuassent mille pretextes d'honneur pour le rompre sans infamie , & mille euasions de conscience pour le violer sans scrupule. Qu'ils ne fissent venir à leur secours,

comme

comme nous l'auons designé ailleurs , cette Maxime qu'ils tiennent en reserue pour s'en seruir quand ils en auront besoin ; qu'on n'est pas obligé de garder la foy aux Heretiques ; principalement quand elle a esté donnée en des choses qui aydent à confirmer l'Herésie en quelque pays , d'où l'on a dessein de la banir : qui luy fournissent de l'aliment & de la vigueur : qui l'enflent & l'enorgueillissent de puissance temporelle , & d'autres auantages humains sur lesquels elle subsiste. Que les faisant passer pour Brigands de peuples , & pour Rauisseurs d'Estats , comme infailliblement ils le feront ; Ils n'employassent contre eux , cette opinion des Casuistes qui est dériuée du droit de nature , & que les Payens n'ont pas ignorée ; que les promesses faites à des Voleurs quand on est à leur discretion , & qu'ils ont la force à la main , n'estant pas volontaires ; n'apportent pas par consequent d'obligation de les obseruer , & n'imposent pas vn ioug qu'on ne puisse briser sans faire mal.

Bref ils doiuent tenir pour certain , que possedans la plus feconde miniere & la plus

D d d

ample source de Cas de conscience, qui soit en la Chrestienté, qui est l'Espagne, & estans maistres du fons où viennent plus abondamment qu'en nul autre lieu, ces Docteurs aigus & subtils, qui font quand ils veulent des Anatomies si curieuses & si recherchées des actions & des mœurs des hommes, & qui ont de pleins magasins de couleurs pour déguiser les choses qu'ils veulent. Qui decident avec vne merueilleuse hardiesse des difficultez, ausquelles la Bible les Conciles les Papes & les Peres n'ont pas voulu toucher, & en vn mot qui manquant le plus souuent d'un point fixe à establir leurs opinions, & se servant d'une Regle si molle & si flexible pour les mesurer, comme est leur Raisonnement; les sçauent par consequent acommoder quand il leur plaist, aux inclinations de ceux qui les consultent.

Les Suedois dis-je doiuent tenir pour certain, que les Princes de cette Maison trouueront tousiours quelqu'un de ces Docteurs, (car il ne faut point faire le mesme iugement de tous) qui leur prouuera, que de ne tenir pas aux Heretiques ce qu'on leur a promis;

n'est pas vn Mal, quand il en peut reussir vn Bien pour la Religion, & que de les depouiller des biens temporels qui seruent de nourriture & d'appuy à l'Herésie, bien qu'on leur ait promis de leur en laisser la possession; n'est pas vne action plus blasmable; que d'oster vne espée des mains d'un furieux qui s'en pourroit percer le cœur, quelque promesse qu'on luy eust fait de la luy laisser. Au pis aller les Princes de ce temps & particulièrement ceux de la Maison d'Austriche; sont trop intelligens & trop ingenieux, pour ne sçauoir pas faire naistre quand ils voudront des sujets de broüillerie: & les affaires de la Chrestienté sont aujourd'huy si troubles & si confuses; que quelque soin qu'on apporte à les esclairsir & à les demesler; on est asseuré que d'icy à long-temps il n'y demeurera que trop de matiere pour quereller & pour faire noise, à ceux qui en auront enuie.

Ddd ij





DISCOVRS DIXIEME.

*Que la Confederation qui est entre le Roy & ses
Associez, a toutes les conditions necessaires
affin que la Paix qu'on pretend faire soit
de durée. Quelques considerations
sur la nature des Lignes affin
qu'elles se maintiennent.*

L resulte clairement de ce que nous auons dit cy dessus, que les troubles de la Chrestienté ne scauroient se calmer, par des moyens si trompeurs & si infideles, que des paix particulieres, & que ce seroit bastir son repos sur de la glace qui fondroit aux premiers rayons du Soleil, qui viendroient à luire; que de l'esleuer sur vn fons si peu certain & mal-assuré. Il faut affin qu'il soit tel qu'on le desire, qu'une paix generale en soit le fondement & la base, & qu'une Con-

federation permanente de ceux qui sont assés pour faire la guerre; soit le bouclier de cette paix, & le rempart qui la couure contre les attaques qu'on luy pourroit faire. Il faut qu'elle soit l'obstacle qui retienne perpetuellement la Maison d'Austriche, & l'empesche de faire des inuasions sur ses voyfins, & de les tourmenter à l'auenir comme elle a fait par le passé. En vn mot comme il y a vne si forte liaison & vne si estroite correspondance, entre les branches & les dependances de cette Maison; qu'on diroit qu'elles n'ont toutes qu'un mesme Interest, & qu'on les voit courir au secours les vnes des autres avec la mesme chaleur & la mesme impetuosité, que si c'estoit leurs affaires propres; Il faut de mesme que toutes choses mises à part, les Puissances Confederées s'entendent tousiours & soient tousiours prestes, pour agir de concert contre la Maison d'Austriche, toutes les fois qu'elle s'esbranlera mal-à propos contre quelqu'une d'elles, & que reprenant cét esprit d'ambition qui luy est si naturel, & qui luy fait tant de peine; Elle viendra vne autre fois à conjurer contre le repos de la Chrestienté,

& contre la liberté de ses Princes.

Or il me semble que la Confederation qui est maintenant sur pied, entre le Roy & les autres Princes qui trauaillent avec luy, pour procurer vne paix honneste & seure au reste de la Chrestienté; a toutes les conditions necessaires pour former & pour maintenir cette belle vnion, & cette parfaite correspondance, que nous voulons opposer à celle qui lie & conjoint la Maison d'Austriche & ses Dependances. C'est ce que je pretens faire voir en la suite de ce Discours, & que je feray aisement comprendre, en examinant la nature & les conditions des plus fameuses Liges, que la Chrestienté ait veu depuis deux Siecles, & en recherchant les defauts & les foibles par où elles ont manqué, & qui ont esté les principes de leur dissolution & de leur ruine.

Pour entrer donc en matiere je dis, qu'encores qu'il y ait deux sortes de Liges, ou qu'on les puisse considerer sous deux visages differens & sous deux fonctions distinctes; les vnes & les autres ont besoin des mesmes appuys pour estre fermes, & des mesmes soins pour estre durables. Il y en a qui selon la premiere

intention de ceux qui les font ; n'ont quasi point d'action qui paroisse, ny de mouvement & de vie qui se fassent presque sentir. Qui ne sont proprement que pour estre les preseruatifs des guerres qu'on apprehende, & pour empêcher les Princes turbulens d'exciter des troubles ; comme les digues empêchent la Mer de se desborder, & retiennent les inuations & les degats qu'elle feroit sur la terre. Les autres sont toutes en mouvement & en action, & la premiere idée sous laquelle on les projette ; est pour servir de remedes contre les maux qui pressent & non pas contre ceux qu'on craint : pour repousser les tempestes qui esclatent, & non pas pour conseruer les calmes qui regnent. J'apporteray des exemples des vnes & des autres, qui seront les fons des Raisonnemens ; & qui rendront plus aisée & plus sensible la force des Instructions qu'on en doit tirer. Quant aux premieres ; on en vit esleuer & fleurir vne en Italie du temps de Laurens de Medicis le plus grand Politique de son Siecle, & plusieurs autres Princes & Estats de ce pays-là s'associerent pour la conseruation de la tranquillité publique, & pour

se jetter tous ensemble sur celuy qui entreprendroit le premier de la troubler, & de rompre cette belle harmonie de peuples, qui rendoit l'Italie heureuse.

Cette Ligue regardoit principalement les Venitiens, qui estans alors les plus puissans de tous les Princes d'Italie; estoient estimez aussi les plus ambitieux, & peut-estre pour cela mesme qu'ils estoient les plus puissans, & qu'on ne croyoit pas que la moderation des desirs allat volontiers de compagnie avec de grandes forces, ny qu'on peût garder la sobriété quand on est tenté par l'abondance. Mais d'autant que le ciment de cette Ligue, estoit la sagesse de Laurens de Medicis, & qu'elle auoit besoin de quelque chose de plus fort & de plus durable pour subsister; Il arriua qu'elle tomba par la mort de Laurens, & que Ludouic Sforce pour vsurper sur son Neueu l'Estat de Milan; fust le premier qui s'en destacha, & qui ouurit la porte par où les Francois entrerent en Italie, & apres eux les Espagnols & les Allemans. Il arriua encore comme par vn iuste jugement de Dieu, que l'vsurpateur de l'Estat de son Neueu, & le perturbateur du repos

repos de sa patrie; se vit despoüillé de cét Estat & bany de sa patrie, pour passer le reste de ses jours & mourir prisonnier en pays estrange. Ce qu'il y auoit à desirer à la perfection de cette Ligue, & ce qui fit si promptement relâcher la liaison de ses Membres; fust qu'il n'y auoit pas de grande Puissance réelle & effectiue qui fust le lien des autres: qui ne fust pas sujette à manquer par la mort, ny à tomber par vne disgrâce, & qui peut seruir à toutes de port en cas de tourmente, & de ressource en cas de mal-heur.

Mais il ne suffit pas que dans la structure des Ligues affin qu'elles tiennent, & dans l'assemblage des pieces qui les composent, affin qu'elles ne se dementent point; Il entre vne grande Puissance, si les mouuemens de cette Puissance ne sont moderez, & si elle n'a pour but le bien general de la Ligue, à qui elle sert de Chef & de Centre. Autrement si cette Puissance superieure se constituë la fin des autres, & si elle ne vise qu'à faire ses affaires & non pas les leurs; Elles se separeront bien-tost, & dès que le gros du mal qu'elles craignoient sera passé, & que le torrent qui leur faisoit

E c c

peur sera tary; elles retireront leurs subuentions, & ne voudront plus fournir de matériaux ny prester leurs mains, pour bastir vne Societé qui pourroit avec le temps leur estre fatale. Expliquons nous avec des exemples. Apres que l'Herésie de Luther eust pris racine en Allemagne, & estendu ses branches presque par tout le Septentrion; il se fit vne Ligue à Smalchalde contre Charles le Quint, de la pluspart des Princes & Estats qui auoient embrassé la nouvelle Secte. A cette Ligue l'Empereur fust contraint d'en opposer vne autre, & d'implorer le secours des Princes Catholiques en vne occasion, où l'ancienne Religion auoit à craindre, tout ce qui peut sortir de funeste & de tragique, de la fureur & du zele des Sectes nouvelles. Quelques vns des Princes Catholiques refuserent d'y entrer, comme les Venitiens, & d'autres s'y embarquerent, dont le plus considerable & celuy qui y enuoya les plus beaux & plus grands secours; fust le saint Pere. Avec ce renfort qui estoit notable, & avec sa vertu & sa fortune ordinaire; l'Empereur vint à bout des Protestans conjurez, & eust poussé plus loin sa vi-

toire dans l'Allemagne, si le Pape qui con-
nût que ce n'estoit pas aux Heretiques, mais
aux Rebelles de l'Empire à qui Charles en
vouloit; ne l'eust arrestée, & n'eust retiré ses
forces, par la soustraction desquelles l'Empe-
reur demeura court, & se trouua aussi immo-
bile en la poursuite de ses desseins; qu'un na-
uire à qui le vent vient subitement à man-
quer, & qui est tout à coup acueilly d'un
calme.

Icy on peut remarquer deux choses, qui esta-
blissent & confirment les propositions que
j'ay auancées. L'une que la Ligue Protestante
tomba du premier coup qu'elle reçut sans se
pouvoir releuer, & qu'une seule bataille gai-
gnée la fit aller en fumée, pour la premiere rai-
son que j'ay dite, & à cause qu'elle manquoit
de quelque grande Puissance, qui eust dequoy
recueillir & rassembler le debris du naufrage:
qui peût metre sur pied de nouvelles forces,
& venir à d'autres faits d'armes contre les En-
nemis, & à d'autres espreuves contre la fortune.
Et certes à parler veritablement de la
chose; Il est des petits Princes qui font Ligue
contre un plus puissant, comme des Societez

Ecc ij

de Ioïeurs qui ne sont pas riches, lesquels ayans fait vn fons où chacun a contribué tout ce qu'il auoit d'argent, dès que ce fons est espuisé ils demeurent tous à sec, & sont contrains de rompre leur Societé & de se retirer sur leur perte. De mesme les autres mettant d'abord sur pied ce qu'ils ont de forces, & faisant tout l'effort qu'ils peuuent faire; sont sans ressource dès qu'ils sont deffaits, & se defilent incontinent, si quelque grande Puissance n'intervient pour les rallier. Nous auons encore veu arriuer la mesme chose à la Ligue Protestante, qui prit son origine de la broüillerie interuenüe entre les Pretendans à la succession de Cleues, & qui achena de croistre & de se former, sur le sujet de l'Electiõ du Conte Palatin au Royaume de Boheme. Le premier grand eschec qui luy suruint luy fust mortel, & elle fust si estourdie de la perte de la bataille de Prague; qu'elle ne peût jamais s'en remettre, & tout ce que le Roy de Dannemarc Albestat & Mansfelt ont depuis fait pour restablir ce Party; n'a seruy qu'à le faire plus longtemps languir, & a ressemblé à la vertu des eaux pretieuses qu'on donne aux malades.

desesperez ; qui leur font bien vn peu reuenir le cœur , & leur allongent la vie de quelques heures ; mais qui ne les remetent point en santé , & ne les empeschent pas de mourir.

L'autre chose qu'il y a à considerer en la Ligue Catholique qui donta la Protestante ; Est qu'elle tenoit veritablement à vne grande Puissance , & qu'elle auoit pour fondement & pour lien vn grand Empereur , & qui fit certes voler plus haut les Aigles de l'Empire , qu'elles n'auoient jamais volé depuis Charlemagne. Mais d'autant qu'il estoit encore plus ambitieux que puissant , & qu'il ne portoit pas à faux cette Deuise , qui designoit l'immensité de ses desirs *de ne s'arrester jamais & de passer tous-^{plus ultra} jours outre* ; D'autant que sans auoir esgart au bien de ses Confederez , il ne songeoit qu'à son vtilité particuliere ; Cela fust cause comme nous l'auons remarqué , qu'ils se retirerent de la Ligue. Apres le reestablissement des Sforces dans l'Estat de Milan , le mesme Empereur auoit essayé de former en Italie vne autre Ligue du premier genre , sous pretexte de l'employer contre les irruptions des François , qui entreprendroient d'en venir troubler la tran-

quillité, & d'y venir faire des querelles: ou pour s'enferuir contre le Turc, si ses flotes venoient à attaquer les Estats de quelqu'un des Confederez, & à mugueter leurs Costes. Mais les Italiens furent aussi fins qu'il estoit subtil, & ayant descouvert l'hameçon qu'il leur tendoit sous vne amorce si specieuse; Ils n'eurent garde de s'y laisser prendre. En effet ils ne voyoient que trop que l'Empereur ne visoit par là, qu'à affermir sa domination en Italie, que les seuls François estoient capables d'y esbranler, & qu'à tenir le Turc en eschec, pour trauailler plus à son aise & avec moins d'obstacle à la ruine des Chrestiens. Les Allemans ne furent pas si auisez & si sages, quand ils formerent la Ligue de Suaube qui seruit si longtemps à faire les affaires de la Maison d'Autriche, & à en auancer la grandeur, sous couleur de courir sus aux Rebelles de l'Empire, & aux Perturbateurs du repos de l'Allemagne. Elle n'en fust pas demeurée là, & le mal qu'elle faisoit croyant bien faire n'eust pas si tost cessé; si elle n'eust esté dissipée par les offices de François Premier, & par l'industrie & l'eloquence de Monsieur de Langey, qui fit comprendre

aux Allemans les artifices de cette Maison, & leur demesla les changes qu'elle leur donnoit pour les destruire.

J'ay donné aux Discours precedens le plan de celle que Philippe second tascha de faire avec le Pape & avec les Venitiens, apres que Selin second eust attaqué Chypre, & que le bruit des armes Ottomanes, avec la consternation & l'effroy, eust volé dans l'Italie. Nous y auons aussi veu comme le Pape & les Venitiens resisterent aux propositions de ce Prince, qui ne respiroient que son vtilité particuliere, & nous verrons en la troisiéme Partie, le peu de satisfaction que les derniers rapporterent de celle qui fust conclüe avecque luy, & comme finalement ils furent contrains de s'accorder avec le Turc separement, & sans le sceu de Philippe; comme plusieurs années auparavant, ils auoient esté obligez d'acheter la paix de Soliman, apres que les procedez de Charles le Quint avec qui ils estoient en Ligue, leur eurent fait connoistre; qu'ils ne pouuoient continuer la guerre en si mauuaise compagnie, & en vne Societé si infidele, sans courir fortune de se perdre. Ce n'est pas seu-

lement avec Charles le Quint & avec Philippe son fils; qu'il a fait dangereux de faire des Liges. Le mal est venu de plus haut, & la corruption a vne source plus esloignée. Ferdinand d'Aragon leur Ayeul, leur auoit transmis avec le sang cette trop interessée inclination, & il fust vn de ceux qui violerent la Ligue de Cambray, au prejudice de Louÿs XII. qui l'auoit si legalement obseruée: & en celle qu'il fit à Blois pour despoüiller le Roy de Naples son parent, & pour la conqueste de son Royaume; apres auoir conquis par la valeur du grand Capitaine ce qui estoit de son partage; Il nous fit harceller de gayeté de cœur, & faire des querelles estudiées, pour nous oster ce qui estoit du nostre.

De cette inuincible habitude qu'il semble que la Maison d'Austriche a faite de n'observer pas ce qu'elle promet, & de cét art subtil qu'elle a de destourner les Liges où elle entre à ses fins particulieres, sans se soucier du bien du reste des Confederez; Il est arriué qu'en celle d'Allemagne qui subsiste sous le nom de Catholique; elle éuita en apparence d'en auoir la direction, pour éuiter de donner
trop

trop de jalousie aux Confederez, & que les forces de cette Ligue furent mises entre les mains d'un Prince qui n'estoit pas de cette Maison, qui fut le Duc de Bauiere, & sous un Lieutenant general qui ne dependoit que de luy, qui fust le Conte de Tilly. Mais en cecy il n'y a eü que transposition d'Enseignes, pendant que la chose a esté la mesme, & l'Empereur est parvenu par une voye destournée, où il ne pouvoit arriuer par le droit chemin. Pendant que les forces de cette Ligue tenoient en eschec les Protestantes, & seruoient de barriere à tout ce qu'elles pourroient entreprendre sur les Catholiques; Il s'auisa d'en mettre d'autres sur pied en son nom, & sous un General qui n'auroit d'attachement ny de relation qu'à luy; qui fust le Valsstein. Avec celles-cy qui se rendirent formidables & prodigieuses, par l'inuention des quartiers que ce grand General donnoit aux Officiers pour faire leurs leuées; l'Empereur commençoit à donner la Loy à toute l'Allemagne, & à menacer tout ce qu'il y auoit d'independant & de libre; quand l'affaire de Mantouie survint.

Fff

Alors certes il parût aux Catholiques, que ce n'estoit pas tant à la Religion des Protestans que l'Empereur faisoit la guerre; qu'à leurs Estats, & la paix qu'il fit avec le Roy de Dannemarc pour vaquer à l'oppression du Duc de Mantoue; leur fit comprendre, que si l'on n'arrestoit le cours de ses armes, Catholiques & Protestans seroient enuoloppez dans vn mesme mal-heur, & qu'elles n'auoient commencé à agir par la ruine des vns, que pour finir par celle des autres. La descente donc en Italie des meilleures forces de l'Empereur sous la conduite de Colalte, & l'estat où l'Allemagne se trouua par là, d'estre deschargée de ce grand fais de gens de guerre sous lequel elle gemissoit; donnerent cœur au Duc de Bauiere & à ses Partisans, de parler hautement à la Diete de Ratisbonne, en faueur de la liberté Germanique, & d'y demander la degradation du Valthein qui en estoit le fleau, & le plus propre instrument que l'Empereur eust sceu trouuer, pour y introduire la seruitude. Les Espagnols aussi à qui l'humeur fiere & indocile du Valthein estoit odieuse, & qui le regardoient comme le plus

grand obstacle qu'ils eussent pû rencontrer sur le chemin qu'ils s'aplanissoient, pour ramener l'Empire à leur Branche; poussèrent fortement à la rouë que le Duc de Bauiere auoit esbranlée.

D'autre costé les Protestans qui auoient esté despoüillez, ou qui croyoient le deuoir estre, & à qui les exorbitantes contributions que le Valsstein leuoit sur leurs Estats, estoient comme les Auantcoureurs & les pre-fages de leur prochaine ruine; traiterent avec le Roy de Suede, pour venir au secours de leur liberté mourante, & pour profiter de la conjoncture du desarmement du Valsstein, & du licentiaement de ses troupes, qui ne demandoient que retraite & qu'azile, contre les Commissions qu'on deuoit decerner, pour informer des rauages qu'elles auoient fait sur les terres de l'Empire. Et ainsi les Princes Catholiques respirerent de la peur que leur faisoit la Maison d'Austriche, pour estre acueillis d'une plus grande & plus dangereuse crainte, qui proceda des victoires du Roy de Suede. Mais si ce mal n'eust precedé, ce remede n'eust pas suiuy, & si les desseins de cette Mai-

son eussent esté moderez, les armes de ce Prince ne fussent jamais entrées en Allemagne, & cette Maison n'eust pas esprouué le mesme sort qu'elle faisoit souffrir aux autres.

Pour ce qui est de la Ligue qui se fit entre le Roy de Suede & les Princes Protestans qui l'appellerent à leur secours; on ne peut certes dire que ce Prince fust vne de ces grandes Puissances dont nous parlons, si l'on les considere par la fertilité & par les richesses de leur pays: par la multitude de leurs Sujets, & par les autres auantages qui sont plustot attachez aux lieux de la domination, qu'à la personne des Princes. Mais celuy-cy auoit des conditions si admirables en la sienne, & vn tel amas de vertus naturelles & acquises; qu'il se mit bien-tost en posture d'estre cette grande Puissance, de laquelle toutes les autres de cette Ligue, furent subalternes & dependantes. Elles jetterent au commencement les yeux sur luy par jalousie, & pour ne donner pas cét honneur à vn de leur Nation, qu'il fust le Chef de la Ligue. Ou peut-estre qu'elles estimerent qu'il n'y en auoit point d'assez fort d'entendement & de courage, pour soustenir la pesanteur de

cette guerre, & qu'elles jugerent encore que le Roy de Suede estant en quelque façon à leur solde; Elles en disposeroient comme elles voudroient, & le contiendroient justement au point qu'il faudroit, pour reprimer les ambitieux desseins de l'Empereur, & pour rendre à l'Empire la tranquillité perduë & son ancienne forme. Mais elles ne s'auisoient pas que ce Prince estoit trop courageux & trop braue, pour joüer ce personnage, & qu'on n'arreste pas comme on veut vn torrent, que la force des neiges fonduës precipite d'une Montagne: & qu'on n'esteint pas facilement vn grand feu que le vent souffle, & qui est attaché à quantité de matieres combustibles. Aussi certes ce Prince se rendit si puissant & si redoutable, par les victoires qui le suiuiotent en foule, & les conquestes qu'il faisoit estoient des Aymans qui en attiroient tant d'autres; que plusieurs des Confederez commençoient auant sa mort, à en prendre de la jalousie. Mais laissons là ces ombrages, & le soubçon d'un mal qui n'est pas arriué, pour parler de ce qui nous touche.

Il est aisé à juger de ce que nous venons de

Fff iij

dire, que la Ligue qui est maintenant sur pied entre nous & nos Confederez , a toutes les conditions necessaires pour continuer la guerre autant de temps qu'il faudra, & pour rendre la paix qui la terminera sacrée & inuiolable. Il s'y trouue cette grande Puissance dont nous auons parlé, qui n'a pas seulement le droit d'Ainessé sur toutes les autres Puissances de la Chrestienté, par l'antiquité de son origine ; Mais qui l'a encore par la grandeur de ses forces, & par vne abondance d'argent & d'hommes, qui ne ressemble pas aux eaux des Cisternes, qui s'espuisent facilement ; mais à celles qui viennent des sources viues, qui se rafraischissent & renouellent à mesure qu'elles coulent. Cette verité est si certaine & d'une experience si confirmée & si generale; qu'il faudroit n'estre pas du monde, ou ne sçauoir rien de ce qui s'y passe; pour l'ignorer. Il faudroit ne sçauoir pas ce que nous auons fait en Italie en faueur du Duc de Mantoüe, & n'auoir pas appris, que nonobstant les espouuantables difficultez qui acompagnoient cette guerre : la desolation que la peste & la famine auoient fait en nos armées,

& les disgraces arriuées à nos Alliez par leur mal-heur ou par leur faute ; Nous auons contraint l'Allemagne l'Espagne & la Sauoye conjurées, de rendre ce qu'elles auoient vsurpé sur eux, & de remettre le Duc de Mantoüe & les Grisons, dans leurs Estats & dans leurs places. Il faudroit ignorer ce que le Roy a fait pour le Party Suedois, & pour ses Confe-derez depuis la bataille de Nortlinghen : ce qu'il fait tous les jours en Allemagne aux Pays-Bas en Italie & en Espagne : l'argent & les hommes qu'il y enuoye, & le nombre de ses armées de Mer & de Terre, qui remplissent nos Ennemis de frayeur, & d'estonnement toute l'Europe.

Quant à la seconde condition qui est la moderation des desirs ; & cette belle Temperance qui met vn frein à l'ambition, & qui enchaîne le courage : que les Heros ont plus de peine d'observer, que de deffaire des armées & donter des Monstres ; On ne peut certes nier qu'elle ne soit d'autant plus admirable en l'Ame du Roy, qu'ayant toutes les lumieres qui esclairent le Cabinet, & toutes les qualitez qui agissent à la Campagne ; Il a outre cela

les forces d'un grand Royaume pour les mettre en œuvre. Il a tout ce qu'il faudroit pour enuahir & pour vsurper; s'il ne croyoit que c'est quelque chose de plus magnanime & de plus glorieux de conseruer & de deffendre: quelque chose de plus diuin d'exercer la Iustice; que de faire des conquestes. Je croy auoir semé tant de preuues de cette verité en tant d'endroits de cette œuvre; que je ne sçay si ce ne sera point vne chose superflue de les rafraichir, & de repeindre dans l'esprit du Lecteur les mesmes images. Quoy que c'en soit je le supplieray de se souuenir, que dans ces longs & tragiques mouuemens qui agitent la Chrestienté; Le Roy n'a jamais attaqué personne le premier, & qu'il ne s'est point esmeu ny esbranlé, que pour secourir ses Amis qu'on opprimoit, & faire cesser les embrasemens qui reduisoient leurs Estats en cendres. Qu'il n'a jamais eü recours à la voye des armes, qu'après auoir essayé celle de la douceur & des offices. Qu'auant que de passer les Alpes pour la deliurance de Casal que Gonçales auoit assiégré; il enuoya en Espagne: il fit faire des offices à Vienne: il fit interposer l'autorité du Pape,

Pape, pour obliger les Espagnols de retirer & encore avec honneur leurs armes du Montferrat; comme auant l'ouuerture de la guerre, il auoit fait traiter avec le Duc de Sauoye par plusieurs Enuoyez, & avec des offres les plus auantageuses qu'il eust pû desirer, s'il en eust pû souffrir d'equitables, pour composer ciuilement le different qu'il auoit avec le Duc de Mantoüe. Et apres qu'il eust fait leuer le siege de Casal en forçant les Alpes, & donné la paix aux Espagnols qui leur estoit si necessaire; Il enuoya à Vienne pour les empescher d'estre parjures: & pour destourner les semences d'une seconde guerre, en faisant deliurer au Duc de Mantoüe les Inuestitures promises par la paix de Suze.

Pour ce qui est de l'Allemagne, tout le monde sçait que le Roy n'est d'abord interuenu aux troubles qui l'ont trauaillée; que pour les apaiser, & que dans la querelle de l'Empereur & du Conte Palatin à cause du Royaume de Boheme; Il enuoya vne celebre Ambassade vers les Princes interessez, pour la terminer à l'amiable, & fit conclurre vne paix à Vline, comme nous l'auons desia dit, qui re-

Ggg

stablissoit les affaires de l'Empire. au point où elles doiuent estre, & dans le temperament qui leur est assigné par ses Constitutions, si elle eust esté obseruée. Du depuis celles de l'Empereur s'estant esleuées à vne prosperité prodigieuse, & le Roy voyant que les Traitez de Ratisbonne & de Cairasque n'auoient pas enfermé tous les vents, qui pourroient alterer vne troisiéme fois le repos de l'Italie, & porter peut-estre l'orage plus loin, si la Maison d'Autriche n'auoit rien dauantage à faire en Allemagne; Il fit traiter auec le Roy de Suede que les Protestans y auoient appellé, & luy fournit quelque argent, pour luy donner plus de moyen d'y donner de l'ocupation & de l'exercice à cette Maison, afin qu'elle ne songeat plus à faire de la peine à ses Alliez, ny à luy-mesme dans son Royaume. Enfin il n'eust jamais declaré la guerre à l'Espagne, si elle n'eust fait enleuer l'Electeur de Treues qui s'estoit mis sous sa protection, sans autre sujet que parce qu'il s'y estoit mis, & qu'il auoit pourueu à son salut par son entremise.

En second lieu pour s'asseurer que les armes du Roy ne sont point mercenaires, ny ne se

meuvent pas par esprit d'intérêt particulier; qu'on se souviene du dernier Traité qu'il a fait avec le Duc Charles, & de la générosité avec laquelle il avoit renoncé en sa faveur à une des plus justes conquêtes, qui puissent sortir du droit de la guerre. Qu'on se souviene combien franchement il abandonna par le Traité de Cairasque presque toute la Savoie & une partie du Piedmont, qu'il avoit légitimement occupées; pour faire rendre Mantoue qui n'étoit qu'une usurpation colorée, & le pays des Grisons qui étoit une usurpation sans couleur. Que si l'on voit qu'il a entre ses mains quelques places de l'Empire, dont le nombre pourtant est fort petit, ou quelques autres de ses Alliez d'Italie; On considérera que ce n'est que pour les conserver à ceux qui n'auroient pas le moyen de les garder par eux-mêmes; ce qui n'est pour luy qu'une matière de grande dépense: ou pour délivrer ses frontières de la jalousie qu'elles en recevoient, si elles tomboient entre les mains de ses Ennemis: ou pour servir de retraite & de sûreté à ses armées, quand elles sont obligées de s'en éloigner, pour le bien de la Cau-

Ggg ij

se commune: ou finalement pour les sacrifier au bien de la mesme Cause, & au reestablisement de ses Amis despoüillez, dans vn Traité de paix generale.

Que si Pignerol luy est demeuré apres les guerres d'Italie, qui ont precedé la paix de Cairasque, & si cette place semble estre le desdommagement de tant de milliers de ses sujets morts, & de tant de millions de son Espagne consume, pour la liberté de ce pays-là; c'est vne chose à mon auis qui ne luy peut estre raisonnablement ny reprochée ny enuieée; puis qu'il ne la garde pas comme vne conqueste, mais comme vne aquisition, & qu'il l'a achetée du gré de celuy qui auoit la puissance de la vendre: puis que ce n'a pas tant esté pour seruir de rempart à son Royaume, & pour en couvrir la frontiere; que pour auoir l'entrée plus libre en Italie, & pouuoir plus prontement acourir à son secours, quand elle seroit attaquée. Bref qu'on considere le desinteressement & la magnanimité, qui ont paru de sa part en tous les Traitez qu'il a faits en Allemagne, depuis celuy que Monsieur de Charnassé fit à Beerualde; jusqu'à celuy que

Monsieur d'Auaux renouuella l'année passée à Hambourg. Qu'on considere la douceur & l'équité des conditions, avec lesquelles il recut sous sa protection l'Electeur de Treues; comme il se peut voir aux Traitez que firent avecque luy Messieurs de Saint Chaumont & de la Saludie. Qu'on considere les soins qu'il a eüs des Interests des Suedois, & la reconnoissance effectiue & réelle, qu'il a tousiours fait exhorter leurs Confederez d'Allemagne de leur rendre; comme il se peut justifier par les Harangues que fit Monsieur de Feuquieres à l'Assemblée de Hailbrun & à celle de Francfort. Qu'on tire enfin consequence pour semblables choses; de ce que le Roy a promis aux Princes d'Italie touchant les places qu'il tient en Piedmont, & qu'il confirme en cette sorte en l'Article troisiéme du Traité qu'il a fait avec Messieurs les Princes de Sauoye.

*Cela se
verra en
la 3. Par-
tie.*

*A Thurin
le 14. Juin
1642.*

Que le Roy ratifie de nouveau les Declarations qui ont esté faites par ses Ministres en diuerses occasions, & par les Lettres que sa Majesté a escrit au Pape & à la Republique de Venise sur la restitution des places qu'elle tient en Piedmont depuis la mort du feu sieur Victor Amedée, pouruen que celles qui sont occupées par les Espagnols ses Ennemis soient pareil-

lement restituées, & que Monsieur le Duc de Savoie en demeure assurement le Maître, sous la tutelle & Regence de Madame. Qu'on tire dis-je la consequence de cela, & l'on jugera que nos Confedererez peuvent prendre vne entiere & pleine confiance en sa conduite, & que ce Conseiller de l'Electeur de Mayence qui est sans doute fort abile homme, lequel en la Diete qui fust tenuë il y a quelques mois à Mayence, creût deschiffrer les desseins que le Roy auoit de s'establiir en Allemagne; s'esloignoit de la verité, quoy que ce fust par le chemin de la vray-semblance, & qu'effectiuement il descouurit les moyens avec lesquels il le pouuoit faire, s'il en auoit la volonté.

Auant que de finir ce Discours j'ay à auertir le Lecteur, que j'auois esbauché deux Traitez qui sont du sujet que je traite en ces deux Liures, l'un de la nature des Equiuoques, & l'autre de la force des Opinions probables, qu'il importe infiniment aux Ministres des Princes de connoistre. Mais d'autant que ce Liure est desia trop long, & que ces deux Traitez pourront entrer commodement en la 3. Partie; l'ay creu qu'il estoit plus à propos de les metre là.

Fin du second Liure.



DE LA PRETENDVE
MONARCHIE DE LA
MAISON D'AVSTRICHE.

Liure Troisième.

DISCOVERS PREMIER.

Que le veritable employ de la vaillance d'un Prince, consiste à deliurer son Estat deguerres civiles, & à en destourner les estrangeres. Que le Roy a admirablement reussy en l'une & l'autre de ces deux choses.

IL est certain que le veritable employ de la vaillance d'un Prince, & le juste exercice de ses armes, ne consistent qu'en ces deux choses; L'une à calmer le dedans de son Estat quand il est agité, & à couper les

racines & tarir les sources des broüilleries qui y peuuent naistre. L'autre à rompre les entreprises que les Estrangers pourroient faire contre luy ou contre ses Alliez, & à retenir par tout l'Ambition dans les bornes de la justice. Quand il a acomply ces deux points, & que ces deux grandes fins luy ont reussi; Il peut dire qu'il ne manque rien à sa gloire. Que sa vie n'a rien à desirer dauantage pour estre l'exemple des Princes & l'admiration des peuples, & qu'une telle prosperité est la derniere preuue que le Ciel puisse donner de son amour, & le plus esmerueillable effet que la vertu puisse produire.

Certes on ne peut nier que le Regne du Roy ne soit remarquable par ces deux merueilles, & comme il a effacé la gloire des plus beaux Regnes qui l'ont precedé; qu'il ne doit point laisser de matiere aux Regnes suiuians par où ils le puissent esgaler, ny dequoy moissonner apres luy en vn Champ, dont il aura pris toute la despoüille. Quant au premier point qui regarde le dedans de l'Estat, & l'obeissance que les Sujets doiuent au Prince; qui ne sçait qu'elle estoit si fort relaschée parmy nous, que
bien

bien souuent elle eschapoit entierement aux Huguenots, & qu'elle n'estoit pas renduë aussi pure & aussi nette qu'elle deuoit, de la plupart des Catholiques. C'estoit vn spectacle hideux & vne monstrueuse confusion que la France; où au milieu de l'Estat on voyoit vn autre Estat: où regnoit vne Faction confirmée, qui estoit entretenuë aux despens du Prince, & engraissee de la substance qu'il luy fournissoit: A qui en laissant des places de seureté, il faisoit vne tacite declaration au monde, que sa foy qui doit estre aussi ferme & aussi immuable que les Poles du Ciel, & les fondemens de la Terre; estoit suspecte & douteuse. Bref où l'on n'entendoit parler que *d'Assemblées, de Cercles, d'Abregez de Cercles, de Chefs de Part*, & de semblables mots de mauuais augure, & qui estoient des marques d'une Reuolte presente, ou des presages d'une Reuolte future. Combien donc estoit-ce vne chose juste, combien mesme il estoit necessaire, qu'une telle Faction fust supprimée, & que tous ceux qui auoient vne commune naissance: qui respiroient vn mesme air, & repo-
soient sous les soins d'un mesme Prince, &

Hhh

sous la protection des mesmes Loix; fussent rangez sous vne égale sujétion, & rendissent vne commune obeissance à la Puissance qui les conseruoit; pour en douter il faudroit que cette Faction fust encore viuante, & qu'on fust enueloppé dans ses mouuemens & dans ses fureurs.

Mais comme cette chose estoit fort juste, elle n'estoit pas moins difficile, & si c'estoit l'effet d'une adresse ordinaire & d'une force mediocre, de destruire vne Rebellion si entreprenante & si opiniastre, que celle dont nous parlons, & de remettre en leur place naturelle des parties si destachées de leur Teste & du reste du Corps, comme l'estoient quelques vnes de cet Estat; Philippe second & ses Successeurs l'ont esprouué en la defection des Pays-Bas. Et certes vn Party comme celuy des Huguenots, enraciné en tant d'endroits de ce Royaume: animé à sa defense par le plus violent & plus indontable motif qui puisse remuer l'esprit humain, qui est celuy de la Religion: orgueilleux & fier non seulement par la consideration de ses auantages effectifs & de ses forces presentes; mais encore par la

memoire des pertes dont il s'estoit releué, & des foibleſſes dont il estoit reuenue. Vn Party dis-je comme celuy-là, muni de trois cens places parmy lesquelles il y en auoit d'excellentes: assisté de plusieurs Chefs de Reputation & de merite, & secouru d'une grande Puissance estrangere; apparemment estoit inuincible.

En effet il ne pouuoit estre vaincu que par vn Prince belliqueux, comme estoit le nostre; qui eust le courage d'entreprendre tout ce qui ne seroit pas impossible, pourueu qu'il fust necessaire: qui eust la prudence de conduire ce grand dessein, & qui sceust desunir ceux qu'il n'eust pas esté seur d'attaquer conjoints & vnis: qui sceust appliquer les remedes doux, où il eust esté dangereux de se seruir des violens, & aller avec la persuasion & l'adresse, où il estoit mal-aisé d'arriuer avec la force & la contrainte. Qui eust la resolution de pousser cette affaire jusques au bout, & de ne demeurer pas à moitié chemin, comme on auoit fait tant de fois; à ne se rebuter point ny par la longueur du temps: ny par la difficulté de l'ouurage: ny par les secretes contra-

H h h ij

dictions qu'il receuroit du costé des siens : ny par les oppositions ouuertes que luy feroient les Ennemis : ny par la resistance qu'il rencontreroit aux Elemens : ny par les alterations contraires que luy pourroient susciter les Astres. Qui eust enfin vne grande pieté, pour attirer sur ses entreprises, & faire descendre sur ses armes les faueurs du Ciel, sans lesquelles tous les efforts des hommes deuiennent impuissans, & tous leurs desseins steriles.

De dire maintenant quels ont esté les fruits que nous auons recueillis de la ruine de ce Party, & quelle sera la moisson de ceux qui ne sont pas encore meurs, & qui ne peuuent tarder de l'estre. Personne ne peut certes douter que ces premiers ne soient fort grands ; Si ce n'est que ce soit peu de chose, que le Roy ait regagné cette partie de la Souueraineté, que son pere n'auoit pû luy laisser, & que ses Predecesseurs auoient perduë. Qu'il soit deuenu maistre de tous ses sujets & possesseur de tout son Royaume. Que son Estat que la diuision rendoit foible & ouuert à plusieurs injures ; ait repris ses forces & réparé ses bresches, par l'vnion & par la concorde de ses

habitans. Que les grands Coupables n'ayent plus d'azile pour leurs fautes, ny les Mesconrans de retraite, pour y aller former ou mediter en seureté de la broüillerie. Qu'en cela le Roy à l'imitation de Dieu ait tiré le bien du mal, & tellement reuny à son seruice ceux qui l'auoient trauerfé; qu'ils ayent depuis trauaillé vtilement à ses desseins, & aydé conjointement avec le reste de ses sujets, à luy aquerir des victoires & à luy preparer des triomphes. Bref que par cette generale & profonde paix qu'il a establie dans son Royaume; Il ait esté plus deschargé & plus libre, pour acourir au dehors esteindre le feu qui deuoroit ses Alliez, & rompre les fers que l'on forgeoit pour l'Italie & pour l'Allemagne.

Pour ce qui est du bien que l'auenir nous prepare, comme vne des suites heureuses de la suppression du Party Huguenot; Nous ne le sçaurions certes assez bien comprendre durant le mal-heur de la guerre qui nous exerce, & il faut que ce soit la paix qui nous le fassent sentir. C'est alors que nous connoissons par experience, que le Roy n'aura fait dans les subuentions & les secours que la necessité de

H h h iij

ses affaires le force de tirer de son peuple; que comme le bon pere de famille, qui ne demolit rien de sa Maison; que pour le reffaire mieux qu'il n'estoit, & d'une architecture plus belle. Que les Bien-faits dont il desire & n'a pû jusqu'icy combler ses sujets; ressembleront à certains fleuves, qui s'estant cachez pour quelque temps dans la terre; n'en ressortent que pour n'y jamais rentrer, & pour couler tousiours sur sa surface. Le temps de ce favorable changement & de cette salutaire revolution est fort proche. La Clemence de Dieu est preste à desarmer sa Iustice, & à luy oster des mains le fleau dont elle nous bat depuis tant d'années. Toutes les causes de la despense que nous faisons s'en vont cesser avec la guerre. La Paix qui ne vient jamais au monde que couronnée d'abondance & les mains pleines de richesses; sortira bien-tost du milieu de cette confusion & de ce Chaos où la Chrestienté est plongée. Ce ne sera point une paix de verre, comme tant d'autres que nous auons veües. Ce sera une paix de Diamant qui aura de l'esclat & de la solidité tout ensemble, & les fondemens que le Roy en

creuse & jette par tout, seront si profonds & si larges, si entiers & si sains; qu'il ne faudra pas craindre qu'il en vienne de long-temps faute.

Il n'a pas certes tenu à luy que cela n'ait esté accompli, & les auances qu'il a faites, & les choses ausquelles il s'est relasché pour ce sujet; sont vn gage asseuré à la Chrestienté, qu'il n'aura rien qui luy soit cher, pour luy donner le repos qu'elle desire. La passion qu'il a pour la paix triomphera enfin de l'inclination que la Maison d'Austriche a pour la guerre. Quoy qu'elle ne puisse estre plus forte ny plus obstinée qu'elle s'est monstrée jusques icy; Elle n'est pas pourtant inuincible, & la grande Machine qui la soustenoit, dont le pied estoit dans cet Estat mesme, ayant esté renuersée: & l'esperance qui la nourrit encore & luy donne vn peu de vie, qui est l'Allemagne, ne pouuant longuement durer; Il faut necessairement qu'elle tombe bien-tost, & qu'elle se perde. Bien que le Roy ait dequoy vaincre & faire des conquestes plus long-temps, que cette Maison n'a dequoy estre vaincuë & faire des pertes; Il n'a jamais pourtant eü plus de vo-

lonté de defarmer qu'il en a maintenant, & plus il se trouue haut dans la prosperité; plus il est prest de descendre pour la consideration du bien general: & plus le courant de ses victoires est impetueux & roide; plus il est disposé à le retenir pour l'vtilité publique. Il fera par magnanimité ce que toute la puissance de ses Ennemis ne le sçauroit contraindre de faire, & rendra genereusement ce qu'il leur seroit impossible de luy oster. Cependant pour induire les Cercles Germaniques à leur fournir de l'argent, pour nous forcer à entendre à la paix, dont à leur dire nous auons auersion; Ils ne laissent de publier par tout, qu'il n'a pas tenu à eux que le Traité de Hambourg n'ait reussi, & que le calme n'ait esté rendu à la Republique Chrestienne. Mais le contraire est si éuenté dans l'Allemagne: le Roy de Dannemarc s'en est laissé si clairement entendre, & les Ministres des Princes Neutres residens à la Cour du Roy de Hongrie, l'ont mandé en des termes si formels & si positifs; qu'il n'y a personne qui ne descouure la fourbe, & ne s'apperçoie du Change.

Quant

Quant au second point il est certes fort auancé, s'il n'est pas encore acheué, & toutes les apparences seront fausses, ou le Roy avec l'ayde de ses Confederez fera mourir dans l'Amme des Princes de la Maison d'Austriche, & sur tout dans celle des Espagnols où il a son principal siege; le dessein de la Monarchie dont on les accuse, & cét illustre Crime qu'on leur impute, qui a esté la source de tant de troubles & de broüilleries. Et c'est ce qui rendra le Regne du Roy remarquable & glorieux par dessus les Regnes de tous ses Predecesseurs, & qui fera que la Chrestienté luy aura vne obligation immortelle, de n'auoir pas souffert que cette superbe Maison qui la deuoroit toute de la pensée; ait fait vn pas pour s'acheminer à ce but, qu'il ne l'ait arrestée, & ait pris vne mesure pour s'y ajuster, qu'il n'ait rompuë. Mais affin que personne ne s'imagine que j'auance au hazart ce que je viens de dire, & que parlant du dessein de cette pretenduë Monarchie, je me fasse vn Monstre pour le combattre; Je me suis resolu d'en estaller icy quelque chose, & de donner vne partie du plan qui en a esté autant que je l'ay pû

comprendre dressé en Espagne. D'autres pourront ajouster ce qui manquera à cette besogne, & finir la peinture que je n'auray qu'esbauchée.

Je prendray ce dessein jusqu'à sa premiere origine & à sa source la plus reculée, & le continueray jusqu'aux troubles de la Boheme, où il se fit plus notablement sentir, & où il esclata avec bien plus de bruit & de violence qu'il n'auoit fait jusques alors. Car il est vray que le premier mouuement de defection ou de Reuolte, (on l'appellera comme l'on voudra) qui s'esleua dans l'esprit des Bohemiens contre la Maison d'Austriche, & la premiere pensée qu'ils eurent de se soustraire de sa puissance, & de passer sous vn autre joug; leur vint de la peur qu'ils eurent de tomber avec le temps sous celuy d'Espagne. L'amour de la liberté dont les peuples du Septentrion sont plus épris que peuples du monde; faisoit aprehender à ceux-cy de voir mourir la leur qui estoit desia blessée en plusieurs endroits, sous vne Domination qui ne tient jamais les Estrangers, que par des chaines qu'ils ne puissent rompre, ny ne s'assure jamais de leur fi-

delité, que par l'impuissance où il les met de se rebeller. D'autre costé le zele de la Religion, qui est également violent soit qu'elle soit bonne ou mauuaise, en l'ame de tous ceux qui en ont; ne permetoit pas qu'ils se figurassent sans horreur & sans desespoir, l'image de ce feure Tribunal qui n'en souffrant qu'une; n'a que le fer & le feu pour desraciner & pour destruire les autres.

De ces deux indontables passions nasquirent & pullulerent, comme des fruits de leur semence & des branches de leur Tronc, ce memorable souleuement qu'ils firent contre l'Empereur Ferdinand, & cette fatale election à la Royauté de leur pays, qu'ils arresterent en la personne de Federic Conte Palatin. Nous ferons voir à la fin de ce Liure par des preuues authentiques, que cette imagination des Bohemiens n'estoit pas vaine ny cette terreur panique, & qu'il y auoit long-temps que les Espagnols auoient formé ce projet. Qu'ils en jetoient tous les jours les fondemens, & assembloient les materiaux pour le continuer, & pour le conduire jusqu'au faiste. Pour ce qui est de la suite de cette defection, qui n'est pas

encore terminée , & des embrasemens qu'elle a causez dans l'Europe , qui n'ont pas encore cessé ; Nous en auons parlé en plusieurs endroits de cet ouurage , & nous en parlerons encore plus amplement en la troisième Partie, où j'espere de faire voir que l'Histoire soit ancienne ou moderne , n'a gueres de Tableau à représenter , où l'on voye des passions plus rapides & plus changeantes de la part des hommes: des coups plus soudains & plus inesperez de la part de la fortune, & des occurences plus signalées & de plus grande instruction pour les Princes ; que celles qui ont paru aux affaires d'Allemagne.

Auant que d'entamer vne matiere si importante , & d'entrer en vn si beau champ ; Je ne sçauois m'empescher de dire vn mot des mœurs d'une partie de ceux , que la Maison d'Austriche employe pour faire la guerre , & des moyens dont elle se sert pour affermir ses conquestes. Ces gens-là donc que nous auons fouuent en teste , & dont nous auons esté quelquefois en peine de deffendre nos frontieres ; sont vne certaine espece d'hommes , à qui le voysinage & le commerce des Turcs ,

dont leurs troupes sont peut-estre meslées; ont fait perdre tout sentiment d'humanité & de Religion, & que l'impunité de leurs crimes qu'ils reçoivent au lieu de solde; a conduit à vne habitude inuincible d'exercer toute sorte de cruauté, & de commettre toute sorte de sacrileges. Les Loix de la bonne guerre, que le Marechal de Brissac rendit autrefois si fameuses en Italie, & qui estoient plus indulgentes & plus fauorables au pays ennemy, que celles qu'on pratique maintenant ne le sont au pays amy; sont pour eux vne matiere dont ils n'ont pas seulement ouïy parler. Ils n'y entrent jamais que l'espée à l'vne main & le flambeau à l'autre. Ils veulent que le feu y consume ce que le fer n'y scauroit destruire. Ils y pardonnent aussi peu aux choses sacrées qu'aux profanes. Les Religieuses & celles qui ne le sont pas, sont également l'objet de leur brutalité, & leur volupté seroit imparfaite, si le meurtre ne succedoit au violement, & si apres auoir contenté ce qu'il y a de plus indocile & de plus desordonné en la partie concupiscible; Ils n'assouissent encore par des supplices horribles & par des morts barbares,

ce qu'il y a de plus inhumain & de plus sauua-
ge en la partie irascible. Je ne dis rien que l'ex-
perience ne confirme, & dont la Lorraine &
d'autres pays, n'ayent veu des exemples; qui
sont aujourd'huy l'estonnement de toutes les
Nations, & seront à l'auenir l'opprobre de no-
stre Siecle.

Quant à ceux en faueur desquels se font
des conquestes si tragiques & si funestes; Il
est certain que s'ils abatent & destruisent quel-
que chose d'un Estat; Tant s'en faut que ce soit
leur dessein, comme c'est celuy du Prince le-
gitime, d'en reparer les ruines quand ils le
pourront, & de le rebastir plus magnifique &
plus superbe qu'il n'estoit auparauant; qu'ils le
voudroient metre s'ils pouuoient rez pied rez
terre: qu'ils en voudroient s'ils pouuoient arra-
cher les fondemens: qu'ils voudroient faire
passer la charruë & semer du sel dessus; afin
qu'il n'y restat vn simple vestige de son premier
Gouuernement, ny vn seul trait de son ancien-
ne forme: & leur methode de s'establir, &
d'enraciner leur domination; est d'y metre à
bas les Testes hautes, jusqu'à ce qu'il n'y en ait
point qui ne soient humbles & basses: d'y pren-

dre pour crimes de leze Majesté, le courage & l'esprit des habitans, & d'y tenir pour Rebelles tous ceux qui ont des qualitez pour oser le deuenir: des'en deffaire ou de les transporter ailleurs, où ils ne leur soient point suspects, & où ils ne puissent irriter vne jalousie si tendre, & vne deffiance si delicate que la leur. Et d'autant qu'ils sçauent bien qu'il faut que plusieurs Generations passent, & que plusieurs siecles s'escoulent, auant que les peuples conquis oublians la premiere domination sous laquelle ils ont vescu; se soient acoustumez à la nouuelle: & que d'ailleurs l'obeissance forcée, & qu'il n'est pas au pouuoir de ceux qui la rendent de refuser, reuient mieux à leur humeur altiere & imperieuse; que l'obeissance volontaire, qui se peut perdre toutes les fois que les sujets changeront d'inclination, & reclameront vn autre Maistre; Ils s'en assurent avec des garnisons & des Colonies, & par le moyen des Gouuernemens & des Magistratures, qu'ils mettent entre les mains de ceux de leur Nation à l'exclusion de ceux qui n'en sont pas, & qui sont punis par là du vice de leur origine, & font penitence d'vn

peché, dont ils ne sont pas coupables.

C'est vne peinture dont les traits ne sont pas sortis de mon inuention & de mon caprice ; mais qui ont esté empruntez de leurs Relations & de leurs Histoires, & dont l'Italie lès Indes & d'autres pays encore sont des Originaux certains & indubitables. Et c'est la desolation que le Roy veut preuenir auant qu'elle naisse, & jusques dans le sein de ses Causes : c'est la tempeste qu'il conjure auparauant qu'elle esclate : c'est le veritable sujet des secours qu'il exige de son peuple, & la raison qui le force de mettre en pratique cette dure & triste Loy de la conseruation ; qui permet qu'on chasse & qu'on diuertisse les plus grands maux par les moindres.

DISCOVRS





DISCOVRS DEVXIEME.

De l'Origine du dessein de la pretendüe Monarchie de la Maison d'Autriche. Quelques avantages qu'apporte la Dignité Impériale au dessus des autres Dignitez Seculieres du Christianisme.



ERDINAND d'Aragon vndes grands Politiques de son temps, & qui eust tousiours des pensées plus vastes que sa puissance; fust celuy qui commença à concevoir le dessein de la Monarchie dont nous parlons, & qui en jetta le premier fondement, en mariant sa fille Ieanne & son heritiere, à l'Archiduc Philippe fils de l'Empereur Maximilian. Son mariage avec Isabelle de Castille, auoit vny & comme enté dans sa Maison toutes les Espagnes, excepté le Royaume de Grenade; dont apres vne guerre de dix ans & par la valeur de Ferrant Gonzaluc, il se rendit

K k k

maistre, & en remporta le surnom de CATHOLIQUE, qu'il a laissé à ses descendans. La mesme fortune des armes, & la vertu du mesme Capitaine; luy donnerent sur nous le Royaume de Naples, que nous auions recouuré sur les Roys de Naples ses parens, & rejoignirent en sa personne, à la part que nous luy en auions faite, celle que nous nous estions gardée en le conquerant. L'Interdit que fulmina Iules second contre Henry Roy de Nauarre nostre Allié, luy presta couleur & fournit pretexte, pour vsurper ce Royaume. Le hazard plustot que la Raison: ou pour mieux dire vne secrete disposition de la diuine Prouidence, qui tend quelquefois à ses fins par dessus la Raison des hommes & contre l'apparence des choses; le fit entendre aux propositions de Chistofle Coulom pour la descouuerte des Indes Occidentales, & luy exposa la despoüille des plus riches Mines que la terre porte, & l'abondance du plus long trauail que le Soleil ait fait, depuis qu'il l'esclaire. De sorte que sa fille apporta de grands Estats & de belles esperances à l'Archiduc son mary, qui recueillit encore du costé de sa Mere les Pays-Bas

& la Conté de Bourgogne; outre ce qui luy deuoit venir du costé du Pere, qui n'estoit pas petit ny peu considerable en Allemagne.

Cette conjunction donc de la chaleur & du courage d'Allemagne, à la secheresse & à la prudence d'Espagne estant faite, & tant de differens Estats estant assemblez en vne mesme Maison, comme autant de bras espars en diuers endroits, pour embrasser & pour estreindre le reste de la Chrestienté; Il posa pour Element & pour principe de la doctrine qu'il laissoit à sa Posterité, de retenir tousiours l'Empire deuers soy, comme la base qui deuoit porter la Grandeur où elle aspireroit, & comme le centre où tous les Estats dont elle meditoit la conqueste, se deuoient vnir pour faire le Cercle de la Monarchie. Voila la premiere idée de ce grand dessein, & le germe d'où il a commencé à s'esclorre. Voila la visée de Ferdinand & sa plus douce esperance; Et bien que l'Ambition de son Gendre luy ait fait de la peine à luy mesme, & ait esté le trouble de son repos & le tourment de sa vieillesse; Il l'a peut-estre souffert avec vn sentiment pareil à celuy d'Agrippine Mere de

Neron, laquelle menacée par vn Astrologue du funeste & tragique traitement que luy feroit son fils s'il paruenoit à l'Empire, **QVE IE MEVRE** repartit elle **POVRVEV Q'IL REGNE.**

Faisons icy vne Station qui ne sera pas inutile, & considerons auant que de passer outre, ce que la possession de l'Empire peut contribuer au dessein de la Monarchie. Il est certain que comme entre les Dignitez Seculieres du Christianisme, il n'y en a point de si haute que l'Imperiale, ny dont la lumiere brille si viuement que la sienne; Elle a aussi des moyens extraordinaires de s'agrandir, & d'attirer où elle voudra injustement ou avec justice, tous les Estats qui dependent d'elle. La Maison d'Austriche l'a fait voir, depuis que Charles le Quint y fust esleué, & qu'il eust fortifié la puissance de l'Empire, par la jonction de tant d'Estats qu'il recueillit ou qu'il usurpa. Les moyens les plus esclatans & qui ont fait le plus de rumeur, dont luy & ses Successeurs se sont seruis, ou se sont voulu seruir, pour estendre leur grandeur à l'ombre de cette Dignité; sont particulièrement ceux-cy.

Le premier est, les Ligues qu'ils ont faites ou trouuées en Allemagne, & qu'ils ont tousjours eü l'adresse d'ajuster à leurs Interests sous d'autres pretextes, & de les destourner à leurs fins particulieres, sous couleur de rechercher & de poursuiure le bien des Confederez. Cette inuention a esté vn des plus rares & plus subtils Stratagemes de leur Politique, & ils n'ont gueres jamais mis d'artifice en œuvre, qui leur ait produit de si grands succez, qui ait eü vne vtilité si presente, ny qui ait agy si long-temps & si imperceptiblement, que celuy-là. Par ce moyen ils ont disposé des forces qui n'estoient pas à eux, comme de celles qui leur appartenoyent, & n'ayant pas en leur pouuoir la Fontaine, c'est à dire les Estats de leurs Amis ; Ils n'ont pas laissé d'auoir la commodité & l'usage du Ruisseau, c'est à dire de leur puissance. Tout le monde sçait com-^{70. ans.} bien de temps ils se seruirent pour enuahir & pour despoüiller, de la Ligue de Suaube qui n'auoit esté instituée, comme nous l'auons remarqué en vn autre endroit, que pour empescher les inuasions qui se preparoient, & faire reparer les violences qui se commetoient

K k k iij

dans l'Empire : Et l'Histoire nous apprend assez, la peine qu'eust Monsieur de Langey à rompre le charme qui lioit les membres de cette Ligue : à leur rendre la veüe, & à leur faire comprendre que ce qui auoit esté préparé comme remede; estoit deuenu poison entre les mains de l'Empereur Charles & de Ferdinand son frere. Tant il est vray que la France a tousiours esté le bouclier fatal de l'Allemagne, & le rempart destiné à arrester les mouuemens de ceux qui ont entrepris sur sa liberté.

C'est encore vne chose assez connuë dans l'Histoire, & dont nous auons fait mention au dernier Discours du Liure second, que si le mesme Empereur n'eust trouué moyen de former en Italie & en Allemagne, vne Contreligue pour l'opposer à celle de Smalchalde, où tous les Protestans presque du Septentrion auoient concouru pour le despoüiller; cellecy l'auroit mis en chemise : l'auroit dégradé de l'Empire, & fait trouuer ridicule la Rodomontade du Duc d'Alue, qui respondit à celuy qui pour luy figurer la grandeur des forces, & le nombre des Puissances conjurées.

contre son Maistre; luy disoit que le Duc de Saxe & le Lantgraue de Hesse, le Roy de Dannemarc & celuy de Suede &c. estoient de la partie; que le Roy d'Espagne & celuy de Naples, l'Archiduc d'Austriche & le Conte du Tyrol; le Duc de Milan & le Seigneur des Pays-Bas &c. estoient entrez dans la Ligue que son Maistre opposeroit, à la multitude & aux forces de ces Puissances conjurées. Mais à la faueur de cette Ligue il donta l'autre: Il fit ouurir les portes aux villes mutines, & eust peut-estre deslors pû acheuer, ce qui a esté depuis si souuent & inutilement tenté; c'est à dire la reduction de toute l'Allemagne; s'il n'en eust esté empesché d'ailleurs, comme nous l'auons rapporté au Discours susdit.

Je ne parleray pas à present d'autant que j'en ay parlé amplement au second Liure, de celle qu'en Allemagne on appelle CATHOLIQUE. Il est vray qu'il ne s'en fit jamais de mieux entenduë, ny d'une ordonnance plus reguliere & plus juste, pour les Interests de la Maison d'Austriche. Et bien qu'elle n'ait eü pour fondement & pour pretexte de son établissement, que la defense de la Religion con-

tre les menaces des Protestans; Il est certain qu'elle n'a presque trauaillé ny presté ses forces jusques icy, que pour remettre les affaires de l'Empereur qui estoient en ruine, & pour rendre sa fortune plus florissante & sa puissance plus formidable.

Vn autre moyen que la possession de l'Empire, a fourny aux Princes de la Maison d'Autriche, pour entreprendre comme impunement sur les autres Princes Chrestiens, & pour faire les apprests de leurs entreprises sans trouble, & sans qu'on ait quasi osé en tesmoigner de la jalousie; a esté l'obligation speciale que l'Empire apporte de faire la guerre au Turc, & le personnage particulier que l'Empereur soustient, d'Aduersaire de ce grand Ennemy des Fideles. Et néanmoins combien de fois Charles le Quint a-t'il armé puissamment, & fait armer l'Allemagne sous ce pretexte? Et combien de fois a-t'il trompé le monde, & donné le change aux Allemans, en tournant ses armes contre la France, ou à l'oppression de quelqu'un de nos Alliez, comme il arriua au Duc de Gueldres? Et lors que nous auons fait semblant de nous remuer au bruit de ces preparatifs:

ratifs: lors que nous nous sommes mis en quelque deuoir de nous couvrir contre l'orage qui venoit à nous: lors que nous auons voulu vser de quelque precaution, pour acquerir vne seureté necessaire; C'est alors qu'il a fait des declamations & des inuectiues: qu'il a publié des Cartels & des Manifestes: qu'il a estourdy les Conclaves & les Dietes, des plaintes qu'il faisoit contre nos Roys, & des acufations dont il les chargeoit, de le destourner d'une guerre sainte, & de l'intelligence qu'à son dire ils auoient avec le Turc, au prejudice de la Chrestienté & de ses Princes. De sorte que par les artifices & par les menées de l'Empereur, nous estions reduits à ce triste party, & à cette dure necessité, ou de nous laisser surprendre au mauuais temps qui se formoit; comme il est quelquefois arriué à François premier: ou d'encourir le blasme de peu de sentiment & de peu de zele pour la Religion, si nous nous preparions quelque abry & quelque retraite pour nous en garentir; comme il est arriué à Henry second.

Je diray par ocasion, & pour le diuertissement du Lecteur; que les Successeurs de

Charles n'ont pas mal profité de son exemple, & qu'ils ont esté tres-dignes Imitateurs d'un si bon maistre. La Barbarie a plusieurs fois esté le sujet apparent des armemens qu'ils ont faits, & des flotes qu'ils ont équipées contre la France. C'est un artifice qui semble estre naturel & comme infeodé au sang d'Espagne, & l'on en a veu des exemples aux Siecles plus reculez, & en des temps où la fourberie ne passoit pas pour prudence, & où il y auoit encore communement dans le monde de la bonne foy qui estoit pure, & de la sincerité qui n'estoit pas sophistiquée. En voicy un assez remarquable. Apres que Pierre III. Roy d'Aragon eust perdu la Sicile, & que nous l'eusmes despoüillé de cette belle Isle, qui ne luy estoit gueres moins chere que son Royaume d'Espagne; comme il estoit grand maistre en l'art de dissimuler, il tesmoigna bien-tost en apparence d'estre consolé de sa perte; & bien que le cœur luy en saignat depuis tres-profondement, il fit mine de n'y songer plus, & de n'auoir des pensées pour la reparer, que du costé de la Barbarie. Sur un bruit si specieux qu'il fit semer de tous costez, & sur une si

plausible impression dont il esbloüit les autres Princes Chrestiens; Il en obligea quelques vns entre lesquels estoit saint Louÿs, de l'assister d'argent pour s'équiper, & pour dresser l'armée naualle qu'il destinoit à vne Expedition si sainte. Ce bon Prince qui ne sçauoit regner que pour la gloire de Dieu, & à qui la Couronne qu'il portoit eust trop pesé, si la Charité ne l'eust soustenuë; n'eust garde de manquer à vne si pieuse assistance, & il se laissa aisement prendre à vn atrait si subtil & à vne amorce si delicate. Mais cette armée qui deuoit conquerir l'Afrique, & metre aux fers les Infideles de ce pays-là; n'eust pour objet que la ruine des François qui estoient en Sicile, & par vne supercherie sans exemple, & par vne mer de sang respandu qui n'eust jamais rien de semblable; fit ces fameuses Vespres que depuis on a appellé Siciliennes.

Ce n'est pas pour parler sainement de cette affaire, que ce fust vn crime à Pierre, s'il n'y eust eü autre chose; de tenir caché vn dessein qui ne pouuoit reussir que par le silence, & qu'on ne deust mesme louer la responce qu'il fit à Martin I V. qui luy enuoya demander, où


tendoit ce grand Equipage, & ce puissant Appareil de guerre; *Que si sa chemise sçauoit ce qu'il auoit dans le cœur, il la brusleroit tout à l'heure.* Les Princes certes ne sont pas obligez de n'auoir point de secret pour les autres Princes, & de rendre raison de tout ce qu'ils veulent faire, à tous ceux qui le leur voudroient demander. Mais il n'y a point de couleur ny d'art, pour déguiser & pour adoucir la mauuaise foy de Pierre, & cette noire procedure qui luy fit destourner l'argent que saint Loüys luy auoit donné pour faire la guerre aux Infideles, à l'oppression des Chrestiens, & conuertir vne matiere destinée à vne œuvre sainte, au massacre & à la boucherie de ses sujets. Ce que je pretens inferer de ces exemples, & de plusieurs autres de mesme nature, que la Maison d'Austriche peut fournir assez abondamment; est qu'il y a vne trop grande facilité, & vne trop stupide disposition dans l'Ame de plusieurs personnes, & particulièrement de celles qui se piquent de deuotion, & font profession d'une vie plus reformée; à croire toutes les choses que les Partisans & les Emissaires de cette Maison publient, en faueur de sa

piété. Que le zele qui semble la brusler pour la Religion; n'est quelquefois qu'un feu en peinture, & qu'un zele en apparence, & que cette belle montre qui donne si fort dans la veüe de tant de gens; ressemble aux couleurs de l'Arc-en-ciel, qui ne sont qu'illusion & que tromperie pour les yeux des simples.

Cette obligation particuliere qu'ont les Empereurs Chrestiens, de s'opposer aux armes du Turc, & d'estre le rempart de la Chrestienté du costé de la Hongrie; leur apporte encore vne faculté speciale que n'ont pas les autres Princes de faire des Liges, & d'in-
duire les autres Princes d'armer quand il est
besoin contre l'Ennemy immortel de leur Religion & de leurs Estats.

LII iij





DISCOVRS TROISIEME.

Suite des avantages qu'apporte la Dignité Imperiale au dessus des autres Dignitez Seculieres du Christianisme.



N troisiéme moyen que l'Empire fournit à ceux qui l'occupent, de faire progrez & d'avancer leurs affaires en faisant des grates ; ou en suscitant des traverses ; Est la puissance soit legitime soit usurpée, avec laquelle les Empereurs se sont de tout temps meslez de la conuocation & de la tenuë des Conciles œcumeniques. Il n'y a point de doute qu'à cause qu'ils sont les Testes les plus releuées du Corps Seculier du Christianisme : ou à cause de quelque droit particulier qui est annexé à leur Dignité (si tant est qu'il y en ait d'annexé ;) Ils n'interuiennent avec plus d'autorité & de reuerence, que les autres Princes, à ces grandes & importantes Assemblées. Il n'y a point encores de doute, que

particulièrement aux derniers Siecles, où l'on a esté contraint d'y traiter des affaires temporelles, aussi bien que des Ecclesiastiques, à cause de la puissance des Heretiques & de celle des Infideles; Les Empereurs n'ayent pû s'y rendre formidables ou indulgens à qui ils ont voulu: Et comme c'est le naturel de l'esprit humain d'aller tousiours au delà des choses permises, & d'allonger les limites de sa Jurisdiction; qu'au lieu de remedier aux inuasions des Infideles & à la defection des Heretiques, par les voyes conuenables; Ils n'ayent tantost voulu imposer vn joug aux Papes & leur metre des ceps aux pieds; comme parloient les Ministres de Charles le Quint, sur le sujet du Concile de Trente: & n'ayent tantost applaudy au murmure des Heretiques, & aux plaintes qu'ils ont esleuées contre l'Eglise, à cause des mœurs des Catholiques, & sur tout à cause des vices & des abus dont ils ont acusé la Cour de Rome.

Cette reformation certes des mœurs des particuliers; est vne chose fort desirable, & ç'a tousiours esté le souhait des gens de bien, de voir refleurir l'ancienne discipline, & re-

naître l'innocence du Siecle d'or de l'Eglise. Mais les œuvres ne sont pas si aisées à faire que les souhaits, & les Papes sous lesquels s'est conuoqué ou tenu le Concile de Trente; ont eü raison d'auoüer qu'il estoit juste, qu'on purifiast l'Eglise de la corruption qui s'estoit glissée en quelques vns de ses Membres, & qu'on ostat les taches qui defiguroient quelques vns de ses Ministres. Mais qu'il n'estoit pas moins juste & moins raisonnable, que les Princes qui demandoient avec tant d'ardeur & de vehemence, cette Reformation & ce renouvellement d'esprit des Ecclesiastiques; trouuassent aussi de leur costé à netoyer ce qu'il y auoit de gasté chez eux, & à guerir leurs Ames de ces furieuses passions d'ambition & de vengeance, dont elles estoient agitées, & qui remplissant la Chrestienté de feu & de sang; n'en faisoient qu'une solitude & qu'un Cemetiere. Qu'il falloit premierement en bannir la guerre, qui estant la Mere de tous les vices; estoit une des sources de la licence de quelques Ecclesiastiques, & un des principes de leur ignorance. Qu'il falloit rendre la paix au monde, & faire cesser l'aigreur des
courage

courages & la hayne des Partis; affin que les Peres qui iroient au Concile, y vissent le cœur vuide des passions de leurs Maistres, & l'Ame seulement pleine des Interests de l'Eglise.

Quant aux Heretiques qui s'en estoient separez, sous couleur d'y auoir remarqué de la corruption; (supposé que cela fust ainsi) qu'ils l'auoient fait par vne corruption encore plus grande. Que c'estoient des freres laches, qui au lieu de trauailler à la guerison de leurs freres malades, les laissoient mourir à faute d'assistance: & des Enfans desnaturez qui abandonnoient la vieillesse de leur Mere, sous pretexte que sa beauté declinoit, & qu'ils croyoient auoir veu quelque tache & quelque ride sur son visage. Qu'il falloit retrencher les superfluitez & les excroissances de l'arbre s'il y en auoit; mais non pas le couper au pied, & estançonner ce qui penchoit du bastiment; mais non pas l'abatre. Que ces gens-la estoient venus faire la guerre au luxe à la pompe & aux autres vices de la Cour de Rome, qui estoient des appartenances des Sens & de la matiere, avec l'orgueil & la se-

M m m

lonie, & les autres pechez qui estans propres de l'esprit; auoient vn venin plus dangereux, & estoient d'un ordre superieur en malice.

Reuenons à nostre sujet, & pour la preuue & la confirmation de ce que nous auons dit cy dessus; n'oublions pas d'observer que le Concile de Trente soit en la poursuite de sa Conuocation, soit en sa tenuë; a esté entre les mains de Charles le Quint comme vn couteau qui trenchoit tantost contre le Pape, & tantost contre les Protestans d'Allemagne: ou comme vn instrument dont il se seruoit, tantost pour gaigner les inclinations des mesmes Protestans, & les attirer à sa cordelle: tantost pour se rendre agreable au Pape, & le metre dans ses Interests. Et ainsi par le moyen de la crainte & de l'esperance, & par le ministere de ces deux puissantes passions; Il taschoit de dominer à Rome & en Allemagne: de donner la Loy au reste de la Chrestienté, & sur tout de battre & de miner la France, & de s'oster le grand contrepoids qu'il trouuoit pour l'exécution de ses desseins, aux forces de ce Royaume.

Aux Protestans qui pleins de l'esprit de

Luther & gastez de son venin , brusloient de hayne contre le saint Siege; Il promettoit la conuocation d'un Concile où son autorité deuoit estre refformée : & au Pape qui outré de douleur de voir ce grand Schisme & la defection de tant d'Ames; ne soufpiroit qu'apres leur retour au sein de l'Eglise, & leur reunion au Centre de son vunité qui est le saint Siege; Il donnoit esperance de faire venir les Protestans au Concile, & au cas qu'ils ne voulussent se soumettre à ses Resolutions & à ses Decrets; de les y contraindre. Maintenant il faisoit intimier à ceux-cy mesmes ces menaces, & leur faisoit peur des armes du saint Siege qu'il deuoit fortifier des siennes. Et c'estoit lors qu'ils se monstroient difficiles à ce qu'il desiroit d'eux, & qu'ils ne vouloient conspirer & travailler de concert avecque luy, à la ruine de la France; ce qui estoit le but de ses artifices. Vne autrefois il essayoit de donner de la terreur au Pape, & le menaçoit de le faire tellement brider par le Concile, & reduire son pouuoir à des bornes si estroites; qu'il se repentiroit de n'auoir pas esté assez indulgent à ses desirs, & assez fauorable aux mouuemens

Mmm ij

qui le transportoient contre ce Royaume. Quelquefois pour nous rendre odieux aux Protestans, & pour aiguïser la hayne qu'il leur imprimoit contre nous, & faire fructifier les semences qu'il en auoit de long-temps jetées; Il leur donnoit à entendre que c'estoit nous qui estions l'obstacle de la tenuë du Concile, aux lieux qui leur estoient commodes, & aux conditions qui leur estoient agreables. Et quelquefois il faisoit exagerer deuant le Pape, les precautions que nous apportions, & les preseruatifs dont nous nous munissions, pour nous garentir des pratiques qu'il formoit contre nous, & des maux qu'il nous preparoit à Rome & au Concile.

De sorte que nous n'eusmes pas peu de peine à destromper les Allemans à qui il auoit donné de si sinistres impressions de nostre conduite: ny besoin de peu d'industrie hardiesse & bonne fortune, pour faire auorter les propositions qu'il fit faire à Trente par ses Ministres. Asçauoir, que toute la Chrestienté se liguat contre nous, pour nous faire renoncer à l'Alliance du Turc; bien que nous ne nous en soyons jamais seruis que pour le bien.

des Chrestiens, ou pour vne defense necessaire. Pour restablir le Duc de Sauoye son Oncle, aux places de ses Estats que nous auions ocupées; quoy que c'eust esté legitiment & à tiltre de juste guerre. Bref pour d'autres fins qui le concernoient, & non la Chrestienté, & qui tendoient à la promotion de ses Interests, & non à l'auancement de ceux de l'Eglise. De là nasquirent ces prudentes & necessaires Protestations que Henry second fit faire à Rome & à Trente par ses Ambassadeurs, contre ces Conjurations & contre ces Monopoles. De là vint cette genereuse resistance que firent les Suisses aux menées du Nonce du Pape prattiqué par l'Empereur, & à la violence des offices qu'il faisoit, pour les destacher de nostre Alliance, & pour empescher chez eux la permission des leuées de gens de guerre, qui se faisoient en nostre faueur.

Je ne veux pas oublier icy vn trait remarquable de la mauuaise volonté de Charles contre la France. Bien que le Turc fust le juste Aduersaire, comme nous l'auons desia dit que sa Dignité luy assignoit, & que les Contris-

Mmm iij

butions de l'Empire qu'on appelle ROMAS-
ZVK, ne s'ordonnent principalement que
pour luy faire la guerre; Si est-ce qu'après
que les Princes & Estats Protestans, pour
se deliurer des importunitéz qu'il leur faisoit
de l'assister contre nous: pour ne trauailler
pas eux-mesmes à saper les fondemens de leur
subsistance, qui sont en la protection de cette
Couronne, & pour luy ouurir vne Carrière à
s'esprouuer plus digne de luy; luy eurent of-
fert de le seruir de cent mille hommes contre
le Turc, il les refusa, & s'obstina à vouloir ce
secours & cette subuention contre ce Royau-
me. Il ne faut pas aussi oublier vn autre trait
non moins remarquable, du respect que ce
Prince a porté, & de la deference qu'il a ren-
duë au saint Siege & au Concile. C'est que
pour gagner le cœur des Protestans, & pour
disposer de leurs forces contre nous; Il leur a
permis durant la tenuë du Concile & aupara-
uant: à la face du Legat & des Nonces du Pa-
pe, & sans leur interuention; Il leur a dis-je
permis diuerses Assemblées & Conferences,
pour y traiter & resoudre diuers points qui
concernoient la Religion, & qui deuoient

estre decidez par le Concile. C'estoit proprement enraciner par son autorité l'Herésie, qui auoit esté plantée par sa conniuece, & donner vn nouveau tiltre à des Erreurs, qui ne croyoient estre que trop bien fondées.

S'il fust arriué quelque chose de semblable à quelques vns de nos Roys, & s'ils eussent si insolemment oublié qu'ils estoient Enfans de l'Eglise; Il n'y eust point eü assez de foudres au Vatican pour lancer sur leurs testes, au jugement de nos Aduersaires : Il n'y eust point eü de couleurs assez noires pour obscurcir leur honneur, ny de Satyres assez violentes pour le flectir. On ne doutera point de cette verité, si l'on se souuient du bruit que fit chez nos voyfins & en France mesme, le Colloque de Poissy; qui neantmoins ne fust assemblé que du consentement du Pape: qu'à la presence d'un Legat Apostolique, & pour appaiser le Schisme qui nous deschiroit, & degrader plus solennellement l'Herésie; comme le Cardinal de Lorraine l'auoit fait esperer au Roy.

Et toutefois pour des entreprises si impies, & des attentats si sacrileges, que ceux de l'Em-

percur; on n'en murmura à Rome qu'entre les dents, & l'on n'en fit que des plaintes secretes & des discours à l'oreille. Et soit que la mollesse de quelques vns de cette Cour, ne souffrit pas qu'on y choquat hautement la puissance & la fortune de Charles: ou que la prudence conseillat de dissimuler & laisser courir vn mal, qu'il eust fait dangereux d'entreprendre de chastier; cette procedure demeura impunie à Rome: les armes du saint Siege ne furent pas employées à la venger, & la Maison d'Austriche n'a pas laissé depuis, de se conseruer non seulement parmy les sujets, mais encore parmy les sujets des autres Princes; la reputation d'estre l'espée & le bouclier de l'Eglise. Tant il est vray que cette Maison est puissante en artifices: qu'elle a des ressorts cachéz & subtils pour remuer les Creances, & du plastre fin & delié pour déguiser sa laideur & couvrir ses taches. Tant il est vray aussi que la France est malheureuse de ce costé-là, & que le zele qu'elle a tousiours eü pour la Religion, & le respect qu'elle a tousiours porté au saint Siege; ont eü peine de gagner creance parmy les hommes, & de

de s'insinuer mesme dans l'esprit de ses propres Enfans, & de ceux-là encore, qui ont veritablement de la pieté & de bonnes intentions; mais qui donnent trop à leur chaleur qui n'est pas assez esclairée ny assez discrete, & deffèrent trop peu à la lumiere des autres; dont la chaleur est prydente & considerée.

Vn quatriéme moyen capable de gaigher des Estats à peu de frais, & des victoires sans combatre, que les Empereurs de la Maison d'Austriche ont voulu introduire dans l'Empire, & qui les eust menez bien loin si on les eust laissé faire, & s'ils n'eussent trouué la France en teste pour les arrester; est la voye des Sequestres. Cette voye a vne consequence si funeste à la liberté des Princes & des Estats qui dependent de l'Empire; que les plus affectionnez mesmes à la Maison d'Austriche en ont eü peur & s'en sont scandalisez, & le Duc de Bauiere qui a de tout temps esté vne des colonnes qui ont soustenu la grandeur de cette Maison; s'en laissa assez entendre en ce sens par vne letre du 13. Decembre 1629. que le sieur Iocherius escriuit en son nom à Mon-

Nnn

sieur le Nonce Bagny , pour responce à celle que ledit sieur Nonce luy auoit escrite, du 5. Octobre de la mesme année ; par laquelle il luy represente de la part du Roy , *la consequence du refus que l'Empereur faisoit à la priere des Espagnols, de donner l'Inuestiture des Estats à ceux qui en estoient les legitimes heritiers, & qui estoient compris dans les premieres Inuestitures, & de les despoüiller desdits Estats par le moyen des Sequestres.* Cela regardoit le dernier Duc de Mantouë.

Ils commencerent à faire l'ouuerture de ce chemin , & à metre ce moyen en pratique, apres la mort de Guillaume Duc de Cleues. Les Espagnols qui vouloient à quelque prix que ce fust enuahir sa succession, qui outre l'estenduë & la bonté du pays qu'elle embras-
soit, estoit pour eux d'une merueilleuse bien-
seance ; obtindrent de l'Empereur qu'il en-
uoyat occuper Iueilliers par l'Archiduc Leo-
pold Beau-frere de leur Roy, & tenir cette pla-
ce en forme de Sequestre ; jusqu'à ce qu'il eust
jugé à qui de droit cette Succession apparte-
noit , & terminé en justice ce fameux diffé-
rent, où il y auoit tant de nœuds à deslier , &
tant de parties à contenter ; que la decision

n'enpouuoit estre que fort longue & mal-aisée. Cette inuention de Sequestres s'ils l'auoient pû establir ; leur donneroit moyen de s'asseurer avec le temps sous vne apparence de justice , la possession de ce où ils n'auroient point de droit , & dont ils se feroient saisis par vne simple bien-seance. En effet il n'est rien de plus vray , que l'humeur des Pretendans dont il y en auroit tousiours quelqu'un qui seroit à leur disposition : ou la nature de l'affaire qui ne seroit jamais si nette & si claire , qu'il n'y eust tousiours quelque ombre & quelque nuage qui feroit peine à chasser : ou les formes mesmes de la Iustice si souuent contraires à l'Expedition de la Iustice ; feroient naistre tant de difficultez & esclorre tant d'incidens ; que les veritables maistres du bien contentieux lassez d'une longueur sans fin , & desesperant de le pouuoir jamais retirer de mains si puissantes & si aides, que celles qui le leur retiendroient ; seroient contrains d'entendre aux propositions qui leur seroient faites d'en recevoir compensation , & de prendre quelque chose de réel & d'effectif, pour vn peu d'esperance mal fondée , & pour quelques tiltres

N n n ij

vains & friuoles. De sorte que ceux-là deuiendroient apparemment maistres legitimes, de ce dont ils n'estoient auparauant que Detenteurs de mauuaise foy, & ce qui au commencement & dans son origine, n'estoit que force & que violence; prendroit au progres & dans la suite, le visage & les couleurs de la Iustice.

C'est ainsi que les Espagnols auoient resolu de traiter le Duc de Mantouë; s'il eust voulu consentir au Sequestre de la Citadelle de Casal, & que peut-estre ils l'eussent traité encore s'ils eussent pris cette place de force, comme ils firent de grands efforts pour la prendre. L'offre qu'ils luy firent faire du Cremonois à la referue de la Citadelle de Cremonne, ou de quelque autre Estat de pareille valeur dans la Franche Conté, au lieu du Montferrat; Est vn auen tacite de la violence qu'ils exerçoient, puis qu'ils se vouloient metre en quelque deuoir de la reparer, & vn argument manifeste du procedé qu'ils veulent tenir en l'usage des Sequestres, & dans l'introduction de ce nouveau moyen de s'insinuer dans les Estats qui les acomodent, sous quelque for-

me d'équité, & en sauuant les apparences de la justice.

Charles le Quint à la verité dans le different qui a si long-temps exercé les Ducs de Sauoye de Mantoüe & d'autres Princes, sur le sujet du Montferrat; ne proceda point par la voye du Sequestre auant que de prononcer sur cette affaire. Cette entreprise luy sembla trop hardie & trop jalouse, eü esgart à la conjoncture où il se trouuoit, & il comprit bien que cela refroidiroit la volonté de ceux qu'il vouloit gagner dans l'Italie, & luy rendroit Ennemis, ceux qu'il desiroit qui demeurassent en Neutralité. Cette crainte tint en arrest le desir qu'il auoit d'vsurper le Montferrat, sous le pre-texte dont nous venons de parler, & il ayma mieux traifner cette affaire en longueur, & s'en seruir comme d'un leurre & d'une amorce, pour attirer à son party le Duc de Sauoye, & pour desbaucher du nostre le Marquis de Salusse, dans l'esperance que le Montferrat sur lequel il auoit aussi des pretentions, luy seroit adjudgé; comme Antoine de Leue luy auoit donné à entendre. Enfin apres s'estre long-temps joiué de la credulité du Duc, & auoir

Nnn iij

trompé le Marquis; Il adjugea le possessoire du Montferrat au Duc de Mantoue, & en laissa le petitoire à celuy de Sauoye pour le poursuiure ciuilement & selon les formes de la justice, à la Chambre Imperiale. Il n'auoit garde d'agrandir dauantage celuy, sur les Estats duquel il auoit de grands desseins, & qu'il ne pouuoit souffrir estre le maistre de la barriere qui separe la France de l'Italie, & le gardien de la porte par où les François y peuvent entrer. Ses Successeurs ont esté plus entreprenans, & tout ensemble plus inconsiderez que luy, & ils ont osé remuer vne machine, qui ne s'est esbranlée qu'à leur honte & pour leur ruine. Ils ont suscité pour ce sujet vne guerre cruelle & longue dans l'Italie. Mais ce qu'ils ont en cela gagné a esté de tomber par vn juste jugement de Dieu dans le precipice qu'ils vouloient éuiter, & d'attirer les François en ce pays-là, qu'ils en vouloient pour jamais exclurre.

Reuenons au sujet des Sequestres qui nous a jettez si auant dans cette matiere, & remarquons que c'est vne chose bien estrange; que les Espagnols qui les trouuent si plausibles &

si justes au fait des autres, n'en veulent point ouïr parler aux affaires contentieuses où ils ont interest, & tout le monde sçait que dans la Succession du Portugal, que cinq ou six Pretendans rendit fameuse du temps de nos Peres; Philippe second ne voulut jamais consentir que ce Royaume fust mis en depost: ny faire dependre comme il disoit son droit du jugement d'autrui; qui ne fut pourtant jamais aussi clair & indubitable, que l'a esté celuy du Marquis de Brandebourg & du Duc de Neubourg pour la Succession des Estats de Cleues, & celuy du Duc de Neuers pour la Succession de Mantoüe.

Vn cinquième moyen de s'agrandir, & vn droit que l'Empire donne quelquefois de faire progrez & des'estendre; Est la confiscation des Fiefs qui en releuent. Mais d'autant que nous en traiterons en la troisième Partie dans l'affaire du Palatinat, & que nous nous y arrêterons expressement, au moins si quelque consideration de prudence ne nous en empesche; nous nous contenterons d'y renvoyer le Lecteur, & passerons outre apres auoir remarqué qu'encore que la Dignité Imperiale ap-

porte ces grands Droits & ces belles prerogatiues, & qu'elle esclate par ces illustres priuileges sur les autres Dignitez Seculieres du Christianisme. Toutefois d'autant que les abus & les excez des grandes Puissances, ne sont pas moins dangereux que les desbordemens des grandes Riuieres, & qu'elles ressemblent au Char du Soleil des Poëtes, qui ne peut sortir de son chemin naturel, ny quitter la ligne Ecliptique, sans brusler vne partie du monde; On a bridé celle des Empereurs comme nous l'auons dit ailleurs, & on luy a esleué des bords pour le dire ainsi, afin qu'elle ne sorte point de son liët, & ne passe pas ses limites: On luy a marqué les routes qu'elle deuoit suiure, & le cours qu'elle deuoit prendre, par les Pragmatiques Sanctions, & par les Resolutions des Dietes des Princes & Estats de l'Empire. Ce sont ces Loix & ces Resolutions qui moderent cette puissance, & qui font la symmetrie du Temperament, & l'harmonie des humeurs de tout le Corps, dont les Empereurs ne sont que les Testes. C'est ce que vouloit dire l'Electeur Maurice de Saxe, lors qu'il disoit que l'Allemagne faisoit autant de pas

pas vers sa ruine, que l'Empereur ajoustoit de nouveaux degrez à sa puissance, & qu'affin qu'elle fust tousiours florissante & libre; Il estoit necessaire de conseruer tousiours leur autorité aux Princes, & leur force aux Constitutions de l'Empire, qui estoient le contrepoids qui la balançoient.

Mais d'autant qu'il estoit mal-aisé de maintenir la justesse de ce contrepoids, & que l'Ambition non plus que le feu ne dit jamais c'est assez, & que pour dominer elle rompt toutes les chaines dont la justice pense la lier, & ne respecte ny Loix ny Coustumes pour se satisfaire; On a cherché de l'appuy pour l'Empire hors de l'Empire, & la subsistance du Corps & la liberté des Membres; ont esté particulièrement sous la protection de la France. En quelle maniere s'est formée cette protection, si c'est par Traitez prealables, ou par la Coustume tournée en force de Loy, qu'a tousiours eü cette Couronne d'acourir au secours de l'Empire, & d'empescher la dissolution de ce Corps, & l'aneantissement de sa forme naturelle; Je n'ay que faire de le rechercher icy. Il suffit que les Allemans en tom-

O o o

*AN 15. Jan-
vier 1551.*

bent d'acord, & qu'ils l'ayent tousiours declaré aux Traitez qu'ils ont fait avec nos Roys, lors que pour se redimer de vexation ; ils sont venus implorer leurs offices ou leurs armes. On voit cét Aueu si formel & cette Declaration si expresse, en la Ligue que l'Electeur Maurice & les Princes ses Associez firent avec Henry second, pour sauuer l'Allemagne des fers où Charles le Quint la vouloit metre; qu'il n'y a pas lieu d'en douter. De sorte qu'on ne peut acuser la France de temerité ny d'entreprife, lors qu'elle se mesle des affaires d'Allemagne, & qu'elle interpose ses soins & ses armes; affin que la balance dont nous venons de parler demeure droite, & ne panche ny du costé de l'Empereur, ny de celuy des Princes & des villes libres de l'Empire.

Je ne parle pas icy, d'autant que je l'ay fait ailleurs, de cette generale & indefinie obligation que les Grands ont, de secourir les Petits quand on les opprime. La Loy commune de l'humanité dont ils ne sont pas exempts, & la Loy particuliere de la Charité, qui entre quelquefois dans leur conduite; exigent ce deuoir de tous ceux qui le peuuent rendre, & la Loy

de leur interest, qui est la suprême & dominante Loy des Princes; les sollicite assez d'empescher que les foibles ne soient deuorez par les plus puissans, de peur que ceux-cy ne le deuiennent trop; & que la puissance enflamant leur ambition, ne la pousse & ne l'estende jusques à eux. Je ne parle pas aussi d'une autre obligation plus bornée & plus circonscrite, que la France a de proteger quelques Princes & Estats particuliers de l'Empire, & de leur seruir d'azile & de port, en temps de persecution & de tourmente. Telle est la protection & la sauuegarde qu'elle doit particulièrement à l'Electeur de Treues, & qui ayant esté respectée par le Roy de Suede, & sacrée à des Heretiques victorieux; a esté mesprisée par les Espagnols, & violée par ces bons Catholiques avec qui ny luy ny nous n'auions pas guerre.

Il est vray que l'assistance que la France doit à l'Empire quand il est menacé de ruine; n'a gueres paru depuis qu'il est entré dans la Maison d'Autriche, qu'à l'endroit des Membres contre les entreprises du Chef: comme aussi l'oppression & la violence qu'on a voulu re-

Ooo ij

pouffer; ne sont gueres venuës que de ce costé-là, & n'ont eü leur origine, que dans les inuasions que les Princes de cette Maison ont voulu faire sur la liberté des autres. Elle n'a pas neantmoins manqué au dernier Empereur quand il en a eü besoin: & si aux troubles de la Boheme, & apres les heureux commencemens, & les signes apparens d'une suite encor plus heureuse des armes du Palatin, le Roy n'eust laissé couler quantité de François pour fortifier ses troupes, & enuoyé la plus illustre & plus solennelle Ambassade qui soit sortie il y a long-temps de ce Royaume, pour defiler la Ligue des Protestans, & rompre le cours de leur prosperité; l'Empereur auroit couru fortune d'estre despoüillé de ses Estats: d'esprouer le mesme sort qu'il a fait souffrir au Palatin, & de deuenir pensionnaire des Espagnols; comme l'autre l'a esté des Hollandois.

Il est aisé à conclurre de ce que nous auons dit cy dessus; que ce n'est pas sans raison que la Maison d'Autriche fait de l'Empire, la base & le centre de sa pretenduë Monarchie. Que ce n'est pas sans raison que le feu Empereur, escriuant au Roy d'Espagne, pour luy faire

agrée la translation de l'Electorat du Conte Palatin en la personne du Duc de Bauiere; luy representoit qu'il considerat, que ç'auoit tousiours esté le sentiment de leurs Predecesseurs, que le siege sur lequel se deuoit reposer la grandeur de leur Maison, estoit l'Allemagne, & que ce qu'il y auoit de plus haut & de plus esclatant dans l'Allemagne, estoit l'Empire. Qu'il falloit conseruer cette Dignité dans leur Maison preferablement à toute autre chose, & que la promotion de Bauiere & de ses Successeurs à l'Electorat, rendant superieurs en nombre les suffrages des Electeurs Catholiques, qui seroient tousiours pour les Princes de leur Race; la possession de l'Empire s'y affermissoit, & ce qui estoit electif en la forme & selon les apparences; y deuenoit hereditaire en effet & dans la substance. Et le feu Roy qui auoit tant de lumieres naturelles & acquises des choses du monde, & en qui le bon sens avec lequel il estoit né, s'estoit si fort esclairecy par l'experiance qu'il s'estoit formée; disoit en sens contraire au Prince d'Anhalt, lorsqu'il luy fust enuoyé de la part des Princes d'Allemagne, qui auoient fait Ligue avec

O o o iij

*A Haal
16. Ian-
uier 1610.*

luy, pour se deliurer pour vne bonne fois des atteintes & des alarmes qu'ils receuoient si fouuent de la Maison d'Aultriche ; Qu'il falloit arracher l'Empire de cette Maison où il sembloit auoir pris racine , & le faire passer à vne autre qui fust Catholique , mais qui fust moins ambitieuse , & qui ayant les ailes plus courtes & plus foibles, ne peust les estendre si loiny voler si haut.

Mais la mort fit tomber ce magnifique projet , lors qu'il n'estoit encore qu'en fleur , & l'exécution en est peut-estre reseruée à quelqu'un de ses Descendans , qui heritera de ses pensées magnanimes, & marchera sur ses traces genereuses ; comme fait le Roy d'aujourd'huy. Il est certes aussi digne imitateur des vertus de son pere, que legitime Successeur de son Royaume. Il brulle du mesme zele que luy, pour l'establissement du repos de la Chrestienté, & a cette satisfaction qu'il n'aura rien oublié , pour couper cette fatale Succession de l'Empire en la Maison qui l'ocupe, & ce passage de mauuais augure qui s'en fait de l'un à l'autre, en la personne de ses Princes. Qu'il n'espargne rien pour faire en sorte que l'Em-

pire se reduise à son premier estat, & sous son ancienne forme: que ce qu'on y veut rendre absolu & Monarchique; se tempere par l'Aristocratie qui luy est conuenable & propre, & que tout se gouuerne en Allemagne, selon les Loix & les Constitutions des^{tes} establies, & non par l'ambition & par les caprices de ceux qui se veulent mettre au dessus des Constitutions & des Loix; Affin que par le reestablisement de ce bel ordre, & par l'obseruation des choses qui le doiuent maintenir; La paix qu'on veut donner au monde y vienne avec vne entiere seureté, & que le souuenir des maux passez dont on ne craindra point le retour; ne serue qu'à augmenter la douceur des biens presens qu'on n'aura pas peur de perdre. Nous touchons tantost au temps de ce bienheureux estat, & quoy que la guerre semble n'auoir jamais esté plus forte ny plus eschauffée qu'elle l'est à present; ce ne sont que les derniers abois qu'elle rend, & des esclans plus vifs de la clarté d'un flambeau qui est prest de s'esteindre.





DISCOVRS QVATRIEME.

Que Charles le Quint jugea que pour paruenir à la Monarchie, il se deuoit rendre maistre de l'un de cestrois pays; de la France de l'Italie ou de l'Allemagne. Qu'il les manqua tous trois, & ne peút subjuguer qu'une partie de l'Italie.



APRES auoir esclaircy & deue-
lopé ce principe de la Doctrine
que Ferdinand laissa à ses descen-
dans, pour paruenir à la Monar-
chie; Il nous faut voir comment
ceux-cy en ont profité, & quelle a esté la mois-
son d'une si admirable semence. La mort qui
enleua Philippe d'Austriche durant la vie de
l'Empereur Maximilian son pere; ne luy per-
mit pas de pousser ses pensées hors de l'Espa-
gne, ny de trauailler à l'ouurage dont son
Beau-pere auoit dressé le plan, & qui occupa si
long-

long-temps & si vainement son fils Charles. Celuy-cy donc ne manqua point de tourner les premiers pas de sa jeunesse vers l'Empire, & quoy que la montée qui conduisoit à cette haute Dignité, fust fort roide & scabreuse, & qu'il y eust bien des Ennemis à surmonter & des barrières à rompre, auant que d'y arriuer; Il ne laissa pas de l'entreprendre. La Tige maternelle d'où il estoit sorty estoit fort suspecte aux Allemans, qui eussent voulu n'estre soumis qu'à vn sang purement Germanique, & qui ne fust alteré par le meslange d'un sang superbe & cauteleux; comme estoit alors celuy d'Espagne. Il trouuoit outre cela sur son chemin vn Concurrent puissant & braue, & François premier aspiroit aussi bien que luy à l'aquisition d'une Maistresse, (c'est ainsi qu'il appelloit l'Empire) qui estoit digne de toute son amour de toute sa fortune & de toute sa puissance.

Il vint neantmoins à bout de ces deux obstacles, & il fust assez heureux pour adoucir l'auersion des Allemans, & pour triompher des poursuites de François. La maniere de proceder de ces deux Princes en cette glorieu-

Ppp

se recherche fust fort differente. Celuy-cy qui estoit peut-estre trop magnanime pour vn Prince, au moins pour le Siecle auquel il viuoit, & dont la grande Ame ne respiroit que generosité & franchise; disoit que Charles & luy trauailloient à la poursuite de l'Empire, comme deux honnestes hommes pretendoient à l'amour d'une belle Dame; qu'ils desiroient sans se vouloir mal, & estoient pour ce sujet piquez d'emulation, & non pas poussez de hayne. Aussi n'ayant agy en cette Concurrence qu'avec des offices qu'avec des promesses & avec de l'argent; Il demeura inferieur à son Rival, qui outre l'auantage de la naissance paternelle, ajousta à ces choses les menaces & la force, & fit ses sollicitations en equipage d'homme de guerre, & acompagné d'une bonne armée. Cette haute pretention ayant esté couronnée du succez que Charles auoit desiré; luy en fit conceuoir vne autre à laquelle elle seruoit de planche, comme nous auons dit, qui est celle de la Monarchie Chrestienne: & la jeunesse où il se trouuoit alors luy faisant voir deuant luy vn long espace de vie; luy faisoit aussi esperer qu'il auroit assez

de temps pour passer la carriere où il vouloit entrer , & pour-jouïr mesme longuement du bien qu'il deuoit recueillir au bout de la course.

Mais l'execution de ce grand projet ne respondit pas aux esperances qu'il en auoit eües, & la fortune les fit disparoistre lors qu'elles se monstrent les plus belles & les plus riantes. La Monarchie dont il estoit si fort épris, luy eschapa presque d'entre les bras, & ressembla pour luy à ces pommes des Fables, qui descendent sur le bord des leures de l'affamé Tantale, & qui apres les auoir baisées se reculent & s'enfuyent. Cela luy arriua deux fois, la premiere apres la Iournée de Pauie où François premier fust fait prisonnier , & la seconde apres la deffaite de la Ligue Protestante d'Allemagne, où le Duc de Saxe le fust aussi. En celle-cy on l'arresta lors qu'il estoit le plus esbranlé , comme nous l'auons desia plusieurs fois dit, & la preuoyance de Paul III. l'empescha de passer outre, & coupa pour le dire ainsi les aisles à sa victoire, dans la force de son vol & dans la rapidité de son mouuement. En l'autre il fust esbloüy par cette inesperée prof-

perité, comme par vn excez de lumiere, & se trouuant plus haut qu'il ne s'estoit proposé; la teste luy tourna de telle sorte, qu'il ne sceut prendre sur nous les auantages qu'il auoit deuant les yeux, ny donner la main à la fortune, qu'il le vouloit mener effectiuement, où il n'alloit auparauant que du desir & de la pensée.

Quoy que c'en soit, Charles n'eust pas plustot tourné les yeux vers sa pretenduë Monarchie, & enuifagé ce charmant objet; qu'il se trouua combattu de deux difficultez pour l'obtenir, que luy ny les siens n'ont jamais pû surmonter, ny fermer l'une de ces deux playes, que l'autre ne se soit ouuerte. La premiere & la plus importante a esté la sterilité de gens de guerre, qui a pourtant esté moindre en Charles qu'en ses Successeurs: & la seconde la disette d'argent dont Charles a esté fort trauaillé, & que ses Successeurs ont moins sentie. Et neantmoins à cause de cela il leur est arriué pour leur grand dessein, comme à celuy qui voudroit construire vn grand Edifice en vn lieu où il y auroit faute de matériaux, & qui n'ayant point à sa disposition de

carrières ny de foreſts pour auoir de la pierre & du bois; ne ſçauoit preſque d'où en recouurer, ny par où en faire venir. Sur tout Dieu a permis que la choſe la plus neceſſaire pour l'accompliſſement de leur ouurage, qui eſtoit vne abondance durable d'hommes; leur ait fait faute. Sans elle comme tout le monde ſçait, on ne ſçauoit entreprendre ny continuer de grandes guerres. Sans elle on ne ſçauoit faire de progresz permanens, ny de conqueſtes qui tiennent. Sans elle vn Prince belliqueux peut bien courir & rauager vne grande eſtendue de pays; mais il ne ſçauoit y prendre racine ny s'y affermir, & cét amas de Bergers & de Vagabonds d'où eſt ſortie la Republique qui a commandé à toute la terre; a commencé la Monarchie que ſes deſcendans ont eſleuée, en faiſant prouiſion d'hommes: en changeant les habitans des villes conquiſes en Citoyens & Bourgeois de Rome, & en eſtabliffant dans l'enceinte de celle-cy la principale maſſe, d'où ſe formeroient les armées: d'où ſe tireroient les garniſons, & d'où ſ'en-uoieroient les Colonies.

Ces choſes pourtant ne refroidirent point

Ppp iij

l'ardeur de Charles, & ces difficultez ne firent qu'enflammer dauantage son courage pour les vaincre, & sur tout pour tascher de s'ouurir quelque source de gens de guerre qui fust abondante, & de s'asseurer de quelque pays fort peuplé, qui fust la pepiniere de ses armées, & la ressource de ses pertes. Pour cela il y auoit l'Italie qui estoit fort riche & assez peuplée: l'Allemagne qui estoit fort peuplée & assez riche, & à qui les Pays-Bas dont il estoit Seigneur, seruoient de liziere & de frange: & la France qui auoit l'une & l'autre de ces deux conditions en vn degré quasi pareil, & qui estoit presque également peuplée & riche. Quant à celle-cy il n'auoit point de pretexte pour l'attaquer legitimement, & il n'estoit point d'Estat dans le monde, dont la possession fust plus nette & moins embrouillée pour son maistre. Outre que c'estoit alors vne masse si forte & si bien liée, & que l'union des membres & du Chef estoit si estroite & si ferme; qu'en l'estat où se trouuoit alors Charles, il n'y auoit pas lieu d'esperer de la pouuoir porter par terre, non pas mesme de la pouuoir esbranler. Il falloit donc pour cet effet atten-

dre qu'il fust deuenu plus puissant, & que la fortune luy offrit quelque iuste sujet, ou quelque couleur specieuse pour l'entreprendre; ce qui n'arriue que trop souuent dans l'intrigue des affaires, & dans l'embaras des choses du monde.

Pour ce qui est de l'Allemagne, & de ce vaste & belliqueux pays où les gens de guerre ne tarissent point, & où l'on voit aussi bien naistre que mourir les hommes dans les armées; c'estoit vne entreprise qui portoit avec elle des difficultez extrêmes, & en quelque façon inuincibles. Car bien que Charles fust alors inuesty de la Dignité Imperiale, qui est particulièrement reconnuë & reuerée en ce pays-là, & qu'il y eust vn assez considerable Patrimoine; Si est-ce que cette Dignité n'estant en elle-mesme qu'un simple Tiltre personnel, où aumoins n'apportant pas à celuy qui en est pourueu vn pouce de terre qui luy appartienne: Et d'ailleurs la puissance qui luy est jointe n'estant que subalterne & dependante des Resolutions des Dietes, & des Contributions volontaires des Princes & des villes libres de l'Empire; Cela & tout le reste des

Estats de Charles estoit fort peu de chose, pour l'opposer à la puissance de ces Princes & de ces villes, qui ne manqueroient pas de s'y-nir pour defendre la commune liberté dès qu'elle seroit menacée, & d'attirer à leur party d'autres Puissances qui prendroient de la jalousie d'un dessein si ambitieux, & s'interesseroient à ne laisser point esleuer vne nouvelle Monarchie, au milieu du Christianisme. De sorte qu'il comprit bien qu'il ne donteroit jamais l'Allemagne tant qu'elle seroit entiere, & qu'il n'y auoit que le vent de la diuision qui le peut mener au port où il aspiroit, & pour lequel il auoit à esquiuer tant d'escueils, & à essuyer tant de tourmentes. Et ainsi que pour venir à bout de l'Allemagne il luy falloit exciter des partis, & allumer de la discorde dans l'Allemagne : ou estre tousiours tendu & tousiours prest, pour acourir à toutes les nouveautez qui y paroistroient, & à tous les signes de broüillerie, qu'il y verroit naistre.

Mais attendant que la fortune fit venir un temps si propice, & vne conjoncture si fauorable; l'objet le plus present qui se trouua alors

alors pour tenter l'humeur de Charles , fust l'Italie, & ce beau pays eust tant d'atraits pour luy donner de l'amour; que sa passion de conquerir commença à s'y attacher, & à y jeter sa premiere flamme. Cela certes n'estoit point estrange ny pour l'Empereur ny pour l'Italie. L'avantageuse situation de celle-cy, par laquelle elle tient à la France à l'Espagne à l'Allemagne, & aux Estats du Grand Seigneur. La grandeur & la magnificence de ses villes: la fertilité de la plus grande partie de son terroir: les ports de mer dont elle abonde, & la quantité d'argent que le commerce y attire. L'esprit de ses habitans & le temperament de leur Ame; qui fait qu'on trouue presque tousjours en vne mesme personne vn excellent Negotiateur avec vn grand homme de guerre. Sur tout le Siege du Chef de l'Eglise qu'elle contient, & les avantages qu'en pourroit tirer pour les choses temporelles, celuy qui en seroit le maistre; Tout cela estoit capable de toucher vne Ame moins sensible à la grandeur, que n'estoit celle de Charles, & de donner dans vne veüe moins auide de domination, que la sienne.

Qq q

Quoy que cela fust ainſi, & quelques appas qu'eult l'Italie pour l'obliger d'en entreprendre la conquête; l'exécution pourtant n'en eſtoit pas fort aiſée, & il y auoit bien du chemin à faire & de mauuais pas à franchir; auant que d'y arriuer. Car encore que Charles y eult deſia vn pied, & qu'il en poſſedat vne des plus belles portions & vn des plus puiſſans membres, qui eſt le Royaume de Naples; Il eſt à conſiderer que cét Eſtat n'eſtant qu'à l'vn des bouts, & eſtant par conſequent frontiere du reſte; Il ne pouuoit ſ'y auancer ſans rencontrer l'Eſtat de l'Egliſe, & ſans y entrer hoſtillement; ce qui eſtoit vne matiere odieuſe, & vne entrepriſe à donner du ſcandale au reſte des Chreſtiens, & à jetter vne mauuiſe odeur parmy la pluſpart de ſes ſujets, & juſques dans l'Eſpagne meſme. Que les Italiens n'eſtoient point gens à ſe laiſſer ſurprendre aux artifices, & eſbloüir aux apparences. Qu'ils voyoient fort auant dans l'auenir, & fort clair dans l'intention des autres. Qu'ils éuenteroient ſon deſſein au moindre bruit qu'il en feroit, & en ſentiroient l'odeur pour peu qu'il en fortit & ſ'en exhalat au dehors.

Que la jalousie qu'ils auoient pour leur liberté estoit si tendre; qu'il ne falloit que fort peu de chose pour la réueiller, & que la desffiance leur estoit si naturelle, & qu'ils l'aiguisoient si fort par la viuacité de leur esprit, & par la subtilité de leurs speculations; que non seulement ils prenoient ombrage de ce qui estoit: mais qu'ils soubçonnoient mesme souvent ce qui n'estoit pas, & se donnoient quantité de fausses alarmes, pour ne se trouuer pas endormis, quand il en arriueroit de veritables.

Toutefois comme en certaines occasions ce Prince estoit heureux au delà de ses esperances, & prudent par dessus les autres Princes de son temps pour bien vser des occasions; la fortune luy en presenta vne si fauorable pour son dessein, & il la sceut mesnager avec tant de circonspection & de sagesse; qu'il se trouua enfin faisi du centre, & maistre de la partie la plus noble de l'Italie, qui est l'Estat de Milan. Cét Estat est le milieu dont les extremitéz confinent presque à tous les autres Estats d'Italie, & la ligne qui fait la communication de l'Espagne avec l'Italie, par le moyen de Genes

Qq q ij

qui en est comme vn accessoire : & de l'Italie avec les Suisses les Grisons & le reste de l'Allemagne, par le moyen de la Valteline. C'est la place d'armes & le lieu d'assemblée, pour receuoir des Pays-Bas, ou pour y enuoyer d'Italie d'Allemagne & d'Espagne les gens de guerre, dont ces Estats auroient besoin.

Tellement que depuis que l'Empereur se fust assuré de cét Estat, & qu'il eust mis le pied en Piedmont & dans la Toscane ; Il faisoit son conte, & prenoit ses mesures de cette sorte. Tenant desjà comme enuironné tout l'Estat Ecclesiastique, & en jalousie le Golfe de Venise par le moyen des Costes de Naples; Il vouloit faire fortifier Siene Porthercule & quelques autres places qu'il tenoit de ce costé-là, pour brider toute la Toscane. Il vouloit auoir le Montferrat du Duc de Mantoüe en eschange du Cremonois, & le transporter au Duc de Sauoye à la reserue de Casal Trin Montcalue & Pontdesture, pour retirer de luy Vercel Gatinare Jurée Saint Germain Mazin & Crescentin. Il vouloit rendre ces dix places si fortes, & en faire de si puissantes barrieres contre les irruptions des François;

qu'ils perdissent à jamais l'esperance de les forcer, & de penetrer dans l'Italie: & les Italiens par consequent la volonté de les y appeller, & de les solliciter à vne protection inutile & à vne deffense impossible. Il se promettoit outre cela de serrer de si pres les Genoïs, & de les metre si à l'estroit; qu'ils souffriroient vne Citadelle & luy liureroient Sauonne, pour estre maistre du trajet de Barcelonne & de Genes, & que le Duc de Sauoye luy acorderoit encore Nice, pour tenir en sujction les Costes de Prouence & de Languedoc, & auoir entre ses mains la clef du commerce de ces deux prouinces en Italie.

Il ne restoit pour consommer l'ouurage, & pour acheuer vne circonuallation, qui eust osté aux Italiens toute esperance de secours, & toute apparence de ressource; que d'enuahir la Valteline, & de s'emparer de cette fameuse porte, par où les Suisses les Grisons les Allemâns & les François peuuent descendre en Italie. Mais il n'osoit encore auoir que des yeux pour conuoiter cette Vallée, & il eust fait alors trop dangereux d'employer les

Qq*q* iij

maines , pour tascher de la raurir. Les Venitiens dont les esprits ne furent jamais plus guerriers, ny les armes plus trenchantes qu'en ce temps-là ; n'eussent pas volontiers souffert cette grande vsurpation sur la liberté de l'Italie, & ce blocus particulier pour leur Estat de Terre-ferme. Outre les bonnes troupes & les excellens Chefs de guerre qu'ils auoient sur pied, pour aller combattre le mal dans sa source; Ils auoient comme ils ont encore, vne porte de derriere ouuerte du costé de la mer, & la facilité d'équiper de puissantes flotes, pour faire diuersion sur le Royaume de Naples.

Mais ce qui faisoit plus de peur à Charles, & qui temperoit dauantage l'ardeur dont il brusloit pour la conqueste de la Valteline; estoit l'intérest que les Suisses prendroient à l'empescher, & à s'y opposer de toutes leurs forces. Il est certain qu'il n'y auoit point alors dans la Chrestienté de Nation plus belliqueuse ny plus redoutée, que celle-là. La diuersité des Religions qui l'a depuis trauaillée, ne l'auoit pas affoiblie en la diuisant, & le temps qui change & altere tout dans le monde, n'a-

uoit encore rien relasché de sa premiere vigueur, ny rien diminué de sa vaillance acoustumée. Ces considerations suspendirent pour lors le dessein de l'Empereur, & le firent refoudre d'attendre, que le temps & la fortune luy fissent luire quelque ocaſion plus favorable, pour l'executer. Cependant on peut voir par la justesse & par la beauté du plan qu'il auoit dressé pour subjuguier l'Italie; quel grand maistre estoit ce Prince en la science de conquerir, & quel grand Ingenieur en matiere de destruire & de fonder des Estats. On peut aussi voir par le succez de ce qui luy est arriué de ce costé-là; comme Dieu a confondu sa sagesse & s'est moqué de ses projets: comme il les a fait auorter, lors mesme qu'ils sembloient estre le plus heureusement auancez, & les plus proches de leur terme: & comme sa posterité qui s'y est attachée; n'a trouué que le trauail d'une fusée, qui s'embroüille à mesure qu'on la demesle, & l'exercice de la Penelope d'Homere, dont la toile se defaisoit à mesure qu'elle estoit faite.

Reuenons à l'ocasion que la fortune fit naistre à Charles, & au chemin qu'elle luy ouurit

pour passer plus auant dans l'Italie. Cela prouint de la querelle qui s'alluma entre François premier & les Sforces à raison de l'Estat de Milan, dont ceux-cy estoient en possession, & que l'autre voulut recouurer comme vne piece qui luy appartenoit, & comme vn membre dependant de la Succession qui luy estoit arriuée. Il ne fust pas mal-aisé à vn Prince grand en vertu & en puissance, comme estoit François, de despoiiller de petits Princes comme estoient les Sforces ; pendant qu'ils estoient seuls à luy resister, & seuls soustenans en cette querelle. Mais ils ne demurerent pas longtemps en cette posture, & les autres Princes d'Italie souffroient trop impatiemment dans le cœur, & comme au centre de leur pays vn Roy de France, qui outre les pretections qu'il y auoit sur d'autres Estats; auoit encore comme ils se figuroient, trop de puissance pour auoir de petits desseins, & l'Ame trop ambitieuse pour se contenter d'estre simple voyfin de ceux, dont il pouuoit deuenir maistre. Mais tout cela ne fust rien au prix de la jalousie qu'en conceut Charles, & il y auoit vn interest plus fort que les autres, à cause du Royaume

aume

aume de Naples dont la possession luy estoit encore mal-assurée : comme d'un Estat de nouvelle conqueste, sur lequel François auoit droit, & dont les habitans estoient naturellement amateurs de changement, & aides de nouveauté. Cela le fit resoudre à appuyer vigoureusement le dessein des Italiens, & à traualler de toute l'estenduë de son pouuoir au reestablissement des Sforces.

Mais il ne s'arresta pas là, & il fust si heureux, que non seulement les François furent chassez de l'Estat de Milan, & que les Sforces y rentrerent ; mais que ceux-cy mourans sans Enfans il le retint encore pour soy : ou pour le moins le conféra comme Empereur & comme Fief d'Empire à son fils Philippe. Et ainsi les Princes Italiens arriuerent d'un costé où ils vouloient aller, qui estoit de nous renuoyer delà les Monts : mais ils n'en demeurèrent pas où ils pretendoient ; qui estoit que l'Estat de Milan ne sortit point d'entre les mains d'un Prince de leur pays, & de naissance Italienne. En cela la fortune supplanta leur preuoyance, & en se deffaisant d'un Estranger dont le voysinage leur estoit suspect ; Ils eurent le de-

Rrr

plaisir de voir prendre sa place, à vn autre qui ne l'estoit gueres moins : ou en tout cas qui sçauroit mieux que nous garder sa conqueste, & recueillir les suites de sa victoire ; comme Charles & ses Successeurs le sceurent faire. Il ne faut point oublier icy, qu'après le gain de la bataille de Pauie, & la prise de François qui se firent durant cette guerre ; l'Empereur leua tout à fait le masque, & se declara ouuertement pour son dessein de la Monarchie Chrestienne. Cela arriua à la Consultation qu'il fit s'il deuoit metre François en liberté, & où le Duc d'Alue opina fortement qu'il ne le falloir point, & que le temps fatal estoit venu, où il falloit assembler tant de differens Estats qui composent la Chrestienté, en vn seul Corps & sous vne seule Teste, pour l'opposer tout entier & tout vny à l'Empire du Turc & à la grandeur Ottomane ; comme le seul moyen qu'on auoit de l'abatre & de la destruire.

*Voyez le
Discours du
Duc d'Al-
ue dans
Guiscar-
din.*

Or d'autant que la plus forte opposition & le plus inuincible obstacle, que l'Empereur auoit rencontré en ses desseins, venoient de la France, & que de quelque costé qu'il se

tournat , il se trouuoit tousiours en teste les forces de ce Royaume, ou l'autorité de cette Couronne ; Il se resolut de conuertir tous ses efforts contre nous , & de tascher de ruiner le fondement , sur lequel s'appuyoit le salut de l'Italie & de l'Allemagne. Mais tous ses efforts ne firent voir au monde qu'une impuissante volonté de faire du mal, & les diuerſes Expéditions qu'il entreprit pour ce sujet , du costé de Picardie de Champagne & de Prouence ; n'aboutirent enfin qu'à des retraites honteuses , ou à de grandes pertes d'armées. Et ce qui parut de plus admirable , & qui fit voir plus sensiblement la tromperie du discours des hommes, & la vanité de leur sagesse ; fust que l'entreprise que Charles se figura luy deuoir estre la plus certaine & la plus heureuse, fust celle qui luy manqua le plustot, & qui luy fust la plus funeste.

En effet au voyage qu'il fit en Prouence, qui est l'Expedition dont je parle ; Il venoit non comme à vne conquête à faire, mais comme à vne possession à prendre, & Antoine de Leue qui en auoit esté le premier autheur, la desconseilloit non comme la jugeant difficile ;

R r r ij

mais comme l'estimant infallible, & affin que son Maistre eust & tout le fruit du succez, & toute la gloire du dessein. L'Italie l'Allemagne & les Pays-Bas, s'estoient infectez d'une certaine Prophetie que l'Empereur y auoit fait semer; que la France deuoit cette année là changer de maistre, & sur cette ridicule crainte, & sur vne esperance qui ne l'estoit gueres moins; le Marquis de Salusse General de l'armée du Roy en Piedmont, quitta son seruice, & par la plus lasche & plus insigne trahison dont on eust jamais ouy parler, fust Deserteur de l'armée qu'il commandoit; comme vn Pilote qui se sauue de son vaisseau au premier signe de la tourmente. C'estoit lors que l'Empereur disoit hautement & dans l'excez de sa vanité; *Qu'il falloit que le Roy de France le despoüillat, ou qu'il despoüillat le Roy de France, & que celui-cy outre ce qu'il estoit deuint Empereur & Roy des Espagnes: ou que luy outre ce qu'il estoit deuint Roy de France; c'est à dire le Monarque de la Republique Chrestienne par vne suite necessaire.* Et neantmoins l'euenement demerita cette belle Prophetie. Antoine de Leue paya de sa vie qu'il laissa en Prouence, la te-

merité de son conseil, & la nouveauté de sa dissimulation, & l'Empereur eust la honte avec ses Ferrant Gonzague Marquis de Gast & Duc d'Alue; de se retirer sans auoir rien fait que d'auoir perdu trente mille hommes, pour ne prendre que ce que nous ne deffendions point, & pour n'entrer qu'aux places que nous auions abandonnées.

R r r iij





DISCOVRS CINQVIEME.

*De la troisiéme entreprise de Charles le Quint
pour paruenir à la Monarchie, & comme
elle luy manqua.*



L'EMPEREUR ayant manqué son coup du costé d'Italie & du costé de France, s'attacha à vne troisiéme entreprise: Et comme ceux qui attaquent vne place par vn endroit qu'ils ont trouué plus fort qu'ils ne s'estoient imaginez, changent de dessein & l'attaquent par vn autre, qu'ils croient estre plus foible & moins en defense; Il se resolut d'essayer si le vent du Septentrion luy seroit plus fauorable, & la conquête de l'Allemagne plus aisée. Nous proposerons icy deux Chefs à considerer, qui seruiron à aiguifer l'intelligence & ouurir le Raisonnement de ceux qui sont encore aux Elemens de la Politique, & si j'osois destourner vn terme en

quelque façon sacré, à vn vsage qui ne l'est pas; qui ne sont que Cathecumenes en cette Science. Aussi n'est-ce que pour ceux-cy que j'escriis, & je ne suis pas si vain; que je pretende instruire & discipliner ceux qui sont actuellement Ministres: mais seulement ceux qui le peuuent deuenir, & qui trauaillent à se munir des connoissances necessaires & des dispositions propres, à receuoir cette noble forme. Car pour les autres de la conduite desquels j'enrichis mon ouurage, & mes Discours tirent l'esprit & la vie; Je ne serois pas moins ridicule si je l'auois entrepris; que les Astres s'ils auoient raison & liberté, qui voudroient esclairer le Soleil, de qui ils tiennent toute la clarté qu'ils ont, & tous les rayons qu'ils nous enuoyent.

Le premier Chef donc duquel je veux parler, est ce que j'ay desia designé de la constitution & de l'estat, où l'Empereur trouua l'Allemagne; c'est à dire comme d'une masse forte & espesse, qui ne pouuoit estre renuersée toute entiere, & qu'il falloit diuiser & metre en pieces, pour l'vsurper toute en les recueillant l'une apres l'autre. Cette diuision deuoit estre

en partie vn ouurage de la fortune, & vn effet de quelque maligne influence qui tombat sur ce pays-là : & en partie vn coup de l'industrie humaine, & vn fruit de cette Raison d'Estat, qu'on appellera si l'on veut PRVDENCE ou MALICE. Quant à ce second il est certain que Charles estoit vn grand ouurier de diuision, & vn abile semeur de discorde : & il est certain aussi, qu'il n'est pas mal-aisé de semer de cette graine, & de la faire fructifier par tout où il y a des Interests differens, & où plusieurs peuuent pretendre à vne mesme chose, de droit ou par bien-seance. Mais pour le grand dessein qu'auoit Charles qui estoit d'vsurper toute l'Allemagne, & de tant de membres Souuerains qui la composent, d'en faire vn Corps Monarchique ; Il ne suffisoit pas d'une legere & courte discorde, & ce n'estoit pas assez qu'elle fust deschirée en partis, si elle ne l'estoit long-temps, & si elle se pouuoit bien-tost rejoindre. Il luy falloit pour cela quelque chose de permanent & de durable. Il auoit besoin que le feu qui s'allumeroit fust long & opiniastre, & que la matiere qui l'entretiendroit fust bien combustible; mais qu'elle ne

le ne se consumat point. Autrement il n'est rien de plus naturel & de plus ordinaire, qu'un Interest general comme est celuy de la liberté qu'on opprime; rallie ceux que quelque interest particulier auoit separez: que des humeurs contraires s'accordent à repousser vne commune necessité, & l'on a souuent veu que la presence des Ennemis, a remis la concorde & la bonne intelligence dans les armées; qui n'estoient auparauant que partialitez & que broüillerie.

Mais la fortune fit en faueur de Charles, ce que son industrie n'auoit sceu faire pour ses Interests, & elle alluma ce feu long & opiniastre dont il auoit besoin; en suscitant vne Heresie, qui coupant toutes les attaches du Corps Germanique, rompit pour jamais toute l'union de ses membres. La chose n'est que trop conuë & trop esprouuée, qu'il n'y a point de sujet où les volonteiz soient plus irreconciliables; que celuy où les Entendemens ont des sentimens contraires pour ce qui regarde le salut: ny des playes si mal-aisées à fermer, que celles que fait l'Heresie au Corps Politique. C'est pourquoy Charles conuiua à la naissan-

Sff

ce de celle de Luther, & ne l'estouffa point quand il le pouuoit ; s'imaginant peut-estre qu'il l'estoufferoit quand il voudroit, & apres auoir batu de ce fleau ses Ennemis ; qu'il le supprimeroit, & par le moyen mesme de ceux qu'il en vouloit battre. Mais il se trompa en l'un & en l'autre, & Dieu ne permit pas qu'un poison si subtil que le sien fit son operation, ny qu'une malice si estudiée fust heureuse. Car cette nouvelle Secte eust tant d'appas pour les Princes à qui elle abandonnoit les biens de l'Eglise, qui estoient grands en Allemagne, & tant d'agréemens pour les peuples qu'elle affranchissoit de tout ce qui mortifioit le sang & la chair, comme nous l'auons remarqué ailleurs ; qu'il n'en fust jamais qui fit un progres si soudain, ny dont le cours fust si rapide & si impetueux. De sorte que soit que l'Empereur ne se sentit pas alors assez fort pour la heurter, ou qu'il voulût laisser refroidir le zele dont toutes les Sectes naissantes brulent : soit que des occasions plus pressantes l'appellassent ailleurs, comme la deffense de l'Estat de Milan en Italie ; Il se proposa de laisser pour quelque temps en repos les Reli-

gionnaires d'Allemagne : de se preualoir des auantages que la souffrance de cette Nouueauté luy pourroit apporter ; & de se seruir des demandes des menaces & des forces des Innouateurs, pour les desseins qu'il auoit en Italie & en France ; comme nous l'auons representé.

Cependant le destin des choses du monde, & l'enchaînement des affaires de l'Europe ayant voulu , que les efforts que Charles auoit fait en Italie & en France ; eussent esté imparfaits en l'une & vains en l'autre : & n'y ayant point lieu d'esperer de rien faire dauantage en des lieux, où il s'estoit espuisé d'inuentions & de forces, & où il auoit tant perdu pour n'auoir rien gagné, comme en France, & si peu gagné pour auoir tant trauaillé & tant vaincu, comme il auoit fait en Italie ; Il se resolut de s'appliquer tout entier à la conqueste de l'Allemagne, & de reueiller tout de bon le dessein qu'il auoit jusques alors laissé dormir, de la reduire. Pour cet effet & ce sera le second Chef dont nous auons parlé cy dessus ; nous apporterons icy les considerations qui vray-semblablement luy passerent

*Il auoit fait
prisonniers
& François
premier &
Clement 7.*

Sff ij

par l'esprit, & le Raisonnement sur lequel il affermit sa resolution: Il s'embarqua à cette entreprise, & mit la voile au vent qui ne luy fust pas enfin propice.

L'Allemagne donc deschirée en elle-mesme par des Religions différentes, & la vertu du mal ayant esté si efficace & son progres si actif; que le nombre des parties saines se trouvoit de beaucoup inferieur à celuy des parties malades, & celles-cy plus incapables de reuenir en santé par la proximité & par l'influence des autres; que celles-là d'estre gastées par la contagion & par la malignité des premières. Outre cela le temps ayant fait ouurir les yeux aux Protestans, & la diuerse face d'affaires par laquelle l'Empereur les auoit promenez, entre des mouuemens contraires d'esperance & de crainte, de promesses & de menaces; leur ayant fait comprendre que son intention n'auoit jamais esté de se seruir d'eux, que pour estre les instrumens de ses desseins & les Ministres de ses passions, pour tourmenter l'Italie & faire de la peine à la France. Lassez de tant d'artifices & de tant de changes, & c'ouuoissant l'humeur de Char-

les impatiente de repos , & son esprit transporté d'une perpetuelle ambition , & agité d'un flux & reflux continuel de projets turbulens & de pensées guerrieres. Considerant qu'ayant tant remué & tant bouleversé ailleurs , tantost avec succez & tantost inutilement , & y ayant jetté ses derniers hameçons & employé ses derniers efforts, sans y auoir pû prendre ny enleuer ce qu'il desiroit. Ne doutant point qu'il ne deust finalement venir à eux, comme à vne proye de prise apparemment plus facile , & comme à des Victimes qu'il vouloit sacrifier à l'Idole qu'il seruoit interieurement, qui estoit l'Ambition; sous pretexte de les immoler à la Religion qu'il professoit exterieurement ; Ils se resolerent de songer à leur seureté, de n'attendre pas seulement le mal pour le repousser ; mais de luy aller mesme au deuant pour le combattre , & d'estre les premiers sur les rangs, sur lesquels ils preuoyoient que l'Empereur ne tarderoit point de se metre. Pour cét effet ils firent vne Ligue à Smalchalde, qui eust pour principal fondement, de donner à Charles vn Coadju-
*Le 17. A-
uil 1532.*

faire reuiure vne des Constitutions de la Bulle d'Or, qui porte, *Que pour destourner la Succession de l'Empire, il n'y pourra auoir successiuellement trois Empereurs d'une mesme Race.*

Celuy-cy de son costé qui se sçauoit également seruir quand il le falloit, de la force & de la ruse; voyant qu'il ne pouuoit acabler les Protestans en les surprenant comme c'eust esté son dessein; ne marchanda point à leuer le masque, & à aller hautement à eux, & comme l'on dit à Enseignes desployées. Pour en venir plus facilement à bout, & pour s'aplanir entierement le chemin de la victoire; Il vsa d'un double artifice qui luy reussit d'abord, & eust vn effet present tel qu'il l'auoit projecté. Il fit courir le bruit à Rome, qu'il s'alloit opposer à l'Herésie qui se desbordoit excessiument, & qui auoit fait dessein de passer d'Allemagne en Italie, par le débris de la vraye Religion & sur la teste des Catholiques. Il n'en falloit pas tant que cela pour piquer l'esprit du Pape, & pour reueiller son zele enuers la Religion qu'on attaquoit en sa personne. Il sçauoit bien que c'estoit à luy à qui l'Herésie en vouloit particulièrement, & que

les premiers souspirs qu'elle auoit jettez & les premiers efforts qu'elle auoit faits venant au monde; auoient esté contre sa puissance. Il consideroit que le nombre des Ennemis estoit grand, & qu'ayant à apprehender vne semblable fureur, à celle des troupes que mena Furstenberg à Rome au nom & sous l'autorité de Charles Prince Catholique, qui ne fust neantmoins que passagere; Il auoit à craindre de plus la jonction de la durée à la violence, de la part de ceux qui y viendroient en leur propre nom, & sous les auspices de l'Herésie. C'est pourquoy il ouurit en faueur de l'Empereur les Tresors du Vatican, & ceux du Chasteau saint Ange: luy acorda des Croisades & des Decimes dans tous ses Estats de l'ancien & du nouveau monde: fit faire de belles & fortes leuées de gens de guerre qu'il luy enuoya, & luy procura de tous costez de puissans secours & des subuentions considerables.

L'autre artifice fust, que considerant la grande masse que faisoit le party Protestant d'Allemagne, & des autres Puissances du Septentrion qui estoient de la Ligue de Smalchal-

de ; Il jugea qu'il luy falloit trauailler à diminuer cette masse : à desrober à cette Ligue le plus grand nombre qu'il pourroit de Princes qui n'y estoient pas encore entrez, & à empêcher que ce torrent ne se grossit & ne s'enflât, du concours & de l'affluence de toutes les Eaux qui s'y pourroient rendre. Il sçauoit quelle estoit la nature des Ligues & leur foiblesse ; Il sçauoit que celles qui se faisoient pour attaquer & pour conquerir, estoient plus fragiles & d'une plus facile dissolution ; que celles qui ne se faisoient que pour conseruer & pour deffendre. Qu'en celles-là il n'y auoit gueres que les plus ambitieux & les plus puissans qui eussent haste de s'embarquer ; d'autant que c'estoient eux qui deuoient recueillir le principal fruit de la victoire, & en faisant la part aux autres des choses conquises ; garder deuers foy ce qu'il y auroit de plus riche & de plus beau du butin & de la despoüille. Que les plus moderez & les foibles s'y engageoient le plus tard qu'ils pouuoient ; ceux-là à cause de la fortune de la guerre qui est tousiours pleine d'obscurité & d'incertitude : & ceux-cy d'autant que si elle
leur

leur estoit contraire, & si le vaisseau dans lequel ils se seroient mis venoit à faire naufrage; Ils seroient les premiers emportez par le mal-heur, comme ayant moins de moyen de luy faire resistance: & les premiers submergez; comme ceux à qui il ne demeureroit d'abord ny Esquif ny Table pour se sauuer.

Sur ce fondement, & affin de donner couleur de n'entrer point dans la Ligue, à ceux qui n'estoient pas si desireux de remuement, ny si transportez de hayne contre luy, que le Duc de Saxe & le Lantgraue de Hesse; Il s'auiisa d'en esloigner la cause de la Religion, pour laquelle les plus froids & les plus timides, ont coustume de s'eschauffer & de s'endurcir, & les plus impies & les plus prudens, ont honte de paroistre sanszele & sans violence. Cela l'obligea de donner à entendre par l'Allemagne; que la fin de ses armes n'estoit pas de toucher à la nouuelle Religion, ny à la liberté des Consciences. Que son dessein seulement estoit de reprimer la Rebellion, qui ayant esté conceüe dans la teste du Duc de Saxe & dans celle du Lantgraue; s'estoit esclorse dans l'Empire. Comme au contraire, que

T t t

l'intention de ces Princes n'estoit ny de defendre ny de preseruer leur Religion, qui n'estoit ny attaquée ny menacée; mais de supprimer la Maison d'Austriche dont il estoit le Chef, & d'esteindre ou de s'approprier l'Empire dont elle estoit depositaire.

Ce pretexte arraché à la Rebellion; Il ne doutoit point qu'elle ne fust moins puissante qu'elle n'eust esté, si les Conjurez eussent pû courir leur dessein d'un voile si specieux que celui de l'honneur de Dieu: & que les plus sages & les moins interessez des Protestans, ne fussent bien-aïses de voir quels seroient les premiers succez des armes, & de quel costé inclineroit la victoire; sçachant bien que si elle fauorisoit ceux de leur Secte, ils seroient tousiours les bien-venus parmy eux, & que les mains de la société leur seroient tousiours données. Au contraire si le Ciel se declaroit en faueur de Charles, & s'il venoit à triompher des forces Confederées; Ils s'imaginoient que la foudre preparée contre la Rebellion, ne tomberoit que sur les vaincus, qui seuls auroient esté rebelles: & que la vengeance s'arresteroit sur les bords de leurs

Estats, d'où il ne seroit rien fortý de criminel, ny aucun vent qui eust esmeu le trouble & excité la Reuolte. De sorte que l'Empereur tenoit pour certain, que si rien ne se remuoit contre luy, que ce qui paroissoit en Allemagne; Il en viendrait aisément à bout, & que ces grandes forces qu'il voyoit sur pied; ressembleroient aux eaux d'un torrent, qui descendent avec orgueil & s'espanchent avec du bruit & du rauage; mais qui ne courent pas loin, & dont on ne voit bien-tost apres que les traces par où elles ont passé, & des marques de leur violence. A ces considerations de prudence; Il ajousta celles de l'intérêt particulier, pour en fortifier la vertu & en aiguïser la pointe. Il fit de grandes promesses d'honneur & de biens, aux Ambitieux & aux Auares qui luy pouuoient estre vtils, & avec ce leurre il attira à son party le Duc Maurice de Saxe; à qui il promit l'Electorat & les Estats de son Cousin, qui sont encore aujourd'huy entre les mains d'un des descendans de son frere Auguste. Ce Siecle nous a fait voir quelque chose de semblable, que nous rapporterons en la troisiéme Partie.

Pour ce qui est des Estrangers que les Protestans pourroient engager dans leur querelle; Il sçauoit bien qu'il n'y auoit que le Roy de France qui les peût puissamment assister, & qui peût fournir à vne grande despenſe, & aux beſoins d'vne longue guerre. Qu'il n'y auoit que luy qui peût long-temps nourrir ce Monſtre, qui mange tousiours ſans ſe ſouler jamais, & qui manque tousiours d'aliment ſuffiſant; bien qu'il ait tout celuy que l'indus-trie & la force luy puiſſent faire venir. Mais pour cecy il preuoyoit que les Allemans eſtans naturellement courageux & fiers, & nourris d'un air comme eſt celuy du Septentrion, qui enſe & qui inſpire communement vne grande opinion de ſoy-meſme; ne ſe reſoudroient que fort tard à ſe rendre ſuplians, & à faire connoiſtre au monde qu'ils auoient beſoin du ſecours d'autrui. Qu'ils ne le demanderoient que quand ils ſe verroient perdus, & n'auroient recours à ce remede, que lors que le mal ſeroit deuenu plus puiſſant que ce remede, & que la nature opprimée n'auroit ny force ny vertu pour le ſupporter. Que c'eſtoit l'ordinaire des Princes dont on imploroit

l'assistance, d'essayer premierement de diuertir le mal, & de conjurer la tempeste qui tomboit sur leurs Alliez, par offices & par intercessions; auant que de venir à la force. Et par consequent qu'on estoit renuersé, auant qu'il parût personne pour appuyer, & qu'on auoit receu le coup de la mort, auant qu'il se trouuat des mains pour arrester le bras qui fraipoit. En vn mot que c'estoit la nature des secours que les Princes enuoyent les vns aux autres; d'estre preparez lentement : d'estre enuoyez moindres que n'est le besoin de ceux qui les demandent, & d'estre donnez plus petits que n'est l'intention de ceux qui les donnent.

Que cela estant commun à tous les Estats; Il estoit en ce temps-là particulier à la France, & qu'elle faisoit souuent de faux frais & des auances perduës; pour ne les pas faire assez à temps, ou ne les faire pas assez grandes. Que pour celle-cy elle ne se refoudroit pas d'agir puissamment, ny de faire de grands amas d'argent & d'hommes en faueur des Allemans; sans sçauoir pourquoy, sous quelles conditions, & quel seroit le fruit de tant de bien

T t t iij

hazardé & de tant de vies exposées. Qu'elle voudroit auoir quelque gage de la foy de ceux avec qui elle faisoit Societé ; comme la prudence Politique le conseille : & demanderoit des places de seureté pour la retraite de ses armées, & pour ne demeurer pas la proye des Ennemis & le joüet des Amis en cas de disgrâce ; comme les maximes de la guerre le commandent , & semblables conditions de longue contestation & de resolution difficile.

Qu'au contraire c'estoit le naturel des Allemands de ce temps-là, de vouloir estre secourus quand ils en auoient besoin , plus gratuitement que gens du monde , & apres qu'on auroit fait tout ce qu'on auroit pû pour l'amour d'eux ; de penser qu'on n'en auroit jamais assez fait, & qu'on leur en deuroit encore de reste. Qu'ils auroient de la peine à se résoudre de bailler des places de seureté , pour la retraite des armées de ceux qui les secourroient : de se brider eux-mesmes par des blocus volontaires, & de faire des playes à l'Empire qui ne se fermeroient peut-estre jamais. Que si la preuoyance de l'auenir & la constitution du temps present requeroient , que les

François s'accommodassent de quelque chose pour asseurer leur retour en leur pays, quand ils se seroient engagez dans celuy des autres; Ceux-cy entreroient en desffiance de leur dessein, & craindroient que sous vne protection apparente; Ils ne voulussent introduire parmi eux vne vsurpation veritable, & repousser vne seruitude en les precipitant en vne autre. Qu'il ne leur faudroit que cét ombrage pour s'accorder sans eux, quand ils pourroient s'accorder auantageusement, & pour les laisser dans le boubier, dont ils seroient sortis par leur assistance. Qu'il ne leur faudroit mesme que ce pretexte pour tourner leurs armes contre leurs Libérateurs, & pour passer de la defection à l'hostilité, & deuenir Ennemis declarez, de Confederez Infideles.

Que la France feroit de grandes considerations sur tout cela, & delibereroit longtemps avant que des'embarquer à vne si haute entreprise, & à vne expedition si jalouse. Et par consequent il se prometoit d'auoir dissipé ce grand amas de troupes tumultuaires qui rendoit les Protestans si orgueilleux, & ancanty la Ligue ennemie; auparavant

qu'elle eust cherché quelque autre appuy estranger, & que la France se fust remuée. Cela luy reussit comme il l'auoit projeté, & il eust deslors acheué ce qu'il auoit heureusement commencé, & qu'il auoit plus qu'à demy fait; s'il n'en eust esté empesché par des causes que nous auons apportées ailleurs.

A cette Ligue en succeda vne autre sous la direction de l'Electeur Maurice de Saxe. Elle fust veritablement plus sage que la premiere, & eust recours à la France sans laquelle l'experience luy auoit appris, qu'elle n'auroit que des succez imparfaits & vne prosperité de peu de durée. Aussi fust elle plus heureuse que la premiere, & l'entrée de Henry second dans l'Allemagne, & l'apparition de ce nouuel Astre qu'on peut en quelque façon dire auoir hasté l'Occident de l'Empereur, & fait cacher sa lumiere, luy donnerent vne telle espouuante; qu'il fit rechercher d'accommodement les Protestans, & leur offrir des conditions si auantageuses pourueu qu'ils se destachassent de la France; qu'ils les acceptèrent, & firent leur paix à Passau sans y comprendre le Roy, qui

*En l'année
1552.*

qui n'auoit pas espargné sa propre personne pour les assister. Ils la firent sans se souuenir encore de deux Princes qu'ils luy auoient baillez pour Ostages, & qu'il rendit avec autant de generosité qu'il leur auoit tesmoigné de franchise, à ne leur demander point d'autres gages de leur foy, ny d'autres arres de leur constance. Ce n'eust pas esté assez à Maurice d'auoir violé sa foy, & manqué à vn si magnanime Protecteur; luy qui auoit trahy son propre sang, & fait la guerre à son Cousin Federic pour auoir ses Estats & sa dignité Electorale; si pour consommer la lascheté & couronner l'ingratitude, il n'eust encore acordé à l'Empereur, que les troupes de la Ligue passeroient à son seruice, & seroient employées contre la France, qui auoit tant contribué à les rendre victorieuses, & à deliurer l'Allemagne de seruitude.

Le pretexte dont les Allemans colorerent cette sale procedure, & le plastre dont ils couurirent cette noire tache; fust le recouurement de la ville de Mets, dont Henry second s'estoit accomodé en passant, du consentement de l'Euesque & du peuple, qui aymoit

Vuu

mieux viure sous la domination d'un puissant & juste Monarque, comme estoit Henry; que sous la tyrannie & sous la foiblesse de plusieurs Maistres, comme estoient les Magistrats qui le gouuernoient. Outre que le Roy ayant eü le vent de l'infidelité de Maurice, dont l'humeur interessée & changeante ne luy estoit pas inconnüe, & voyant paroistre des signes d'une future tempeste qui pourroit fondre sur la France; Il creut que le moins qu'il pouuoit faire, estoit de se saisir de quelque place importante, pour metre vn frein à la legereté des Confederez, & pour les empescher de le tromper de peur de perdre cette place. Et en tout cas pour couvrir & remparer sa frontiere aux despens de ceux, pour l'amour desquels il auoit mis son Estat au hazard, apres auoir si liberalement exposé sa vie & le bien de ses sujets pour les deffendre. Cela n'estoit que trop juste, & il n'y auoit rien que le droit de nature ne permit, & que la loy de la guerre ne commandat. Et certes qui se souuiendra sous quel tiltre & avec quelle couleur l'Empereur s'empara de Cambray & de Constance, qui estoient villes Imperiales, & que ce fust seule-

ment pour faire de celle-là vn rempart contre la France, & de celle-cy vne bride pour gourmander les Suisses; jugera que le Roy auroit esté trop delicat & trop foible, si sur de meilleurs fondemens, & sur de plus fortes considerations, il eust fait scrupule d'ocuper vne ville, où les souhaits de la plus grande partie des habitans l'appelloient: & d'entrer dans leurs murailles, apres s'estre logé dans leur cœur & dans leurs affections.

Toutes les forces donc de l'Empire tournerent contre Mets, qui fust l'escueil où la fortune de l'Empereur acheua de se briser, & où il commença à comprendre qu'il luy falloit quitter le monde, où il ne pouuoit plus estre ce qu'il auoit esté: & descendre du Theatre, où il ne pouuoit plus paroistre que comme vn Prince mal-heureux, & dont la fortune vouloit faire exemple. La Iournée de Renty fit la conclusion de la Piece, & la peur qu'il eust d'y estre enleué; comme infailliblement il l'eust esté par Monsieur de Guise, si vn des Chefs de l'armée du Roy n'eust fait sonner la retraite, dans la chaleur du combat & au fort de la victoire. La peur dis-je que Charles eust

V u u ij

de cét accident; le confirma en cette noble & hardie resolution qu'il auoit faite de quitter le monde, & de renoncer à l'Ambition à l'Empire & à tant de Royaumes. Il voyoit bien par les experiences qu'il en auoit faites, & par les disgraces qu'il auoit receües depuis l'aue-nement de Henry à la Couronne; que le Genie de ce Prince estoit superieur au sien, & qu'il ne deuoit pas opposer le penchant de l'âge & les infirmités de la vieillesse, à l'ascendant & à la vigueur d'une jeunesse florissante. Il consideroit que Henry estoit en possession de luy faire des affronts à la guerre: qu'il auoit tousiours eü l'auantage sur luy dans la Negotiation & aux Traitez: qu'il auoit sceu se destourner des pieges qu'il luy auoit tendus à Rome & au Concile, & qu'ayant dissipé les menées qu'il y faisoit pour susciter contre luy toute la Chrestienté Catholique; il auoit eü l'adresse de luy jeter à dos toute l'Allemagne Protestante.

Voila donc Charles hors du monde où il auoit fait tant de bruit & tant remué de choses. Voila son dessein de la Monarchie eschoüé, & les trois pays en seureté; chacun desquels


luy eust pû servir de planche s'il l'eust conquis, pour passer à la conquête du reste. Mais ce qui est le plus considerable, & la plus grande supercherie que la fortune luy ait faite; Est qu'il a veu de son viuant l'Empire sortir de sa Maison, & passer à celle de son Cadet. Qu'il a veu faire cette bresche sans l'auoir pû empêcher, & a veu sa puissance & son credit traualier inutilement pour la reffaire. L'inclination des Allemans de n'auoir point d'Empereur qui ne fust de leur Nation, & le besoin qu'il auoit d'eux aux guerres qu'il auoit sur les bras; l'obligerent à consentir que son frere fust nommé Roy des Romains. Il y consentit certes se promettant de faire en sorte avec le temps, ou que Ferdinand en donneroit la demission en faueur de son fils: ou de faire nommer son fils Roy des Romains en cedant l'Empire à son frere.

Mais Ferdinand qui n'auoit rien oublié pour s'esleuer à cette Dignité: qu'il auoit esté pour ce sujet complaisant aux Allemans au prejudice mesme de sa conscience, & qui s'estoit veu reprocher à Rome en la personne de ses Ambassadeurs; qu'il s'estoit fait passage à

V u iij

l'Empire par le mépris de la Religion, & par les injures qu'il auoit souffert luy estre faites; n'auoit garde de se demetre volontairement d'une chose, qu'il auoit si cherement achetée: & il auoit trop de passion pour son fils, pour luy preferer son Neveu en la plus haute Dignité du Christianisme. De sorte que l'Empereur ayant enuoyé sans effet auant sa retraite, la Reyne de Hongrie sa sœur vers Ferdinand & vers Maximilian son fils, pour obtenir ou vne demission de la Royauté des Romains: ou vne substitution à la mesme Royauté en faueur de son fils Philippe; aquiesça à ce qu'il ne pouuoit éuiter: suiuit la force de la destinée qui l'eust entraîné, & remit l'Empire à son frere qu'il n'auoit pû faire tomber en la personne de son Successeur.





DISCOVRS SIXIEME.

Que Philippe second s'attacha principalement à la France, pour s'ouurir par là le chemin à la Monarchie. Que ses Successeurs ont tasché de s'establis dans le cœur de l'Allemagne, pour faire reuenir l'Empire à leur Maison, & pour passer de là à la Monarchie.



PHILIPPE second fust malade, comme ses descendans l'ont aussi esté depuis, de la passion de Charles, & recueillit l'amour de la Monarchie comme vne piece de son heritage. Mais d'autant que l'Angleterre qui eust fort aydé à acheminer ses desseins, luy eschapa, & que l'Empire qui luy eust fourny des pretextes & des forces pour l'exécution de plusieurs grandes entreprises, luy auoit manqué; Il laissa pour quelque temps reposer sa passion: ou n'en fit point pa-

roistre d'autre, que celle de conseruer ce que son pere luy auoit laissé, & d'affermir ce qu'il auoit trouué de tremblant dans ses Estats. Il obtint à la verité d'abord quelques auantages esclatans sur Henry second, qui n'eust pas le mesme ascendant sur le fils qu'il auoit eü sur le pere, & qui expia l'infraction de la Treue, où Messieurs de Guise la Duchesse de Valentinois & les Caraffes le precipiterent; par la perte des batailles de Saint Quentin & de Grauellines, & par la paix de Cateau Cambresis, où il rendit en vn jour ce qu'on n'eust sceu prendre en plusieurs années, & ouurit la porte aux guerres ciuiles en la fermant aux estrangeres. Depuis la continuation de la decouuerte des Indes qui luy fit depeupler l'Espagne, & troquer des hommes dont il auoit fort à faire, contre de l'argent dont il n'auoit pas tant de besoin. La defection des Flamens contre lesquels il n'eust pas assez de puissance; bien qu'il possedat tant de Royaumes: ny assez de sagesse; quoy qu'on l'ait nommé le Salomon de son Siecle, & l'humeur mutine & inquiete des Morisques; le refroidirent vn peu de son grand dessein, & rallentirent en luy cét

Esprit

Esprit Monarchique , qui auoit tant agité Charles le Quint.

Mais dès qu'il eust ouïy le bruit que les differens de la Religion faisoient parmy nous, & qu'il eust veu l'embaras où les guerres ciuiles nous auoient plongez ; Il réueilla vn desir qui n'estoit qu'assoupy : Il embrassa l'ocasion qui luy rioit : Il se proposa de se frayer le chemin à la grandeur premeditée, sur les ruines de la France. Il jugea bien qu'il ne pourroit traualler sur vne plus riche estoffe pour la besoiigne qu'il meditoit: qu'il trouueroit parmy nous ce que peut-estre il chercheroit ailleurs inutilement , & que les Espagnols ayant d'ordinaire sur nous cét auantage, qui naist du temperament du corps & de la constitution du Climat, d'agir avec plus de preuoyance ; l'abondance de richesses & d'hommes dont ce Royaume ne se sçauroit espuiser, les gueriroit d'vn defect auquel nous ne sommes pas sujets ; qui est de faire *lentement* & avec vne longueur ruineuse, les apprets de leurs entreprises. Cela pourtant n'est pas arriué, & la mesme Prouidence qui n'a point souffert iusques icy, que les hommes ayent coupé les

Xxx

Istmes & les Destroits qui separent les Mers qu'il a voulu estre diuisées; n'a pas voulu que les auantages que l'vne des Nations a sur l'autre, se conjoignissent avec durée sous vne seule. Quoy que Philippe ait fait jouïr toute sorte de machines, & mis en besoigne toute sorte d'ouuriers; Il n'a jamais pû faire cette liaison, & la France n'a pû se donner à luy, bien que ce fust son enuie: & il n'a sceu la recevoir, bien que ce fust sa passion. Bref apres auoir consumé tant de forces, & jetté tant de millions parmy nous: apres y auoir tant trafiqué & tant fait la guerre: apres y auoir remué la bonne & la mauuaise Religion pour paruenir à son but; Il ne luy est resté pour se consoler d'auoir manqué le veritable sujet de ses armes & de ses pratiques, qui estoit d'vsurper la Couronne; que la beauté du pretexte, qui estoit de nous donner vn Roy Catholique.

Je ne laisseray pas de remarquer icy pour le diuertissement du Lecteur, & pour vn exemple illustre de la vanité des grandeurs, & de l'instabilité des choses humaines; qu'il n'est gueres possible de trouuer vne vie plus meslée de bien & de mal, & plus tissüe d'accidens

heureux & sinistres; que celle de Philippe. Il est certain que si ce Prince a beaucoup gagné d'un costé; il a beaucoup perdu de l'autre, & que si vne partie de ses desseins luy a reussi, l'autre a manqué & s'est auortée. L'accomplissement de son mariage avec la Reyne d'Angleterre, qui auoit rencontré tant de contradictions & d'escueils : les victoires de Saint Quentin & de Grauellines, dont nous auons desia parlé : le reestablissement du Duc de Sauoye despoüillé pour les Interests de sa Maison, & les François chassez de l'Italie: tant de pays conquis & tant de Mines descouuertes aux Indes Occidentales : la Succession du Portugal avec ses dependances, qu'il s'assura avec les armes contre cinq fameux Concurrrens: la suppression des Priuileges & de la liberté des Aragonois: la deffaite des Morisques: le gain de la bataille de Lepanthe, où il eust si grande part, & la reprise de Thunis & de la Goulete; sont à la verité de grandes pieces, & qui feront du bruit jusqu'à la derniere posterité.

Mais d'ailleurs la mort de la Reyne d'Angleterre sans Enfans, & par consequent la pos-

Xxx ij

session de ce beau Royaume eclipsée: la perte de la vraye Religion aux Pays-Bas, sans que pour le moins il y ait pû conseruer comme nos Roys ont fait parmy nous, la fidelité & l'obeissance qui luy estoient deües: la France qui s'est sauuée de ses mains lors qu'il la tenoit comme prise: l'attaque des Gelues & les descentes de ses troupes en Irlande qui luy furent mal-heureuses, & l'invincible qui deuoit metre à la chaisne toute l'Angleterre, & pour laquelle les Rodomons qu'elle portoit, disoient qu'ils ne desiroient en cela sinon que Dieu ne se messat de rien, & qu'il les laissât seulement faire. Cette invincible dis-je qui ne fust que le jouiet d'un grain de vent, & l'exemple du plus grand naufrage qui ait difamé l'Ocean depuis le temps de Tybere. En un mot de trois places que son pere luy auoit recommandé de garder avec plus de soin & de jalousie, comme les clefs de l'Espagne des Pays-Bas & de l'Afrique; Cadix fust prise par les Anglois, Flessingue par les Hollandois, & la Goulete par le Bacha Pialy. Ces disgraces neantmoins & cette bizarrerie d'accidens n'ont pas empesché, que ce Prince n'ait aquis

vne reputation qui a volé par tous les lieux de la terre, & qui se rafraischira dans tous les âges du monde; ce qui n'est ny merueilleux ny nouveau, puis que ç'a tousiours esté le destin de la plupart des grands hommes, d'estre exposez à ce flux & reflux de fortune, & de mourir riches d'honneur apres auoir fait plusieurs pertes.

Quoy qu'il en soit du cours & de la Catastrophe de la vie de Philippe; Il ne peut s'empescher auant mourir de tourner les yeux du costé de la Monarchie, & de jetter quelque œillade vers l'Allemagne où est l'Empire, qui en est le fondement & le centre. C'estoit peut-estre pour monstrier à ses Successeurs la route qu'il leur falloit suiure pour y arriuer, & l'endroit par lequel ils pourroient rappeler & faire reuenir l'Empire dans leur Maison. De là vint l'Expedition de l'Admirante d'Aragon delà le Rhin, dont nous parlerons amplement en la troisiéme Partie au *Traité* de la Succession de Cleues. De là vint le renouvellement de la mesme entreprise par Spinola sous les Archiducs de Flandres & sous Philippe III. Et bien que l'une & l'autre de ces deux Expe-

ditions ait eü vne fin plus prochaine , qui estoit la communication de l'Allemagne & des Pays-Bas , & la commodité de faire plus auantageusement la guerre à leurs Ennemis , & de les tirer d'entre leurs Canaux & leurs Riuieres; Si est-ce que les Espagnols qui n'ont jamais l'esprit que trop embarrassé des considerations de l'auenir , & qui en toutes leurs actions ont tousiours plus d'un but où ils visent; Outre le dessein particulier & present dont nous auons parlé , auoient encore en teste cét autre general & esloigné , de s'ouurir le chemin à l'Empire , & de là à la Monarchie.

Les Successeurs de Philippe ne se sont pas d'abord jettez à des entreprises si vastes. Ils n'ont pas d'abord montré des desseins qui ayent pû beaucoup estendre leur domination & allonger leurs limites, & jusqu'à la mort du feu Roy; les Pays-Bas ont esté le champ où ils se sont le plus exercez , & où ils ont dauantage paru, tantost en qualité d'Assaillans & tantost en qualité de Soustenans. Vn peu deuant & incontinent apres la mort de ce Prince, qu'on a à bon droit appellé GRAND , & à

qui entre tous nos Roys on pourroit justement eriger le tiltre d'incomparable, s'il n'eust point laissé de Successeur qui l'eust esgalé; les armes d'Espagne exciterent du trouble, & causerent quelque innouation en Allemagne sur le sujet de la Succession de Cleues. Mais elles se firent principalement sentir en Piedmont contre le Duc de Sauoye, & firent trois efforts reiterez pour despoüiller ce Prince, & se saisir de l'entre-deux qui separe la France de l'Italie. Ce jeu sanglant où la France agit tantost avec langueur & mollesse, & tantost avec quelque force & quelques esclans de courage; dura jusqu'aux troubles de la Boheme, & aux derniers mouuemens de l'Allemagne. L'Empire aussi depuis Charles le Quint jusqu'à ce temps-là, auoit si fort changé de ce qu'il estoit; qu'il ne luy en restoit presque que le nom & les armes, & au lieu de ce vol hautain & superbe que ses Aigles prenoient autrefois, & qu'elles ont pris depuis; Elles ne battoient plus que d'une aïlle.

Mais apres que le Conte Palatin eust commencé cette celebre querelle, qui n'a pû finir encore par le hazard de plus de quinze batail-

les, & irrité ceux qu'il n'a sceu depuis ny vaincre ny apaiser. Apres qu'il eust enleué la Bohême à l'Empereur, & porté la guerre jusqu'au cœur de l'Austriche, & aux Fauxbourgs de Vienne; les deux Puissances Austrichiennes estant vnies, eurent bien-tost la reuanche de cét affront, & ayant changé la face de l'action, & conuertý la defense en attaque, poussèrent si auant la victoire; qu'ils'en fallut peu qu'elles ne la missent en son comble, & ne la vissent couronnée du gain entier del'Allemagne. Cela fust sans doute arriué, si l'impatiente auidité des Espagnols, comme nous l'auons plusieurs fois dit, ne leur eust fait oublier cette vieille Maxime qui leur a esté si familiere; de n'entamer jamais de nouuelles conquestes, qu'on n'ait bien asseuré les premieres: & si les Estats du Duc de Mantouë qui deuoient changer de maistre; ne leur eussent fait abandonner la certitude pour l'esperance, & exposer ce qu'ils possedoient en Allemagne, pour vsurper ce qu'ils n'ont pas aquis en Italie.

Mais laissons l'affaire de Mantouë jusqu'à la troisiéme Partie, où nous en traiterons au long,

long, & reuenons au dessein des Roys d'Espagne de faire reuenir l'Empire chez eux, & de metre sous les aïles de ses Aigles tous les Estats qu'ils possedoient, pour y joindre ceux qu'ils ne possedoient pas, & qui leur estoient necessaires pour former le rond de leur Monarchie. Ils virent bien qu'apres s'estre saisis des auenuës & emparez des lizieres de l'Allemagne, s'ils ne vouloient que s'auancer pied à pied dans ce grand & vaste pays; la besoigne seroit trop longue, & qu'ils rencontreroient sur leur chemin tant de mauuais pas & tant de trauerfes; qu'ils seroient peut-estre contrains de s'arrester, ou de retourner en arriere. Cela n'empescha point que d'un costé ils ne projetassent d'enuahir la Valteline, pour la communication de l'Italie & de l'Allemagne, & de l'autre de s'establir delà le Rhin pour le commerce de l'Allemagne & des Pays-Bas.

Quant au premier l'humeur des habitans de cette vallée, qu'ils preparoient de longue main à la Reuolte contre les Grisons leurs Souuerains, & la graine de discorde qu'ils y auoient semée, & qu'ils cultiuoient avec grand soin; leur faisoient esperer qu'ils y trouue-

Yyy

roient tousiours la porte ouuerte lors qu'ils y voudroient entrer , & que les gages leur demeureroient durant la contestation des Parties. Quant au second la mort prochaine du Duc de Cleues sans Enfans, & la concurrence de plusieurs Pretendans à cette riche Succession ; ne leur permettoient pas de douter que s'ils ne pouuoient l'attraper toute ; Ils n'en tiraissent tousiours à eux quelque membre important, & quelque piece considerable. Mais leur preuoyance donna plus auant , & par vn intrigue ourdy certes avec beaucoup d'esprit, & continué avec constance, dans la famille des Princes de l'autre Branche de leur Maison ; Ils tascherent de s'ancrer dans le cœur de l'Allemagne : d'y aquerir de beaux Estats, & de s'oster la grande pierre de scandale , & le fatal obstacle qui les empeschoit de paruenir à l'Empire ; qui estoit d'estre estrangers de l'Empire ; & de n'estre point membres du Corps Germanique.

Deux principales considerations leur donnerent cœur à former ce dessein , & à ourdir cet intrigue. La premiere la foiblesse où l'Empire estoit tombé depuis la mort de Charles le

Quint, & le besoin qu'auoient les Empereurs Regnans de leur assistance & de leur protection, contre les frequentes inuasions des Turcs dont la Hongrie estoit trauaillée, & contre les entreprises des Protestans, qui estoient tenus en eschec & empeschez de remuer, à l'aspect de leur puissance. La seconde consideration estoit l'imbecillité de l'esprit, & la bassesse des inclinations de l'Empereur Rodolphe; sous le regne duquel se commença la piece que nous allons estaller. L'humeur de son frere Mathias perpetuellement inquiete, & à qui la nouveauté le trouble & la broüillerie; estoient de merueilleux appas pour le faire aller où l'on vouloit, & celle des deux Cadets Maximilian & Albert, qui n'auoit ny action ny vigueur, & estoit toute dans la dependance, dans la soumission & dans vne obeissance presque aueugle.

D'autre costé le Genie de Ferdinand Archiduc de Grets leur Cousin & Beau-frere de Philippe III. Prince nourry à la deuotion, & par l'acoustumance qu'il auoit prise de dependre, & de se laisser conduire aux choses spirituelles; tres-disposé à se laisser gouuerner, & à

Yyy ij

souffrir direction aux temporelles. De quoy il ne faut point s'esmerveiller, puis qu'il arriue assez souvent que l'une de ces dependances attire l'autre, tant de la part de ceux qui se soumettent & qui suivent; que du costé de ceux qui gouvernent & qui conduisent, & qui non contents d'une si absoluë & si delicate domination, que celle qui s'exerce sur l'esprit; ont bien de la peine à s'empescher de l'estendre sur les objets materiels: & s'ils ne font des usurpations stables & fixes en ce pays-là; d'y faire au moins de temps en temps des irruptions & des courses. Bref de la part des objets mesmes qui sont assez souvent complicez & mixtes, & composez de ce qui regarde l'esprit & de ce qui concerne la matiere; & pour lesquels par consequent les Princes n'ont pas moins besoin du Conseil de Conscience, que du Conseil d'Estat, & d'estre esclairez des lumieres de la Morale Chrestienne, que de celles de la Politique. De sorte qu'encore que Ferdinand aymat naturellement la Justice, & eust auersion de ce qui choquoit la probité; Il n'estoit pas difficile de le faire consentir à beaucoup de choses, qui choquoient la justice & la

probité; en les colorant des apparences de la Religion, & en les dorant du pretexte de la plus grande gloire de Dieu.

Outre que ce Prince ayant vn Foible, auquel sont sujets tous ceux qui sont comme il estoit, d'un naturel benin & d'une temperature douce, qui est de ne pouuoir souffrir vne longue importunité; les Espagnols preuoy-oient bien que l'attaquant par là, ils en obtien-droient plusieurs choses auxquelles il auoit de la repugnance: qu'il les acorderoit pour se re-dimer de vexation, & que pour le contrain-dre de se rendre; Il ne faudroit que redoubler les bateries, & le sommer souuent de se ren-dre; ce qui est arriué plusieurs fois. Comme aussi il est arriué qu'en consideration du zele pour la Religion: de l'amour pour la justice, & des autres bonnes qualitez de ce Prince; Dieu luy a enuoyé des prosperitez avec les-quelles ses vertus morales n'auoient point de proportion: & que pour la peine de ses defaux & de ses foiblez, qu'il a laissé seruir d'organe & d'instrument aux passions d'autrui; Il luy a enuoyé des disgraces si extrêmes, qu'il s'est veu trois fois sur le point d'estre perdu sans res-

Yyy iij

source, & sur le penchant d'un abyfme, d'où ceux qui y tombent ne remontent point. Mais enfin les prosperitez l'ont emporté sur les disgraces, & il a eü cette fatisfaction auant mourir, de voir la promotion de son fils à la Royauté des Romains; bien qu'on la tienne illegitime, & la grandeur de fa Maison en quelque sorte de feureté, & en quelque estat de confistance.

Reprenons ce que nous auons quité. Ferdinand auoit vn frere appellé Leopold, qui n'estoit pas à la verité Prince de haute entreprise ny de grande ambition; mais qui n'estoit pas aussi depourueu de sens commun ny de chaleur Martiale, & qui estant obligé de dependre comme Cadet des mouuemens de son frere aîné; les Espagnols jugeoient bien qu'il feroit par consequent obligé de dependre d'eux, qui donneroient la Loy aux actions & à la conduite de l'autre, & qu'il feroit vn instrument assez propre pour auancer les desseins qu'ils auoient sur la liberté des Grisons, & pour l'vsurpation de la Valteline.





DISCOVRS SEPTIEME.

*Comment les Successeurs de Philippe ont tasché
de s'establr dans l'Allemagne. Des motifs qui
obligerent les Bohemiens à se soustraire de
la Domination de l'Empereur Ferdi-
nand, & d'appeller à la Royauté de
la Boheme l'Electeur Palatin.*

LES conditions de ces Princes soi-
gneusement obseruées , comme
nous venons de dire , & leur Fort
& leur Foible bien reconnu par
les Espagnols ; Ils commencerent
à trauailler à leur besoigne , & à faire joüer
leurs artifices. Pendant que Rodolphe faisoit
de son Cabinet vn Laboratoire & vne Forge,
& reduisoit toutes les pensées de l'Empire à
chercher la Pierre Philosophale , & à faire des
Montres & des Horologes ; Ils firent vn Traité *L'an 1606.*
auec Paul V. & auec les Archiducs , par lequel,
Et le tout pour la conseruation & l'exaltation de la Re-

ligion Catholique, fust resolu d'un commun consentement de declarer à Rodolphe, que luy mourant sans Enfants masles legitimes, le plus vieux de la Maison d'Autriche luy succederoit aux Estats hereditaires. Laquelle Declaration faite il tascheroit de le faire eslire Roy des Romains, de peur que l'Empire ne tombat entre les mains d'un qui ne fust point Catholique. Que si cela ne se pouvoit, il le declareroit Roy de Boheme. Que cette Protestation se feroit à l'Empereur avec une armée, afin de contraindre les Bohemiens d'accepter cette Declaration en cas de refus, & les Confederez s'obligeoient de l'assister d'argent & d'hommes s'ils en estoient requis, &c.

En cecy le zele du Pape est excusable, qui auoit veritablement pour fin la conseruation & l'exaltation de la Religion Catholique dont il estoit le Chef: qui croyoit qu'elle ne pouuoit receuoir vne plus dangereuse blessure, que si l'on laissoit assis la Couronne Imperiale sur vne teste Heretique, & à qui on auoit sans doute donné à entendre; que l'Election du Royaume de Boheme estoit vne vsurpation faite par les Bohemiens, dont on se vouloit deliurer, & vn droit enuahy par ces peuples, qu'on vouloit rappeler à sa source. Outre cela les Papes pretendent auoir quelque droit de Superiorité & d'Inten-

d'Intendance aux choses qui regardent l'Empire, & qui concernent les Electeurs; vn desquels est le Roy de Boheme. Ils pretendent auoir esté les Fondateurs de l'Empire d'Occident, & que Leon III. fit la separation de la masse qui appartenoit aux Empereurs Grecs, & en attribua à Charlemagne les parties Occidentales, comme des membres trop esloignez de leur premier Chef, pour en recevoir les influences & la vie. Ils se disent les Instituteurs du College Electoral, & les Autheurs de la reduction des suffrages pour la creation des Empereurs, au nombre où l'on les voit aujourd'huy. C'est ainsi que l'a escrit entre les Modernes vn certain Lonigy, non pas problematiquement, & comme vne chose soutenable; mais affirmatiuement & par resolutions absolues, aux Aphorismes qu'il publia à Rome, sur la promotion à l'Electorat du Duc de Bauiere, lors qu'il en enuoya demander la confirmation à Gregoire XV.

Sur ces fondemens & avec ces tiltres, les Papes presument de se pouuoir legitimement mesler des affaires de l'Empire, & d'estre obligez d'empescher que ce qui est de leur Insti-

Z z z

tution, & qui a emané de l'autorité du saint Siege; ne tourne au prejudice de l'Eglise, & ne serue à faire du degast dans la Vigne de Dieu, dont la garde leur est commise. Si les Papes sont bien ou mal fondez en ces pretentions, & s'il y a des Repliques pertinentes & de justes exceptions contre ces Aphorismes; c'est le fait des Interessez, & non pas le mien de le rechercher. Je dis seulement que pourueu que ces pretentions demeurent aux termes de la probabilité & de la vray-semblance; Ils sont à couuert de l'injustice & de la mauuaise foy, quand ils les veulent faire valoir: & que les opinions veritablement probables, sont des principes suffisans pour agir legitimement & en conscience, comme je le monstrey en la troisiéme Partie.

Mais pour ce qui est des Espagnols, outre qu'ils auoient vne autre visée, que celle de la Religion, comme nous auons dit, ou pour le moins qu'ils ne la regardoient qu'obliquement; Je ne sçay comment on pourroit excuser leur procedure, & adoucir la violence avec laquelle ils ont troublé le repos de l'Empereur, & la paix de l'Empire. Ils se sont ingerez

où ils n'auoient aucun droit d'interuenir, & jettez comme par vne bresche, où ils ne pouuoient entrer par la porte. Je ne sçay par quelle Loy de conscience; ils ont pû susciter vn sujet contre son Souuerain : Ils ont pû rendre Mathias felon contre son frere Rodolphe, & faire contraindre celui-cy à main armée & avec vn bras esleué, de faire la volontré de l'autre; quand mesme elle eust esté iuste, quand mesme elle eust esté sainte. Je ne sçay par quel droit des Gens ils ont voulu faire despoüiller vn Royaume de tout temps Electif, de ses Libertez & Franchises qui ne leur estoient pas inconnuës, & violer des Priuileges qui auoient esté jusques alors inuiolables.

Que s'ils veulent en cecy comme en plusieurs autres choses se couvrir de leur vieux Manteau, & dire que c'estoit pour roigner tousiours les aisles à l'Herésie, & pour luy couper chemin de peur qu'elle ne passat outré en Allemagne. A cela on leur auroit pû respondre, que la fin estoit veritablement bonne, mais que les moyens ne l'estoient pas, & qu'ils prenoient vne route pour y paruenir, où il y auoit tant de mauuais pas à franchir, & tant

Zzz ij

de precipices à éviter ; qu'il n'y auoit pas moins à craindre qu'à esperer pour la Religion, & que le hazard estoit également incertain entre le gain & la perte. Qu'en cecy il falloit laisser agir le Ciel & gouverner la Providence. Qu'il falloit s'en remettre à elle, qui mene les choses à leur fin selon le bon plaisir de sa volonté, & non pas selon les fantaisies des hommes. Que ce n'estoit pas à eux à faire venir les temps qui ne sont pas ordonnez dans les Decrets du Conseil Eternel : ny à haster la maturité des Euenemens, qui n'arriueront qu'en leur saison, & ne s'esclorront qu'aux heures prefixes de leur terme. Qu'elle entendoit cependant qu'ils se continssent dans les limites de l'ordre receu : que pour luy plaire ils ne s'esgarassent point du droit commun, & n'entreprissent jamais de l'honorer par le vice, ny de chercher sa gloire dans le chemin de l'injustice de la violence & de la mauuaise foy. Cependant on peut voir par ce procedé des Espagnols; combien leur Appetit de dominer est licentieux, & leur ambition effrenée: combien ce feu est actif & deuorant, & comme il se nourrit de toute sorte de matiere:

comme il ne consume pas seulement ceux qui ne leur font rien; mais comme il brusle encore leurs propres parens, & dissout le ciment du sang & des Alliances. Reuenons à nostre sujet.

Après que le Complot dont nous venons de parler fust formé, & la Conjuracion résolue contre Rodolphe; On ne fust pas longtemps sans en voir des esclats, & Mathias ne tarda point à luy donner jour par des attentats memorables. Pour cet effet il fit auancer vers Prague où estoit l'Empereur, vne armée qu'on auoit assemblée en Goritie, & l'ayant comme inuesty en cette ville capitale de Boheme; luy fit en cet estat & avec cet equipage, la Protestation qui auoit esté concertée avec les Espagnols & le Pape. Qu'eust fait vn homme defarmé & pauvre de cœur & d'experience, comme estoit Rodolphe, en ce destroit où il s'estoit laissé enfermer; que de recevoir la Loy de çeluy qui auoit la puissance de la luy donner, & d'abandonner sa teste à vn joug qu'il luy estoit force de subir? Il se fit donc vn Acord au mois de Iuin de l'an 1608. par lequel il est porté *Qu'il cede à son frere Mathias la Couron-*

ne de Hongrie, le Sceptre le Chapeau Royal & les autres ornemens, qui luy furent portez par le Cardinal Dietresthein. Qu'il reserve pour soy le Tiltre de ce Royaume, pour le porter conjointement avec Mathias, comme aussi il luy cede la haute & basse Autriche, dont il se reserve le Tiltre, deschargeant les habitans dudit pays du serment de fidelité qu'ils luy avoient presté. Consent que ledit Archiduc soit nommé à la Couronne de Boheme, en cas que luy meure sans heritier male, le tout sans prejudice aux Estats dudit Royaume de leur droit d' Election & de leurs autres Privileges. Les Estats dudit Royaume consentirent à ladite Succession future, moyennant deux conditions, qui furent sans prejudicier aucunement à leurs Privileges, & que ledit Archiduc pendant la vie de sa Majesté Imperiale, ne s'immisceroit en aucune sorte au Gouvernement dudit Royaume, ny des Prouinces incorporées à iceluy, & au cas qu'il y contrevint; qu'il seroit privé & descheu du droit de la Nomination qui luy estoit acordée, & qu'il s'intituleroit seulement Designé Roy de Boheme. Encore Rodolphe ne fust pas entierement degradé par ce Traité, ny la liberté des Bohemiens totalement supprimée. Il y a tousiours vn milieu entre deux extremités, & quelque sorte d'espace pour passer de l'une à l'autre. Toutes les

blessures qu'on reçoit ne font pas mourir subitement, & la vigueur que ces peuples témoignèrent, & la résistance qu'ils firent en l'occasion dont nous parlons; sauuerent à l'Empereur & à eux, ce reste de liberté qui paroist en ce Traité.

L'audace de Mathias, & les menées des Espagnols n'en demurerent pas là, & ne s'arrestèrent point en si beau chemin. Ils n'auoient pas si bien commencé pour ne pas pour suivre, ny esbauché si heureusement pour ne finir pas leur besoigne. Le sort en estoit jetté, & c'estoit vne destinée inuiolable dans leur esprit; d'abolir le droit d'Electiō des Estats de Boheme, & de rendre ce Royaume successif & hereditaire. Pour cela il falloit continuer à mater les Bohemiens: Il ne falloit point se laisser d'appesantir leur joug, & d'approfondir leur seruitude. Il falloit rompre tous les obstacles, & ouurir toutes les barrieres qui s'opposoient à ce dessein. Le Cardinal Clessel confident de Rodolphe, & Intendant des affaires de Boheme, leur faisoit vne estrange opposition dans le Conseil, & ne feignoit point de leur résister ouuertement, & de rompre tou-

tes leurs mesures. Ce fust le sujet pour lequel Mathias à la suggestion du Conte d'Ognate Ambassadeur du Roy Catholique; le fit emprisonner sans le sceu de l'Empereur, & sans la participation du Nonce résident en cette Cour. Et ainsi ayant desarmé Rodolphe de ce fidele & courageux Ministre, & abatu cette Teste qui influoit la vigueur & les esprits aux Bohemiens; Il les creut ranger facilement à tout ce qu'il desireroit.

Après ces Equipées de Mathias dont nous venons de parler, & les nouveautez qu'il introduisit en la Cour de l'Empereur. Après y auoir fait quelque temps tout ce qu'il vouloit, & gouverné à son gré l'Empire sous le nom & l'autorité de son frere; Il y paruint à la fin. Mais il ne fust pas si tost assis au Trône, où les Espagnols l'auoient aydé à monter; qu'ils luy firent adopter son Cousin Ferdinand, à l'exclusion de Maximilian & Albert ses freres, & le declarer son Successeur à la Hongrie Bohême & Estats hereditaires. Cette Declaration ne fust point sterile & vaine. Elle fust suiuite de son effet, comme l'esclair l'est quelquefois de la foudre qu'il a precedée.

Mathias

Mathias fait venir Ferdinand à Prague, où par fraude & avec argent, mais plus véritablement à la faueur d'une armée qu'il auoit dans la Boheme; Il le fait couronner Roy sans vser du mot d'ELECTION, & sans qu'il parût que l'autorité des Estats y fust interuenüe; qui estoit le blanc où visoient les Espagnols, & pour lequel il y auoit long-temps qu'ils se donnoient de la peine. L'acheuement de la besoigne & la conclusion de la piece furent, qu'ils firent vne Transaction avec Ferdinand par laquelle il fust resolu, *Que l'Election des Royaumes de Hongrie & de Boheme seroit abolie, & que le Roy d'Espagne succederoit à ces Royaumes; au cas que la Ligne droite masculine de Ferdinand vint à manquer. Moyennant quoy le Roy d'Espagne luy cedoit tous les droits qu'il auoit en ce pays-là comme petit fils de l'Aîné de la Maison.* 1517.

Surquoy il est à remarquer, que tout cela se fit & s'arresta entre les Espagnols & Ferdinand, de pleine autorité & de pure violence, & sans le sceu & participation des Estats de ces Royaumes qui sont electifs. Et ce fust le sujet du grand mal de cœur qu'en conceurent les Bohemiens, quand ils le sceurent, & la

A a a a

grande pierre de scandale où ils se heurterent, & qui les porta à la resolution qu'ils prirent apres, de rejetter Ferdinand pour leur Roy, & d'appeller en sa place Federic Conte Palatin; sous lequel s'est fait en Allemagne vn intrigue d'affaires, que vingt & cinq ans de guerre n'ont pû denoüer, & que mille incidens nouueaux qui naissent tous les jours, ne permettent point aux plus sages, de deuiner quel en sera le demeslement, & par quel destour on sortira de ce labyrinthe.

Que la Transaction dont nous venons de parler, ait esté le principal & plus violent motif du souleuement des Bohemiens; Il appert de la Declaration des Estats de ce Royaume sur la Rejection de Ferdinand du 23. May 1618. par laquelle ils se plaignent entre autres choses, *Qu'on auoit voulu transporter le Royaume à vne autre Branche.* Il appert de la Lettre qu'escriuit l'Ele-cteur Palatin à l'Empereur, du 25. Iuin de la mesme année, sur les mouuemens arriuez en Boheme, dans laquelle il dit formellement, *Que les Autheurs de ces troubles estoient gens, qui cherchoient l'acroissement de quelque Grandeur Estrangere, & represente l'esmotion que sentiroient les prouinces*

DV MINISTRE D'ESTAT. 555

de l'Empire, si l'on y introduisoit les Estrangers, comme on auoit fait au Duché de Iuilliers. Il appert enfin de la Declaration faite par les Bohemiens l'an 1619. sur l'Electiō de Federic premier, où ils disent clairement, *Que Ferdinand auoit voulu faire passer le Royaume sous vne Domination estrangere.*

Mais d'autant qu'il n'est rien de si aisé que d'acuser, & de colorer vne accusation: que chacun se flate en sa propre cause: qu'il l'ajuste & l'embellit comme bon luy semble, & que le papier souffre tout ce qu'on y met dessus, comme vn Miroir represente tout ce qu'on met deuant luy; apportons le tesmoignage de Ferdinand mesme, & les preuues qu'il a fournies aux plaintes des Bohemiens. Il est certain qu'au lieu que ses Predecesseurs parlant de leurs Estats; mettoient tousiours, *De nos Royaumes & Prouinces hereditaires*, le mot d'*hereditaires* tombant seulement sur les Prouinces, & non pas sur les Royaumes; Il l'a transporté à la teste, affin qu'il s'attachat & s'incorporat aussi bien aux Royaumes qu'aux Prouinces, & a mis, *De nos hereditaires Royaumes & Prouinces.* Et aux Letres Monitoires du 30. A-
uril 1620. contre l'Electeur Palatin, par les-

A a a a ij

quelles il le somme, *de quitter dans vn mois la Couronne de Boheme*, il pretend, *que ce Royaume luy est escheu par droit naturel & successif.*

Il y pouuoit auoir vn autre sujet, dont la connoissance estoit sans doute paruenüe jusqu'aux Bohemiens; qui les obligea à penser de changer de maistre, & à chercher vn autre joug que celuy de Ferdinand; dont la personne d'ailleurs ne leur estoit pas desagreceable. C'est la forte & implacable auersion que ce Prince auoit des Heresies, & vn zeile ardent & fixe dont il brusloit, de les exterminer aux pays de sa domination, & par tout où son auctorité seroit reconnuë. Il en auoit fait vœu à l'âge de vingt ans à nostre Dame de Lorete: il le renouella à l'âge de quarante trois à nostre Dame de Celles, qui est entre l'Austriche & la Styrie, & le reconfirma vn peu auant mourir, au raport du P. Larmorman en son *Liure des vertus de cét Empereur.*

Certes le zeile de voir ruiner les Heresies, & metre tousiours des pierres viues au Temple de Dieu, pour vser des termes de l'Apostre; est fort louïable en luy mesme, & pour n'en

sentir point quelque chaleur ; Il faut estre tout à fait destitué de charité enuers le prochain, qui est vne des fins du Christianisme : Il faut manquer de pieté enuers l'Eglise, à qui les Heretiques font la guerre : Il faut n'auoir point d'amour pour la gloire de Dieu, qui est profanée par de faux Cultes. Mais bien que ce zele puisse estre si chaut qu'on voudra dans le cœur, & s'y conuertir en fournaise: bien qu'il puisse s'augmenter à l'infiny dans son principe ; Si est-ce qu'il ne doit point sortir au dehors que temperé de discretion, ny laisser aller sa chaleur que par mesure & par regle. Il ne doit point tendre à sa fin que par des moyens conuenables: que par les moyens que Dieu a ordonnez, ou qu'il a laissez à la prudence de choisir. Sur tout il doit s'asseurer, que ses operations se font bien mieux d'ordinaire, avec des mains douces & pacifiques; qu'avec des mains violentes & sanguinaires, & supposer que c'est vne mauuaise inuention de vouloir tuer pour guerir, & abatre vn Edifice pour l'empescher d'estre bruslé. Qu'à la verité il y a des constitutions & des rencontres; où l'on se sert de quelque remede fort, pour

arrester la contagion des maladies qui se communiquent, & où l'on coupe des maisons, pour empêcher que le feu qu'on ne peut éteindre, ne prenne à d'autres, & ne consume ce qui se peut conserver. De cela j'en ay donné quelques Regles en la premiere Partie, & j'en dis tousiours quelque chose çà & là, selon que je le juge necessaire, & que les abus que j'y voy commettre m'y obligent.

Mais principalement il ne faut point manquer en allumant ce zele dans l'esprit des Princes; d'y respendre aussi les lumieres necessaires pour le conduire, & l'on se doit souuenir de ce que j'ay remarqué ailleurs, & qui ne scauroit estre trop souuent représenté; que les Grands ne peuuent faire de petites fautes, ny les Causes generales se desregler avec des ruines mediocres. Sebastien penultiesme Roy de Portugal, auant que ce Royaume fust passé sous la domination d'Espagne; est vn exemple remarquable de ce que je viens de dire. La Reyné Catherine sa Mere en ayant confié l'Education à des Religieux, gens de bien à la verité & de doctrine eminente selon leur profession, mais peu versez aux affaires du mon-

de, & en la science des Princes ; Leur plus grand soin fust d'imprimer profondement dans l'Ame de celuy-cy naturellement courageux, le desir de faire la guerre aux Mahometans, & de conuertir ce grand principe de valeur avec lequel il estoit né, à la destruction de ces Infideles. Cela certes estoit fort bon. Mais les preceptes se donnoient & cette impression se faisoit sans discretion & sans choix, sans temperament & sans regle ; ce qui gasta la bonté & corrompoit la vertu de cette culture. Aussi le fruit qui en reussit ne fust ny profitable à la Religion ; bien que ce fust son principal but : & fust fatal à l'Estat, qui en changea de face, & tomba sous vn joug qu'il a tousiours depuis porté impatiemment, & qu'il a enfin secoüé ayant perdu toute sa patience.

Quant aux Vœux de Ferdinand qu'on fait tant valoir, de ne souffrir point d'Heretiques aux lieux de sa domination, & d'y effacer jusqu'aux moindres traces de l'Herésie. Sans parler de la nature de ces actes qui peuuent estre excellens en eux-mesmes ; Je trouue qu'il y a de l'imprudence en la solennité, & en cette

condition esclatante de les auoir faits publiquement, & au sceu de quantité de personnes. Il y a certes des actions qu'il faut faire à la veüe du monde: qu'il faut exposer à vn grand jour; & les metre pour vser de la comparaison de nostre Seigneur, en des lieux eminens, comme ces villes qui sont basties sur le sommet des Montagnes; affin qu'elles soient mieux apperceües, & que ceux qui les verront en donnent de la gloire à Dieu: Et vn Docteur qui feroit vœu de s'appliquer tout entier à combattre les Heresies, & à purger par sa doctrine les Esprits de ce venin, qui est d'autant plus dangereux & mortel, qu'il est moins senty de ceux qui meürent; feroit certes vne action de grand prix, & d'vn ordre en quelque façon Heroique. Mais qu'vn Souuerain qui veut employer les Proscriptions & les Suplices, contre ce genre de maladies; n'y apporte pas plus de circonspection & de secret que feroit vn particulier, & qu'il fasse bruire son zele & esclater son dessein, par quelque publique formalité; Qu'est-ce autre chose, que d'auertir ses Ennemis de se tenir sur leurs gardes? Que de réueiller ceux qui dorment,

dorment, de peur qu'ils ne soient surpris ? Que de leur donner la volonté & le loisir de se mettre en estat de se deffendre : de chercher des Amis & des Protecteurs : de se fortifier d'Alliances, bref de les jetter dans le desespoir, qui est plus à craindre que la vaillance. C'est ce qui est arriué aux Bohemiens, & c'est la seconde source des troubles de la Boheme que Ferdinand a ouuerte, & vn des principes des mouemens de l'Allemagne qui durent encore.

F I N.

Bbbb






TABLE DES DISCOVRS
DE LA SECONDE
PARTIE DV MINISTRE
D'ESTAT.



LIVRE PREMIER.

Discours Premier.

D'Où vient que les Bestes d'une mesme espece ne se font pas la guerre entre-elles mesmes comme font les Hommes. Que les passions derreglées sont la cause de ce desordre. Que les Duels sont contre le droit des Gens, & particulièrement contre l'authorité du Prince.

Page

1

II.

Pourquoy Dieu a laissé aux Princes le droit de se faire Justice Eux-mesmes, quand ils sont offensez par les autres Princes. Que la Guerre legitime est dans l'ordre des Vertus, & une branche de la Justice. D'où vient qu'elle est appelée VN FLEAV de l'Ire de

T A B L E.

Dieu. pag.

16

I I I.

Que les Princes doiuent imiter Dieu en l'usage du droit qu'il leur a laissé de se faire Iustice eux-mesmes. Que cela est fort difficile, mesme pour les Princes qui ayment & entendent leurs affaires. Ce qui se confirme par deux Exemples, l'un de Henry second, l'autre de Philippe second. pag.

32

I I I I.

Qu'il faut observer quelque Iustice aussi bien en la forme qu'en la matiere de la guerre. Qu'il faut garder la Foy aux Heretiques & aux Infideles. Que les Chrestiens ont d'assez justes sujets de faire la guerre au Turc sans se seruir du pretexte de la Religion. pag.

53

V.

Que la deffense de la Reputation offensée est le sujet d'une juste guerre. En quoy consiste cette Reputation. Que le Roy n'a pû éuiter avec honneur de rompre avec les Espagnols, qui auoient fait surprendre la ville & l'Electeur de Treues, qui estoient sous sa protection. p.

72

V I.

Qu'il ne suffit pas qu'une guerre soit juste, si elle n'est encore utile à celuy qui s'y embarque. Quelques Regles que les Princes doiuent observer, quand ils secourent leurs Alliez. pag.

90

V I I.

La seconde Regle qu'un Prince doit observer quand il veut secourir ses Amis. pag.

103

Bbbb ij

T A B L E.

V I I I.

Que la conduite que le Roy a observée en secourant ses Alliez, est pleine de moderation & de generosité. Que celle de quelques autres Princes de ce Siecle n'est pas de mesme. pag. 117

I X.

S'il est expedient de hazarder ce qui reste de forces à l'Estat, pour reconurer la Reputation perduë par quelque notable disgrâce. Que c'est mal-fait aux entreprises difficiles, de vouloir tout faire seul, ou de vouloir laisser tout faire aux autres. pag. 132

X.

De la difference qu'il y a entre l'Honneur des Particuliers & la Reputation des Estats, & si le Prince est maistre de l'honneur aussi bien que de la vie & du bien de ses sujets, quand la necessité publique le requiert. page. 154

X I.

Que quand la guerre se rend trop ruineuse aux sujets d'un Prince, il doit tascher de la terminer s'il luy est possible. Que le Roy a esté porté à faire & à continuer la guerre jusques icy par une necessité inévitable. Que les Ennemis & non pas luy se sont tousiours esloignez de la Paix. pag. 173

X I I.

Où il est monsté par deux preüves infaillibles, que c'est la Maison d'Autriche qui a tousiours resisté au dessein de la paix, où le Roy & ses Confederez se sont portez tout de bon. pag. 189

T A B L E.

L I V R E S E C O N D.

Discours Premier.

QU'E c'est un grand mal-heur à un Prince de n'avoir pas en luy-mesme dequoy se defendre contre un autre Prince qui l'attaque, & de dependre en cela de la volonté d'autruy. Ce qui se confirme par deux Exemples: le premier de la Ligue qui se fit entre le Pape le Roy d'Espagne & les Venitiens, pour le secours de l'Isle de Chypre. pag.

211

II.

Du mal-heur de la condition des petits Princes. p.

230

III.

Où est apporté le second Exemple dont il a esté parlé au Premier Discours, pour monstrier les artifices dont se servent les Princes qui attaquent un autre Prince, pour empêcher ses Amis de le secourir. pag.

243

IIII.

Quelques Regles que les Princes & sur tout ceux qui sont foibles, doivent observer quand ils ont besoin de se servir du secours de leurs Amis. pag.

268

V.

Quelle sorte de Confederation & de Correspondance se peut former entre un Prince & les sujets d'un autre Prince qui luy sont Rebelles. Que le Roy a pû en conscience assister les Catalans. pag.

296

B b b b iij

T A B L E.

VI.

A quoy se doit terminer la Protection, que donne un Prince aux Sujets Rebelles d'un autre Prince, & ce qu'il faut faire affin que cela se fasse & honnestement pour celuy-là, & seurement pour ceux-cy. Cela se confirme par la procedure que le Roy a obseruée en l'occurrence de la Catalogne. pag.

313

VII.

Que c'est un grand secret à la guerre, de sçauoir bien choisir l'Endroit où il faut faire les plus grands efforts. Que les Espagnols ne se trompent gueres en ce choix, avec quelques autres obseruations sur leur conduite. Que celle du Roy a esté admirable à gouverner la guerre qu'il fait en tant d'endroits de la Chrestienté. pag.

333

VIII.

En quelle Conjoncture on se pourroit vray-semblablement prometre, que les Venitiens entreroient en Ligue contre les Espagnols. pag.

359

IX.

Quelles conditions doit auoir la Paix que tous les gens de bien desirent, affin qu'elle soit honneste & seure. Que les Paix particulieres que la Maison d'Autriche tasche de faire; seroient la ruine de ceux qui les feroient. pag.

371

X.

Que la Confederation qui est entre le Roy & ses Associez, a toutes les conditions necessaires affin que la Paix qu'on pretend faire soit de durée. Quelques considerations sur la nature des Ligues affin qu'elles se maintiennent. p.

396

T A B L E.

L I V R E T R O I S I E M E.

Discours Premier.

QU'E le veritable employ de la vaillance d'un Prince, consiste à deliurer son Estat de guerres ciuiles, & à en destourner les estrangeres. Que le Roy a admirablement reussi en l'une & l'autre de ces deux choses. p. 423

I I.

De l'Origine du dessein de la pretenduë Monarchie de la Maison d'Autriche. Quelques auantages qu'apporte la Dignité Imperiale au dessus des autres Dignitez Seculieres du Christianisme. pag. 441

I I I.

Suite des auantages qu'apporte la Dignité Imperiale au dessus des autres Dignitez Seculieres du Christianisme. pag. 454

I V.

Que Charles le Quint jugea que pour paruenir à la Monarchie, il se deuoit rendre maistre de l'un de ces trois pays; de la France de l'Italie ou de l'Allemagne. Qu'il les manqua tous trois, & ne peût subjuguer qu'une partie de l'Italie. pag. 480

V.

De la troisiëme entreprise de Charles le Quint pour paruenir à la Monarchie, & comme elle luy manqua. p. 502

V I.

Que Philippe second s'attacha principalement à la France,

T A B L E.


pour s'ouvrir par là le chemin à la Monarchie. Que ses Successeurs ont tâché de s'établir dans le cœur de l'Allemagne, pour faire revenir l'Empire à leur Maison, & pour passer de là à la Monarchie. pag. 527

V I I.

Comment les Successeurs de Philippe ont tâché de s'établir dans l'Allemagne. Des motifs qui obligerent les Bohémiens à se soustraire de la Domination de l'Empereur Ferdinand, & d'appeller à la Royauté de la Bohême l'Electeur Palatin. pag. 543

F I N.





PRIVILEGE DV ROY.

NOVIS PAR LA GRACE DE DIEV ROY DE FRANCE, ET DE NAVARRE, A nos amez & feaux Conseillers les Gens tenans nos Cours de Parlemens, Maistres des Requestes ordinaires de nostre Hostel, Baillifs, Seneschaux, Preuosts, leurs Lieutenans, & à tous autres de nos Iusticiers, & Officiers qu'il appartiendra, Salut. Nostre cher & bien amé *le sieur de SILHON*, nous a fait remonstrier qu'il a composé vn Liure intitulé, *La Seconde Partie du Ministre d'Estat*, lequel il desireroit faire imprimer, s'il nous plaisoit de luy accorder nos Lettres sur ce necessaires. A CES CAUSES, Nous luy auons permis & permettons par ces presentes, de faire imprimer, vendre & debiter ledit Liure en tous les lieux de nostre obeissance, par tel Imprimeur ou Libraire qu'il voudra choisir, en vn ou plusieurs volumes, en telles marges & caracteres, & autant de fois que bon luy semblera, durant l'espace de *dix ans* entiers & accomplis, à compter du jour que chaque volume sera acheué d'imprimer pour la premiere fois: & faisons tres-expresses defences à toutes personnes de quelque qualité & condition qu'elles soyent d'imprimer, faire imprimer, vendre ny distribuer durant ledit temps, ledit Liure, ou partie d'iceluy, en aucun lieu de nostre obeissance, sous pretexte d'augmentation, correction, changement de titre, fausses marques, ou autrement, en quelque sorte & maniere que ce puisse estre, sans le consentement de l'exposant, ou de ceux qui auront droit de luy. Defendons mesmes à tous Marchans Libraires, & autres qui ne seront nos
Cccc

sujets d'en apporter en ce Royaume, de ceux qui pourroyent estre imprimez hors iceluy : le tout à peine de deux mil liures d'amende, payables sans deport par chacun des contreuenans, & applicables vn tiers à nous, vn tiers à l'Hostel Dieu de Paris, & l'autre tiers au Libraire que l'exposant aura choisi, de confiscation des Exemplaires contrefaits, & de tous despens, dommages & interests : *à condition qu'il sera mis deux Exemplaires dudit Liure en nostre Bibliothèque publique, & vn en celle de nostre tres-cher & feal le Sieur Seguier Cheualier Chancelier de France, auant que de l'exposer en vente, à peine de nullité des presentes.* Du contenu desquelles nous vous mandons que vous faciez jouir & vser plainement & paisiblement ledit exposant, & ceux qui auront droit de luy, sans qu'il leur soit donné aucun empeschement. Voulons aussi qu'en mettant au commencement ou à la fin dudit Liure vn Extrait des presentes, elles soyent tenuës pour deuëment signifiées, & que foy y soit adjoustée, & aux copies collationnées par vn de nos amez & feaux Conseillers & Secretaires, comme à l'original. Mandons au premier de nos Huissiers ou Sergens sur ce requis, de faire pour l'execution des presentes tous exploits necessaires, sans demander autre permission. Car tel est nostre plaisir, nonobstant clameur de Haro, Chartre Normande, & autres Lettres à ce contraires. Donné à Paris le 21. jour de Novembre, l'an de grace mil six cens quarante deux. Et de nostre Regne le trentetroisiesme. Par le Roy en son Conseil, Signé **C O N R A R T.** Et sceelé du grand Sceau de cire jaune.





L Edit Sieur de Silhon a cedé & transporté le present Pri-
uilege à Pierre Rocolet, Imprimeur & Libraire ordinai-
re du Roy, pour en jouir & vser conformement audit Pri-
lege, ainsi qu'ils ont accordé entre-eux.



Acheué d'imprimer le 5. jour de Decembre 1642.



Les Exemplaires ont esté fournis.





